

La claustra da Mustér

Da la cella da Sigisbert a l'abazia moderna dad oz

■ **La claustra da Mustér po guardar enavos sin in'istorgia marcada da bleras midadas e tensiuns – ma a medem temp sin in'existenza e cuntinuitad nuninterotta da var 1300 onns. Ils artitgels dal Lexicon Istoric Retic preschentads sin questa pagina raquintan l'istorgia da la claustra e da ses fundaturs Sigisbert e Placi e dattan in'invista en l'urden benedictin.**

Mustér (claustra)

Claustra da benedictins en la vischnanca politica da Mustér, appartegnenta a la diocesa da Cuira. Patruns: s. Maria, s. Martin, s. Peder, s. Sigisbert e s. Placi. La claustra da Mustér, situada lung il curs superiuor dal Rain Anteriuor, è vegnida fundada enturn l'onn 700. 765 *Desertina*, 846 *coenobium Desertinense*, 1020 *abbatia Tisentinensis*, 1127 *monasterium Disertinensis*. Chats dal temp da fier en la curt interna da la claustra 2007.

Tenor la tradiziun (Passio Placidi, 12avel tschientaner) ha il muntg francon Sigisbert, inspirà dal spiert irlandais-francon dal missiunar ed avat irlandais Columban a Luxeuil (Vogesas), erigi ina cella en la *Desertina*. El ha mess quella sut il patronadi da s. Martin, il sontg dals Francs, dal qual proven il num da l'abazia. Sigisbert ha obtegnì sustegn da l'indigen Placi, in dals possessurs ils pli pussants menziunà en la «Lex Romana Curiensis» contemporanea. Placi è vegnì assassinà sin cumond da Victor, guvernatur (preses) da la Rezia a Cuira, e la tradiziun ha fatg da quest assassinat in martiri (la festa dals sontgs claustrals Sigisbert e Placi ha lieu ils 11 da fanadur). Ina claustra per propi è Mustér daventada enturn ils onns 750 sut l'avat Ursicinus. Da l'investg da Cuira Tello, in figl da Victor, ha Mustér obtegnì vasts regals ch'eran probablamain donaziuns d'expiaziun (Testament da Tello dal 765). Conform al spiert benedictin en las vals vischnancas, che Mustér aveva survegè sco dotaziuns, vegnidas urbanisadas. En il cudesch da fraternisaziun da Reichenau da l'onn 810 figureschan gia 93 muntgs morts e 71 vivents cun nums retics, alemans, francons e lumbards.

Las emprimas baselgias cumprovadas tras exchavaziuns archeologicas (1980–1983) dateschan dal 8avel tschientaner (picturas monumentalas en stil bizantin tempriv). Enturn l'onn 800 suondan duas tipicas baselgias reticas cun sala a trais absidas (quellas da s. Martin e da s. Maria) e la chaplutta da s. Peder. En la baselgia da s. Martin sa chattava la cripta da s. Placi che furma cun quella da s. Gliezi a Cuira ina da las pli veglias criptas da la Svizra. Tenor la tradiziun è il complex claustral dal temp carolingic vegnì destrui tras ils invasurs «ungarais», tenor la perscrutaziun tras ils Saracens (enturn il 940). Sco projectura dal Cuolm da Sontga Maria (Lucmagn) ha la claustra da Mustér laschà eriger ospizis lung la via dal pass. La politica dals pass alpini, proseguida dals imperaturs germans, ha er interessà la claustra imperiala da Mustér. Sut il domini dad Otto I (962–973) ha Mustér obtegnì numerusas donaziuns, confermadadas da ses successurs. L'imperatur saxon Heinrich II (1002–1024), che preferiva il Brenner al Cuolm da Sontga Maria, ha cedi Mustér il 1020 al chapitel catedral da Brixen (Tirol dal Sid). La claustra è restada alura ina marionetta dals imperaturs. Ella è puspè vegnida privilegiada sut Friedrich I Barbarossa (1152–1190) ch'ha engrondi ses possess en la Lombardia. Il domini claustral, numnà Casa Dei respectivamain Cadi, s'extendeva il 1185 da Breil al Pass dal Furca. Ils avats exercitavan la giurisdicziun criminala sur la gliueda da la Chadè e possedeavan il dretg da fier; els han era fundà plaviss independentas.



La claustra da Mustér.

FOTO M. HARTMANN

Lur domini è però prest vegnì indebli: administraturs laics èn documentads per Ursera (1203) e Medel (1322). Sco convent imperial era la claustra da Mustér apparentamain sutmesses gia en il 12avel tschientaner ad in chastellan. Questa funcziun è vegnida exercitada, en servetsch dals connts de Lenzburg, da la famiglia de Torre, il 1213 da Heinrich de Sax-Mesauc ed, a partir dal 1250, dals connts de Werdenberg (cumprà liber il 1401). En il 12avel e 13avel tschientaner han ministerials erigi lur chastels en il territori dal domini claustral.

Il 1251 cumpara la Cadi per l'emprima giada sco persuna giuridica. I sa tractava d'intermediar tranter il feudalism e tendenzas autonomisticas. L'avat Johannes da Gion (1367–1401) ha accordà a la Cadi in mastral independent. Il 1395 è stà il medem avat fundatur da la Lia (dals signurs) da Gion ch'ha confermà l'unificaziun politica da las regiuns a la ruta sursilvana vers il sid. Da quella è sortida il 1424 la Lia Grischa. L'avat Pieder de Pultengia (1402–1438) è stà a la testa dals sutsegnaders. Il 1472 ha acquistà la claustra da Mustér il signuradi da Munt Son Gieri, ella ha però stuì conceder a la Cadi ulteriurs privilegis en connex cun la nominaziun dal mastral. Il 1477 è la vischnanca da Mustér perfin sa segirada il dretg da veto en la recepziun da noviz ed ha surpiglià qua tras la rolla dals avugads claustrals. La claustra percenter ha incorporà ulteriuras plaviss ed ha expandì sia pussanza ecclesiastica fin a Domat. Ils privilegis dals avats èn vegnids confermads tras l'imperatur.

Las midadas effectuadas da la Refurmaziun han rinforzà supplementarmain la pussanza seculara. Ina clausula speziala dals Artitgels da Gion (1524 e 1526) ha garantì la survivenza da la claustra. Il 1536 han adoptà l'avat Martin Winkler (1528–1536) e trais muntgs la cretta reformada. Las autoritads da la vischnanca da Mustér han però nominà in nov avat e salvà la claustra, oravant tut era per tema da perder ils vegls privilegis. Il 1539/40 ha l'avat stuì ceder il chastè da Munt Son Gieri als signurs reformads da Vuorz. Il 1581, durant la Refurma catolica, ha l'avat Cristian de Castelberg (1566–1584) envidà l'archuevestg milanais Carlo Borromeo a Mustér ed ha rinforzà la refurma tridentina. Era sche l'abazia ha institui en ils onns 1587–1596 in seminari da spirituals, n'èn las stentas per reformar la claustra e megliorar la furmaziun teologica dal clerus betg

stadas fritgavlas. Cura che l'avat Sebastian de Castelberg (1614–1634) ha stuì fugir durant ils Scumbigls grischuns da las truppas da Gieri Genatsch, han las autoritads secularas surpiglià l'administraziun da la claustra. Tras l'intermediaziun dal nunzi e da la Congregaziun svizra dals benedictins, en la quala la claustra da Mustér è vegnida recepida il 1617, è quella sa revegnida sut la direzziun da l'administratur ed avat Augustin Stöcklin (1634–1641) che provegniva da la claustra da Muri/AG. Sut l'avat Adalbert Bridler (1642–1655) è il convent sa separà da l'investgieu da Cuira, el ha però cedi a la vischnanca l'entira giurisdicziun. Il 1649 ha la Val d'Ursera cumprà or il dretg feudals da Mustér. Ils avats Adalbert de Medell (1655–1696) ed Adalbert Defuns (1696–1716) han laschà eriger il nov edifiz claustral represchentativ en il spiert dal temp baroc e tenor ils plans da Caspar Moosbrugger, frater da Nossadunnaun.

Durant la Segunda Guerra da coaliiziun (1799–1801) è la claustra da Mustér vegnida involvida en ils cumbat tranter la Frantscha e l'Austria. Il pader erudit Placi a Spescha ha empruvà (senza success) d'intermediar. Ils 6 da matg 1799 èn la claustra e l'entira vischnanca da Mustér vegnidas messas en tschendra, quai ch'ha chaschunà la perdita da l'archiv e da la biblioteca claustrala sco era da numerusas ovras d'art. L'abazia ha pers tras la Confisca ils possess da Postalesio en Vuclina (circa la mesadad da sia facultad); ella n'è dentant betg vegnida secularisada grazia al fatg che las davosas restanzas dal domini feudal eran gia vegnidas dismissas cun la vendita da Vuorz (1734) e cun l'aboliziun da las dieschmas (1737). Il spiert radical dal cumbat cultural, ch'ha provocà l'aboliziun da numerusas claustras en Svizra, ha er influenzà la sort da la claustra da Mustér. Il 1859 è vegnida sutmesses l'administraziun claustrala a la controlla chantunala. Il 1861 ha la regenza impedì ultra da quai quasi totalmain la recepziun da noviz. Il medem onn è la giurisdicziun ecclesiastica da la claustra vegnida assegnada a l'investgieu da Cuira. Il redactor Placi Condrau da Mustér, il politicher Caspar Decurtins da Trun e Theophil Sprecher von Bernegg da Maiavilla han contribuì fermamain ad in nov pensar en la populaziun ed en la regenza ch'è stà a la basa da la restauraziun da la claustra. Cun agid da la Congregaziun svizra dals benedictins ha Mustér uschia pudì sa revegnir. L'avat

Benedikt Prevost (1888–1916), mess a disposiziun da la claustra da Muri-Gries (Tirol dal Sid), ha cumbinà l'innovaziun interna cun la fundaziun da la scola claustrala, la pastoraziun ed il pelegrinadi. Il 1895–1899 ha el incumbensà August Hardegger d'eriger la nova baselgia consecrada a s. Maria. Ils avats Beda Hophan (1925–1963) e Viktor Schönbächler (1963–1988) han consolidà il gimnasi ch'è daventà in center da furmaziun regiunal. Il complex claustral è vegnì amplifitg cun la construcziun da l'internat (Walther Sulser, 1937–1940) e dal nov edifiz da scola (Hermann e Hans Peter Baur, 1969–1973). Suenter la restauraziun, dirigida da Felix Schmid, ha ospità la baselgia da Hardegger la biblioteca e duas collecziuns, ina da tempra istoric-culturala, l'autra da tempra istoric-naturala. Las exchavaziuns archeologicas dals onns 1980–1983 han pussibilità da consolidar la cripta da s. Placi dal temp medieval tempriv, rendida accessibla al public. L'avat Pankraz Winiker ha timunà la claustra dal 1988–2000, succedi da Daniel Schönbächler. Il 2010 dumbrava il convent 28 profess. Daniel Schönbächler

Sigisbert

* vers la fin dal 7avel tschientaner, † l'entschatta dal 8avel tschientaner. Tenor il num era Sigisbert probablamain in Francon ch'era sa domicilià sco eremit da tempra irofranca en la cuntrada deserta dal stgalim superiuor dal Rain Anteriuor, numnada *Desertina(s)*, e che vegniva sustegnì dal Ret Placidus. L'ipotesa, tenor la quala el derivava dal circol da son Columban, n'è betg cumprovada. Per sia resistenza cunter las pretensiuns franconas en Rezia è Placidus vegnì assassinà, probablamain per raschuns politicas. Il «martir» ed il «confessor» han chattà lur fossa en la cripta da la baselgia da son Martin a Mustér, lur di commemorativ cuminaivel è ils 11 da fanadur.

Il 1899/90 ha la regenza stuì conceder a las scolas catolicas da la Surselva – suenter protestas massivas (1898) ed in cumin extraordinari a Gion (1900) – il «Sigisbert en Rezia» da Maurus Carnot sco lectura per il stgalim bass enstagl dal «Robinson» e dals «Nibelungs» ch'èn vegnids refusads sco texts «pajauns». Quest'istorgia raquinta da la cristianisaziun ed urbanisaziun da la Rezia, surtut da la Surselva, tras il missiunari Sigisbert e ses dus gidanters indigens, il mattatsch

Retus ed il matter Columbin. Quest cudesch ha instrui e delectà trais generaziuns sursilvanas. Carl Pfaff

Placi

† a l'entschatta dal 8avel tschientaner, a Mustér. Pir en texts liturgics pli tardivs ed en la «Passio» dal 12avel respectivamain dal 13avel tschientaner vegn el menziunà sco protectur dal muntg ambulat francon Sigisbert che vuleva fundar ina claustra en la cuntrada criva da la Desertina. Probablamain cun intenziun politica, forsa per sa defender cunter l'influenza francona, ha il preses Victor laschà assassinà Placi. Per l'expiaziun duai Victor avair fatg a la claustra da Mustér donaziuns impurtantas. La veneraziun da Placi era derasada a Mustér ed en l'entira Rezia. Carl Pfaff

Benedictins

Ils benedictins furman in urden catolic da muntgs (latin *Ordo Sancti Benedicti*, OSB), numnà suenter Benedict da Nursia († 547). La regla da Benedict è s'etablida relativamain tard, l'emprim al nord da las Alps. En il 7avel ed 8avel tschientaner (epoca da reglas cumbinadas) vegniva ella observada sper autras reglas. En il 8avel tschientaner han las claustras benedictinas en il territori alemannic-retic introduci, sut l'influenza da la pussanza francona, ina furma pli clera. Questas claustras eran vegnidas fundadas da famiglias da magnats regiunals: en la Currazia cumparan ils Zaccons/Victorids sco fundaturs da las claustras da Mustér, Cazas, Mistail e Faveras ed eventualmain era da quella da Müstair. L'integraziun da las baselgias imperialas en il sistem carolingic garantiva a questas fundaziuns l'existenza ed il sustegn. Sut l'influenza da Benedict d'Aniane († 821) èn vegnids mess accents marcants fin il di dad oz: l'abit nair cun capuza, la claustra gronda, la tgira speziala da la liturgia e las activitads culturalas colliadas cun quella. Ils cudeschs da fraternisaziun da Son Gagl e Rehanau ed il «Liber Viventium» da Faveras (800/820) dattan perditga da vastas colliaziuns tranter las claustras carolingicas. Las claustras benedictinas han giugà ina rolla impurtanta en il process d'urbanisaziun e da colonisaziun da la Currazia, per exempel la claustra da Mustér en la Val Ursera ed en la Sursassiala. En il rom da la refurma conventuala (10avel/11avel tschientaner) han las claustras reticas pudì mantegnair lur autonomia. Il 1602 è vegnida fundada la Congregaziun benedictina svizra, e dapi il 1893 èn las claustras benedictinas reunidas en la Confederaziun benedictina. Il center spiertal da quella è il Collegi da S. Anselm a Roma, la residenza da l'avat-primas (abbas primas). Malgrà quest'unien èn ils benedictins ina cuminanza lucca da claustras independentas, organisadas da lur vart en 21 congregaziuns (per gronda part reuniuns naziunals). Il temp dapi il Segund Concil vatican è caracterisà d'in chal marcant da vocaziuns.

Leo Ettlin

Lexicon Istoric Retic (LIR)

Il Lexicon Istoric Retic è in'ovra cumplettiva davart l'istorgia grischuna/retica e la Rumantschia, edida da la «Fundaziun Lexicon Istoric Svizzer». Il LIR cumpiglia radund 3100 artitgels (geografics, tematics, artitgels da famiglias e biografias). Versiun online: www.e-lir.ch.

La versiun stampada consista da dus toms (A–L, M–Z) che cumpiglian mintgamai bundant 570 paginas. Mintga tom cuntegna radund 700 illustraziuns, chartas e graficas. Empustaziuns: Chasa editura Desertina (ediziun da cummissiun), www.casanova.ch u en mintga libreria. (Tom 2 cumpara il mars 2012).

Da Langwies ad Arosa

Las colonias gualsras en il Scanvetg Dadens

■ Il Scanvetg Dadens che s'extenda da Langwies enfin Arosa è vegni urbanisà en il decurs dal 13 e 14avel tschientaner da colonists gualsers. Il Pass da la Striera als colliava cun lur cumpatriots domiciliads a Tavau ed era en pli da muntada sco via da sauma la pli directa tranter Cuira ed il Vnuost. Las curts dals Gualsers situadas il pli sisum, ad Arosa, han dumber sur tschientaners ina populaziun modesta da radund 100 abitants. Vers la fin dal 19avel tschientaner ha il turissem manà ad in svilup enorm da quest vitg idilic e dal dumber d'abitants.

Pralung (Langwies)

Vischnanca politica, circuit Scanvetg, district Plessur, situada en il Scanvetg Dadens, cun ils aclauns e las culegnas da Platz, Litzirüti, Fondei e Sapün. Pralung sa chatta a la colliaziun la pli curta tranter Cuira e Tavau sur il Pass da la Striera. 1384 die *lang Wise*, tudestg Langwies (uffizial). 1623 ca. 670 abitants; 1850 358; 1900 285; 1950 383; 1980 286; 2000 303. Scuvarta dal piz d'ina lantscha dal temp da fier tempriv a Fondei. Sin iniziativa dal chapitelatedral da Cuira e da la claustra da S. Gliezi è vegnida colonisada a partir dal 1273 la part dadens dal Scanvetg, l'emprim davent da Peist (da quel temp da lingua rumantscha), a partir dal 1307 tras Gualsers da lingua tudestga. A Pralung, il punct da partenza per las vals laterals Fondei e Sapün, è vegnida erigida il 1385 la baselgia da Nossadunna (collatura exequida da la claustra da Faveras). Il cumin da Pralung è sa furmà enturn il 1400 sco fusiun dals vischinadis da Pralung, Prada, Fondei e Sapün en il Scanvetg Dadens (senza Arosa), abitads da colonists da lingua tudestga. La suveranità territoriala han exequì fin il 1338 ils de Vaz, alura ils Werdenbergs, il 1363 per l'emprima giada ils Toggenburgs. A partir dal 1436 ha constituit Pralung, ensem cun Son Peder, ina dregira auta da la Lia da las diesch dregiras. Cuntrari al Scanvetg Dadens, quella giada anc da lingua rumantscha, possedeve Pralung in'atgna dregira bassa cun libra tscherna dal landamma, sco quai che la brev da libertad dal 1441 cumprova. Ils novs signurs territorials èn stads ils Montforts a partir dal 1437, suandads dals Matschs il 1471 e dals Austriacs il 1479. Enturn il 1530 ha Pralung adoptà la cretta reformada. Il 1652 è la vischnanca sa cumprada ora dals dretgs signurils austriacs, il 1657 dals dretgs feudals episcopals. Dapi il 1851 furma Pralung, ensem cun las vischnancas dal Scanvetg Dadens e cun Arosa (dapi il 1857), ma senza Prada, il circuit dal Scanvetg entaifer il district da la Plessur. Il 1875-77 è vegnida costruida la via charrabla da Cuira enasi, il 1888-91 enfin Arosa. Dapi il 1914 existan a Pralung ed a Litzirüti staziuns da la Viafier d'Arosa. Ils aclauns da Fondei e Sapün en las vals laterals da Pralung n'èn betg pli abitads l'entir onn. Il 2005 lavuravan 59% da las persunas cun activitad da gudogn a Pralung en il sectur terziar.

Jürg Simonett

Fondei

Val laterala dal Scanvetg, vischnanca da Pralung. La val ritga da funtaunas, betg pli abitada durant l'entir onn, cumpiglia il lieu principal da Strassberg (1919 m) e divers abitadis sparpagliads. 1311 *Vanden*. 1623 ca. 230 abitants. Chat d'in piz da lantscha dal temp da fier tardiv. La Val Fondei furmava oriundamain ina regiun d'alp en la retroterra da Peist. En il 14avel tschientaner è ella vegnida colonisada da Gualsers. Il 1370 eran sis aclauns cun 24 familias tributars dal chapitelatedral da Cuira. La Val Fondei fascheva part dal cumin da Pralung ch'era sa constituit enturn il 1400. En quella val cun ses numerus bains e sias vastas pastgiras alpinas predominescha anc oz l'allevament



Pralung (Langwies) enturn 1890.

muvel. Las runcadas excessivas han ex-post la Val Fondei a gronds privels da lavinas. Ina senda maina da Fondei sur il Pass dal Duranna a Fadrein. En ils onns 1886-87 è vegnida costruida la via charrabla da Pralung en il Fondei. La scola da la val è vegnida serrada il 1903.

Jürg Simonett

Sapün

Vallada laterala dal Scanvetg, vischnanca politica da Pralung, cun ils abitadis dad Eggen, Dörfli (1725 m), Schmitten e Chüpfen. Regiun da funtaunas. 1273 *Sampuni*. En il 17avel tschientaner ca. 250 abitants; il 1981 eran domiciliads anc trais familias durant l'entir onn en la val; il 2011 vivevan a Sapün anc ina persuna singula ed ils gestiunaris da l'albiert. Sapün era oriundamain ina regiun d'alp en la retroterra da la vischnanca rumantscha da Peist. Il 1307 ha cedi il prevostatedral da Cuira Sapün ensem cun l'abitadi da Medergen sco feuds ereditars a colonists gualsers. La via da sauma da Cuira a Sapün e sur il Pass da la Striera, menziunada il 1338, era la colliaziun la pli curta a Tavau. Ensem cun Fondei ed Arosa han ins erigi «an der langen Wiese» (Langwies/Pralung) a la sbuccada da las trais vals ina baselgia, consecrada il 1385. Sapün era in vischinadi dal cumin da Pralung, constituit enturn il 1400. Fin en il 19avel tschientaner disponiva la val d'in agen urden communal e forestal e d'in agen urden da pasculaziun. La scola ha

existi fin il 1873. Il 1886 han ins costruit la via charrabla da Pralung a Sapün. Bains purils cun manaschis ambulants e maders extendids eran las furmas economicas principalas. Las runcadas han exponi la val a gronds privels da lavinas.

Jürg Simonett

Pass da la Striera (Strelapass)

Pass a 2350 m che colliava Pralung en il Scanvetg cun Tavau en la Val da la Landwasser. 1338 *uff Striael*, tudestg Strelapass. La via da sauma che manava da Cuira via Pralung tras la val laterala da Sapün sur il Pass da la Striera era la colliaziun la pli directa a Tavau e vinavant en l'Engiadina ed en Vuclina. Il 1413 è sa rendi il retg Sigismund dal Vnuost sur il Fuorn, il Flüela ed il Pass da la Striera a Cuira. Grazia al Pass da la Striera han ils Gualsers dal Scanvetg pudì entrar en contact a partir dal 1300 cun lur cumpatriots domiciliads a Tavau. Il 1441 è Pralung sa cumprà liber per 90 flurins d'in tschains da paiver incassà per l'escorta durant ils transports da muvel e da marganzia. En consequenza dal grond privel da lavinas vegniva il Pass da la Striera strusch utilisà d'enviern. Divers projects da vias u viafiers, preschentads vers la fin dal 19avel tschientaner, n'èn betg vegnids realisads.

Jürg Simonett

Arosa

Vischnanca politica, circuit Scanvetg, district Plessur. Lieu da cura e da sport, situà sin las spundas al sidost da la cha-

daina dal Weisshorn entadim il Scanvetg che s'avra qua vers il sid e vers l'ost. Arosa cumpiglia ils quartiers dad Innerarosa, Dorf-Obersee, Untersee e Maran-Prätschli (1690-1950 m). 1330 *Araus*, 1383 *Orossen*, 1428 *Arosa*. 1550-1750 ca. 125 abitants; 1850 52; 1888 88; 1900 1071; 1930 3466; 1940 1980; 1950 2600; 2000 2771. Oscillaziuns extremas da la populaziun tenor stagium.

Il 1222 è documentada ina curt *Marians* (Maran) da la claustra da Curvalda, abitada da Rumantschs. Las sis u set curts dals Gualsers, domiciliads ad Arosa a l'entschatta dal 14avel tschientaner, eran vegnidas integradas en la corporaziun da curts da Tavau tras ils baruns de Vaz. Ils Gualsers eran persunalmain libers ed avevan da pajar enturn il 1330 tschains en furma da chaschiel, launa, nursas e paintg als baruns de Vaz. Il 1337 èn ils dretgs feudals dals de Vaz passads als conts de Toggenburg, suenter il 1436 als conts de Montfort, alura a quels de Matsch ed il 1470 als Habsburgais. Il 1649 è la dregira auta da Tavau sa cumprada ora, ensem cun il vischinadi d'Arosa, dals dretgs feudals dals conts dal Tirol (Habsburg). Suenter in'emprima emprova berg reussida il 1542 è la vischnanca d'Arosa sa separada da Tavau il 1851 ed è daventada ina vischnanca politicamain autonoma. Il 1911 è la curt Maran vegnida attribuida, ensem cun l'alp ed ils gauds da Peist, ad Arosa. Ecclesiasticamain appartegneva Arosa oriundamain a la plaiv da Vaz. Il 1384

han ils d'Arosa erigi, ensem cun Sapün e Fondei, la baselgia a Pralung sco filiala da Son Peder, ed il 1492, ensem cun Maran e Prätsch, l'uschennunà Bergkirchli ad Innerarosa (patrocini da S. Barbara e S. Jodocus). Separaziun da la plaiv da Pralung 1520, reformaziun 1528. Dals onns 1907-09 dateschan la baselgia reformada, catolica (oz albiert da giuventetgna) ed englaisa (sbuvada il 1985) a Dorf-Obersee. Il 1935-36 han ils catolics erigi la baselgia da Nossadunna.

Tranter il 1400 ed il 1560 han ins explotà (en quantitads modestas) minerals a l'Erzhorn, Tschirpen e Rothorn e culà quels en l'Isel. Fin en il 19avel tschientaner tardiv han predominà l'allevament da muvel e l'economia d'alp. Il 1438 èn Tavau ed Arosa sa cumprads ora dals tschains feudals visavi ils ervavels dals conts de Toggenburg. L'utilisaziun da las alps vegniva reglada tras ina repartiziun tenor vatgadas. Mintga pursanavel pudeva disponer libramain da quests dretgs. A partir dal 1443 ha Arosa vendi repetidamain bains e dretgs da vatgadas ad esters. Uschia èn ids anc avant il 1596 l'Alp Furgga a Maiavilla, il Welschtobel ad Alvagni, Altein e la Sattelalp a la citad da Cuira e la Schönbodenalp parzialmain a Cuira ed a Maiavilla. Suenter lungas charplinas cun Cuira ha Arosa acquistà il 1781 parts da la Schönbodenalp (oz Arosar Alp).

A partir dal 1880 è la vischnanca d'Arosa sa sviluppada ad in lieu da cura e da sport. La gronda affluenza da giasts da stad, iniziada il 1875, ha manà il 1877-78 a l'avertura da las emprimas pensiuins, il 1880 a la construcziun dals emprims hotels ed il 1884 a la fundaziun da la societad da cura. L'emprim sanatori per malsaus dal lom, realisà il 1888 dad Otto Herwig, e la recepziun da pazients en chasas gia existentas han fatg d'Arosa in lieu da cura occupà durant l'entir onn. A la fin dal 19avel tschientaner èn arrivads ils emprims turists da skis ad Arosa. Construcziun da la via Pralung-Arosa 1888-90, da las Ovras electricas Arosa 1897, da la viafier privata Cuira-Arosa 1912-14 (incorporada en la Viafier retica 1942). Il 1916 è vegni costruit il sanatori grischun, transfurmà en in hotel il 1960. Il Lichtklimatisches Observatorium, fundà il 1921 per la perscrutaziun scientifica dal clima d'Arosa sut la direzziun da Paul Götz, daventa part integrala da las staziuns internaziunalas per l'observaziun da l'ozon. Gronda activitad en il sectur da construcziun e transfurmaziun da sanatoriis en hotels 1927-31. Dapi il 1911 organischa Arosa cursas da chavals sin naiv. Construcziun dals emprims runals 1938 e da las emprimas telefericas 1945-56. Il 1939 ha la Scola politecnica federala Turitg installà in observatori astronomic sin il Tschuggen. Las emprimas chasas d'appartaments han inizià il 1959 ina segunda onda da construcziun (abitaziuns da vacanzas). Il scumond dad ir cun auto la notg, decretà ad Arosa il 1973, e l'introducziun da bus gratuits il 1988 èn emprovas da limitar il traffic local. Il 2000 derivavan 60% dals giasts da vacanzas da la Svizra, 27% da la Germania, 5% dal Benelux e 3% da l'Engalerra. Dumber da letgs da giasts: 1900 750; 1930 3500; 2000 11 000; dumber da pernottaziuns: 1905 97 400; 1930 536 000; 1990 1 003 000; 2000 975 000.

Hans Danuser



Vista sin il vitg d'Arosa.

KEYSTONE

Lexicon Istoric Retic (LIR)

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Dal currier a l'e-mail

L'istorgia da la posta e da la telecomunicaziun

■ Pudair communitgar sur lungas distanzas è in basegn uman preschent da vegl ennà. Pli baud vegnivan las brevs rimnadas en ustarias lung las vias e speditas tras curriers. Per il Grischun era en spezial il curs da currier da Lindau via Cuira a Milaun d'impurtanza. Tranter il 1803 ed il 1848 èn alura ils chantuns stads responsabels per la spediun da brevs e da pachets; silsüenter ha la Confederaziun surpiglià questa incarica. Cun il svilup da la telecomunicaziun a partir dal 19avel tschientaner han telegraf e telefon, pli tard la radiofonia mobila e l'internet concurrenzà pli e pli fitg la comunicaziun a scrit tradiziunala.

Posta

Cun il declin da l'Imperi roman occidental ha la posta fatg in pass enavos. La comunicaziun a scrit è puspè sa splegada per in temp pli lung suletta-main tras curriers engaschads tenor basegn. Ils mess da las claustras sco era commerziants ed auters viagiaturs, a partir dal 14avel tschientaner era curridurs dals chantuns incaricads dad uffizis statals, exercitavan servetschs da currier. Novs sforzs per l'installaziun d'ina organisaziun postalà èn vegnids fatgs en lieus cun in traffic commercial regular. Sin il territori da la Svizra èn vegnids offersts emprims curs da currier tranter Son Gagl e Nürnberg respectivamain Lyon (a partir dal 1387 e dal 1418) sco era da Lindau via Cuira a Milaun (a partir dal 1445).

Emprimas instituziuns postalas per propi èn naschidas en l'ultim quart dal 15avel tschientaner per incumbensa da gronds signuradis. La pli impurtanta è stada la posta imperiala da la famiglia Taxis che gestiunava dapi il 1490 lingias postalas fixas, avertas gia il 1500 al diever privat. Cun il curs Milaun-Cuira-Feldkirch ha la posta dals Taxis tanga il 1496 era territori svizzer. En il 16avel tschientaner ha in'organisaziun postalà franzosa collià Lyon cun Soloturn e da là via Turitg cun Cuira, Basilea e Lucerna. Quest traffic postal tempri è restà limità a las rutas da colliaziun principalas. Avant la cumparsa da las charrotschas en il 19avel tschientaner vegnivan la posta e las persunas transportadas cun chavals, l'enviern cun schlieusas.

Avant il 1798 n'existiva en il Grischun nagina posta instituzionalisada. La posta vegniva deponida respectivamain rimnada en ustarias lung las vias. La spediun e repartiziun interna era chaussa dals ports respectivamain dals postins dals vischinadis e cumins. Las vals laterals vegnivan consequentamain provedidas mo irregularamain. A partir dal 16avel tschientaner procuravan il Currier da Lindau e la Zürcher Kaufmannspost per la spediun da la posta tras il Grischun e dal Grischun a l'exteriur. Els eran munids cun brevs da protecciun da las Trais Lias. Dapi il 1786 cursava la posta a chaval ina giada l'emna da Cuira a Turitg, a Lindau ed a Milaun. La regenza helvetica ha alura centralisà ils servetschs postals, ma cun la Mediaziun dal 1803 è quest regal puspè passà als chantuns. Il chantun Grischun laschava exequir quels servetschs da privats ed incassava suletta-main in tschains annual persüenter. Il Currier da Lindau ha obtegnì il monopol da transport da Maiavilla fin al Pass dal Spleia. Il 1813 è vegnì installà l'emprim Uffizi chantunal da posta, suttaless il 1817 a la controlla da la cumissiun da posta. Dapi il 1817 stuevan ils curriers da Lindau, Turitg, Feldkirch e Son Gagl laschar bullar tut la posta sin il biro da posta a Cuira e pajar ina taxa avant che transportar u spedir ella vinavant. L'amplificaziun da las vias commercialas s'üenter il 1820 ha pussibilità l'introducciun da



Staziuns da l'istorgia da la posta: Currier imperial (15avel tschientaner) – Chavals da sauma en la Viamala (gravura dal 19avel tschientaner) – tavla da posta a Spleia (enturn 1825)

FOTOS PD

charrotschas, da curs supplementars e da consegnas per express, exequids tenor contract tranter auter da las firmas Abys/Bauer e Tscharner/Dalp da Cuira. Il 1826 ha surpiglià la nova posta da viadi privata dal Grischun ils servetschs dal Currier da Lindau e d'auters transportaders sco era la direcciun da la posta (trais commembers), l'administraziun e la controlla dal persunal. Dal 1835–48 ha il Chantun dirigi il transport da posta e da persunas. Ils chavals e las manadiras vegnivan mess a disposiziun a privats, ils detagls reglads en in contract. Il 1849 ha la Confederaziun surpiglià il monopol da posta. Il curs postals vegnivan exequids contractualmain da privats, ils postigliuns vegnivan dentant accompagnads e survegliads d'in conductur chantunal. La construcciun da la Viefier retica en ils onns 1900 e l'introducciun da l'auto postal s'üenter il 1919 ha inizià l'epoca moderna dal servetsch postal en il Grischun. La davosa concessiun per ina posta a chavals datescha dal 1914. Dal 1939–45 èn ils chavals puspè vegnids reactivads per mancanza da benzin. La davosa posta a chavals è circulada il 1961 tranter Avras-Cresta e Juf. Adolf Collenberg

Lindau

Anteriura citad imperiala situada a la riva nord dal Lai da Constanza, oz en Germania. Lieu da commerzi impurtant per las Trais Lias e per il traffic da transit tranter la regiun al Lai da Constanza e la Lombardia. Lindau ha già sia fluriziun en il temp medieval tardiv. La citad giudeva da quel temp in'exemiun da dazi per martanzia da transit e privilegis per il transport da quella. Transports frequents han existì probablamain gia en il 14avel tschientaner, curs da currier regulars èn attestads dapi il 1455. Dapi l'avertura da la via nova tras la Viamala (1473) èn quellaz frequenzas creschidas. Da l'emprima mesadad dal 16avel tschientaner fin il 1826 organisava l'uschenumà Currier da Lindau mintg'emna in transport da rauba e da persunas sur il Spleia a Milaun e da Milaun a Lindau. In viadi durava tschintg di e mez: Lindau-Feldkirch (emprim di)–Spleia (midada da chavals)–Clavenna–Com (20 uras cun la bartga)–Milaun. Il currier (adina in catolic) vegniva proponi da Lindau ed elegi da la chombra da commerzi da Milaun. El era munì cun brevs da protecciun spezialas da las Trais Lias. Il

1803 è il regal da posta passà als chantuns svizzers. Ils spediturs da Lindau han dentant pudì mantegnair lur mandat, pajond al chantun Grischun dapi il 1813 ina fittanza annuala per il regal da posta tranter il Pass da Son Gliezi ed il cunfin sid dal Chantun. Cun la fin settember 1826 ha la nova posta da viadi dal Grischun surpiglià ils servetschs dal Currier da Lindau. Adolf Collenberg

Cumissiun da posta

La posta è daventada pir s'üenter la Mediaziun in regal statal. Il 1813 ha il Cussegl grond decidi d'installar in Uffizi da posta chantunal che sustasteva l'emprim a la cumissiun da transit. Il 1817 ha la Regenza elegi ina cumissiun da posta da traies commembers (dus refurmads, in catolic e d'in secretari, incaricada cun la direcciun suprema da las fatschentas da posta. Fin il 1822 cumpigliava la Posta mo la spediun da brevs e da pachets ed il traffic monetar; alura èn vegnids instituids il servetsch da posta spezial e las uschenumnadas diligenzas (charrotschas da posta directas) ch'han procurà fin il 1835, per incumbensa dal chantun Grischun (ingiant ad interpresas privatas), per il transport da persunas da Ragaz Bogn a Blinzuna. Alura ha il Chantun surpiglià omduas domenas ed ha suttaless quellaz a la cumissiun da posta. Ils 12 da settember 1848 ha la Confederaziun surpiglià il regal da posta ed ha schlià la cumissiun. Adolf Collenberg

Currier

Avant il 1800 n'existiva nagin servetsch postal regular per las vals laterals Avras, Lumnezia, Tujetsch, Medel, Scanveg e Val Müstair. Ils vischinadis a las transversalas percenter profitavan da l'infrastructura dal traffic da transit. Il regal da posta appartegnava als cumins. En consequenza existivan numerus urdens da taxa ed ultra da quai anc in grond dischurden che provocava reclamaziuns senza fin da vart da la clientella. L'unificaziun da las taxas imponida dal Chantun il 1813 ha pudì vegnir realisada mo malamain. Il 1826 èn vegnids suttaless ils curriers a l'Uffizi chantunal da posta. A partir da quel mument ha la direcciun da la posta dictà ils curs. Il currier da l'Engadin'Ota gieva ina giada fin il 1831, alura duas giadas l'emna a pe sur l'Alvra fin a Cuira, a partir dal 1844, cun manadira, ina giada l'emna sur l'Alvra e traies giadas sur il Güglia (plirs cur-

riers). A partir dal 1803 vegniva offert mintg'emna in, s'üenter il 1846 dus curs supplementars da Samedan a Tiraun. Il currier da l'Engiadina Bassa purtava la posta a S-chanf, nua ch'el surdeva ella al currier da l'Engadin'Ota (fin il 1833). Dapi il 1843 circulava in curs emnil tranter l'Engiadina Bassa e Danuder. Il currier da la Val Müstair transportava dapi il 1821 ina giada l'emna la posta a S-chanf e surdeva quella là al currier da l'Engadin'Ota. Il currier da la Bergaglia absolveva mintg'emna in, s'üenter il 1846 dus viadis tranter Clavenna e Samedan. Il currier dal cumin da la Cadi transportava (probablamain da vegl ennà), ultra da la posta uffiziala dal cumin, era posta da privats tranter Cuira e la Cadi (1754–1841 ina giada l'emna, dapi ca. 1800 cun chavals da sauma, s'üenter il 1823 cun char e chaval). El appartegnava sco currier (istoric: leifer) al stab da persunal dal cumin. Il 1832 ha Glion engaschà in segund currier. A partir dal 1846 vegnivan offersts tranter Cuira e Glion traies curs l'emna durant la stad e dus durant l'enviern; dal 1841–50 circulava in tal l'entir onn duas giadas l'emna tranter Glion e Mustér. Il 1846 è vegnì avert il curs da Cuira a Punt Martina. Il vegl currier da Tavau repartiva la posta tranter Cuira e Tavau ed in nov currier dal Flüela transportava quella da là davent fin a Susch e la surdeva al currier da l'Engiadina Bassa. La qualitad dals servetschs postals (transport da posta e da persunas) è s'augmentada pir cun il monopol da manaschi ed administraziun da la Confederaziun (1849). Quai è stà da grond'impurtanza per il svilup dal turissem. Adolf Collenberg

Telecomunicaziun

Il term telecomunicaziun cumpiglia scadin stgomi d'infurmaziun sur ina tscherta distanza. Cun il svilup da l'hotellaria en la segunda mesadad dal 19avel tschientaner èn innovaziuns sco la glisch electrica e la telecomunicaziun sa derasadas era en il Grischun. En ils centers turistics è il dumbr da telefons creschì fitg spert s'üenter il 1920, en las autras regiuns pir en ils onns 1930 respectivamain s'üenter il 1958.

Telegraf, telefon ed internet

Il 1852 han ins avert la lingia da telegrafia Sargans–Blinzuna–Genua, ed il 1880 è vegnida installada l'emprima

rait da telefon da la Svizra en la citad da Turitg, il 1889 l'emprima dal Grischun a San Murezzan. Il 1890 è suandada la rait a Cuira, il 1891 quella a Tavau, e fin il 1900 eran realisadas las raits chantunals e naziunalas. Las emprimas centralas grischunas da telex cun batteria centrala, ch'han remplazzà la telegrafia da Morse, èn vegnidas installadas il 1928 a Cuira ed il 1929 a San Murezzan. La tecnica da transister ha revoluziunà la telecomunicaziun a partir dal 1948. Il 1959 han ins serrà la davosa centrala cumandada a maun a Champatsch/Samignun e la davosa centrala svizra cun batteria centrala a Scuol e Strada. Il 1965 è vegnì introduci en il Grischun il cabel coaxial (Cuira – San Murezzan), suandà il 1980 dal cabel a fibras da vaider cun l'emprim indriz dad Andeer a Crôt (1987). Dapi il 1976 ha il telefax, transmess sur la lingia da telefon, remplazzà il telex. Il 1986 è vegnida averta a Lucerna l'emprima centrala digitalisada da la Svizra, il 1989 l'emprima grischuna a Versomi. Dal 1990 datecha il Swissnet, l'emprima colliaziun d'ISDN (Integrated Services Digital Network) a Landquart (firma Cedes), ed a San Murezzan fa il Badrutt's Palace las emprimas emprovas cun Megacom (internet).

Radiofonia mobila

La radiofonia mobila exista en Svizra dapi il 1909, l'emprima staziun da radiotelegrafia dapi il 1919 (Dübendorf), ed il 1940 è ina tala vegnida installada en la Chamanna Cluozza en il Parc naziunal svizzer. L'emprima rait da radiotelegrafia da la Svizra è vegnida installada il 1970 per il Forum economic mundial a Tavau. Ils telefons en autos da polizia, ambulanzas e taxis ed ils telepagers han precedi il natel cun la rait (grischuna) A 1978, B 1983, C 1989 e D 1995. Adolf Collenberg

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Ruman-tschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Zernez, fotografia or da l'aria (1925).



Susch: baselgia reformada e tur Planta.

FOTO J. MENOLFI

Da la Punt Ota al Pass dal Flüela

En visita a Zernez e Susch

■ **L'emprima staziun dal LIR en Engiadina Bassa vegn introducida d'artitgels davart cunfins: la Punt Ota marchescha il cunfin tranter l'Engiadina Bassa, Sur e Suot Muntfallun sa numnava la partiziun istorica da la dretgira criminala en la regiun; ulteriurs artitgels tractan ils cunfins dals circuits Sur e Suot Tasna e dal district En. Silsuenter cumenza il viadi per propi cun visitar las vischnancas da Zernez e Susch.**

Punt Ota

Punt che maina al sidvest da Brail sur l'aula da la Val Punt Ota e che furma il cunfin istoric-politic tranter l'Engiadina Bassa e l'Engiadina Bassa. Il 1287 è attestà il contadi da Pontalt (*comitatus Pontalti*) che cumpigliava – gist sco a partir dal 1348 la dretgira da Danuder – sper parts dal Vnuost era l'Engiadina Bassa fin a la Punt Ota. L'aula da la Val Punt Ota furma dapi il 1851 il cunfin tranter ils districts d'En e da Malögia sco era tranter ils circuits da Surtasna e d'Engiadina Bassa.

Adolf Collenberg

Sur e Suot Muntfallun

Sur Muntfallun e Suot Muntfallun designeschan dus districts giuridics per la giurisdicziun criminala en l'Engiadina Bassa, separads da l'aula Muntfallun al cunfin ost dal vitg da Ftan. En il temp medieval tardiv vegniva la giurisdicziun criminala da l'Engiadina Bassa, anc sutamessa entirmain a l'Austria, administrada da la dretgira da Munt Danuder en il contadi dal Tirol. En il contract statutar dal 1519 è ella alura vegnida repartida tranter l'investgieu da Cuir e las vischnancas d'ina vart e l'Austria da l'otra vart. La separaziun da la dretgira criminala en Sur e Suot Muntfallun è succedida il 1600. A Sur Muntfallun appartegnevan Zernez, Susch, Lavin, Guarda, Ardez e Ftan, a partir dal 1803 era Tarasp. Il lieu d'execuziun, numnà *Güstizia*, era situà tranter Zernez e Susch. Da Suot Muntfallun fachevan part Scuol, Sent, Ramosch, Tschlin e Samignun. Lur lieu d'execuziun, numnà *Chünettas*, sa chattava sut Sent. Il 1652 èn las vischnancas da Sur Muntfallun sa cumpradas libras per 14 000 rentschs dals davos dretgs da suveranità austriacs, quellas da Suot Muntfallun per 12 600 rentschs. La repartiziun da la dretgira criminala è sa mantegnida fin il 1851.

Paul Eugen Grimm

Sur e Suot Tasna

Ils nums Sur Tasna e Suot Tasna desi-

gneschan dus cumins da l'anteriura dretgira auta d'Engiadina Bassa, resortids da la giurisdicziun feudala da l'investgieu da Cuir. Già en il 15avel tschientaner eran els parts autonomas da la Lia da la Chadé. A Suot Tasna (uffizial Untertasna fin il 1992) appartegnevan las vischnancas da Ftan, Scuol e Sent. Lur intschesch tanscheva dal Tasnan (Val Tasna) fin a la Brancla (Val Sinestra), il lieu da mastralia era Scuol. A Sur Tasna (uffizial Obertasna fin il 1991) appartegnevan las vischnancas da Zernez, Susch, Lavin, Guarda, Ardez ed, a partir dal 1803, Tarasp. Quest territori s'estendeva da la Punt Ota (tranter Brail e Cinuos-chel) fin al Tasnan; il lieu da mastralia era Lavin. La subdivisiun da la dretgira criminala en in Sur e Suot Muntfallun divergiava da questa repartiziun. Ella è vegnida abolida il 1851 cun l'introducziun dals circuits. Dapi alura èn Sur Tasna e Suot Tasna circuits dal district d'En.

Paul Eugen Grimm

En

Il district d'En cumpiglia 13 vischnancas repartidas sin ils quatter circuits da Sur Tasna, Suot Tasna, Ramosch e, dapi il 2001, da la Val Müstair. El dumbra 1197 km² e quintava il 2007 9411 abitants. Il rumantsch è qua anc la lingua maioritaria. Il 1801–02 existiva en il chantun Rezia in district d'En che cumpigliava l'Engiadina Bassa e la Val Müstair.

Paul Eugen Grimm

Brail

Fracziun da la vischnanca politica da Zernez. 1283 *Brigel*, *Bregel*. Il 1283 è attestà a Brail l'emprim possess da la Chasa Wildenberg-Sagogn, pli tard la Chasa Wildenberg-Zernez: pradas a *Cunzera* (Gundscheras) ed *Allareto de Pestel* (Laret da Paistel). L'emprima baselgia è menziunada il 1415 (restaurada probablmain enturn il 1650). Sco patrocini principal è documentà S. Tumesch (1499), sco patrocini secundars S. Christophoros (1508) e S. Barbara (1513). Chaplania da la pravenda da Zernez, reformada dapi il 1553, pastorada davent da Zernez fin il 1742 ed a partir dal 1834.

Adolf Collenberg

Zernez

Vischnanca politica, circuit Sur Tasna, district En, situada a la via tras l'Engiadina a l'entrada per il Pass dal Fuorn, cun la fracziun da Brail. 1131 *Gumpo de Ernece*, 1161–64 *Zarnetz* (omaduas attestaziuns figureschan en ina copia dal 1365). 1835 634 abitants; 1850 603; 1900 596; 1910 1075 (con-

strucziun da la Viafier retica); 1950 739; 2000 959.

Chats dal temp da fier a Muottas ed a Muottas da Clüs e relicts da culegnas dal temp da bronz (Cuvells/Ova Spin) cumprovan che Zernez era abità già en il temp preistoric. Il 1968 e 1971 han ins scuvert ina culegna romana cun susta da chavals sin il Munt Baselgia. En il 12 e 13avel tschientaner è la regiun da Zernez vegnida colonisada ed urbanisada intensivmain (runcadas). Possess dals signurs de Tarasp e de Frickingen èn attestads per il 12avel tschientaner, numerus bains dals signurs de Wildenberg per il 13avel tschientaner. Quels èn alura ids a l'investgieu da Cuir, pli tard als Plantas da Zuoz (14avel tschientaner). La tur dal chastè da Wildenberg, la tur da la famiglia Mohr e pliras turs d'abitar integradas en chasas purilas derivan dal temp medieval. Il 1367 è vegnida fundada la Lia da la Chadé a Zernez. Il 1499 ed il 1622 è la vischnanca vegnida destruida. Suenten l'iconoclassem dal 1553 ha aderi Zernez a la cretta reformada. Il 1609 ha Rudolf de Planta fundà la baselgia parochiala construida en stil baroc tempriv. Ils de Planta-Wildenberg han determinà fin viaden il 19avel tschientaner la politica da Zernez e da l'Engiadina Bassa. Il chastè da Wildenberg, in complex baroc, ha servì il 1956–2008 da chasa communal, alura a l'administraziun dal Parc naziunal svizzer. Il 1652 è sa liberada la vischnanca da Zernez, ensem cun las autras vischnancas da la val, da l'Austria ed ha fatg part fin il 1851 dal cumin da Sur Tasna. Suenten l'incendi dal 1872 è la vischnanca vegnida reconstruida en il stil talian cun tetgs mez plats. Dal 14 al 17avel tschientaner han ins explotà ed elavurà (cun interrupziuns) minerals da fier a Buffalora ed Il Fuorn. Tranter il 15 ed il 19avel tschientaner èn vegnidas flottadas enormas quantitads da laina ad Alla. Zernez è stà da tuts temps in impurtant center da traffic. Dapi il 1913 maina la lingia Bever-Scuol da la Viafier retica tras Zernez. La vischnanca da Zernez ha anc adina la pli gronda surfatscha da guaud da tut la Svizra: 68% da la surfatscha dal Parc naziunal svizzer, fundà il 1914, sa chattan sin territori communal da Zernez. Dapi il 1968 exista a Zernez la Chasa dal Parc (museum), remplazzada il 2008 d'in edifizii nov. La vischnanca è era la sedia da las Ovras electricas d'Engiadina SA; il 1971 è vegnida averta l'ovra d'accumulaziun a pompa cun il Lai da Livign ed il batschigl d'egualisaziun Ova Spin.

En ils davos decennis dal 20avel tschientaner èn daventads l'industria da construcziun ed il turissem las funtanas d'entrada las pli impurtantas da Zernez. Part da la populaziun da lingua rumantscha: 2000 61,1%/80,2% (meglra lingua/tuttas indicaziuns).

Paul Eugen Grimm

Susch

Vischnanca politica, circuit Sur Tasna, district En, situada a la riva da l'En al pe dal Pass dal Flüela. 1161 *Susis*, tudestg Sūs (fin il 1943). 1850 401 abitants; 1900 349; 1950 283; 2000 199. Chats dal temp da bronz e dal temp da fier sin las collinas da Chaschlin, Padnal, Motta da Palü e Chaschinas. Ils signurs da Susch èn attestads il 1299. La tur cun il num La Praschun vegn menziunada enturn il 1200, quella cun il num Planta deriva probablmain dal 13avel tschientaner. La vischnanca è vegnida destruida da truppas austriacas durant la Guerra svabaisa (1499). Il 1635 han laschà construir il duca Henri de Rohan e Gieri Genatsch la fortezza da Chaschinas, in implant fortifitgà concepì en furma da staila. Il 1325 è Susch sa separà ecclesiasticamain, ensem cun Lavin, dad Ardez e furma dapi il 1422 in atgna pravenda. En la baselgia gotica (ca. 1515) ha gè lieu il 1537–38 l'enconuscenta Disputaziun da religiuun salvada dals spiritualis engiadinais. Il 1550 ha introduci Susch la reformaziun; l'emprim plevon reformà è stà Durich Chiampell. Il 1652 è la vischnanca sa cumprada libra da l'Austria ed è vegnida incorporada al circuit da Surtasna (fin il 1851). Ils territoris da pasculaziun, accessibels en las vals Flüela e Veraina, èn vegnids vendids a Tavau (14avel tschientaner) ed a vischnancas dal Partenz (16avel tschientaner). Fin a la construcziun da la Viafier retica (1913) ha Susch vivì oravant tut dal traffic sur il Flüela. Il 1925 è la vischnanca daventada victima d'in grond incendi. L'avertura dal tunnel dal Veraina (1999) ha chaschunà in augment considerabel dals occupads a Susch en il sector terziar (2005 passa 65%). Part da la populaziun da lingua rumantscha: 2000 65,3%/85,4% (meglra lingua/tuttas indicaziuns).

Paul Eugen Grimm

Pass dal Flüela

Pass a 2383 m che collia Tavau en la Val da la Landwasser cun Susch en l'Engiadina Bassa. 1513 *Fluela*. Il Pass dal Flüela n'è mai stà uschè impurtant per il traffic da transit sco il Set ed il Spleia, perquai ch'el na surmunta betg l'entir artg alpin.

Il piz d'ina lantscha dal temp da bronz, scuvert sin il Pass dal Flüela, dat perditga da l'utilisaziun dal pass en temps preistorics. Chats da munaidas romanas a Susch. Da la vart da Tavau, a l'entrada da la Val dal Flüela, sa chatta in chastè. A Susch, a la cruschada da las vias da l'Engiadina e dal Pass dal Flüela, existan numerusas turs e fortezzas. Entant che la regiun da Tavau era colonisada mo d'ina pitschna gruppa rumantscha, appartegneva la Val dal Flüela da la vart dal nord a la pastgira comunabla da Susch. Suenten l'arriv dals Gualsers a Tavau a la fin dal 13avel tschientaner è la val vegnida affittada als novs colonists da lingua tudestga ed alura vendida (1328). La senda da sauma da Cuir sur il Pass da la Striera a Tavau e sur il Pass dal Flüela en l'Engiadina era la colliaziun la pli directa cun il Tirol austriac u sur il Pass dal Fuorn cun la Val Müstair ed il Vnuost. Il 1413 è vegnì il retg Sigismund sin questa ruta dal Vnuost a Cuir. Il Scaletta, che maina parallel al Pass dal Flüela da S-chanf respectivamain da Cinuos-chel via Chapella a Tavau, serviva oravant tut da colliaziun sur il Bernina cun la Vuclina. Sur il Pass dal Flüela vegniva exportà muvel e paintg en il Tirol ed en il Vnuost ed importà sal e graun. Tenor la cronica da Durich Chiampell vegniva il Pass dal Flüela utilisà en il 16avel tschientaner mo durant las stagiuns senza naiv. Il lieu da susta il pli aut sa chattava a Tschuggen (1938 m) en la Val dal Flüela; l'emprima susta sin il pass datescha probablmain dal 1668. La via da transit è vegnida construida il 1866–67, l'ospizi il 1868–69. Il turissem naschè durant quel temp ha augmentà l'impurtanza dal Pass dal Flüela sco colliaziun la pli directa cun l'Engiadina Bassa. Il Pass dal Flüela ha profità da l'avertura da la lingia da viafier fin a Tavau (1890), entant che la viafier da Samedan a Scuol (1913) concurrenzava fermamain il pass. Dapi l'avertura dal tunnel dal Veraina (1999) resta il Pass dal Flüela serrà durant l'enviern.

Jürg Simonett

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

«Vi sur mar»

Sguard a l'emigraziun grischuna atras ils tschientaners

■ **La stgarsezza materiala, la speranza d'ina meglra vita u la brama da terras estras eran ils motivs originars da l'emigraziun. L'emprima furma d'emigraziun enconuschenta è stada – ultra dals servetschs mercenars – l'emigraziun artisanala ch'aveva solitain in caracter stagional ed era in'emigraziun prevalentain masculina e periodica, quai vul dir ch'ils emigrads turnavan suenter in tschert temp puspè a chasa (Randulins, Schuobacheclers). L'emigraziun pli moderna, che cumpiglia omaduas schlattainas e tut las gruppas da vegliadetgna cun ina dimora definitiva a l'ester, è surtut in fenomen dal 19 e 20avel tschientaner.**

Emigraziun continentala

L'emprim emigrant artisanal grischun attestà è l'Engiadinais Antonio di Giacomo ch'era sa rendì sco furner a Vaniescha il 1458. Pliras crisas economicas han intimà las autoritads da conceder privilegis a novs immigrads, quai ch'ha carmalà a Vaniescha oravant tut Grischuns da l'Engiadina e da las vals talianas. Bliers avevan dentant da viver da lavurs mal pajadas sco chalgers, tschinters, fachins, vaidrers e molacuntels. Da l'autra vart planschan ils pastiziers venezians indigens già l'onn 1493 dals numerus concurrents engiadinais. En il decurs dal 16avel tschientaner han quels surpiglià la batgetta en la mastergnanza dals pastiziers ed han dominà il commerzi fin viaden en il 18avel tschientaner. A partir dal 16avel tschientaner han els diversifitgà lur affars cun cafetarias e butias da spirituosas. Enturn il 1600 vivevan var 4000 Grischuns en la Republica da Vaniescha, quai vul dir en la citad da Vaniescha, ma era a Bergam ed a Brescha. Ultra dals mastergns menziunads faschevan els era ils commerziants e martgandants da muvel. En consequenza da la politica da las Trais Lias e da la scuidanza dals commerziants venezians envers ils concurrents grischuns bainstants, èn las relaziuns tranter il Grischun e Vaniescha sa pegiuradas a partir dal 1750. Cura che las Trais Lias han refusà da construir la via sur il Pass da S. Marc, ha Vaniescha revocà il 1764 las alianzas, ha privà ils Grischuns dals privilegis ed ha laschà serrar il 1766 ils ultims 171 manaschis grischuns. Ils Grischuns han stuì bandunar Vaniescha ed èn alura sa domiciliads sco pastiziers, fabricants da tschigulatta, commerziants ed industrials en auters pajais ed en autras regiuns da l'Europa.

Als emprims emigrants èn suandads per part entiras gruppas da parents u enconuschents da la vischnanca u da la val nativa. En l'Italia dal Nord e dal Sid chattain nus oravant tut Engiadinais e Grischuns da las vals talianas, en la Lombardia eran engaschads durant ils mais d'enviern numerus latgers (lavurers en latgarias) e fantschellas dal Rain Anteriur. Centers da l'emigraziun grischuna en il vegl Imperi d'Austria-Ungaria eran Vienna, Prag e Budapest. En la Slovacchia ed Ungaria èn documentads passa 50 pastiziers e cafetiers da la Stussavgia, ed a Triest eran il 1815 21 dals 37 cafés en possess da Grischuns, e mintga gruppa etnica da la regiun aveva la ses café grischun preferì. En quella citad da port eran ultra da quai plirs Grischuns activs en il sector da l'import ed export ed en l'industria textila. Suenter ils onns 1765/70 è gliעד da tut il Grischun emigrada en Frantscha, surtut a Paris ed en ils contorns da Bordeaux, Lyon e Marsiglia, dal Grischun catolic oravant tut sco emploiads d'hotels e fantschellas. Bliers èn fugids da la Revoluziun franzosa en Spagna, nua ch'ina impurtanta colonia da Puschlavins ha fundà en il decurs dal 19avel tschientaner il renomà Café Suizo (1890: 54 ma-



Port europeic enturn l'onn 1890.

FOTO PD

naschis). Da lur bainstanza dattan perdita ils «palazzi spagnoli», realisads dals reemigrads a Poschiavo. A Berlin ha erigì Johann Josty (cun cumpagnuns) il 1796 la chasa d'origin da l'imperi europeic dals Jostys, ed a Varsovia ha Andrea Robbi da Silvaplana avert sia fabrica da tschigulatta.

Ils emprims emigrants en Russia èn stads ils pietists e predigants reformads domiciliads a la Wolga Centrala ed Inferiura, derivants oravant tut da l'Engiadina Bassa, dal Partenz e Tavau e da la Val dal Rain Grischuna. Da Claustera èn emigradas il 1804 21 famiglias cun 124 persunas sin la penisla da Crim. L'emigraziun en gronda dimensiun ha inizià suenter il 1770 cun ils pastiziers derivants da l'Engiadina d'Ota, da l'Engiadina Bassa, dal Puschlav e da la Bergaglia. A Son Petersburg è sa furmada ina colonia grischuna pli gronda oravant tut da zutgeriers, pastiziers e cafetiers. Questa gruppa da professiun cumpigliava var 75% (dal 1816–48 perfin 93%) da tut ils Grischuns emigrads en Russia. Famiglias enconuschentas eran ils Bernards, Brangers, Wolfs, Conradis, Rizs à Porta, Lareidas, Caviezels. Pliras da quellas famiglias han occupà posts directivs en la Societad svizra da succurs, fundada en Russia il 1870. Alliadadas en pliras manieras tras maridaglia, possedevan ellas filialas en diversas citads ed en divers pajais: per exempel a Moscau, Odessa, Riga, Varsovia, Berlin, Kiev, Belgrad, Cracovia, Stettin, Wilna e Helsinki. Suenter il 1850 èn sa derasads da Paris fin ad Odessa cafés cun salas da bal e da concert, manads da las famiglias Saratz, Scartazzini, Orlandi, Frizzoni, Matossi, Maurizio-Prevosti, Semadeni, Mini, Catani ed autras. Da quels cafés è resortì a Paris il renomà cabaret Chat Noir da Rodolphe von Salis. Main grondas ch'utro èn las colonias grischunas a Londra, Amsterdam, Copenhagen e Helsinki. L'Emprima Guerra mundiala ha sigillà il declin da las tschientinas d'interpresas grischunas en Europa. Mo fitg paucas han survivi la guerra e la crisa dals onns 1920.

Entaifer duas generaziuns han ins uschia pudì cumpensar la perdita da Vaniescha. Ina statistica da la baselgia evangelica dal 1835 documentescha 3484 Grischuns reformads sco cafetiers, pastiziers u commerziants a l'ester, 396 sulettmain a Cracovia en Polonia. Ins quinta cun in dumber total

da ca. 6000 Grischuns a l'ester. En il decurs dal 19avel tschientaner èn emigrads bliers Grischuns e numerus Grischunas en l'Europa da l'Ost ed en Russia, nua ch'els eran activs sco magisters da linguas, educaturs privats u guvernants en famiglias aristocraticas.

Ina gruppa speziala d'emigrants artisanals deriva dal Mesau e da la Val Calanca: quests emigrants han fatg carriera surtut en l'Europa Centrala sco architects ed impressaris constructurs da baselgias e palazz. Els han creà lur ovras principalas en stil baroc, per exempel Giovanni Albertalli. En il 19avel tschientaner han bliers tschertgà lavur a l'ester sco vaidrers, picturs, spazzachamins e rimnaders da rascha – enturn il 1850 ca. 600.

Ina categoria speziala da l'emigraziun furman era ils students che stuevan absolver lur scolaziun en ils divers gimnasis ed a las differentas universitads da l'Europa (Felici Maissen ha descrit quella emigraziun en numerus tractats). In chapitel per sai represchentan l'emigraziun militar (servetschs mercenars) e surtut ils Schuobacheclers – per la pli gronda part uffants da famiglias paupras ed ofrens che vegnivan tramess tranter il 1800 e l'Emprima Guerra mundiala da la primavaira fin l'atun en regiuns al nord dal Lai da Constanza tar purs gronds sco famegls, fantschellas, pertgiradras d'uffants e pasturs.

Emigraziun surmar

Ina rolla impurtanta en l'emigraziun commerziala grischuna han giugà ils Stadis Unids da l'America. Quella è s'alimentada oravant tut da las valladas dal Rain, da la Lumnezia, Stussavgia e Mantogna, dal Partenz, dal Scavveg e da Tavau; contingents pli modests provengivan da la Val d'Alvra e dal Surses. Las autras regiuns grischunas pratitgavan oravant tut l'emigraziun continentala ed han perquai giugà – cun excepziun da Tarasp – ina rolla minimala en l'emigraziun surmar.

Ils emprims fastizs da Grischuns en ils Stadis Unids èn da chattar il 1690 en Pennsylvania, Carolina e Georgia. Ella ha inizià vairmain en ils onns 1820–30 (total 35 persunas; 1830–40 530) ed ha cuntanschì ses emprim punct culminant il 1845–47 (440; 556; 426). En consequenza da las crisas en l'agricultura e da la fin dal traffic da transport tradiziunal sur ils pass gri-

schuns suenter il 1850 è il dumber d'emigrants restà sin in aut nivel ed ha durà fin viaden ils onns 1880–90. Bliers vischnancas munivan lur emigrants cun ils daners da viadi necessaris – per part era per sa liberar da lur abitants basegnus. Dal 1820–55 èn immigrads en tut 3540 Grischuns en ils Stadis Unids, tranter quels ils pioniers da l'emigraziun grischuna Johann e John Hitz. Las colonias dals Sursilvans sa concentravan sin ils stadis d'Ohio (a Wapakoneta eran sa domiciliadas oravant tut famiglias da la Cadi), Wisconsin e Minnesota. La metropola da la lana Stillwater a Minnesota è vegnida fundada il 1850 da resgiaders e lainaris sursilvans e glarunais. Ina part da quels è alura sa dischlocada a St. Paul (Minnesota), in magnet da l'emigraziun grischuna fin il 1914. Da Stillwater èn arrivadas il 1874 12 famiglias da farmers oriundas da la Cadi a St. Henry (Minnesota); ellas han era fundà il 1878 las culegnas rumantschas las pli tipicas, numnadain quellas da Lake Badus e Ramona en il Dacota dal Sid, fundaziuns da la Lidga Grisha Colony da Minnesota cun immigrants da la Lumnezia, Foppa e Cadi. Els bliers dal Schons e dal Valragn èn emigrads suenter il 1848 sco farmers, mulschaders, fantschellas, pastiziers e commerziants en il stadi da Wisconsin. L'immigrant che vuleva far là il pur obtegnava gratuitain in bain (64–128 ha) ch'el pudeva urbarisar e sin il qual el dastgava construir sia furma. Colonias grischunas cumparan suenter las scuvertas d'aur dal 1849 en California: a San Francisco (commerziants), Eureka, Modesto, Kern County (purs), intgins paucs sco chavaders d'aur. Sut St. Paul, a la riva dal Mississippi, han immigrants da Tavau fundà il center agricul Tell ed en il sid, enturn la citad da Dubuque (California), èn sa domiciliads numerus emigrants dal Partenz e var 100 emigrants da Tarasp ch'avevan là enturn il 1900 las pli grondas farmas da latg. En consequenza da la fluriziun dal turissem en il Grischun è l'emigraziun regredida suenter il 1880 (1887–1938 5985), cun excepziun dal Schons e dal Valragn (valladas da transit en crisa economica, provocada tras l'avertura da la Viafier dal Gottard il 1882). In bel dumber da schuldads ed uffiziers grischuns ha cumbattì en la Guerra da secessiun (1861–65). L'archivist Johann Martin Henni da Sursaija è stà in dals pioniers da la

missiun catolica dal temp da la colonizaziun grischuna e svizra en ils Stadis Unids.

A la culminaziun da l'emigraziun en l'America ha Conrad Conzett publictà il 1871 a Cuira ses cudesch «Nach Amerika! Handbuch für Auswanderer, nach eigenen Erfahrungen geschrieben». Quest'ovra cunteneva instructiuns detagliadas davart la preparaziun dal viadi fin a l'emprender spert englais. Pliras agenturas d'emigraziun avevan in biro en il Grischun, predominanta era la Compagnie Générale Transatlantique. L'Emprima Guerra mundiala ha interrut l'emigraziun, e la crisa economica dals onns 1930 ha provocà ina davosa unda d'emigraziun economica en ils Stadis Unids.

En Brasilia èn emigrads tranter il 1852 ed il 1866 tut en tut 338 Grischuns, engaschads sco lavurers en las plantaschas da café en la regiun da São Paulo. Ils 114 emigrants da Vaz Sut ed ils 59 da Mastrils, arrivads il 1855 en Brasilia (ensemen cun 71 ulteriurs Grischuns e cun ca. 1800 auters emigrants svizzers), guidads da Thomas Davatz, han chattà lavur sco racoltaders da café en 25 plantaschas ad Ibicaba, Biry ed Angelica; els èn dentant vegnids sfruttads malamain e tegnids sco sclavs. Davatz è sa drizzà il 1856 a las autoritads svizas, e lur intervenziun suenter la rebellun dals colonists dal december 1857 ha manà a contracts acceptabls.

Il Canada, l'America Latina (exceptà la Brasilia) e l'Australia han giugà ina rolla absolutain marginala en l'emigraziun grischuna.

Per e cunter l'emigraziun

Ils giudicats contemporans davart l'emigraziun (civila) dal 19avel tschientaner prefereschian l'emigraziun periodica a quella definitiva, perquai che l'emprima transferiva parts da las facultads en la patria, entant che l'emigraziun intercontinentala signifitgava ina perdita da substanza definitiva per las communitads grischunas. Sco aspect positiv da l'emigraziun vegniva resguardà il reffluss dal chapital, grazia al qual ins pudeva construir bellas chasas burgaisas, villas e palazz u megliar las relaziuns d'abitar. Ins ludava en general era il schlargiament da l'orizont, las enconuschentschas da linguas ed il spiert d'iniziativa dals emigrants cun lur chapital ch'ha contribuì essenzialmain a la finanziaziun dals emprims edifizis d'hotels e cun quai al svilup dal turissem en il Grischun. Sco punct negativ vegniva relevada la submissiun al cumond ester da bliers Grischuns basegnus, uschiello superbis. Ins registrava era l'avarizia d'ina vart e la vanagloria da l'autra vart, ed ins deplorava – ma quasi mo da vart ecclesiastica – la decadenza (presuntiva) da la moralà.

Suenter il 1945 ha remplazzà l'emigraziun individuala e temporara quella solitain collectiva e fitg savens definitiva d'antruras. Bleras professiuns pretendan in'auta mobilitad ed in domicil temporar a l'ester. L'emigraziun actuala ha ina qualitad ed ina motivaziun differenta da quella d'avant 100 onns, cura ch'els bliers bandunavan lur patria per mitschar da la paupradad, giond a finir insanua sco fugitivs economic basegnus.

Martin Bundi

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Calantgil (enturn 1915)...



... ed Avras-Cresta (enturn 1930).

Avras – ina da las regiuns las pli autas en Europa abitadas l'entir onn

Avras è in circuit dal district Rain Posterior accessible nà dal passadi tranter la Val Schons ed il Valragn. El sa cumpona da las duas vischnancas Ferrera (enfin il 2007 Farera e Calantgil) ed Avras. Oriundamain è la regiun vegnida colonisada da Rumantschs; pli tard èn arrivads Gualsers nà da l'Italia dad oz. Dapi l'onn 1961 vegn explotada l'aua da la Val da Lei; ils projects per eriger in mir da serra en la Val Madris èn fruntads ils onns 1980 sin ferma opposiziun e n'èn la finala betg vegnids realisads.

Ausserferrera (Farera)

Anteriura vischnanca politica, circuit Schons, district Rain Posterior. Fusiun cun Calantgil a la vischnanca da Ferrera en Avras il 2008. Vitg accumulà al Rain d'Avras. Ca. 1150 *Farreira*, tudestg *Ausserferrera* (uffizial). Separaziun da Calantgil il 1837. 1808 110 abitants; 1850 167; 1900 107; 1950 78; 1960 219; 2000 47. Culegna fundada a partir dal 11avel tschientaner da Rumantschs, l'emprim probablmain il vitg da Cresta situà sin ina terrassa a 1660 m, abità durant l'entir onn fin en il 18avel tschientaner. La baselgia a Cresta è vegnida construida enturn il 1200, quella a Farera vers la fin dal 15avel tschientaner (patrocinis nunenconuschents). Refurmaziun avant il 1538. Separaziun definitiva da S. Martin a Ziràn il 1707. La suveranità territoriala sur la Val Schons, exercitada l'emprim da l'uvestg da Cuira, è passada successivamain als signurs de Vaz, alura als de Werdenberg per turnar il 1456 puspè a l'uvestg. Il 1458 è la val sa cumprada libra dals dretgs signurils. Sper l'allevament da muvel han ins explotà ed elavurà, cun agid da miniers austriacs, minerals fin viaden il 19avel tschientaner. Fin il 1851 ha Farera furmà in vischinadi dal cumìn da Schons ed ha constitui in dretgira bassa (civila) cun Calantgil, Andeer e Pignia. Construcziun dal stradun 1890–95. Centrala da las Ovras electricas Rain Posterior dapi il 1961. Il 1990 existiva anc in manaschi puril. Part da la populaziun da lingua rumantscha: 1880 98,4%; 2000 2,1%/25,5% (meglra lingua / tuttas indicaziuns). *Jürg Simonett*

Cresta-Farera

Fracziun da l'antieriura vischnanca politica da Farera (dapi il 2008 Ferrera en Avras). Culegna la pli veglia en la Val Farera, situada a 1660 m e che datescha probablmain dal temp da fier. Pir ils colonists gualsers han probablmain abità Cresta-Farera durant l'entir onn a partir dal temp medieval tardiv. La baselgia da Cresta-Farera, erigida enturn il 1200 en stil romanic, è la pli veglia da la val ed ha appartegnì, sco baselgia affiliada, a S.

Martin/Ziràn fin il 1707. Ils mises vegnan utilisads dals purs da Cresta-Farera dapi il 18avel tschientaner. Cresta-Farera consista da radund 25 chasas e da 30 stallas. *Adolf Collenberg*

Innerferrera (Calantgil)

Anteriura vischnanca politica, circuit Schons, district Rain Posterior. Fusiun cun Farera a Ferrera en Avras il 2008. Vitg a mantun situà al Rain d'Avras. 1556 *Canicùl*, tudestg *Innerferrera* (uffizial). 1808 57 abitants; 1850 106; 1900 55; 1950 67; 1960 286 (construcziun da las ovras electricas); 1970 81; 2000 49. Culegna fundada da Rumantschs en il 11avel tschientaner. Ils dretgs feudals en l'entira Val Schons avevan l'emprim l'uvestgieu da Cuira, alura ils de Vaz, suandads dals de Werdenberg ed, a partir dal 1456, puspè l'uvestgieu da Cuira fin che la val è sa cumprada libra il 1458. L'emprima baselgia datescha dal temp prerefurmatoric (patrocinis nunenconuschents, refurmaziun avant il 1538), la baselgia odierna dal 1834. Allevament da muvel, desperas fin viaden il 20avel tschientaner explotaziun ed elavuraziun da minerals tras miniers austriacs domiciliads a Calantgil. Separaziun da Farera 1837. Fin il 1851 è Calantgil stà in vischinadi dal cumìn da Schons e furmava ina dretgira civila cun Farera, Andeer e Pignia. Contacts cun l'Italia sur il Pass da Niemet (exportaziun da lavurs da vaschler), cuntrabanda fin suenter la Segunda Guerra mundiala. Construcziun dal stradun 1890–95. Dapi il barat da terren cun l'Italia (1962–63) furma il mir da fermada da las Ovras electricas Rain Posterior en la Val da Lei in'exclava da la vischnanca da Calantgil. Il sector secundar predominava a Calantgil. Part da la populaziun da lingua rumantscha: 1880 100%; 1980 21,9% (meglra lingua); 2000 4,1%/6,1% (meglra lingua/tuttas indicaziuns). *Jürg Simonett*

Emet

Pass a 2295 m che maina da Madesimo (Val Son Giachen) a Calantgil (Val d'Avras). Il num Emet (era Diamat u Niemet) pudess star en connex cun las minieras. Attestà per l'emprima giada il 1204 sco *alpe de Emede*: in tschert Konrad da Masein aveva affittà l'Alp Emet en num dals Libers dal Rain Posterior per 30 onns a la vischnanca da Clavenna. En il temp medieval utilisav'ins per part il Pass d'Emet enstagl dal Spleia per il traffic da martganzia e da muvel.

La Val d'Emet è vegnida cultivada durant tschientaners da gliued dal sid. Il 1546 ha in *Tonatz* dad Andeer vendì la mesadad da l'Alp Mutalla en la Val d'Emet ad in vischin da Clavenna. Las relaziuns da possess han alura puspè mi-

dà. L'alp, situada sin territori da la vischnanca da Calantgil, vegn oz puspè utilisada da Grischuns. *Martin Bundi*

Val da Lei

Vallada auta en las vischnancas da Plür e da Calantgil situada en l'intschess dal Rain Posterior. La val s'estenda sur 15 km ad in'auzezza da 2000 m ed ha ina surfatscha da 51 km². 1355 *de Leylo*, talian Valle di Lei. Enturn la mesadad dal 14avel tschientaner è la Val da Lei stada abitada temporarmain durant l'entir onn da colonists derivants dal sid. Pli tard è ella vegnida explotada sco pastgira, cun las alps chargiadas cun biestga chatschada dal sid sur ils pass da Lei e d'Angeloga. Il 1462 han ils conts von Werdenberg-Sargans vendì lur possess a la vischnanca da Plür. En il 17avel tschientaner han ins explotà minerals en la Val da Lei. Cura che las Trais Lias han pers la Vuclina il 1797 è la val daventada ina zona da cunfin. Sin la spunda occidentala sa chattan pitschnas alps. Cun la correctura dals cunfins tranter la Svizra e l'Italia (1962–63) èn var 45 ha da la val vegnidas attribuidas a la vischnanca da Calantgil, cumprais il mir da serra dal nov batschigl da las Ovras electricas Rain Posterior (197 miu. m³). *Jürg Simonett*

Avras

Vischnanca politica, circuit Avras, district Rain Posterior. La culegna consista da singuls bains ed aclauns, tranter auter da Cresta, il center politic ed ecclesiastic da la val, e da Juf, l'abitadi permanent situà il pli aut en l'Europa (2126 m). La vischnanca cumpiglia las vals dal Rain da Juf e d'Avras sco era las vals laterals Madris e Bergalga. 1292 *Anue (Avre?)*, 1354 *Auers*, tudestg *Avers* (uffizial). 1645 498 abitants; 1850 293; 1900 204; 1950 167; 1960 270 (construcziun ovras electricas); 1990 128; 2000 160.

Ina sigir cun chau radund da la fin dal temp neolitic e traies fossas dal 3–6avel tschientaner dattan perditga d'ina preschientscha umana fitg tempriva. La Val d'Avras è probablmain vegnida colonisada da Rumantschs pir a partir dal 11avel tschientaner sur l'ospizi da S. Peder (Pass dal Set). Suenter il 1280 èn arrivads Gualsers dal Pomat (Val Formazza) en la Val d'Avras, nua ch'els èn sa domiciliads l'emprim mo en las regiuns pli autas. Fin il 1310/20 han els conquistà l'entira val e stgatschà la populaziun indigena ed il linguatg rumantsch. La culegna gualsra era a l'entschatta sut la protecciun da la citad da Com, a partir dal 14avel tschientaner sut il patronadi da l'uvestgieu da Cuira. Sco part da la Lia da la Chadé (a partir dal 1367) è la Val d'Avras daventada autonoma. Il 1498 è ella s'alliada cun la Confederaziun ed è daventada il 1524/26 part

integrala da las Trais Lias. Sper la baselgia parochiala a Cresta, che datescha da l'entschatta dal 14avel tschientaner (oriundamain probablmain patrocini da S. Teodul, evtl. da S. Clau), existan chapluttas a Madris e forsa er a Cröt. Refurmaziun 1525–30. La construcziun da la vischnanca d'Avras è attestada probablmain gia per il 1292, cun segirtad per il 1377 (cumin). Ils cudeschs dal pajais dal 1622/44 èn revisiuns da statuts pli vegls. Fin il 1867 è la chasa-cumin stada la sedia da la dretgira. Plirs process ed execuziuns da strias ad Avras dal 1652–64. Avras è dapi il 1851 ina vischnanca ed in circuit, dapi il 1902 er in circuit electoral autonom, quai che garantescha a la val ina represchentanza permanenta en il Cussegl grond. A basa d'ina chascharia privata e tenor in sistem da corporaziun vegniva pratigà l'allevament da muvel e l'economia d'alp. Fin enturn il 1850 era il commerzi da muvel sur la Forcellina ed il Set orientà vers il sid (fieras lumbardas). Ils sintoms da crisa ch'èn sa manifestads per part gia en il 17avel tschientaner (debts, numerusas fitanzas als Salis, diminuiziun da la populaziun), han cuntanschì lur culminaziun en il 19avel tschientaner.

Il 1895 ha la Val d'Avras obtegnì cun l'avertura da la via nova in access a la rait da traffic chantunala. Pir la construcziun dal lai da serra en la Valle di Lei (1958–63) ha dentant inizià in svilup economic (tschains d'aua, provediment d'electricità, renovaziun da l'access a l'A13). Sper l'agricultura, promovida tras la fundaziun Pro Avers, offra er il turissem da stad ed enviern (oravvan tut quartiers privats) pussaivladads da gudogn a la populaziun dad Avras. La Societad Alte Averser Strasse garantescha il mantegniment e per part la renovaziun dals artifizis istorics e da la via. *Hermann Weber*

Cresta

Lieu principal da la vischnanca politica dad Avras e dal circuit d'Avras, situada a 1959 m. Attestà il 1377. Fossa cun sarcofag dal 6/8avel tschientaner. Oriundamain ina culegna rumantscha, a partir dal 14avel tschientaner immigraziun da Gualsers. Antruras territori suveran da l'uvestgieu da Cuira, en il temp medieval tardiv sut avugadia dals de Marmels ed incorporada en il cumìn da Stalla/Beiva, cun il qual la part interna da la val, colonisada da Gualsers, era colliada era ecclesiasticamain fin en il 14avel tschientaner. En il 16avel tschientaner furmava Cresta in dals set vischinadis da la Val d'Avras. La baselgia da S. Niclà a Cresta, erigida en il temp roman tardiv e menziunada il 1377, è la baselgia principala da la Val d'Avras Dadens. Refurmaziun avant il 1630. Sper la baselgia sa chattava la veglia chasa communal, sbuvada il 1867. En il decurs dal

19avel tschientaner ha Cresta midà sia orientaziun economica da la Bergiaglia e da l'Italia dal Nord vers il Schons e la Val dal Rain. Turissem da stad moderà. Plazzas da lavur en las Ovras electricas Rain Posterior. *Adolf Collenberg*

Juf

Aclaun en la vischnanca politica dad Avras. 1292 *de Zovo*. Situada a 2126 m, è Juf la culegna la pli auta en Europa abitada permanentamain. 1991 20 abitants; 2008 29. Il 1292 èn attestads Gualsers derivants dal sid ch'èn sa stabilids en la regiun da Juf sin territori da l'uvestg da Cuira. Sco part da la Lia da la Chadé constituiva il vitg ina vischinanza dal cumìn dad Avras. Avant la construcziun da la via en il Schons furmava l'aclaun in punct da partenza per la colliaziun cun Beiva sur il Starlera (ruta savens frequentada) ed en la Bergiaglia sur il Forcellina. Il 1899 è vegnida construida la via charrabla a Cresta. Svilup d'in turissem moderà a Juf. *Jürg Simonett*

Val Madris

Val laterala sin territori da las vischnancas politica dad Avras (culegna da Madris) e Suogl che cumpiglia numerusas alps. 1368 *alpis de Madrixio*, talian Valle Madrisa, tudestg *Madrisertal*. 2002 11 abitants a Stettli e Højahus. Colonisada en il 13 e 14avel tschientaner a partir da Clavenna e Plür (part dadens) respectivamain a partir dal Schons (part dadora). Il 1292 èn documentads Gualsers a Juf, danunder ch'els èn spert sa derasads era en la Val Madris. Il 1372 ed il 1412 han ils da Clavenna e Plür vendì lur alps en la Val Madris a purs da Suogl che charginan quellas sur il Pass da la Prasignola (2724 m). Fin a la realisaziun da la via charrabla en il Schons e da quella da Cröt a Stettli (1890–95) ha existì in viv barat da martganzia sur ils pass en la Bergiaglia ed a Clavenna. Ils projects per in'ovra d'accumulaziun a pumps, lantschads da las Ovras electricas Rain Posterior SA, ed ils plans per ina piazza da tir per chars armads èn fruntads en ils onns 1980 sin ina ferma opposiziun ed han fatg naufragi. Il 2002 existivan anc dus manaschis purils en la Val Madris. *Adolf Collenberg*

Lexicon Istoric Retic

Il LIR cumpiglia bundant 3100 artgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

L'istorgia da la Lia Rumantscha e da las uniuns regionalas

■ Il Lexicon Istoric Retic preschenta l'istorgia ed ils champs da lavur da la Lia Rumantscha e da las trais uniuns regionalas Surselva Romontscha, Uniun Rumantscha Grischun Central ed Uniun dals Grischs. Resguardadas vegnan er las uniuns antecessuras e las uniuns u secziuns da giuventetgna respectivamain studenticas.

Lia Rumantscha

Societad d'utilitad publica, fundada il 1919 sco organisaziun da tetg da tut las uniuns linguisticas e culturalas rumantschas en Svizra. La Lia Rumantscha cumpiglia actualmain las trais uniuns regionalas Surselva Romontscha, Uniun Rumantscha Grischun Central ed Uniun dals Grischs, las quatter uniuns surregionalas Societad Retorumantscha, SRG SSR Svizra Rumantscha, Uniun per la Literatura Rumantscha (avant Uniun da scripturas e scripturs rumantschs), Giuventetgna Rumantscha e las duas uniuns extraterritorialas Uniun dals Rumantschs e da las Rumantschas en la Bassa e Quarta Lingua. La Surselva Romontscha è vegnida fundada ils 18 da mars 2006 sco uniun successura da la Romania e da la Renania (sursilvana), l'Uniun Rumantscha Grischun Central ils 20 da zercladur 2006 sco nova uniun regionala per il Surmeir e la Sutselva (remplazzond l'Uniun Rumantscha da Surmeir ch'ha midà intent e la Renania sutsilvana).

La Lia Rumantscha è politicamain e confessionalmain neutrala. En sia funcziun sco organisaziun da tetg da tut las uniuns rumantschas sustegna ella las activitads da las uniuns affiliadas. Cun ses mandat federal e chantunal per la promoziun da la lingua e cultura rumantscha ademplescha ella in'incumbensa da dretg public e porscha servetschs d'utilitad publica. La Lia Rumantscha represchenta la Rumantschia, vul dir la populaziun svizra da lingua rumantscha, sin il champ chantunal, nazional ed internaziunal e s'engascha per la promoziun dal rumantsch en tut ils secturs da la vita da mintgadi. Ella ha sia sedia a Cuira e maina trais centers regionalas. Entant ch'ella è stada occupada en ils onns 1919–80 surtut cun conservar l'existent e metter a disposiziun ovras da basa sco vocabularis e grammaticas, prosa ella dapi ils onns 1980 ina promoziun linguistica pli offensiva (tranter auter cun la lingua da scrittura unificada rumantsch grischun), basada sin la planisaziun da lingua internaziunala moderna. La Lia Rumantscha sa finanziescha surtut cun contribuziuns federalas e chantunalas sco era da la vendita da cudeschs e portatuns, il davos temp però era pli e pli savens tras servetschs specifics sco translaziuns, lectorats e supports linguisticas e tras fundraising. Organ da publicaziun: «Rapport annual» (cumpara dapi il 1919).

Manfred Gross

Giuventetgna Rumantscha (GiuRu)

Organisaziun surregionala, fundada il 1991 cun l'intent da promover la lingua e cultura rumantscha stabilind contacts tranter la giuventetgna da las differentas regiuns rumantschas e sustegnend (era finanziemmain) la planisaziun e realisaziun da projects en favur da la giuventetgna. La GiuRu è dapi il 1977 in'uniun affiliada da la Lia Rumantscha. Ella è era commembra da la Giuventetgna da las cumunanzas eticas europeicas (GCEE) e tgira sco tala stretgs contacts cun autras minoritads en l'Europa; il 2005 ha ella per exempel organisà in seminari da la GCEE a Lags. Organ (enfin il december 2011): revista mensila «Punts», l'emprima gasetta interrumantscha (l'emprim numer è cumpari il 29 d'avrigl 1994). Il mars 2010 dumbrava la GiuRu 215 commembras e commembres.

Adolf Collenberg

Surselva Romontscha

Uniun regionala per lingua e cultura, naschida il 18 da mars 2006 da la fusión da las anteriuras societads regionalas Romania e Renania (sursilvana) ch'ella represchenta en il cussegl, en la suprastanza sco era, in proporziun a sia fermezza demo-



La «Chasa Rumantscha» a Cuira, sedia da la Lia Rumantscha.

grafica, en la radunanza da delegadas e delegads da la Lia Rumantscha. La Surselva Romontscha cumpiglia l'entir intschess da derasaziun dal rumantsch sursilvan davent da Tujetsch fin a Domat. Sia finamira è da promover e rinforzar l'applicaziun da la lingua e cultura rumantscha en Surselva, sviluppar l'identitad regionala ed interrumantscha e promover ina sauna basa existenziala per la Surselva. Organ uffizial da la Surselva Romontscha è «Nies Tschespet» (edi dapi il 1921), ina secziun è la Surselva Romontscha da Giuventetgna. Dal 1984 fin il 2005 han procurà collavuratur regiunals, engaschads da la Lia Rumantscha e da la Romania respectivamain da la Renania, per l'animaziun culturala e linguistica en il territori romanian ed en la part renaniana da la Surselva. Il 2000 è quella collavuraziun regionala vegnida surpigliada dal Center da cumpetenza e management (CCM) cun sedia a Lags che s'engascha a moda innovativa ed iniziativa per il mantegniment e la tgira dal rumantsch en la regiun. En il rom da sias restructuraziuns generalas ha installà la Lia Rumantscha il schaner 2006 a Lags in center da promoziun da la lingua e cultura sursilvana (Lia Rumantscha Surselva). Quest center cumpiglia era il CCM (ch'exequescha oravant tut incumbensas per terzas persunas) e la Scuntrada e formaziun Surselva (SFS) che disponan d'in status parzialmain autonom entaifer il manaschi.

Manfred Gross

Romania

Uniun per lingua e cultura fundada il 1896 ed affiliada a la Lia Rumantscha. Ella era oriundamain in'uniun studentica da la Surselva catolica, reorganizada il 1948 e transfurmada suenter il 1967 pli e pli en ina societad populara. Ses territori d'acziun cumpigliava la part catolica da la Surselva e dal Plaun. La Romania è s'engaschada per il mantegniment e la promoziun dal rumantsch en general e da l'idiom e da la cultura da ses intschess en spezial. Ella ha represchenta la Surselva en il cussegl, en la suprastanza ed, in proporziun a sia fermezza demografica, en la radunanza da delegadas e delegads da la Lia Rumantscha. Els organs uffizials da la Romania eran «Igl Ischi» (dapi il 1897) e «Nies Tschespet» (dapi il 1921). Secziuns: la Romania da giuventetgna e divers circuls culturals. Els 18 da mars 2006 è la Romania vegnida schliada ed ha fusiunà cun la Renania sursilvana ad ina nova uniun regionala cun il num Surselva Romontscha.

Manfred Gross

Renania

Societad affiliada a la Lia Rumantscha, sortida il 1922 da la fusión da l'Uniun romantscha dalla Foppa (fundada il 1920 dals protestants sursilvans) e da l'Uniun rumantscha da Schons (fundada il 1917). Questa fusión reflectescha la colliaziun tradiziunala tranter las regiuns protestantas dals Rains Anterior e Posterior, ma era

la necessitad da rimnar las forzas per far frunt a la germanisaziun. La Renania è stada ils davos decenniis politicamain e confessionalmain neutrala. Ses territoris d'acziun eran la Surselva protestanta, la Tumleasgga, la Mantogna e la Val Schons. L'intent formulà en ils statuts era da mantegnair e promover ils dus idioms renans, vul dir il sursilvan ed il sutsilvan, en lur intschess respectiv. Sutsecziuns da l'antieriura Renania (tenor ils statuts dal 1992) èn: il Ravugl rumantsch ad Andeer e la Cuminonza romontscha a Flem e Trin. La Renania represchenta la Surselva en il cussegl, en la suprastanza ed, in proporziun a sia fermezza demografica, en la radunanza da delegadas e delegads da la Lia Rumantscha. Ella ha edi la gasetta emnila «Casa Paterna / La Pünt» (fundada il 1920 respectivamain 1951, fusiunada il 1974, integradas il schaner 1997 en «La Quotidiana»). Ses organs uffizial eran il «Calender per mintga gi» (dapi il 1921), il «Dun da Nadal» respectivamain «La Tschuetta» (a partir dal 1994). Tranter il 1984 ed il 2006 han procurà collavuratur regiunals da la Renania e da la Lia Rumantscha per l'animaziun culturala e linguistica en il territori renanian. Il mars 2006 ha fusiunà la Romania sursilvana (Il Plaun, Trin) cun la Romania a la Surselva Romontscha, ed il zercladur 2006 è s'unida la Renania sursilvana (Schons, Tumleasgga, Mantogna) cun l'Uniun Rumantscha da Surmeir a l'Uniun Rumantscha Grischun Central.

Bernard Cathomas

Uniun Rumantscha Grischun Central

Uniun regionala per lingua e cultura, sortida il 20 da zercladur 2006 da la fusión da l'Uniun Rumantscha da Surmeir e da la Renania sursilvana (Schons, Tumleasgga, Mantogna). Incumbensas specificas vegnan adempidas vinavant da l'Uniun Rumantscha da Surmeir («La Pagina da Surmeir», edida dapi il 1945) e da la Surselva rumantscha. L'Uniun Rumantscha Grischun Central represchenta il Surmeir e la Sutselva (senza Il Plaun) en il cussegl, en la suprastanza ed, in proporziun a sia fermezza demografica, en la radunanza da delegadas e delegads da la Lia Rumantscha. Sco organ uffizial da l'Uniun Rumantscha Grischun Central cumpara dapi il 2008 il «Sulom Grischun Central» sco successur dal «Sulom surmiran». En il rom da las restructuraziuns generalas da la Lia Rumantscha ha il Grischun Central obtegnì l'entschatta dal 2007 in center da cumpetenza regional (Lia Rumantscha Grischun Central) cun dus posts decentralas a Suagnign e Ziràn.

Manfred Gross

Uniun Rumantscha da Surmeir

Societad affiliada a la Lia Rumantscha, fundada il 1921 sut il num Uniun rumantscha da Surses, extendida pli tard sin tut il Surmeir e fusiunada il 20 da zercladur 2006 cun la Renania sursilvana a l'Uniun Rumantscha Grischun Central. La finamira da l'Uniun Rumantscha da

Surmeir era, tenor ils statuts dal 1950, da mantegnair e promover la lingua da scola uffiziala dal Surmeir, da conservar las particularitads dialectalas dal Surses e Sotes sco era ils usits e las tradiziuns regionalas, da promover «tot serious e sang svilup digl noss pievel» e da porscher lectura en l'idiom surmiran. L'Uniun Rumantscha da Surmeir (fin il 2006) respectivamain l'Uniun Rumantscha Grischun Central (a partir dal 2006) represchenta il Surmeir en il cussegl, en la suprastanza ed, in proporziun a sia fermezza demografica, en la radunanza da delegadas e delegads da la Lia Rumantscha. L'organ uffizial da l'Uniun Rumantscha da Surmeir, surpiglià da l'Uniun Rumantscha Grischun Central, era «Igl noss Sulom» (dapi il 1992 fin il 2007 «Sulom surmiran», sorti da la fusión cun il «Calender surmiran» edi da l'Uniun Rumantscha da Surmeir dapi il 1951), cumpari dapi il 1922 sco periodica cun contribuziuns davart l'istorgia, la cultura e la litteratura. Tranter il 1984 ed il 2006 han collavuratur regiunals da l'Uniun Rumantscha da Surmeir e da la Lia Rumantscha procurà per l'animaziun culturala e linguistica en il Surmeir. Dapi il 2007 dispona la Lia Rumantscha d'in center da cumpetenza regional (Lia Rumantscha Grischun Central) cun dus posts decentralas a Suagnign e Ziràn.

Bernard Cathomas

Meirana

Uniun studentica surmirana, fundada il 26 da fanadur 1931 a Casti sut il num Sesana. L'intent principal da la Sesana era da cultivar il surmiran, sia istorgia e litteratura. Il confundatur ed emprim president è stà Leza Uffer. La Sesana publicava tranter auter las lavurs litteraras da ses commembres. Il 1939 è vegnida fundada l'Uniun rumantscha surmirana da students (emprim president: Duri Loza) sco successura da la Sesana e sco secziun da l'Uniun Rumantscha da Surmeir. Il 1943/44 ha quella uniun obtegnì il num Meirana. L'intent da quella è da cultivar il surmiran e da tgirar il contact tranter ils students ed ils anteriurs absolvents d'universitad. Sias activitads cumpiglian l'organisaziun da champs per students, la lavur publica e la collavuraziun cun la «Talina» (publicaziun da la Romania) e cun il «Corv» (publicaziun da la Ladinia). Il 1958 ha la Meirana disponì d'in agen organ, il «Zundrign», cumpari en in sulet numer. La Meirana organisescha teaters, concerts, referats, discussiuns ed occurrenzas litteraras e collavura regularmain cun la Romania (Surselva Romontscha dapi il 2006) e cun la Ladinia. La Meirana ha tranter auter era promovì la rumantschaziun da las inscripziuns publicas en il territori surmiran. Dal 1990–94 ha ella puspè edi il «Zundrign» ch'ha fusiunà alura cun la gasetta «Punts», la revista mensila da la Giuventetgna Rumantscha.

Gian Peder Gregori

Uniun dals Grischs

Societad affiliada a la Lia Rumantscha, fundada il 1904 a Samedan sin iniziativa da reverenda Otto Gaudenz cun l'intent da cumbatter ils privels da la germanisaziun, la resignaziun ed ils sentiments d'inferiuradad en l'intschess ladin. Il territori d'acziun da l'Uniun dals Grischs cumpiglia l'Engiadina, la Val Müstair e Bravuogn. L'Uniun dals Grischs ha la mira da defender, mantegnair e promover la lingua e tut ils bains culturals dal pievel rumantsch ladin. L'organ uffizial da l'Uniun dals Grischs è il «Chalender ladin» che cumpara dapi il 1911. En pli edescha l'Uniun dals Grischs il «Dun da Nadal», in cudeschet annual per las scolas ladin, e procura e sustegna anc ulteriuras ediziuns. Cun il Chesin Manella a Schlari-gna dispona l'Uniun dals Grischs d'in center administrativ e d'ina libreria. L'organ suprem da l'Uniun dals Grischs è la radunanza generala che sa cumpona da delegadas e delegads da las singulas regiuns e da las vischnancas politicas da l'intschess ladin. Els commembres da l'Uniun dals Grischs en ina u pliras vischnancas furman ina secziun locala da l'uniun regionala. Mintga vischnanca u fracziun pli gronda dal territori ladin ha in represchendant uffizial da l'Uniun dals Grischs (cuvih) ch'ha da tgirar la vita rumantscha en sia vischnanca e ch'ha la funcziun da correspondent ed administratur da l'Uniun dals Grischs. Ulteriuras secziuns da l'Uniun dals Grischs existan era ordaifer il territori ladin, per exempel a Cuira, a Tavau ed a Zug. Contacts informals ha l'Uniun dals Grischs en pli cun la Ladinia (uniun studentica / Turitg), cun la Cumünanza ladina e cun la Conferenza ladina. L'Uniun dals Grischs represchenta il territori ladin en il cussegl, en la suprastanza ed, in proporziun a sia fermezza demografica, en la radunanza da delegadas e delegads da la Lia Rumantscha. Dal 1984–2005 procuravan collavuratur regiunals, engaschads da l'Uniun dals Grischs e da la Lia Rumantscha, per l'animaziun culturala e linguistica en il territori ladin. Dapi l'entschatta 2006 dispona la Lia Rumantscha, independentamain da l'Uniun dals Grischs, d'in center da collavuraziun regionala (Lia Rumantscha Center Ladin) a Zernez.

Gian Peder Gregori

Ladinia

Secziun academica da l'Uniun dals Grischs, seduta da fundaziun sin iniziativa dad Eduard Bezzola il settember 1929 a Zuoz, approvaziun dals emprims statuts il settember 1930 a Zernez. La Ladinia cumpiglia las sutsecziuns dals students ladins a Cuira ed a las universitads svizras, l'uschenumnada Ladinia dals vegls (oz Cumünanza ladina). Ella è commembra da la Societad svizra da studentas e students. Ses intent principal è l'engaschament per la lingua e cultura rumantscha e sias activitads principalas cumpiglian l'organisaziun da champs da students, inscuters e scolaziun e la publicaziun d'in agen organ. Dal 1930–47 ha la Ladinia edi il «Sain Pitschen» (quarter ediziuns l'onn) ed il 1932 il cudeschet da chanzuns rumantschas «Fluors». A partir dal 1964 è cumpari «Il Corv», l'emprim sco periodica autonoma, dapi il 1965 ensem cun la «Talina» (organ da la secziun studentica da la Romania) e dal 1981–85 la «Prouva, giassetta da la Ladinia» (10 ediziuns l'onn). Dapi il 1993 è la Ladinia affiliada a la Giuventetgna Rumantscha.

Gian Peder Gregori

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Poschiavo d'antruras cun vista sin il Piz Varuna.



L'enconuscent viaduct circular da la Viafier retica a Brusio.

Poschiavo e Brusio – las duas vischnancas dal Puschlav

■ Il viadi nà dal Pass dal Bernina maina l'emprim sur la costa sanestra da la Val Puschlav (u cun il tren sur l'Alp Grüm) a San Carlo e Poschiavo. La via cuntinuescha sur Le Prese ed il Lago di Poschiavo a Miralago che furma il cunfin tranter las duas vischnancas. Il vitg da Brusio vegn flancà da vart sanestra da la baselgia da San Romerio e da Viano, da vart dretga da Cavajone. Il pli giudim il Puschlav, al cunfin tar la Vuclina, sa chatta il vitget da Campocologno.

San Carlo

Abitadi en la vischnanca politica da Poschiavo, oriundamain Aino. A San Carlo appartegneva l'entir intschess al nord da Poschiavo fin al Pass dal Bernina, vul dir la *Contrada* interna da Poschiavo ch'era responsabla per tschertas lavurs cuminas, oravant tut per il mantegniment da las vias. A partir dal 1612 ha existì ina chaplania a San Carlo. La baselgia, consecrada a s. Carlo Borromeo, è vegnida erigida il 1613. Il 1908 è San Carlo daventà ina curazia, il 1941 ina plaiv. L'abitadi maina ina scola primara. *Adolf Collenberg*

Poschiavo

Vischnanca politica, circuit Puschlav, district Bernina, situada en ina foppa lada da la part sura dal Puschlav. 824 in *Postclave* (copia); 1140 de *Puschlavio*. Poschiavo cumpiglia, ultra dal lieu principal Poschiavo (il Borgo), las fracziuns dad Angeli Custodi, San Carlo, Cologna, S. Antonio (Li Curt), Annunziata, Prada, Pagnoncini, Cantone, Le Prese e Miralago (parzialmain anc sin territori da la vischnanca da Brüsich). Vischnanca paritetica (maioritad catolica) e da lingua taliana. 1850 2888 abitants; 1900 3102; 1950 4034; 2000 3225. La structura organisatorica da la vischnanca è attestada per Poschiavo gia en il 12avel tschientaner. Ils emprims fragments da statuts communalns dateschan dal 1388. Ils Matschenostas avevan la suveranità territoriala en il 12 e 13avel tschientaner, ils Viscontis tranter il 1350 ed il 1406, ed a partir dal 1408 ha Poschiavo fatg part da la Lia da la Chadé. Ils Puschlavins han elegi l'emprima giada sco suverans in podestà (mastral) il 1524. La vischnanca da Brüsich è sa separada da Poschiavo il 1851.

L'onn 824 vegn menziunà per l'emprima giada ina baselgia cun dretg da batten, il 1286 la baselgia principala da S. Vittore. La baselgia è vegnida reconstruida en stil gotic il 1497–1503, alura transfurmada en stil baroc ed elevada il 1690 ad ina baselgia collegiata. Brüsich ha appartegnì a partir da ca. l'onn 1400 a la plaiv da Poschiavo ed è sa separada

da quella il 1501. La cuminanza refurmada da Poschiavo, constituida enturn il 1550, ha stui fugir il 1623 da las persecuziuns en connex cun ils Scumbigls grischuns ed ha pudì turnar ed eriger in'atgna baselgia pir suenter la sentenza da cumpromiss da las Trais Lias dal 1642. Il 1629–38 è vegnida fundada la claustra da las ursulinas ch'è passada il 1684 a l'Urden dals augustins. La scola publica refurmada è vegnida averta il 1824–25, quella catolica (l'Istituto Menghini) il 1830. Las duas scolas èn restadas separadas tenor confessiun fin il 1967. La pravenda catolica appartegneva a l'uvestgieu da Com ed è passada a la diocesa da Cuir pir il 1870.

Cun la conquista da la Vuclina tras ils Grischuns il 1512 è l'impurtanza strategica e commerciala e quella per il transport s'augmentadas a moda considerabla. La perdita da la Vuclina (1797) ha indebli fermamain l'economia da Poschiavo, basada durant tschientaners sin l'agricultura e l'allevament da muvel. En il 19avel tschientaner èn emigrads numerus Pusciavins en auters pajais da l'Europa ed en l'Australia. En la segunda mesadad dal 19avel tschientaner han erigi pastiers e cafetiers emigrads en la Spagna ed en il Portugal numerusas villas a Poschiavo, daventadas enconuschantas sut il num «quartier spagnol».

In modest svilup industrial, avant la flurizium turistica, han ins gi enturn il 1850 cun ina bieraria (1850/52–1929) ed ina fabrica da tubac (avant il 1840 fin il 1866). Il 1913 è vegnì avert in ospital, reconstrui en la zona da S. Sisto il 1927 e restructurà cumpletamain il 2005. La tipografia Landolfi, endrizzata il 1547, è stada l'emprima dal Grischun. Sin il plaun cultural e sin il champ da la furmazium vegnan las offertas pussibilitadas dal Progetto Poschiavo il 1995–2001 cuntinuadas dal Polo Poschiavo. Il 2005 lavuravan 60 % da las persunas cun activitad da gudogn a Poschiavo en il sectur terziar. Grondas inunaziuns ha Poschiavo subì en ils onns 1566, 1572, 1834 e 1987. Meglieraziun generala 1962–2007. *Arno Lanfranchi*

Le Prese

Abitadi situà en la vischnanca politica da Poschiavo, colonisà en il temp medieval tardiv. Construcziun da la chasa da cura 1856, meglieraziun ed amplificaziun da las installaziuns dals bogns termals 1861. Dapi il 1874 pravenda da S. Francesc, da la quala fa part era l'acclun Cantone. Le Prese sa recumandava sco lieu d'acclimatisaziun ideal surtut pervia da sia posiziun tranter l'Italia dal Nord ed ils instituts da cura da l'Engiadina. Ils bogns sulfurics e termals vegniavan frequentads

stediain fin il 1914. La stagiun turistica dura dal matg fin mez october. Il vitg ha in'atgna scola primara. *Adolf Collenberg*

Brüsich (Brusio)

Vischnanca politica, circuit Brüsich, district Bernina, situada en la part sut dal Puschlav. Brüsich cumpiglia ils aclauns da Campocologno, Zalende, Campascio, Brüsich, Piazza e Miralago a la via dal Bernina ed ils abitadis da Viano e Cavajone situads aut sur la val. 1106 *Bruse*, 1212 *Brusio*, tal. Brusio (uffizial). 1803 620 abitants; 1850 1000; 1900 1199; 1950 1528; 2000 1202.

La confraternità da San Romerio, domiciliada sur Brüsich e menziunada per l'emprima giada il 1055, ha influenzà fermamain la colonisaziun ed urbanisaziun a Brüsich. Gia il 1212 è Brüsich daventada ina vischnanca autonoma cun in agen decan. En il 13avel tschientaner è l'entir Puschlav passà sco feud a l'uvestgieu da Cuir. En il decurs dal 14avel tschientaner è la vischnanca da Brüsich vegnida incorporada a quella da Poschiavo che s'administrava per gronda part autonomamain. Cun la conquista da la Vuclina tras ils Grischuns èn vegnids annectads era ils aclauns da Campocologno (1518) e Zalende (1526). Il 1610 vuleva Brüsich sa separar da Poschiavo, quai ch'è dentant reussì definitivamain pir il 1851. Il 1863 èn vegnids attribuids a Brüsich la val laterala da Sajo (fin alura talian) e l'abitadi da Cavajone. Ecclesiasticamain ha Brüsich appartegnì a la plaiv da S. Lorenzo a Villa di Tirano (Vuclina), pli tard a quella da S. Vittore a Poschiavo. Il 1271 vegn menziunà per l'emprima giada la baselgia da la S. Trinitad, Brüsich è dentant daventada ina plaiv independenta pir il 1501. Vischnanca refurmada il 1590, cun in'atgna baselgia (construida il 1645). En il 17avel tschientaner èn vegnids expulsads ils refurmads che fachevan il 2000 anc damain che 10% da la populaziun. Il 1870 è sa separada la plaiv catolica da Brüsich da la diocesa da Com ed è vegnida incorporada a l'uvestgieu da Cuir. Separaziun da la plaiv da Campocologno 1966. Las Ovras electricas Brüsich (1906) e la Viafier dal Bernina (1910) han effectuà in svilup economic considerabel. Il commerzi da vin, fritga, legums e tubac ha cumenzà a flurir. En ils onns 1960 èn s'aggiuntads l'industria da textiliis ed il traffic sur cunfin (ca. 280 pendularis d'ordifer); tutina è sa reduci il dumber da las persunas cun activitad da gudogn a Brüsich da 730 il 1920 a 450 il 1980. Il 2005 dumbrava la vischnanca puspè 698 occupads (30 lieus da lavur en il sectur primar, 24 en il sectur secundar e 70 en il sectur terziar). *Fernando Iseppi*

San Romerio

Baselgia en la vischnanca da Brüsich ch'ha appartegnì durant in tschert temp a la plaiv da Villa di Tirano e ch'è actualmain proprietad da la vischnanca da Tiraun. San Romerio (antruras S. Remigio) è attestà per l'emprima giada il 1106 (*ecclesia sancti Romedii*). Ella è vegnida consecrada tras l'uvestg da Com, Guido Grimoldi, ch'ha concedì la regla da s. Augustin als *servitores de ecclesia* e reglè las relaziuns cun il clerus da la baselgia-mamma da Villa di Tirano. La tradiziun orala locala ha affidà l'emprim insediament al moviment dals umiliads, ma i sa tracta probablamain d'ina fundaziun episcopala cun la funcziun d'ospizi a la via tranter Tiraun e Poschiavo. San Romerio disponiva d'in territori da ca. 15 km² che cunfinava cun las vischnancas da Poschiavo, Brüsich, Tiraun, Tovo e Grosotto. Il 1237 èn vegnids unids ils bains ed il chapitel da San Romerio cun la comunitad e cun l'ospital da la baselgia da S. Perpetua di Tirano. Ils fraters e las soras da las communitads vegnivan guvernads d'in rector u d'in plevon e sustegnids da numerus famegls en l'urbanisaziun dal terren. Il 1427 è vegnida midada la baselgia, per mancanza da fraters e soras, en ina commenda. Il 1517 ha incorporà il papa Leo X ils bains al santuari da la Madonna di Tirano, accordond a Tiraun il possess ed il dretg da patronadi. *Arno Lanfranchi*

Viano

Abitadi da la vischnanca politica da Brüsich, situà a 1280 m aut sur la val. 843 *Milvianum*, 1187 *Vian*. Per ina precursura romana da la via da sauma dal temp medieval da Tiraun sur Viano e S. Remigi al Pass dal Bernina mancan las cumprovas. Viano ha appartegnì fin il 1387 a Tiraun, alura a Brüsich. Urbanisaziun intensiva tras ils convers (fraters laics) da S. Remigi en il 12 e 13avel tschientaner. Prads e culms domineschan la cuntrada. Il cunfin tranter Tiraun e Brüsich, fixà da las Trais Lias il 1526, n'è betg vegnì renconuschì da Tiraun. La scola primara exista dapi il 1896. L'emprima via charabla a Viano è vegnida construida il 1920. *Adolf Collenberg*

Cavajone

Abitadi sparpaglià en la vischnanca politica da Brüsich, situà a 1200–1500 m sin la spunda sanestra dal Sajo. 1233 *Cavalono*. 1873 103 abitants (14 famiglias senza naziunalitad); 1950 65; 1990 13. En il temp medieval complex dad aclas vuclinais en possess da la chaplutta da Nossadunna da Tiraun. A l'entschatta dal 16avel tschientaner èn

ils cunfins vegnids spustads en favur da Brüsich. Cavajone è restà in abitadi da stad fin il 17/18avel tschientaner. La chaplutta da la S. Crusch, construida il 1777, ha appartegnì fin viaden il 19avel tschientaner a la plaiv da Tiraun, alura a Brüsich. Tranter il 1797 ed il 1815 n'eran ils cunfins a Cavajone ed en la Val dal Saent danovamain betg clers. La chaplutta da Nossadunna aveva vendi a ses temp ses bains a famiglias vuclinais residentas l'entir onn u la stad a Cavajone. Fin il 1874 è Cavajone stà in abitadi senza appartegnientscha statala e cun quai liber da tagliar. Fin il 1874 ha el era furmà ina basa tradiziunala da cuntrabandiers senza organisaziun communal, cun excepziun d'ina guardia champestra e d'in pendrader (da muvel). La via a Cavajone è vegnida renovada il 1968. Il 1997 è vegnida constituida la Fundaziun Pro Cavajone. *Adolf Collenberg*

Campocologno

Culegna en la vischnanca politica da Brüsich, situada al cunfin cun la Vuclina. Tenor la tradiziun orala consistiva Campocologno oriundamain da trais aclauns. En il temp medieval ha appartegnì la culegna a la giurisdicziun da Tiraun. Da quel temp predominava qua l'agricultura. En ils onns 1429–1521 è il cunfin tranter Brüsich e la Vuclina vegnì spustà da la tur da Piattamala vers il sid, da maniera che Campocologno è daventà ina part da la vischnanca da Brüsich. Il 1526 èn vegnids rectificgads ils cunfins tranter Poschiavo e Tiraun. Il 1615 è attestada per l'emprima giada la *contrada di Zalende Campocologno* en in contract da partiziun cun Tiraun. Ils da Campocologno fachevan tradiziunalmain commerzi cun la Vuclina (tranter auter martganzia da cuntrabanda). Il 1902–10 è vegnida construida a Campocologno la centrala da las Ovras electricas Brüsich (da quel temp la pli gronda en l'Europa, reconstruida il 1971), il 1910 ina fabrica da conservas. Ferma emigraziun dapi il 1950. L'antieriura chaplania da Brüsich è ina plaiv dapi il 1964. *Adolf Collenberg*

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Principadi da Liechtenstein

Monarchia costituziunala tranter tradiziun e novas sfidas

■ **L'istorgia dal Principadi da Liechtenstein è marcada da duas dinastias: dals ertavels dals conts da Briganza e dals prinziis von Liechtenstein. Il temp tranter la fin da l'Imperi francon (10avel tschientaner) e l'entschatta dal 17avel tschientaner stat sut l'ensaina dals conts da Briganza (Bregenz) e da lur successors: ils von Montfort (enturn 1200), von Werdenberg (enturn 1258), von Brandis (enturn 1400) e von Sulz (enturn 1510).** Tranter las duas dinastias principalas ha la regiun fatg part durant il 17avel tschientaner dal contadi da Hohenems. Ils onns 1699/1712 marcheschan alura il cumenzament dal domini odiern. Ils prinziis von Liechtenstein derivan oriundamain dal sid da Vienna. En il Liechtenstein dad oz han els chattà territorii suttaress directamain a l'imperatur (tenor dretg concedì il 1396) ed han pudì constituir uschia in'atgna suveranità. Il principadi imperial existà dapi il 1719; dapi l'onn 1806 furma el in stadi autonom. L'onn 1938 ha il prinzi regent transferì sia sedia da la regiun da Vienna a Vaduz.

Principadi da Liechtenstein

Il principadi da Liechtenstein existà sco stadi autonom dapi il 1806 e cun Vaduz sco chapitala. El cumpiglia ina part sura cun sis ed ina part sut cun tschintg vischnancas. Surfatscha: 160 km². Abitants: enturn il 1600 ca. 3800; 1784 4317; 1812 5797; 1852 8162; 1901 7531; 1950 13 757; 1980 25 215; 2000 32 863. La quota da la populaziun residenta estra importava 11 765 (34%) il 2004, da quels eran 3625 Svizzers. Il Liechtenstein vegn definì dapi il 1921 sco «monarchia ereditara costituziunala sin basa democratica e parlamentara». Il Congress (tudestg Landtag) vegn elegì dapi il 1939 tenor il sistem proporzional e quinta dapi il 1988 25 deputadas e deputads. Il 1984 è vegnì accordà il dretg da vuschar a las donnas. La Regenza collegiala sa cumpona dapi il 1965 da tschintg commembers. Il prinzi è il schef da stadi e represchenta quel vers l'exteriur. Per obtegnair vigur legala ston las leschas vegnir sancziunadas dal prinzi, al qual cumpetan ils dretgs d'urgenza, da grazia e d'abolizion. Ecclesiasticamain ha il Liechtenstein appartegnì a l'uvestgieu da Cuira fin il 1997, alura è el daventà in archvestgieu separà da Cuira.

Conquistà e romanisà ensemen cun la Rezia, è il Liechtenstein adina stà collià cun il Grischun tras il Pass da Son Gliezi, dapi il temp medieval tras la Via imperiala che manava dal Lai da Constanza en la Republica en las Trais Lias. Cun l'introducziun da la constituziun dal contadi francon il 806 è Liechtenstein vegnì incorporà en la Rezia Sut, dal 917 fin il 1806 ha el fatg part da l'Imperi german. Da bains e dretgs episcopals en Liechtenstein disponivan tranter auter las claustras da Faveras, S. Gliezi/Cuira e Schänis sco era il chapitel catedral da Cuira. La claustra da S. Gion a Curvalda ha possess fin il 1305, ultra da bains, era il dretg da collatura da Balzers ch'ella ha alura barattà cun quel da Favugn. A partir dal 843, cura che l'uvestgieu da Cuira è vegnì separà da l'archidiocesa da Milaun ed attribui a l'archvestgieu da Magonza, è s'augmentada la preschientscha e l'influenza da regents ed administraturs aristocraticas da lingua tudestga e d'immigrants nordalemannics. En il 13avel tschientaner èn ultra da quai sa domiciliads Gualers al Triessenberg, a Malbun e a Planken. La populaziun rumantscha residenta è uschia vegnida tschinclada da tut las varts, ed il rumantsch è stà condannà a la mort. La midada da lingua è succedida tranter il 9avel ed il 14avel tschientaner; ils toponims tradeschan anc l'ierta rumantscha. Già il 1309/14



Il chastè da Vaduz: sedia dal prinzi da Liechtenstein.

FOTO PIA/FL

èn ils Habsburgs vegnids en possess da Gutenberg a Balzers (fin il 1824). Causa l'aderenza dals prinziis da Liechtenstein cun ils Habsburgs èn Vaduz e Schellenberg respectivamain il Principadi da Liechtenstein restads sut l'influenza da l'Austria fin viaden il 20avel tschientaner. Suenter il 1920 èn ils lioms politics ed economics cun la Svizra daventads adina pli stretgs e dominants. Il 1416 han ils baruns de Brandis cumprà da l'uvestg Hartmann da Cuira, lur parent, tranter auter Vaduz ed il sid, il 1430–37 era il nord dal Schellenberg. L'unitad territoriala odierna è cun quai stada creada. En il 15avel tschientaner han ils Confederads e Grischuns determinà l'istorgia regionala. En la Guerra svabaisa (1499) han la regiun ed ils abitants dal Liechtenstein subì gronds donns. La Confederaziun è s'expandida fin al Rain che furma dapi il 1500 il cunfin tranter Liechtenstein e la Svizra. Il 1510 ha Johann von Brandis vendì Vaduz e Schellenberg a ses nev Rudolf von Sulz. Ils Sulzs han defendì Liechtenstein cunter influenzas reformatoricas nà dal Signuradi. Il 17avel tschientaner è stà caracterisà da malgovern, guerras (Guerra da trent'onns, Scumbigls grischuns), spogliaziuns, incendis, pestilenzas e persecuziuns da strias. Il 1693 ha Jakob Hannibal von Hohenems, fermamain indebità, mess en vendita a las Trais Lias las vischnancas al sid da Vaduz. Interessads a l'acquist eran tranter auter era l'avat da Son Gagl e l'uvestg da Cuira che tschertgava in refugi (*asylum*) en consequenza dals conflicts cun ils protestants grischuns. La populaziun ha però impedi la fatschenta. Suenter l'acquist dal signuradi da Schellenberg (1699) e dal contadi da Vaduz (1712), han ils prinziis dal Liechtenstein obtegnì il 1719 il titel da prinziis imperials.

Adolf Collenberg

Von Montfort

Schlatta da conts dal Vorarlberg dal 13–18avel tschientaner, il possess central dals quals s'extendeva dal nord dal Lai da Constanza sur Briganza e Feldkirch fin en la regiun da Sargans e Feldkirch fin en la Republica en las Trais Lias. L'emprim represchentan dals Montfort è stà Hugo (menziunà il 1188, † avant il 1228), il figl da Hugo von Tübingen (†1182) e dad Elisabeth von Bregenz. El ha surpiglià a chaschun d'ina partiziun effectuada il 1200 tranter el e ses frar Rudolf von Tübingen ina gronda part da l'an-

teriu possess dals conts da Briganza ed ha fundà uschia il rom dals conts von Montfort. Il 1208 è el documentà per l'emprima giada sco tal. A partir dal 13avel tschientaner è el sa stentà, sco pli tard ses figl Hugo (menziunà il 1237–59), d'affirmar ses signuradi. Da quai dattan perditga tranter auter la fundaziun respectivamain l'amplificaziun da las citads residenzials da Feldkirch (enturn il 1190) e da Briganza (vers la fin dal 12avel tschientaner). Partiziuns ereditaras ed il squitsch creschent dals Habsburgs en il davos quart dal 13avel tschientaner han però impedi la realisaziun d'ina atgna suveranità territoriala cumplessiva.

Probablmain en consequenza da la dispita naschida en ils onns 1240 tranter Hugo e sia quindada Clementa von Kyburg, la vaiva da Rudolf (†1243), è sa separà il rom dals conts de Werdenberg da la famiglia Montfort enturn il 1258. El ha surpiglià ils bains e dretgs en la regiun da Sargans, en l'odiern Principadi dal Liechtenstein ed al sid dal Vorarlberg, entant che quels al nord da Feldkirch èn restads en possess da Hugo. Tras in'ulteriura partiziun han fundà il 1272 ils figls da Hugo, Rudolf, Ulrich e Hugo, ils roms da Montfort-Feldkirch, Montfort-Bregenz e Montfort-Tettang. Carrieras spiritualas han fatg sco uvestgs da Cuira Friedrich, Heinrich e Rudolf. La lingua da Montfort-Feldkirch ha tgirà stretgas relaziuns cun l'uvestgieu da Cuira fin a sia extincziun il 1390. Sco davos exponent da la schlatta ha vendì Rudolf il 1375, avant sia mort, l'entir possess da la famiglia als ducas d'Austria. En il 15avel tschientaner èsi reussì a la famiglia Montfort-Tettang da fitgar puspè pe, almain temporarmain, en la Svizra Orientala. Uschia ha ella acquistà il 1402 il signuradi da Werdenberg ed è stada per in curt temp era en possess dal signuradi da Kyburg (pegn austriac). Sco cunertavla dal davos cont de Toggengurg, ha ella survegnì il 1437 tut ils possess retics (las Sis Dretgiras da la Lia da las diesch dretgiras), cun excepziun da Maiavilla. Ma già 50 onns pli tard èn puspè vegnids vendids tut ils novs acquisti.

Martin Leonhard

Von Werdenberg

Famiglia da la noblezza auta dal 13–16avel tschientaner cun bains e dretgs che s'extendan dal Lai Rivaun fin al

Vorarlberg e dal territori retic fin en il spazi da la Svevia Superiura. Ils Werdenberg èn sortids sco agen rom da la schlatta da conts von Montfort en in process da divisiun ch'ha durà da ca. l'onn 1245 fin il 1260. Sco progenitur vala Rudolf de Montfort che cumpara il 1243 en l'Italia en la suita imperiala ed a Cuira a la testa da la noblezza retica. Entant che Hugo (†1255), ses frar pli giuven, ha surpiglià il possess a dretga dal Rain dals Montforts, è Rudolf sa concentrà sin la regiun da Sargans ed il Gollen, danunder ch'el fascheva controlar il traffic per l'Arlberg e per l'Italia. Suenter sia mort il 1247 han sia vaiva Clementa von Kyburg ed ils figls Hartmann (1254–65) e Hugo (1254–80) consolidà il signuradi en quest territori. Il 1250 respectivamain avant il 1260 han els fundà ils centers signurils da Sargans e Werdenberg ed han institui in'atgna administraziun. Clementa e ses figls represchentan, al cuntrari dals Montforts, ina politica antistaufica. En ils onns 1258–60 è la divisiun stada accumulada, en quel mument pia ch'els figls Hartmann e Hugo han surpiglià lur cumpart dal rest dal possess cuminaivel e da la noblezza da servetsch dals Montforts. Pauc pli tard han era els partì l'ierta dals geniturs ed han fundà fin enturn il 1290 las duas lingias principalas dals Werdenberg-Heiligenberg e Werdenberg-Sargans. Socialmain han ils Werdenberg fatg part suenter il 1264 fin viaden ils onns 1380 da la stretga suita e dal signuradi territorial dals retgs habsburgais. A partir dal 14avel tschientaner èn els stads activs, cun success, sco interprendiders militars. La lingua dals Werdenberg-Sargans metteva ils uffizants da Riva ed è stada fin enturn il 1300 en possess dal signuradi da Greifensee ch'ella ha obtegnì, sur Kyburg, da l'ierta da Rapperswil. Suenter il sustegn da l'uvestg da Cuira en l'uschenumnada Faida da Vaz (1335) ed il matrimoni cun la figlia ereditara dals baruns de Vaz, han ils Werdenberg-Sargans survegnì il 1338 da l'uvestgieu da Cuira ils feuds dals de Vaz en la Rezia Sura, tranter auter il contadi da Schons cun il Valragn e Balamburg, la Stussavgia, il Scanvetg ed il chastè dad Ortenstein en la Tumleasta ch'è restà fin il 1516 lur sedia centrala. Il 1342 han ils Werdenberg-Sargans partì il possess. Il rom dals Werdenberg-Sargans-Vaz ha surpiglià, sper l'ierta dals Vazs, la part

dal contadi da Sargans a sanestra dal Rain, entant che quel dals Werdenberg-Sargans-Vaduz ha obtegnì la part a dretga dal Rain cun ils chastels da Vaduz, Blumenegg e Nüziders. En ils onns 1390 è la famiglia vegnida successivamain sut squitsch da l'Austria che aveva interess territorials en la Val dal Rain. En l'uschenumnada Faida da Werdenberg, en la quala l'Austria era s'alliada cun l'uvestg Hartmann ed ils Werdenberg-Sargans cunter ils Werdenberg-Heiligenberg, han quests ultims pers bunamain l'entir possess, cun excepziun da Werdenberg. La Faida da Belmont dal 1352 (cun las battagliais a Porclas ed al Mundaun) era probablmain prurta surtut per motivs d'ierta: Anna, la davosa represchentan dals Willdenbergs e figlia da la Chasa da Sagogn, era maritada cun Hugo IV de Werdenberg-Heiligenberg. Suenter la sconfitta da Jörg en la Guerra da Schons cunter ils subdits revoltants e la destrucziun dal chastè da Balamburg, han ils Werdenberg-Heiligenberg vendì il Schons a l'uvestgieu (1456). La lingua dals Werdenberg-Sargans da sia vart ha stuì impagnar il 1396, sut squitsch finanziar, il contadi da Sargans a l'Austria, curt suenter ch'ella aveva cedì Rheineck ed Altstätten, ed ella ha era stuì surlaschar la chastellania imperiala e sa retrair en lur signuradis en la Rezia Sura.

Martin Leonhard

Von Brandis

Famiglia nobla dal 13–16avel tschientaner, originara da l'Emmental e probablmain parentada cun ils signurs von Lützelflüh, menziunads ca. 1120–61. En il 13avel tschientaner possedeavan ils Brandis proprietads en la part sura e centrala da l'Emmental, enturn il chastè da Brandis en vischinanza da Lützelflüh. En il 15avel tschientaner èn els daventads impurtants per il Grischun, suenter avoir surpiglià ina gronda part dals bains e dretgs dals conts von Werdenberg-Sargans. Lur pretensiuns sa basavan sin la lètg da Wolfhart I cun Agnes von Montfort-Feldkirch, vaiva da Hartmann von Werdenberg-Sargans. Il 1391 han ils figls da Wolfhart, Ulrich Thüring (1375–1408/09) e Wolfhart IV, survegnì, l'emprim en furma da pegn, il signuradi da Blumenegg da lur mezs frars fermamain indebitads. Alura èn suandads il contadi da Vaduz (1399), il signuradi da Sonnenberg en la Val Druschauna (1412) e da Schellenberg (1416). L'ultim acquist pli grond ha fatg il 1437 Wolfhart V cun ina part d'ierta al signuradi da Maiavilla ed al chastè da Marschlins. Pauc temp pli tard ha el cumenzà a liquidar sias proprietads bernaisas. Sco quai che ses antenats han fatg cun Berna, èn era el e surtut ses figl Ulrich s'arranschads cun lur vischins pussants, ils Austriacs, senza però rumper las relaziuns tradiziunalas cun Berna. Vers la fin dal 15avel tschientaner è la famiglia vegnida pli e pli en difficultads economicas e politicas ch'han culminà en la gronda sconfitta cunter ils Confederads en la Guerra svabaisa (1499). Il 1509 ha Johannes, il davos represchentan da la famiglia, vendì il signuradi da Maiavilla a la Trais Lias, il 1510 il signuradi da Schellenberg, Vaduz e Blumenegg a ses nev Rudolf von Sulz.

Martin Leonhard

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Bivio – abitadi al spartavias per ils Pass Güglia e Set

Il vitg da Bivio è situà entadim il Surses, al pe dal Pass dal Güglia che maina en l'Engiadina e dal Pass dal Set che maina en la Bergiaglia. Il num da l'abitadi renviescha al spartavias per quests dus pass ch'èn omadus stads d'impurtanza en il temp roman e medieval. Suenter la construcziun da la Viamala (1473) è il traffic da transit sa spustà da la Via Sura (Set e Güglia/Malögia) a la Via Sut (Spleia e S. Bernardin). Cun la construcziun da la via dal Güglia il 1820–26 ha il Pass dal Set pers definitivamain si'impurtanza. La situaziun geografica declera er, daco che Bivio ha enconuschì ina convivenza da las trais linguas chantunales sco strusch in auter lieu en il Grischun.

Beiva (Bivio)

Vischnanca politica, circuit Surses, district Alvra, situada al pe dal Güglia e dal Set, cun las culegnas perifericas da Stalveder, Mott, Cavreccia e Valetta da Beiva. Il num Beiva deriva dal latin *bivium*, rumantsch duas vias, spartavias. Ca. 840 *de stabulo Bivio*, fin il 1895/1903 talian *Stalla*. 1808 182 abitants; 1850 211; 1900 141; 1950 224; 2000 204. Il Set ed il Güglia al sid da Beiva vegnivan utilisads durant il temp roman per transports cun chars. En l'«Urbari curretic dals bains imperialis» (ca. 840) cumpara Beiva sco lieu d'alloschi e da deposit. Da quel temp, il pli tard dal 12avel tschientaner, datescha l'ospizi sin il Set, sur il qual èn arrivads pasturs e colonists bregagliots a Beiva. Ils abitants da questa regiun, cuverta anc fermamain da guaud en il 13 e 14avel tschientaner, tgiravan contacts cun vischins rumantschs dal Surses e da tschella vart dal Güglia e cun vischins tudestgs domiciliads da l'autra vart dal Munt Stalla en la Val d'Avras. Ecclesiasticamain appartegneva Beiva a Tinizong, il 1219 ha la vischnanca dentant survegnì in agen predigtant. Il 1459 è attestada la baselgia da S. Gagl. Refurmaziun avant il 1584. La vischnanca anc oz paritetica ha dentant obtegnì ina baselgia reformada pir il 1675. Vers la fin dal 15avel tschientaner disponiva la part sura dal Surses d'ina atgna dretgira civila e d'in agen mastral; ella suttasteva al prefect episcopal da Riom mo en cas criminalis. Fin il 1851 ha Stalla (Beiva e Murmarera) furmà cun Avras in cumin entaifer la Lia da la Chadé che constituiva ina dretgira auta ensemen cun la dretgira da Ramosch en l'Engiadina Bassa. Fin a l'avertura da la Viafier da l'Alvra (1903) èn stads l'allevament da muvel ed il traffic da transit da gronda impurtanza per ils ports da Beiva. Dapi il 15avel tschientaner è la vischnanca da Beiva ina cuminanza plurilingua. Durant l'Emprima Guerra mundiala èn sa



Arrivada a l'ospizi dal Pass dal Güglia (foto enturn 1880).

domiciliads ils davos purs bregagliots a Beiva, la plipart en culegnas perifericas. Cun il svilup dal turissem (emprim runal da skis il 1959) è creschida era la populaziun da lingua tudestga (2000 ca. 55%) e sa sminuida quella da lingua taliana (2000 ca. 29%). Il 2000 eran ca. 60% da las persunas cun activitad da gudogn a Beiva occupadas en il terz sectur. La populaziun rumantscha è sa diminuida da 68% (meglra lingua) il 1880 a 12,3%/34,3% (meglra lingua/tuttas indicaziuns) il 2000.

Jürg Simonett

Pass dal Set

Passadi a 2310 m che collia Beiva en il Surses cun Casaccia en la Bergiaglia, talian Passo del Settimo, tudestg Septimerpass. Entschatta dal 13avel tschientaner *Setmunt*. Gia per il temp da bronz è attestà in traffic commercial tras il Surses e sur ils pass alpins. L'«Itinerarium Antonini», in register da las vias stabili a la fin dal terz tschientaner s.C. a basa da documents pli vegls, menziunescha in tschancun tranter las staziuns da *Tinnetione* (Tinizong/Surses) e da *Muro* (probablmain Müräia/Promontogno) che correspunda cun gronda probabilitad a la ruta dal Set respectivamain dal Güglia. Ina cultura cun chats dal temp roman tempriv, scuverts sin il Set, cumproma ch'il pass vegniva frequentà durant il temp roman. Sin fundament da ruderas e d'in tschancun da via taglià en il grip, scuverts sin la spunda sid dal pass, presuppona

Armon Planta ch'il Set saja vegnì frequentà gia en il temp roman cun chars. La perscrutaziun moderna è però sa distanziada da quell'ipotesa, tant pli ch'ìls fastiz al Set pon strusch persvader, surtut en cumparegliaziun cun quels al Pass dal Güglia.

L'«Urbari curretic dals bains imperialis» (ca. 840) menziunescha a la ruta dal Set in albiert a Murmarera, ina stalla al spartavias a Beiva ed ina duana a Castelmur. Igl è intschert, schebain il *Xenodochium sancti Petri*, attestà en la medema funtauna, correspunda a l'ospizi dal Set. Enturn il 1100 èn documentads in nov ospizi ed ina nova chaplutta al Set. Dapi l'onn 960 controllava l'uvestg da Cuira il Set sco era las vias d'access al nord ed al sid dal pass; il retg Otto I aveva cedi ad el la Bergiaglia cun la duana. Il 1209 ha il retg Otto IV liberà ils servs e la servitid da l'ospizi da l'obligaziun da pajar taglias e da dar albiert, accentuond qua tras l'impurtanza dal Set ch'è stà il pass grischun il pli impurtant dal temp aut-medieval fin viaden ils onns 1470. A partir dal 12avel tschientaner èn arrivads Bregagliots sur il Set a la tschertga da nov territori da colonisaziun ed han occupà il stgalim sura dal Surses. Era la senda da la Val d'Avras sur il Forcellina (2672 m), orientada vers il sid fin en il 19avel tschientaner, manava a l'ospizi sin il Set ch'ha existì probablmain fin viaden il 16avel tschientaner. Il 1359 ha l'uvestg Peter I Gelyto obtegnì da l'imperatur Carl IV in mandat che scumandava a las

citads imperialas da duvrar auters pass che quel dal Set. Il 1386 han commerziants milanais tschertgà ina ruta da guntgida al Gottard ch'era daventà malsegir en consequenza da las Guerras da Sem-pach. Il 1387 ha l'uvestg Johannes II Ministri obligà Jacob de Castelmur da construir ina via da salaschada da Tinizong a Plür, adattada per chars cun chargias da fin a 36 rups (ca. 300 kg u duas chargias e mez da sauma); Castelmur ha obtegnì per recumpensa il dretg d'incassar ina taxa da via. Ma il Set para d'esser daventà prest puspè ina via da sauma. Cun la construcziun da la Viamala (1473) è sa spustà il traffic da transit da la Via Sura (Set e Güglia/Malögia) a la Via Sut (Spleia e S. Bernardin), privond il Set da si'impurtanza originara. Crudadas da crappa, bovas e lavinas han rendì savens nunpussai-vel il passadi dal Set, surtut da la vart sid dal pass.

Dal traffic da martganzia sur ils pass s'occupavan ils ports. Il transport sur il Set vegniva garantì dal port da Stalla (Beiva e Murmarera) e da quel da la Bergiaglia superiura. En il temp modern han ins alura transportà dapli rauba sur il Spleia ed il S. Bernardin che sur il Set ed il Güglia. Suenter il 1820 è vegnida costruìda ina nova via sur il Güglia ed il Malögia, avrind surtut l'Engiadina al traffic da transit. Projects per ina via ed ina viafier sur il Set n'èn mai vegnids realisads. Durant l'Emprima Guerra mundiala èn arrivads ulteriurs purs da la Bergiaglia sur il Set ed èn sa domiciliads en la vischnanca da Beiva uffizialmain da lingua taliana.

Jürg Simonett

Pass dal Güglia

Passadi a 2284 m che collia Beiva en il Surses cun Silvaplauna en l'Engiadina'Ota. 1365 *an den Berg Julien*. Gia per il temp da bronz è attestà in viv commerzi tras il Surses e sur ils pass alpins. L'«Itinerarium Antonini» (terz tschientaner s.C.) menziunescha ina ruta cun las staziuns da *Tinnetione* (Tinizong) e *Murus* (probablmain Castelmur-Müräia/Buond) che correspunda probablmain a la ruta sur il Güglia respectivamain a quella sur il Pass dal Set. Exchavaziuns sin il Güglia han mess a la glisch in sanctuari roman che cumpigliava era las duas colonnas anc oz visiblas a la via dal Güglia. Numerus chats da munaida e restanzas da vias romanas al nord da l'ospizi sco era sur Segl e Silvaplauna laschan presumar ch'il Güglia era in dals paucs pass alpins frequentads intensivamain gia en il temp roman (cumbain mo cun chars a duas rodas per surmuntar las vias stippas e crappusas). Igl è pussaivel ch'ins preferiva la ruta dal Güglia per transportar la martganzia vers il nord e turnava cun ils chars vids sur il Pass dal

Set pli stip e pli privlus (lavinas), ma pli direct (scursanida Surses-Bergiaglia). Tenor la legenda existiva ina chaplutta da S. Bastiaun sin il Güglia (betg cumprovada). L'«Urbari curretic dals bains imperialis» (ca. 840) menziunescha in albiert a Murmarera, faners a Beiva ed a Segl sco era la staziun da duana a Castelmur. I n'è betg cler, schebain il Set u il Güglia aveva dapli impurtanza. En il temp dal traffic da sauma n'eran las difficultads topograficas dal Set en mintga cas anc betg uschè relevantas. Cun la construcziun d'ina via charrabla sur il Set ha il Güglia pers definitivamain sia impurtanza suenter il 1387.

L'associaziun dals ports a la Via Sura (Set e Güglia/Malögia) cumpigliava las quatter corporaziuns da transport a la ruta dal Set, ma betg quella da l'Engiadina'Ota a la ruta dal Güglia. Cun l'amplificaziun da la Viamala a la Via Sut sur il Spleia ed il S. Bernardin (1473) è il Güglia daventà anc pli pauc impurtant per il traffic da transit. El ha però mantegnì sia impurtanza sco access a l'Engiadina'Ota ed al Pass dal Bernina. L'emprim è vegnida schlargiada per chars la Via Sut, pli tard era la Via Sura. Ins aveva preferì il Güglia al Set per motivs topografics e politic-statalis, vul dir per betg dischavantagiar l'Engiadina. La via dal Güglia è vegnida costruìda il 1820–26, l'access davent da Cuira e la via tras la Bergiaglia però pir suenter las auas grondas dal 1834 ch'han destrui quasi totalmain la Via Sura. Il Chantun ha sustegnì per l'emprima giada in grond project da vias ed affidà la direcziun a Richard La Nicca ed Ulysses Gugelberg von Moos.



L'enconuschenta Punt Romana sin via al Pass dal Set.

En il decurs dal 19avel tschientaner han ins amplifitgà parzialmain la via dal Güglia. A partir dal 1850 è il pass daventà impurtant oravant tut per il traffic da transport als novs lieus da cura da l'Engiadina'Ota, entant ch'il traffic da transit alpin preferiva il Spleia. L'avertura da la Viafier da l'Alvra (1903) ha quasi interrut il traffic sur il Güglia. Ils plans per ina viafier sur il Güglia n'èn mai vegnids concretisads. Cura ch'il Grischun ha stuì avrir il 1923 sut pressium da la Confederaziun ina ruta da transit per l'automobil, è el sa decidì per il Güglia. Dal 1935–40 è la via dal Güglia vegnida sanada per il traffic creschent. Ella è vegnida catramada sco emprima via da pass da las Alps svizras. Oz è il Güglia la colliaziun principala tranter il nord dal Grischun e l'Engiadina.

Jürg Simonett

Lexicon Istoric Retic

Il LIR cumpiglia bundant 3100 artigels (geografics, tematics, artigels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Bivio ozendi.

FOTO R. CANAL

«A Trun sut igl ischi» – La fundaziun da la Lia Grischa (1424)

■ L'onn 1395 è vegnida fundada a Glion la Lia Sura. L'onn 1424 han l'avat da Mustér Pieder de Pultengia ed ils signurs Hans Brun de Razén e Hans de Sax-Mesauc renovà questa lia a Trun e fundà uschia la Lia Grischa.

Lia Grischa (Lia Sura)

La Lia Grischa – numnada oriundamain Lia Sura – è sa constituida tras l'unìun da 21 cumins da las vals dal Rain Anteriu e Posteriur, dal Mesauc e Calanca. Trais chaus feudals da la Val dal Rain Anteriu, numnadamain Johannes von Ilanz, avat da Mustér ed iniziand principal, il barun Ulrich II de Razén ed il barun Albert de Sax-Mesauc en s'unids ils 14 da favrer 1395 cun deputads dals cumins a Glion en ina lia perpetua, a la quala èn s'associads tschintg dis pli tard era il cont Johann de Werdenberg-Sargans cun ils Libers da sur il guaud (da Flem).

Il motiv per quest'allianza è stà ina seria da charplinas tranter ils signurs de Belmont, Werdenberg e Razén e l'uvestg da Cuira, ma era entaifer la noblezza bassa. Il mastergn, il commerzi ed il traffic avevan qua tras subì gronds donns. Cun la lia stipulada a Glion vulev'ins restabir la segirezza sin las vias, pussibilitar il commerzi ed il traffic liber e garantir il dretg da l'um cumin davant dretgira. Las cunvegns per il mantegniment da la pasch publica cumpigliavan puniziuns severas per assassinats, ladernitschs ed incendis. Ils 4 d'avrigl 1399 è era il signuradi dal Crap S. Barcazi, suttemess al cont de Werdenberg-Heiligenberg, s'unì cun sia gliued a Trin e Termin e cun la duana a La Punt/Rehanau a la Lia Sura. Ils 24 da matg 1400 è la Lia Sura, che cumpigliava ussa tranter auter l'entira Val dal Rain Anteriu, s'accordada cun Glaruna da garantir als martgadants e commerziants da muvel glarunais la segirtad sin las vias da pass vers il sid (Veptga, Pass dal Lucmagn, Cuolm Val).

Ils 16 da mars 1424 è la Lia Sura vegnida reafirmada, approfondada ed amplifigada a Trun sut l'ischi legendar, e sa numna dapi alura Lia Grischa. Il num deriva probablamain dals vestgms producs dal ponn grisch per l'um cumin, pli tard è el alura vegnì attribui a tut ils Grischuns ed al chantun Grischun. Ultra dals trais signurs feudals principals avevan ussa era las vischnancas ed ils Libers da sur il guaud ina represchentanza pli ferma a Trun. Ils conclus dal 1395 èn vegnids amplifigads cun resoluziuns d'admoniziun e d'agid vicendaivel, per garantir la protecciun dal possess ed ina meglra giurisdicziun. Trun è vegnì designà sco sedia d'ina dretgira imparziala da la Lia Grischa che serviva da dretgira d'appellaziun. Da las trais Lias reticas, reunidas il 1524 en la Republica da las Trais Lias, possedeava mo la Lia Grischa ina pussanza giudiziala centrala; ella è era stada la suletta ch'aveva introduci ina giurisdicziun civila unitara.

Il 1424 èn s'associadas era la Val dal Rain Anteriu, la Mantogna-Tusaun, la Val Schons ed il Valagn cumplainamain a la Lia Grischa. Cun ils pass da transit dal Spleia e dal S. Bernardin, che colliavan, ultra dal Lucmagn, il territori da la Lia Grischa cun il sid, ha quella cuntanschì dapli impurtanza geostrategica. Cun il consentiment dal cont Johann de Sax è la part sura dal Mesauc entrata ils 23 d'avrigl 1480 en la Lia Grischa ch'ha rinforzà la collavuraziun en il territori retic cun sa colliar cun parts da la Lia da la Chadé (1406 e 1425), cun Cuira ed ils Quatter Vitgs (Eigias, Zezras Termin, Vaz Sut, 1440) e cun la Lia da las Diesch Dretgiras (1471).

La Lia Grischa è daventada la forza principala en las activitads exteriuras da l'entir Grischun (campagnas militaras en Vuclina 1486–87, contract da mercenariat cun la Frantscha 1496, alianza cun la Confederaziun 1497, campagnas milanaisas 1512). Ina lita cun la Lia da la Chadé per la precedenza è vegnida reglada il 1550 cun in cumpromiss: en missiun a l'exteriur ed en campagnas militaras aveva la Lia Grischa ina posiziun da



Fundaziun da la Lia Grischa. Maletg en la Cuort Ligia Grischa a Trun (enturn 1700).

preferenza; en dumondas da sigillaziun eran las duas lias da princip egualas, en la pratica aveva dentant la Lia da la Chadé cun ses bundsresident in avantatg, perquai che Cuira era pli savens il lieu da reuniun dals deputads esters.

Entaifer la Lia Grischa avevan las regiuns dals anteriurs chaus feudals principals (Cadi, Lumnezia-Foppa-Flem, Vuorz-Sursaissa-Razén) in ferm surpais politic, perquai che mo gliued da questas trais regiuns aveva da vegl ennà il dretg d'acceder en roda da dus onns a l'uffizi suprem dal landrehter (chau-derschader e chau-lia). Famiglias d'autras regiuns transferivan perquai savens lur domicili en ils lieus cun tals privilegis. Il 1798 è sparida la Lia Grischa sco part dal Stadi liber da las Trais Lias, ella ha però survivì sco part da l'organisasiun politica dal chantun Grischun dal 1803 fin il 1851/54.

Martin Bundi

Johannes von Ilanz

Avat da Mustér dal 1367–1401, numnà *filius domini Enzii Maradie*. Suenter l'assassinat da ses predecessur, Jakob Buchhorn, tras gliued da la Chadé e l'incendi da la claustra e da la baselgia (1387), ha Johannes von Ilanz restaurà la claustra. El ha revocà la concessiun contestada da las minieras da Medel ad abitants da la Svizra Centrala ed ha dubl il 1371 il pegn als Blegnais per las alps claustrales sin il Pass dal Lucmagn, nua ch'el ha fundà il 1374 in ospizi. Il 1376 ha el confermà in'allianza da transit tranter la Cadi e la Val dal Blegn, rinforzand il moviment communal (participaziun dal mastral e dals ministerials); il 1395 è el stà in dals confundaturs da la Lia Sura/Lia Grischa (dals signurs) a Glion (amplifigada il 1424 a Trun). Cun la Cadi èsi reussi a Johannes von Ilanz il 1401 da liberar la claustra da l'avugadia dals Werdenbergs.

Ursus Brunold

Albert de Sax (Mesauc)

Attestà per l'emprima giada il 1395, † 1406. Figl da Caspar. Frar da Johann. Albert de Sax è sa participà cun ses signuradis da la Lumnezia, da la Foppa e da Flem al sistem d'allianza ch'è sa constitui enturn il 1400 en las vals dal Rain. Ils 14 da favrer 1395 ha el conclus in'allianza cun l'avat e la vischnanca da Mustér sco

era cun ils signurs de Razén e lur gliued. Gia il favrer 1395 èn s'alliads cun els ils conts de Werdenberg-Heiligenberg ed il 1400 Glaruna. Albert de Sax è il sulet partenari preschent en tut ils contracts d'allianza. A partir dal 1400 signescha el ensemen cun ses frars Johann e Donat. Il 1403, suenter la mort dal duca Gian Galeazzo Visconti da Milaun, han ils Sax conquistà la fortezza da Blinzuna. A partir dal 1406 han els stuì tegnair avert quella per ils Confederads ch'avevan entant occupà la Leventina. Albert de Sax è vegnì assassinà en la Torre Fiorenzana sper Grono, residenza d'ina lingia laterala dals Sax (aderents da Milaun?).

Florian Hitz

(Brun) de Razén

Famiglia da libers d'auta noblezza dal 12–15avel tschientaner, estinguida il 1458. Numnada tenor il chastè da Razén, attestà per l'emprima giada il 1282. Tudestg Rhäzüns; la scripziun «Räzüns» è antiquada. Il num da famiglia Brun deriva probablamain da barun (il stan ierarchic-social dals Razén). La derivanza da la famiglia n'è betg clera. A partir da la mesadad dal 13avel tschientaner era ella ina da las famiglia noblas las pli respectadas en la Rezia. Ils baruns, versads en faidas, èn vegnids engaschads en ils onns 1330 l'emprim da l'uvestg da Cuira per cumbatter cunter Donat de Vaz, alura da l'avat da Mustér cunter ils Quatter Chantuns. Da quel temp enavant è creschida la paisa politica e militar da la famiglia.

En il 14 e 15avel tschientaner era ella parentada cun ils signurs de Sax-Mesauc, ils Orellis, Belmonts, Montals, Matschs, Werdenbergs e Stoffelns. La fossa dals baruns de Razén sa chattava a Razén, sper l'antieriura baselgia parochiala da S. Paul. Il signuradi da Razén vegniva dà en ierta mintgamai mo ad in sulet member da la famiglia. L'emprim represchentant attestà da la famiglia è Arnold (menziunà il 1137–39). Cun Heinrich III, *nobilis vir* (menziunà il 1251–88), èn ils de Razén daventads pli perceptibels: quel ha manà ina coaliziun da nobels retics cunter l'uvestg da Cuira ch'è vegnida battida il 1255 a Domat. Sia fossa aveva el tschernì il 1288 en la catedrala da Cui-

ra. Suenter il 1350 han ils de Razén extendì lur domini vers la Surselva, la Tumeleastga e la Mantogna. Il represchentant il pli impurtant da la famiglia è Ulrich II. Lungas charplinas cun l'uvestg da Cuira (oravant tut per il domini en la Tumeleastga e sin la Mantogna) a la sava dal 15avel tschientaner han consumà dal tuttatfatg las forzas militaras ed economicas dals baruns e terminà lur fasa da success. Il 1395 han las charplinas surmenziunadas manà a la fundaziun da la Lia Sura (dals signurs), la precursura da la Lia Grischa ch'era ils baruns de Razén han affirmà tras engirament a Trun il 1424. Suenter la mort da Gieri (il davos represchentant masculin da la famiglia) l'onn 1458, è il signuradi da Razén vegnì dividi.

Linus Bühler

Pieder de Pultengia

Menziunà per l'emprima giada ils 11 da november 1398, † 17 da december 1438. Figl da Claus, chavalier. Attestà en ils onns 1398–99 sco custodi da la claustra da Mustér, da la quala el è stà avat dal 1402–38. Pieder de Pultengia ha laschà renovar la baselgia da S. Maria, donnegiada tras l'incendi dal 1387, sco era la chaplutta da S. Gada. En la liturgia quotidiana cultivava el la spiritualitad benedictina. En il grond schisma è Pieder de Pultengia stà indecis; el ha probablamain assistì al Concil da Constanza ed ha laschà confermar il 1418 ils privilegis da la claustra tras il papa Martin V. Il 1408 ha el obtgèni la renconscient-scha dals vegls dretgs claustrals da vart dal retg Ruprecht, il 1413 ed il 1433 era da vart dal retg Sigismund ch'ha probablamain exprimi uschia sia apprezzaziun per l'ospitalitad concedida ad el durant sias campagnas en l'Italia.

En las Guerras appenzellais dal 1403 ha Pieder de Pultengia prendì partida per Sviz. Il 1406 ha el negozià cun Blegn, ensemen cun la vischnanca da Mustér, davart la renovaziun dal contract da traffic dal 1376. Il 1407 è el entrà cun Uri en in dretg territorial, senza pudair garantir la duraivilamain la Val d'Ursera a la claustra. Dal 1412 fin il 1419 han entretschaments en la Faida da Razén turmentà l'avat e l'abazia. Cun l'avat Pieder de Pultengia sco emprim signader è la Lia Grischa vegnida renovada ed amplifigada il 1424 a Trun. En il spiert dal moviment communal per la pasch dal pajais ha el intermedià cun success suenter il 1424; percenter n'ha el betg pudì sa retrair dal tuttatfatg dals cumbats politics per la pussanza. Il 1425 ha el sustegnì cun truppas da l'abazia e da la Lia Grischa ina campagna da Confederads en la Val d'Ossola. Perquai han quels da la Svizra Interna obtgèni reducziuns da dazi fin a Milaun era per l'abazia. Cunquai che Pieder de Pultengia ha promovì, sco ses antecessur Johannes von Ilanz, il svilup communal, proseguind ina politica d'allianzas, ha el appartegnì als avats da Mustér ils pli impurtants. Ad el ha Ludovic Hendry deditgà ses roman istoric «Pieder de Pultengia» (1964).

Lothar Deplazes

Johann de Sax

Attestà per l'emprima giada il 1400, † 1427 a Castrisch, barun, a partir dal 1413 cont. Figl da Caspar. Frar dad Albert. ∞ Katharina nata de Werdenberg-Bludenz, cunertavla dal cont Friedrich VII de Toggenburg. Ensemen cun ses frars Albert e Donat e cun ses cusrin Kaspar (il qual n'era dentant betg participà als bains en Surselva) cundomini sur il Mesauc e sur Glion, la Foppa, la Lumnezia, Val S. Pieder, Castrisch e Flem, a partir dal 1413 domini exclusiv. Cundomini sur Blinzuna 1403–19. Johann de Sax è stà participà al svilup da la Lia da Glion dal 1395 a la Lia Grischa dal 1424 (signatari). Anna-Maria Deplazes-Haefliger

Dietas: Lia Grischa

La dieta da la Lia Grischa era sortida da la dretgira da cumpromiss. Ella vegniva convocada a Trun per il di da s. Gieri (23

d'avrigl, Jörgentag), ma vegniva salvada de facto il pli savens il matg. Questa dieta era responsabla per la legislaziun (ad referendum) e per affars administrativs currents. Ella era l'autoritad electorala per ils uffizis federals da la Lia Grischa, repartiva las entradas ed expensas sin las dretgiras autas, classificava ils plis ed exercitava la dretgira da cumpromiss. Sco autoritad politica cumpigliava ella il landrehter, ils 27 mess ed ils trais chauslia envidads, e sco dretgira d'appellaziun sa cumponiva ella da 18 commembers sut il presidi dal landrehter.

Adolf Collenberg

Chaus feudals da la Lia Grischa

L'avat da Mustér ed il signur da Razén proponivan en roda quatter, il barun de Sax(-Mesauc) trais candidats per l'elecziun annuala dal chau da la Lia Grischa, fundada il 1424. La dieta da la Lia Grischa elegeva alura in da quels candidats sco chau-lia/landrehter. A partir dal 1538 avevan las dretgiras da la Lumnezia, da la Foppa e da Flem en roda il dretg da proponer in candidat sco chau-lia, resalv fin alura a lur signur feudal, il barun de Sax(-Mesauc). Dapi il 1702 stueva l'administratur austriac da Razén prestar sarament sin la constituziun da la Lia Grischa per pudair far diever da ses dretg da proposta (snegà ad el sulettamain il 1701). L'elecziun dal landrehter aveva provocà savens tensiuns en ils cumins paritetics (Lumnezia, Foppa, Flem), perquai ch'ils catolics pretendevan, sper ils dus chauslia reformads da la Lia da la Chadé (il bundsresident) respectivamain da la Lia da las Diesch Dretgiras (il bundslandamma), almain in chau catolic per la Republica da las Trais Lias.

Adolf Collenberg

Dretgira d'appellaziun: Lia Grischa

Enconuschna dapi il 1395, cun caracter da dretg public en la Lia Grischa dapi il 1424. Attestada il 1438 per l'emprima giada sco «Dretgira dals 15», presidiada dal chau-lia (landrehter). Attestada gia enturn il 1490 sco dretgira d'appellaziun per cas civils ed extendida il 1529 a 18 commembers. Ella sa radunava al term s. Gieri (23 d'avrigl) en l'antieriura curt claustrala a Trun e, tenor balsegn, era utrò (per exempel a Tusaun u Andeer). Fin enturn il 1500 è ella stada l'emprima istanza, sch'ina dretgira era sezza partida, a partir dal 1535 mo ina curt d'appellaziun. Ultra da quai survegliava ella l'execuziun correcta dal dretg da la Lia Grischa e da la Brev da federaziun dal 1524 (mo en la Lia Grischa).

Adolf Collenberg

Vopnas: Lia Grischa

L'emblema original da la Lia Grischa era probablamain ina cruscha d'aur e d'argent cun bratscha fin a l'ur sin fund cotschen – ina copia da la cruscha imperiala che punctuava l'appartegnientscha a l'Imperi respectivamain la loialitad dals emprims manaders da la Lia Grischa visavi quel. Gia enturn il 1500 vegnivan duvradas duas furmas da vopnas: ina da quellas represchentava ina cruscha alva e grischa sin fund cotschen, l'autra in scut sfendi en grisch ed argent. Omaduas èn vegnidas duvradas fin en il 19avel tschientaner. Il grisch da la Lia Grischa è vegnì remplazzà il 1564 per motivs eraldics cun nair (cf. sala dal cussegli a Tavau).

En il 17avel tschientaner ha il cotschen imperial fatg plazza ad in grisch u nair argentà. Il portensaina è s. Gieri.

Adolf Collenberg

Lexicon Istoric Retic

Il LIR cumpiglia bundant 3100 artigels (geografics, tematics, artigels da famiglia e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Exchavaziuns romanas sin l'areal Ackermann (Welschdörfli).

FOTO SERVETSCH ARCHEOLOGIC DAL GRISCHUN



Maletg da paradid dal Maister da Vuoz en il battisteri da la catedrala (enturn 1330).

Da la preistorgia al temp autmedieval

Istorgia da la citad da Cuira, 1. part

■ La citad da Cuira sa chatta en la Val dal Rain a l'entrada dal Scanvetg sin il cugn alluvial da la Plessur. Las culegnas preistoricas e romanas sa chattavan, sco la citad veglia actuala, tranter il Pizokel ed il Mittenberg. La citad s'extenda dapi la mesadad dal 19avel tschientaner vers la planira dal Rain e vers la spunda sulegliava dal Lürlibad. En il quart tschientaner s.C. è ella menziunada per l'emprima giada sco *Curia* en l'«Itinerarium Antonini». La Curt, situada sin in grip sur la citad, è vegnida incorporada il 1852 a la citad da Cuira, l'abitadi da Salsal il 1939 (avant part da la vischnanca da Maladers). Las fracziuns da Masans (cumplainmain) ed Araschga (parzialmain) appartegnan da vegl enà a Cuira. La citad pauc industrialisada è in center dal traffic stradal e ferroviari, la sedia da l'investgieu, d'ospitals e d'ina piazza d'armas federala sco era il center scolastic ed administrativ dal chantun Grischun. La chapitala dal Grischun triling è dapi il 1803 era la sedia da la Regenza e dapi il 1820 il lieu da reuniun stabel dal Cussegl grond. Center regiunal impurtant da differents servetschs. Sco center da la Val dal Rain Grischuna dar Cuira lavur a pendularis da tut il Grischun dal Nord.

Preistorgia

Ils emprims fastizs umans (chatschaders) dateschan dal temp paleolitic tardiv (11–10 000 a.C.) ed èn vegnids scuverts il 1998–99 en l'intschess dal Marsöl. En il territori da Cuira han ins mess a la glisch dus abitadis preistorics impurtants: in da quels sa chattava da la vart sanestra da la Plessur en il Welschdörfli, l'auter da la vart dretga en l'areal dal Sennhof/Karlhof en la citad veglia. Era en l'intschess da la Curt èn documentadas restanzas d'abitadis preistorics, mo ina pitschna part da quels è dentant vegnida exchavada.

En il Welschdörfli, al pe dal Rosenhügel e dal Pizokel, han ins scuvert tranter il 1967 ed il 1990 restanzas remartgablas d'abitadis preistorics. En l'areal Ackermann han ins chattà en ina profunditad da 5 m in abitadi dal temp neolitic. Da grond'impurtanza èn qua oravant tut ils fastizs d'ina cultivaziun dal temp da bronz tardiv sco era objects da la Cultura da santeris cun urnas e da la Cultura da Laugen-Melaun (ca. 1300–800 a.C.). Sur quest abitadi han il archeologs chattà restanzas d'in abitadi dal temp da fier tempriv cun objects da l'uschenumnada

cheramica da Tumein (6–5avel tschientaner a.C.), ma era chats e rechats dal temp roman e dal temp autmedieval.

Dal temp da fier dateschan restanzas remartgablas d'abitadis, scuvertas al Markthallenplatz ed en l'areal Ackermann. Ins ha chattà qua ils fundaments da chasas sco era objects da l'uschenumnada Grappa da la Val dal Rain alpina cun ina quantitad considerabla da chats d'ina cheramica pli veglia, l'uschenumnada cheramica da Tumein, e d'ina pli giuvna, l'uschenumnada cheramica da Schneller (5avel–terz tschientaner a.C.). Ils chats appartegnan plitost ad in circulo cultural celtic che retic. *Jürg Rageth*

Epoca romana

Suenter sia conquista en la campagna militar romana dals onns 16–15 a.C. ha Cuira appartegnì l'emprim a la regiun administrativa da las *Alpes Graiae et Poeninae*, dapi ils onns 40–50 s.C. a la nova provinza romana *Raetia*. La posiziun da Cuira a l'intern da l'Imperi roman n'è

betg clera, fors era ella ina *civitas peregrina* u *stipendiaria*. Ils paucs chats da l'equipament dals schuldads romans na cumprovan betg ina preschientscha militar pli lunga. Cuira era dentant probablain ina staziun da fermada, situada en in lieu strategicamain impurtant al pe dals pass alpins. L'ipotesa, tenor la quala Cuira era daventada la chapitala da la provinza *Raetia* prima suenter la restructuraziun da las provinzas romanas en il quart tschientaner, n'è anc betg cumprovada.

La gronda part da l'abitadi originar sa chattava en il Welschdörfli odiern. L'archeologia ha perscrutà dapi il 1902 in areal da ca. 80 x 300 m. La dimensiun da l'abitadi roman n'è anc betg sclerida. Era sche singuls chats dateschan da l'entschatta da l'emprim tschientaner a.C., cumenza il temp da prosperitad per Cuira pir enturn l'onn 40 s.C. Da quel temp han las chasas cun armadiras da travs stui ceder ad edificis da crap, construids tenor la tradiziun romana.

L'abitadi aveva ina structura irregulera e cumpigliava intgins edificis publics (per exempel bogns termals e probablain edificis d'alloschi e da martgà), oravant tut dentant chasas d'abitar che servivan per part era a l'agricultura ed a differents mastergns. L'elavuraziun da fier, bronz ed ossa è cumprovada, ed ins ha chattà era ina vaschlaria ed in lavuratori da textilias.

Ils numerus chats d'objects da l'Imperi roman, importads oravant tut dal sid ma era dal sidvest e dal nordvest (vaschella, recipients per vivondas, lampas, cliniez, statuettas), documenteschan a medem temp l'impurtanza da Cuira sco center da traffic ed il grad da la romanisaziun e da la bainstanza da la populaziun.

A partir da ca. l'onn 250 cumenza il Welschdörfli ad ir en decadenza. Cumprovas per ina devastaziun en connex cun las invasiuns alemannicas dal terz e quart tschientaner s.C. mancan però fin qua. Fastizs d'in abitadi existan fin il quart tschientaner tardiv, per part fin viaden il 5avel tschientaner. Modestas restanzas d'ina culegna han ins era chattà en la citad veglia ed en l'areal da la Curt (lieu dal castel dal temp roman tardiv).

Anne de Pury-Gysel

Dal 450 fin enturn il 1450

Dal punct da vista topografic sco era da quel dal dretg constituional mussa Cuira a partir dal 5avel tschientaner il dualissem classic d'in vitg da fiera, situà al pe d'ina residenza episcopala (Curt da Cuira). Il center da l'abitadi era vegnì translocà dal vicus roman (Welschdörfli) da l'autra vart da la Plessur al pe da la residenza episcopala. A l'ost da la Curt ed al nordvest d'in santeri dal temp medieval tempriv sa chattava la baselgia sepulcrala da S. Steivan, erigida a la fin dal 5avel tschientaner u pauc temp suenter l'onn 500 (ida en musschna suenter in incendi d'avant il 1538/39). Probablain dal 8avel tschientaner datescha l'emprima baselgia da Son Gliezi, erigida gist sper quella da S. Steivan. Al stradun vers il nord sa chattava la baselgia da S. Regula (emprim edificis dal 9avel tschientaner). Suenter ch'ìls Sarazens avevan mess en tschendra Cuira enturn l'onn 940, han ils privilegis considerabels concedids dals Ottos (dretg d'incassar dazi, batter munaida e far martgà, privilegis d'immunitad) mess en la segunda mesadad dal 10avel tschientaner la basa per la suveranità episcopala sur la citad da Cuira. A la fin dal temp autmedieval consistiva l'abitadi da Cuira da la Curt cun la catedrala (il pli vegl edificis datescha da l'emprima mesadad dal 5avel tschientaner), da l'uschenumnà *Burgus*

superiur cun la baselgia da S. Martin (emprim edificis da la segunda mesadad dal 8avel tschientaner), dals quartiers Salas e Clawuz a l'Untertor posteriur, dal quartier furnà en il 13avel tschientaner enturn la claustra dominicana da Son Nicolai e dal Welschdörfli, situà da la vart sid (sanestra) da la Plessur. Cun la costruziun dal mir exteriur en l'emprima mesadad dal 13avel tschientaner èn creschids ensemen ils singuls quartiers, e la citad ha cumenzà a savi-luppà.

La populaziun da Cuira, che quintava en il 13avel tschientaner probablain 1000–1500 abitants, consistiva per gronda part da purs, mastergnants e commerziants che profitavan d'ina gronda activitad en il sector da costruziun (construziun dal mir da tschinta e da la catedrala nova, consecrada il 1272) e da la posiziun geografica favuraivla da Cuira a las vias da transit.

Emprims fastizs d'ina citad independenta dateschan dal 1227, ina mastergnanza stabla para dentant da s'esser stabilida pir vers la fin dal 13avel tschientaner. Dal 1282 dateschan ils emprims indizis d'ina constituziun che prevesa in cussegl da citad. L'investg da Cuira ha però pudì mantegnair sia suveranità sur la citad ed occupar vinavant ils uffizis municipals impurtants. Ils exponents dal moviment per l'indipendenza da la citad eran en emprima lingia mastergnants e commerziants da la ministerialitad da l'investg. Il 1367 han conclus il chapitel catedral, las vischnancas dal domini episcopale e la citad da Cuira in'allianza cunter l'investg Peter Gelyto che vala sco origin da la Lia da la Chadé. In urden municipal dal 1368/76 è mantegnì en furma da fragments. Il 1396 ha il retg Wenzel liberà ils vischins da Cuira da dretgiras estras. Il 1413 han els obtegnì il dretg da construir ina chasa da commerzi sco era il dretg da susta per tailla, graun, sal ed autras martganzias. Il medem onn è era documentà l'emprima giada in burgemester da Cuira. Il 1422 han ils vischins da Cuira assagli la Curt e sfurzà l'investg Johannes IV Naso, ch'era savens absent, a concessiuns considerablas a la citad.

Linus Bühler

Lexicon Istoric Retic

Il LIR cumpiglia bundant 3100 arttgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



La citad medievals da Cuira è ina da las pli bain mantegnidas en Svizra. P.-G. MEISTER / PIXELIO



Gravura da la citad da Cuira da Matthäus Merian (1642).



FOTO PD Investa en il palazzo da Peter von Salis (Altes Gebäu), erigi il 1727.

FOTO TGIRA DA MONUMENTS

Dal temp medieval tardiv a la fin da l'ancien régime

Istorgia da la citad da Cuira, 2. part

Dal temp medieval tardiv a la mesadad dal 17avel tschientaner

Il 1464 ha in incendi devastà la gronda part da la citad da Cuira, tranter auter era la chasa-cumin e cun quella tut ils documents da libertad. Ils da Cuira han alura tramess lur scrivant Johannes Gsell a Vienna a laschar confermar ils dretgs da libertad tras l'imperatur Friedrich III ch'ha era accordà la fundaziun da mastergnanzas. Ils mastergnants ed ils commerziants avevan gia avant in'organiziun corporativa che sa basava sin dretgs da disa e sin confraternitads. Il 1464 han ils vischins approvà in nov urden da mastergnanza che reglamentava, ultra dals secturs specificamain professiunals, era il modus d'elecziun da las suprastanzas da las mastergnanzas, dal burgamester e dals cussegls pitschen e grond. Suenter la reformaziun han ins agiuntà a questa constituziun il modus d'elecziun dals ulteriurs uffizis municipals. Tut las professiuns eran integradas en las tschintg mastergnanzas dals viticulturs, chalgers, cusuns, ferrers e furners. Ina grond'impurtanza en la citad prevalentamain agrara avevan ils possessurs da terren da la mastergnanza dals viticulturs ed ils berniers e viturins da la mastergnanza dals ferrers e participads al traffic commercial. Suenter l'incendi da la citad ed il nov urden da mastergnanza èn sa domiciliads a Cuira pli e pli mastergnants spezialisads da linguatg tudestga ch'èn s'acquistads il dretg da burgais da la citad e ch'han contribuì essenzialmain a la germanisaziun da quella.

Il nov urden da mastergnanza è stà in pass fitg impurtant en l'emancipaziun da la tutela episcopala. La citad è s'acquistada successivamain il dretg fiscal ed il daner da guardia. L'imperatur aveva approvà il 1464 e confermà il 1480 la liberaziun da la dretgira auta, l'uschenumna da avugadia imperiala, ch'era en furma da pegn en possess da l'uestg da Cuira. La citad ha però pudì far valair ses nov dretg pir a partir da l'onn 1489. L'uestg aveva vinavant il dretg d'occupar ils uffizis civils e possedeve la gronda part da las regaglias, sco quella da la duana, da la munaida, da la chatscha, da la mesira e dal pais. Quests privilegis episcopals han ins pudì eliminar pir cun la reformaziun ed ils Artitgels da Glion dal 1524 e 1526. Las tentativas da daventar ina citad imperiala libra, interpendidas da Cuira a partir dal 1495, han fatg definitivamain naufragi il 1498.

Sco member impurtant da la Lia da la Chadé fundada il 1367 è daventada la citad da Cuira pli tard, en alternanza cun Glion e Tavau, ina sedia da la Dieta da las Trais Lias. Las assembleas a Cuira

avevan lieu en la stiva dal Cussegl grond da la citad en la chasa-cumin, reconstruida suenter l'incendi da la citad. Dal 1419 datescha in'allianza tranter Cuira e la citad da Turitg; quest'allianza, renovada il 1470 ed il 1496, preveseva il succurs vicendaivel en temps da conflicts e garantiva a Turitg ina ferma posiziun en la regiun da la fortezza da Flums, in punct strategic lung la via dal Lai Rivau. Il 1440 è Cuira s'allià cun ils Quatter Vitgs (Tschintg Vitgs) e cun la Lia Grischa. A l'emprima conquista da la Vuclina tras las Trais Lias il 1486/87 (campagna da Buorm) èn sa participads ils da Cuira cun la bandiera principala da la Lia da la Chadé sut il cumond da lur anteriur burgamester Johannes Lohrer. Durant la Guerra svabaisa ha la truppa da Cuira cumbattì sut il cumond da lur chapitani e chastellan episcopal Heinrich Ammann en l'Engiadina Basa, en il Partenz ed a Balzers/FL. En occasion dad ulteriuras guerras a l'ester han puspè manà ils burgamesters las truppas da Cuira, per exempel Luzius Gugelberg von Moos en la conquista da la Vuclina (1512) u Hans Brun ed Ulrich Gerster en la Segunda Guerra da Müsch (1531). En il rom dals contracts da mercenaria, stipulads da las Trais Lias cun l'exteriur, èn ils mercenaris da Cuira sa participads surtut a las guerras en l'Italia dal Nord. Divers citadins, oravant tut represchontants da las mastergnanzas, èn s'opponids repetidamain a l'influenza negativa da la mercenaria, per exempel en las proclamaziuns e petiziuns dal 1535 a la Lia da la Chadé ed en quellas dal 1543 als cussegls pitschen e grond da la citad.

La reformaziun è vegnida introducida a Cuira il 1525–26. In rolla centrala han giugà qua a partir dal 1523 il magister da la scola da citad, Jakob Salzmänn (anteriur magister al chapitel catedral) ed il plevon da S. Martin, Johannes Comander. Gia da Pasca dal 1525 ha Comander pregia la nova cretta davant ina gronda raspada. Sper las resistenzas da vart catolica han dentant era l'activitad ferventa dals anabaptists ed ina revolta da purs dal 1525 chaschunà rumpatesta als reformators ed a las autoritads. Suenter la Disputaziun da religiun a Glion dal 1526 han las Trais Lias laschà a las singulas vischnancas la libertad da decider, schebain ellas vulan restar fidaivlas a la cretta catolica u adoptar quella reformada. Ils Artitgels da Glion dal 1524 e 1526 han promovì considerablmain il svilup reformatoric, permettend a las vischnancas da reducir las dieschmas e da tscherner libramain il plevon. Cun l'iconoclassem, l'aboliziun da la messa e l'introducziun

da la Sontga Tschaina la primavera dal 1527 è la reformaziun a Cuira – cun excepziun da la Curt episcopala – ida pli u main a fin.

A la sava dal temp medieval al temp modern e da la gotica a la renaschientscha è sa manifestada a Cuira ina grond'activitad architectonica ed artistica. Tranter il 1467–1543 han ins erigi divers edificis publics, per exempel la nova chasa communal e la chasa da commerzi, tranter il 1470–92 la baselgia da S. Martin e dal 1494 al 1500 la baselgia da S. Regula en sia furma actuala. Il 1492 ha Jakob Russ realisà il famus altar grond en stil gotic per la catedral, e dal 1543 dateschan ils uschenumnads maletgs dals morts, stgaffids tenor in model da Hans Holbein il giuven ed exponids en la residenza episcopala. Ins ha reconstrui la gronda part da las chasas da las mastergnanzas e renovà e fortifitgà il 1538 ils mirs e las portas da la citad. Represchentaziuns teatralas cun acturs laics, per exempel il «Giuvenessendi» (1517) e «Lum ritg ed il pover Lazarus» (1541), han dà impuls impurtants a la vita culturala da Cuira. Ils citadins giudevan il stil da viver excessiv da la renaschientscha, celebrà en occasion da festivtads politicas e da festas da nozzas che duravan per part plirs dis.

En la segunda mesadad dal 16avel tschientaner han ins reglamentà pli riguramain la vita e las activitads citadinas. Numerus urdens dattan perditga da quai, spezialmain quels concernent las interpresas da transport ed il commerzi da martganzia. La citad aveva era gronda premura per l'agricultura e l'economia d'alp. A partir dal 15avel tschientaner ha Cuira acquistà successivamain pastgiras entadim il Scanvetg ed ha engrondì il 1573 ses areal dad alps cun la cumpra da las alps Sattel ch'appartegnevan ad Arosa. Gia il 1636 dumbravan las alps da Cuira 450 vatgadas.

L'incendi dal 1574 ha donnegia fermamain la citad da Cuira. Var 300 da las 400 chasas èn daventadas victimas da las flommas. Donaziuns ed emprests da tut la Confederaziun han però pussibilità ina reconstrucziun speditiva. Ultra da quai han ins stgaffi legats, per exempel quel per «hausarme Leute». Novs urdens da construcziun e d'incendi duevan prevegnir en futur a catastrofes sumegliant.

A l'entschatta dal 17avel tschientaner è la citad da Cuira, aderenta da la partida spagnola, savens stada pertutgada da tumults, revoltas e rebellions che stevan en connex cun ils cumbats tranter las differentas partidas e cun ils servetschs mercenaris. Il 1607 per exempel

han gè lieu trais dretgiras nauschas a Cuira. Ils Scumbigls grischuns han provocà il 1622 in'occupaziun pli lunga da las Trais Lias tras pussanzas estras. Cuira ha stuì supportar durant radund 10 onns truppas imperialas. L'armada spagnola resguardava mo per part las cunvegns stipuladas en il contract d'occupaziun ed ha derasà ultra da quai la pestilenza. La guerra e las campagnas militaras da las guarnischuns austriac-spagnolas e da las truppas franzosas han chaschunà a Cuira custs dad 88 844 rentschs tranter il 1622 ed il 1636. Cun ceder a la citad ils dretgs da la duana da Cuira ed autras entradas ha il Stadi da las Trais Lias pudì restituì mo ina part da questas expensas. Pir en la segunda mesadad dal 17avel tschientaner è la citad sa remessa economicamain ed ha pudì superar la stagnaziun culturala dals onns da guerra.

Martin Bundi

Da la mesadad dal 17avel tschientaner a la Helvetica

Suenter il 1648 han ils citadins da Cuira bain svelto pudì cumpensar las perditas subidas tras ils Scumbigls grischuns. Uschia han els reservà il 1665 il dretg da burgais mo pli a paucs candidats bainstants. Il dumber dals burgais da Cuira è sa reduci perquai per la mesadad en il decurs dal 18avel tschientaner, entant che la part da la noblezza e da las personas bainstantas è creschida. A partir dal 17avel tschientaner eran constantamain ca. 50 % dals abitants fulasters, e quai malgrà diversas propostas da bandischar quels da la citad. Suenter l'abrogaziun da l'Edict da Nantes il 1685 èn arrivads a Cuira tschients da fugitivs ughenots, emigrads per motifs professiunals dal Piemunt, da la Savoia e da la Frantscha dal Sid. L'emprim han els obtegnì bles sustegn, pli tard èn els dentant savens vegnids tramess vinavant. Quels ch'èn restads eran, sco tut ils fulasters, economicamain dischavantagiads, avevan però in agen spiritual. En il 17 e 18avel tschientaner è il sistem economic strusch sa midà. Quasi tut ils burgais e bles fulasters han cuntinuà a lavurar en l'agricultura ed en il traffic da transit. Era en la viticultura n'hai dà praticamain naginas midadas: ins basegnava anc adina grondas surfatschas per garantir ina raccolta modesta. Las lavurs vegnivn fatgas da fulasters e da schurnaliers stagionali. Il transport da martganzia via Cuira è sa reduci fin il 1670 ad in minimum absolut ed ha puspè cuntanschì pir vers la fin dal 18avel tschientaner il nivel d'avant ils Scumbigls grischuns. Las meglieraziuns da las vias han contribuì decisivamain al pro-

gress. Uschia ha Thomas Massner, speditur da Cuira, pretendì ch'ins segireschia il Cardinel (in tschancun privlus al Pass dal Spleia), e las Trais Lias e la citad da Cuira han finanzià l'amplificaziun da la Via imperiala dal Pass S. Gliczi a Cuira (1782–86). En il 18avel tschientaner èn naschidas veritablas chasas da commerzi cun partenaris d'affars en tut l'Europa. L'urden da mastergnanza è sa verifitgà en fatgs politics ed economics. Malgrà las dumengias da plant ha il cussegl pudì mantegnair la controlla sur ils commembers da las mastergnanzas ch'han da lur vart pudì defender lur monopol cunter la concorrenza dals fulasters e da la mastergnanza da la Curt episcopala, ma era cunter rivals externs. Ellas han impedì tut las tentativas da stabilir manufacturas a Cuira. A l'entschatta dal 18avel tschientaner han ins mess en dumonda la rolla da Cuira sco center regional ed avant-lieu da la Lia da la Chadé e sco center dal congress/pitag, da l'archiv, da la cassa e da la chanzlia da las Trais Lias. Mo grazia a l'intermediaziun da Turitg en la Sentenzia da Malans (1700) ed en l'accumodament dal 1730 ha Cuira pudì defender ses privilegis. Las relaziuns cun l'uestg da Cuira eran percunter, malgrà las differentas cuntraversas, vaira bunas.

L'aspect exteriur da la citad è sa midà mo pauc, cumbain ch'ils dus incendis dal 1674 e l'inundaziun da la Plessur dal 1762 han chaschunà devastaziuns considerablas. L'activitad da construcziun è dentant proseguida dadur ils mirs da la citad, ed il stil baroc è sa manifestà en quatter chasas signurilas isoladas cun ierts formals sco era en la concepziun interna da pliras chasas burgaisas. A la fin dal 17avel tschientaner han ins avert a Cuira ina scola da latin ed in Collegium musicum (Son Nicolai). Ultra da quai procuravan da temp en temp truppas da teater ambulantas da la Germania per represchentaziuns dad operas, ils ambassadurs esters ed il prinzi-uestg garantivan ina tscherta splendur en la chapitala retica.

Max Hilfiker

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



La citad da Cuira enturn l'onn 1900.



La nova staziun d'autos da posta, erigida il 1994.

FOTO N. PITARO

Da la Helvetica al temp preschent

Storgia da la citad da Cuira, 3. part

Constituziun, sistem politic, administraziun ed infrastruttura

Durant l'occupaziun franzosa (l'emprima giada il 1799) è vegnida dismessa l'obligaziun da far part ad ina mastergnanza, e la citad da Cuira è vegnida administrada d'ina regenza municipal. La mediaziun dal 1803 ha permess tranter auter a las mastergnanzas da recuperar lur pussanza politica. La critica creschenta al sistem electoral (betg individual, mabain tenor mastergnanza), a la mancanza d'ina separaziun da las pussanzas ed a l'ineffacitad da l'administraziun ha manà il 1841 a la nova lescha municipal: las mastergnanzas èn vegnidas abolidas ed in Cussegl dad indesch s'occupava dals affars politics, polizials, administrativs, ecclesiastics e scolastics. La radunanza communal, introducida il 1850, era cumpetenta sulettamain en affars chantunals e federals. Il 1852 è la Curt (1850 240 abitants) vegnida incorporada a la citad da Cuira. A partir dal 1862 han ins distingui tranter in Cussegl grond da la citad (legislativa, 21 commembers) ed in Cussegl pitschen (executiva, 7 commembers). Il 1875 ha la vischnanca politica remplazzà quella burgaisa sco suveran politic ed economic. Il 1904 è il Cussegl pitschen vegnì reduci a tschintg commembers (president e schef dal Departament da construcziun en uffizi cumplain). Dapi il 1916 vegn elegi il Cussegl grond tenor il sistem da proporz. La radunanza communal è vegnida abolida il 1921, il Cussegl grond redimensiunà a 15 commembers il 1928. Il cussegl municipal (tschintg commembers), dirigì dal president da la citad, aveva sulettamain da survegliar l'administraziun. La revisiun dal 1964 ha creà in cussegl communal (legislativa, 21 commembers) ed in cussegl municipal (trais commembers en uffizi cumplain). Il 1988 han ins introduci era per il cussegl municipal ina limitaziun dal temp d'uffizi a trais legislaturas respectivamain a 12 onns.

Enturn il 1800 era Cuira dividi en duas gruppas politics: ils Aristocrats furmads dal clan dals Salis ed ils Patriots, ina partida reformista fundada da Johann Baptist von Tscharnier (1751–1835). L'aboliziun da las mastergnanzas ha inizià il 1840 la predominanza liberala. Pir l'immigraziun da personas da regions catolic-conservativas e la secessiun dals Democrats (1919, pli tard PD resp. PPS) han indebli questa predominanza. Tut las trais partidas avevan lur gasetta quotidiana: «Der Freie Rätier» (fin il 1974), il «Bündner Tagblatt» e la «Bündner Zeitung». Il 1882 è vegni elegi l'emprim deputà socialdemocratic en il cussegl da citad. En la perioda da legislatura 1997–2000 ha quel consistì da mintga-

mai in represchentant da la PS, da la PPS e da la PCD, il cussegl communal da sis represchentants da la PS, tschintg da la PLD, quatter da la PPS, trais da la PCD, dus da la PCS ed in da l'Alternativa sanestra.

En il sector dal provediment social disponiv'ins, ultra da donaziuns e legats, d'ina chasa d'orfens (1844), da la chasa d'educaziun Plankis (1845), dal Bürgerheim (1847), d'in ospital municipal (1875) e da l'emprima chasa d'attempads (1924). L'Ospital da la Crusch (1853) è vegnì dischlocà il 1912 a la Loëstrasse. Il 1820 ha la citad da Cuira cumenzà ad illuminar las vias cun lanternas d'iel, a partir dal 1859 cun lampas da gas. Ils indrizs per il provediment d'aua èn vegnids renovads il 1880. A partir dal 1891 furniva ina centrala da la citad (engrondida il 1906, 1914 e 1947) forza electrica. Il 1895 ha Cuira cumprà la fabrica da gas (reconstruida il 1911) ed introduci il 1990 il gas natiral. Il 1905 han ins cumenzà a construir la chanelisaziun. L'emprim bogn public datescha dal 1871.

Cuira n'era betg la chapitala da las Trais Lias, ma sulettamain il lieu principal da la Lia da la Chadé. Grazia a sia posiziun strategica, a la sedia episcopala ed a la forza economica era ella tuttina il center natiral dal Grischun. Il 1803 è ella daventada la sedia da la Regenza dal nov chantun Grischun ed il 1820 (definitivamain) la sedia dal parlament grischun. Oz sa chattan a Cuira la dretgira chantunala ed administrativa, las autoritads penales, la praschun chantunala Sennhof, la Clinica psichiatica chantunala Waldhaus (1892), l'Ospital chantunal da dunnas Fontana (1917) e l'Ospital chantunal e regional retic (1941). Cuira dat era alloschi a la gronda part da las instituziuns ed associaziuns culturalas publicas e privatas sco era als meds da massa dal Grischun. La Confederaziun è represchentada oravant tut tras la posta, la viafier, l'administraziun da la duana e quella militar (plazza federala d'armas dapi il 1887). La commemoraziun da la Guerra a la Chalavaina il 1899 è stada impurtanta per l'identitad grischuna, entant che las festas federalas da tir (1842 e 1949, 1985), da gimnastica (dapi il 1845) e da chant (dapi il 1862) han rinforzà il sentiment naziunal svizzer.

Abitadi e populaziun

A la fin dal 18avel tschientaner era limità il spazi surfabrigà a la citad veglia actuala, al Welschdörfli ed a las rivas da la Ples-sur. Suenter la spazzada dal mir tranter l'Untertor ed il Hexenturm (1829) ha cumenzà la citad ad expandar vers il Rain. La demoliziun dal Schelmenturm il 1838 ha creà in ulteriur access al nord. Il Post-

platz e la Poststrasse concurrenzavan ussa l'Untertor (spazzà il 1861) e la Reichsgasse sco axa principala. Il fossal è vegnì emplenì e transformà en la Grabenstrasse, flancada d'edifizis represchentativs (Villa Brunnengarten 1848, Villa Planta 1876, Bank- und Staatsgebäude 1878, Chasa da la posta 1904, Banca Chantunala 1911). Suenter la construcziun da la staziun (1858) al nord da la citad è daventada la Piazza da la posta il nov center urban. Ulteriurs accents han mess la transformaziun dal santeri Scaletta en in parc public e la construcziun da la Loëstrasse (1890–92) ch'ha avert in nov quartier d'abitar. In'emprima lescha da construcziun generala è entrada en vigur il 1896. La Ringstrasse, terminada il 1973, traversa il quartier dal Rain (che crescha continuadamain dapi ca. il 1900) cun ses blocs e sgrattatschiels Solaria (1961–62) e Lacuna (1964–1981). Il center da Cuira sa transformescha pli e pli en in quartier d'affars (butias e biros). Ultra dals edifizis surmenziunads datti anc auters stabiliments publics remartgabels a Cuira: la chasa da scola Quader (1914), la baselgia da la S. Crusch (1969) ed ils edifizis da protecciun dals chats romans en il Welschdörfli.

L'avertura da la citad da Cuira sin il champ giuridic, economic ed urbanistic ha fatg crescer la populaziun per il tripel tranter il 1780 ed il 1860 e per il dubel dal 1860 al 1910. A la stagnaziun demografica dal tranterguerras è suandà a partir dals onns 1950 ina creschientscha rapida, accumpagnada d'in boom da construir, oravant tut en il quartier dal Rain. La diminuziun dal surpli da naschientschas e la bilantscha da migraziun per part negativa han laschà stagnar la populaziun da Cuira suenter il 1976 a pauc dapli da 30 000 abitants.

Economia e traffic

Il traffic da transit tranter la Germania dal Sid e l'Italia dal Nord era tradizionalmain in'activitad dominanta a Cuira. El ha augmentà dapi il 1788 grazia a la construcziun da la Deutsche Strasse tranter il Pass S. Glièzi e Cuira. Ils spediturs da Cuira han contribuì il 1818–23 a la construcziun da las rutas dal Spleia e dal S. Bernardin ed han preni en maun la politica da transport dal Grischun. Il 1820–40 han ins realisà las vias sur ils pass dal Malögia e dal Güglia, il 1858 ina lingia da las viafiers federalas da Rorschach a Cuira, il 1859 ina tala da Turitg a Cuira. Suenter l'avertura da la Viafier dal Gottard (1882), è la citad da Cuira s'orientada pli ferm al turissem, ella è però restada ina staziun, nua ch'ins midava da la viafier a la posta da chavals respectivamain da la Viafier svizra (Viafiers federalas svizras a partir dal 1902) a la Viafier

retica (per Tusaun 1896, l'Engiadina e Glion 1903, Arosa 1914). La citad da Cuira giavischava in'avertura da las vias chantunales a l'automobil, ella ha dentant stui sa suttametter a la voluntad dal pievel grischun fin il 1925. La via da sviamment dal 1965 fa part da l'A13. La grond'expansiun da l'aglomeraziun da Cuira e l'augment dals pendularis han ventilà il davos temp dumondas davart il traffic local sco era davart la provegnientscha e la destinaziun dal traffic d'autos.

L'industria da textilas, installada a Cuira vers la fin dal 18avel tschientaner, n'ha betg pudì fitgar pe. Ma las vias charrablas, l'aboliziun da las mastergnanzas e l'access a las viafiers federalas han meglierà la situaziun periferica da Cuira ed effectuà tranter auter la fundaziun d'ina fabrica da gas (1859) e da la filandaria Meiersboden (en funcziun dal 1861–86). Cuira n'è dentant mai daventada ina citad d'industria. Las officinas da la Viafier svizra, pli tard da las Viafiers federalas svizras, èn stadas, cun maximal 300 lavurers, bunamain adina la pli gronda interpresa a Cuira. Firms tradiziunalas eran per exempel la fabrica da pon Pedolin (1789–1982), la fabrica da pasta (dapi il 1841), la cularia (1892), la fabrica da tschigliatta (1893) e las bierarias reticas (fusiunadas il 1902 a la Calanda-Bräu, oz Calanda Heineken Switzerland AG). En ils onns 1950 ha la promozion tras la citad attratg in pau industria. L'industria da textilas e da metal ha gì difficultads en ils onns 1970/80. Auras interpresas èn vegnidas translocadas en l'aglomeraziun da Cuira, per exempel il 1989 la fabrica da stadairas Busch (fundada il 1919). Ils manaschis da Cuira en il sector secundar han mantegnì lur character artisanal cun diversas interpresas da construcziun e, dapi in tschert temp, era cun intgins manaschis d'electronica. Ultra da sia funcziun sco chapitala grischuna è Cuira restada, grazia a la distanza da citads pli grondas, in center da servetschs cun accents en l'economia da transport, en il commerzi da detagl ed en la scolaziun.

Cultura e scolaziun, baselgia e vita religiosa

Enturn il 1800 han gi lieu a Cuira divers tumults e dretgiras nauschas. La populaziun era dividida en aderents da l'urden vegl, reformists e revoluziunaris. L'opposiziun tranter la Curt episcopala e la citad burgaisa reformada existiva anc adina. La scola catolica da la Curt è vegnida integrada pir il 1966–67 en la scola da citad. La ferma immigraziun da Grischuns, surtut Rumantschs catolics da la Surselva, da Songagliais (da la Part Sura Songagliaisa e da la Val dal Rain), da lavurers talians e tudestgs, ha midà il ca-

acter da Cuira sco citad reformada e tudestga. Dapi il 1970 èn omaduas confessions represchentadas equivalentamain a Cuira. L'augment da la part da la populaziun da lingua rumantscha e taliana ha effectuà la fundaziun dad uniuns linguistics e culturalas, sco per exempel il Chor Viril Alpina Cuera (1898). Daspera sa chattan a Cuira era las centralas da las organizaziuns per la promozion da la lingua e cultura taliana e rumantscha, la Pro Grigioni Italiano (1918) e la Lia Rumantscha (1919). Il dretg da vuschar e da vegnir elegi per domiciliads (1874) ha spustà las relaziuns da pussanza politics. Era senza in ferm proletariat a Cuira ha cuntanschi il moviment dals lavurers, sut l'influenza da lavurers migrants tudestgs e talians, ina tscherta impurtanza. Tranter il 1900 ed il 1914 èn prorus numerus conflicts da lavur. Durant il temp da crisa dals onns 1930 è sa dustada la citad da Cuira cun tut ils meds pussaivels cunter l'immigraziun d'esters basegnus.

Il 1779 avev'ins reformà radicalmain la scola da citad. La fundaziun da las scolas chantunales confessiunalas (1804) ha provocà l'aboliziun da la scola da latin. Il 1853 ha il Seminari scolastic avert sias portas a Cuira (integrà en la Scola auta da pedagogia dal Grischun dapi il 2003/04), il 1872 la Scola da perfecziunament (antecessura da la scola secundaria), il 1895 la Scola da dunnas. Il 1964 è vegnì fundà il Tecnicum da la saira (Scola auta da tecnica ed economia STE/HTW dapi il 2000), il 1987 la Scola superiura d'economia ed administraziun SEA/HWV). Il Teater da citad, fundà il 1923 cun in'atgna truppa ed atgnas produziuns, è vegnì liquidà il 1992 en favur d'in manaschi cun represchentaziuns da gruppas ospitantas. Dapi ils onns 1970 è s'establida a Cuira l'unium culturala Klibühni Schniderzunft, purtada da la Klibühni – Das Theater (avert il 1974). Menziun speziala tranter las instituziuns culturalas chantunales meritan en pli il Museum retic (avert il 1872) sco era il Museum d'art dal Grischun ed il Museum grischun da la natira, naschids il 1919 sin basa da la collecziun d'art e d'istorgia natirala dal Museum retic.

Jürg Simonett

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Las guerras da Müsch (1525/1531)

Fin da l'expansiun militar da las Trais Lias

■ **Vers la fin dal 15avel tschientaner en la Vuclina ed ils dus contadis da Clavenna e da Buorm daventads victimas da la politica d'expansiun dal Grischun. Suerter la campagna militar a Buorm (1486–87) han ils Grischuns conquistà il 1512 ils dus contadis, las Trais Plaivs e la Vuclina ed han annectà quellas regiuns sco Terras subditas.** Ludovico Sforza, numnà il Mor (duca da Milaun 1494–1499), ha respundì a quella conquista cun eriger fortezzas sisum il Lai da Com. Francesco II Sforza (duca dal 1521–25 e dal 1529–35) ha surdà il 1523 Müsch sco feud a Gian Giacomo Medici. Quel ha provocà las guerras da Müsch dal 1525 e dal 1531, numnadas tenor ses chastè situà a Musso (sper Dongo) en la part sura dal Lai da Com. Gian Giacomo Medici vuleva reacquistar davent da ses chastè las Terras subditas dals Grischuns suenter esser vegnì rebattì quels en ina battaglia a Murbegn. Cun agid dals Confederads e grazia al sustegn diplomatic da Vaniescha, da la Frantscha e dal papa han ils Grischuns pudì batter il Medeghin, demolir sia fortezza e defender, cun excepziun da las Trais Plaivs, lur Terras subditas. Entant che la victoria a la Battaglia a la Chalavaina (1499) ha procurà a las Lias la libertad factica da l'Imperi han las duas guerras da Müsch definì e stabilisà il cunfin meridional da la Republica da las Trais Lias cun il ducadi da Milaun. La «Chianzun dalla guerra dalg Chiaste da Müs», in text politic publictà da Gian Travers da Zuoz l'onn 1527, marca en pli l'entschatta da la litteratura scritta rumantscha.

Trais Plaivs

Term che designeschan las traivs plaivs talianas (Tre Pievi) da Dongo, Gravedona e Sorico. Las Trais Plaivs cumpiglian 21 vischnancas situadas da la vart dretga dal Lai da Com superiur. En il 11 e 12avel tschientaner han ellas furmà in stadi autonom tenor il model roman-republican. En il 13avel tschientaner en ellas stadas incorporadas en la citad suverana da Com ed involvidas en ils cumbats tranter ils Guelfs ed ils Ghibellins. Enturn il 1350 en ellas vegnidas sutmessas al domini da Milaun. Suerter il passadi dal domini dals Viscontis als Sforzas (1450), en vegnids instituids durant ogt onns cumissaris (derschaders) grischuns en las Trais Plaivs. Il 1464 è vegnida amplifitgada la via commerciala da Monte Dongo a Blinzuna sur il Pass da S. Jorio. Il 1466 han ins scuvert ritgas minieras da minerals da fier a Dongo ed en la part settentrionala dal Pass da S. Jorio. Cun l'acquist da la Vuclina il 1512 en las Trais Plaivs vegnidas sut il domini grischun ed en stadas la sedia d'in podestat fin il 1525. A partir dal 1521 ha

smanatschà Gian Giacomo Medici (il Medeghin), chastellan dals Sforzas resident sin il chastè da Müsch, las Trais Plaivs. Sco resultat da las Guerras da Müsch (1525 e 1531) en quellas vegnidas attribuidas il 1532 definitivamain a Milaun. Suerter l'Emprim Capitulat da Milaun (1639) ha la Spagna organisà margtads emnills a Gravedona, Domaso e Gera, nua ch'ìls Grischuns pudevan cumprar e vender granezza senza stuair pajar dazi.

Martin Bundi

Müsch

Chastè e vischnanca en la provinza taliana da Com, situadas da la vart dretga al nord dal Lai da Com, talian Musso. Lieu da cunfin e fortezza durant il temp che las Trais Lias possedeven las Trais Plaivs. Il chastè da Müsch è stà dapi il 1406, sco feud milanais, en possess da la famiglia Malacrida, enturn il 1500 è el passà al feldmarschal Gian Giacomo Trivulzio ch'aveva laschà renovar la fortezza e construir in port, rendend qua tras l'areal fortifitgà quasi inconquistabel. Trivulzio aveva era laschà installar qua cularias da fier ed ina monetaria. Dapi il 1523 avdava sin il chastè da Müsch il chastellan Gian Giacomo Medici (numnà il Medeghin u il Müsler) ch'aveva laschà construir sur il chastè en il grip in'ulteriura fortezza munida cun in foss insuperabel, chanuns ed indrizs da defensiun. Cun sia artigliaria controllava el il traffic en tut la part sura dal Lai da Com. Il 1525 ha el declerà la guerra als Grischuns, el è però vegnì battì a Murbegn da truppas grischunas e vuclinais; ma el occupava anc Clavenna. Ina delegaziun grischuna sut la direzziun da Gian Travers, ch'aveva negozià senza success per la pasch a Milaun, è vegnida fermada dal chastellan il settember 1525 en vischnanza da Müsch e messa en fermanza (ostagis). La separaziun confessional da las Trais Lias e da la Confederaziun ha impedi ina sperta superaziun da la crisi. Pir la primavera dal 1526 èsi reussi ad in'otra delegaziun dal Grischun, cun il sustegn da la Frantscha e da Vaniescha, da liberar ils praschuniers – cunter il pajament d'ina spendradira e la cessiun da las Trais Plaivs a Milaun – e da concluder ina pasch, cumbain intscherta. En realitad regnava anc adina il status d'in armistizi. Il mars 1531 è il chastellan entrà danovamain en Vuclina ed ha occupà Murbegn, nua ch'el ha procurà ina sconfitta dolurusa als Grischuns ch'han sin quai clamà en agid ils Confederads alliads (Segunda Guerra da Müsch). Friburg, Solorum ed ils lieus reformads en suandads il clom, entant che quels catolics da la Svizra Interna han fatg dependent lur sustegn dal return dals Grischuns a la cardientscha ve-



Las restanzas da la fortezza sco ellas sa preschentan oz.

FOTO PD

glia. Ensemen cun las truppas federalas han ils Grischuns stgatschà il Medeghin da la Vuclina. Cun il contract da pasch dals 13 da favrer 1532 ha il duca da Milaun reconuschì il possess grischun da la Vuclina, da Buorm e da Clavenna. Ils Grischuns han alura demolì la fortezza da Müsch. Pli tard han ins explotà en la part sura da l'anterior implant il crap da marmel ch'è vegnì elavurà a moda industrial ed exportà en il 19 e 20avel tschientaner, per exempel il 1850 per la renovaziun dal dom da Com.

Martin Bundi

Dongo

Vischnanca taliana situada en la part sura dal Lai da Com. Tranter il 879 ed il 1532 furmava Dongo cun Sorico e Gravedona las Trais Plaivs che controllavan l'access en Vuclina ed als pass grischuns. Durant il 13avel tschientaner han ils baruns de Sax tgirà relaziuns intensivias cun las Trais Plaivs da lur sedia a Roveredo sur il Monte Dongo. Dongo appartegneva al domini da Milaun che sutstaveva als Sforzas. Il 1512 han ils Grischuns occupà la vischnanca da Dongo ch'els han alura puspè pers il 1525 a Gian Giacomo Medici (il Medeghin) en l'Emprima Guerra da Müsch, evocada il 1527 da Gian Travers en sia «Chianzun dalla guerra dalg Chiaste da Müs». Dapi il 1430 fin il di dad oz vegnan explotads ed elavurads minerals da fier al Monte Dongo.

Adolf Collenberg

Gravedona

Vischnanca situada en la provinza taliana da Com en la part sura dal Lai da Com. 2001 2614 abitants. En il temp autmedieval era Gravedona la chapitala da la Re-

publica da las Trais Plaivs. En il temp medieval disponiva la vischnanca d'in vast retroterra agricul a Livo, Dosso del Liro e Valle S. Jorio. Gravedona è stà in port impurtant per la navigaziun sin il Lai da Com. En il 15avel tschientaner partivan da Gravedona las novas vias da sauma sur il Pass da S. Jorio vers Blinzuna e sur il Bocchetta di Camedo vers Roveredo. La vischnanca tgirava intensivias relaziuns economicas e culturalas, cun fermes barats da la populaziun cun il Mesauc. Gravedona è stà la sedia da cumissaris (derschaders, 1450–58) e d'in podestat dal Grischun (1512–25) ed è alura vegnì attribui a Milaun.

Martin Bundi


Gian Giacomo Medici

* 1495, † 8 da november 1555 a Milaun. Figl da Bernardo e da Cecilia n. Serbelloni. Frar da Giovanni Angelo, il posteriur papa Pius IV, e da Margherita, mamma dal cardinal Carlo Borromeo. Descendent d'ina famiglia da l'auta aristocrazia, numnà era il Medeghin respectivamain der Müsler. Il 1523 ha Gian Giacomo Medici obtegnì en feud dal duca da Milaun Francesco II Sforza il signuradi da Müsch, situà en la part sura dal Lai da Com. El ha transfurmà il chastè da Müsch en ina fortezza ed ha stgaffì in'atgna flotta, cun la quala el ha pudì smanatschar il traffic dals Grischuns e Confederads cun il ducadi da Milaun. Il schaner 1525 è el entrà en la Vuclina ed ha occupà las Trais Plaivs e Clavenna. Suerter la sconfitta cunter ils Grischuns a Murbegn en l'Emprima Guerra da Müsch dal 1525, è el sa retratg. Il 1531 ha el attagà danovamain la Vuclina en la Segunda Guerra da Müsch, el ha dentant pers la battaglia cunter ils Grischuns ed ha stuì bandunar Müsch; la fortezza è vegnida demolida. Gian Giacomo Medici è alura stà activ sco condottiere en servetsch da l'Imperi e da la Spagna.

Martin Bundi

Gian Travers

* 1483 a Zuoz, † 22 d'avust 1563 a Zuoz, da Zuoz. Figl da Jacob. ∞ Anna n. Planta, figlia da Thomas. Furmaziun umanista e giuridica en universitads da la Germania (tranter auter a Lipsia il 1503) ed en Transilvania. Sco manader d'ina bandiera (fengli) da l'Engiadin'Ota ha Gian Travers participà il 1515 a la Guerra da Marignano. Governatur da la Vuclina 1517–19. Nobilità il 1519, ensemen cun ses cusrin Simon, tras l'imperatur Maximilian I. Durant sia segunda perioda d'uffizi sco governatur da la Vuclina (1523–25) ha gi lieu l'Emprima Guerra da Müsch (1525), en la quala Gian Travers è sa cumprovà, sco en la Segunda Guerra da Müsch (1531), sco cumandant dals Grischuns e Vuclinais. Sco landamma da l'Engiadin'Ota – in uffizi ch'el ha occupà 13 giadas – ha Gian Travers contribuì essenzialmain a rinforzar la Republica da las Trais Lias (Artitgels da Glion 1524) ed a reparter il territori da las uschenumnadas



Las truppas grischunas ed aliadas attatgan il chastè da Müsch. (Entagl en lain or da la cronica da Guler von Wyneck, 1616).

FOTO PD

Markgenossenschaften da l'Engiadin'Ota en singulas vischnancas (1539–42). El ha represchentà repetidamain la Republica da las Trais Lias a la Dieta federala ed a las curts da l'exteriur.

Interessà per dumondas da religiu ed influenzà da la *Devotio moderna* (moviment cristian religiu dal temp medieval tardiv), ha Gian Travers participà il 1537 sco deputà da Zuoz a la Disputaziun da religiu a Susch, nua ch'el è s'engaschà per daplì toleranza en dumondas teologicas. L'interrupziun dal Concil da Trent (1552) ha destrui sia speranza da pudair evitar ina separaziun da la Baselgia. Sia conversiun al protestantissem (1552) ha inizià la segunda epoca da la Reformaziun en il Grischun e l'abandun da l'Engiadin'Ota da la creta catolica. Sin ses giavisch han ins clamà a Zuoz il predigtant Philipp Gallicius ch'ha gidà a proclamar la nova ductrina reformada. Cun il consentiment da la Sinoda ha Gian Travers sez predeggià cun passa 70 onns giu da chanzla a Zuoz. Pli tard è el s'opponì cun success a las tentativas dals predigtants d'abolir l'investgiu da Cuir, quai ch'è strusch vegnì chapì a ses temp – ed era pli tard – da ses amis reformads. Per Gian Travers, maiordom e chancelier da l'investg Paul Ziegler, represchentava il chapitelatedral l'urden instituziunal, per il qual el è s'engaschà durant tut sia vita. El era persvas che l'aboliziun da quel favurisiss mo singulas familias e periclitass l'existenza da la Republica da las Trais Lias.

Gian Travers ha tgirà ina viva corrispondenza cun numerus scienziads svizzers ed ha contribuì, ensemen cun ses ami Heinrich Bullinger, decisivamain a la fundaziun da la scola statala (level superiur) installada en l'anteriura claustra da S. Nicolai a Cuir. Oz è Gian Travers enconuscent surtut grazia a sia lavur litterar; el vala sco fundatur da la lingua scritta putera e rumantscha. La descripiun da sia praschunia en il chastè da Müsch dal settember 1525 en fin mars 1526 (Emprima Guerra da Müsch) en furma d'ina cronica en rima (700 vers) è il document il pli tempriv da la litteratura rumantscha («Chanzun da la guerra dalg Chiaste d'Müs», 1527). In grond effect han gi ses dramas biblics, las emprimas ovras represchentadas en il Grischun en lingua rumantscha a partir dal 1534.

Constant Wieser

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Da Breil tanscha l'egliada sur l'entira Cadi. (Carta postala enturn il 1930).



Squard nà da Sursaisa sin il territori da la vischnanca da Breil.

Breil – emprima staziun dal LIR en la Cadi

■ **La Cadi (dal term «Casa Dei» che sa referescha a la claustra da Mustér) giachsa sisum la Surselva al cunfin dals chantuns Tessin, Uri e Glaruna. La preschentaziun dad oz porscha infurmezziuns generalas davart quest circuit e fa staziun en la vischnanca da Breil che cumpiglia ils vitgs da Breil, Dardin e Danis-Tavanasa.**

Cadi

Anterior territori suveran da l'abazia da Mustér (Casa Dei), sorti il 765 dal domini curretic tras la donaziun fixada en il Testament da Tello, uvestg da Cuir. 1371 *Lacadey*. La Sursassiala (sur la Val Russein) cun ils vischinadis da Mustér, Medel/Lucmagn e Tujetsch furmava il center da la Cadi, a la Sutsassiala (sut la Val Russein) appartegnevan Sumvitg, Trun e Breil. L'aula da s. Pieder a l'ost da Tavanasa furmava dapi il 1185 il cunfin oriental da la Cadi. Il 1213 è documentada regaglia ed il privilegi da dieschmas, concedi a la prinzi-abazia da Mustér. Il 1285 è la Cadi sa preschentada per l'emprima giada cun in agen sigil. Il 1371 è menziunà l'emprim mastral (per propi) da la Cadi. Il 1401 è il cumin s'acquistà l'avugadia sur la claustra da Mustér. En il temp medieval avevan ils Libers exteriori da Lags, domiciliads en la Sutsassiala, lur atgna dretgira che sa radu-

nava a Saissafratg/Castrisch. A l'entschatta dal 16avel tschientaner èn ils blers dad els s'acquistads il dretg da burgais da la Cadi.

Fin il 1851 è la Cadi stada dividida en quatter curts administrativas u dretgiras civilas cun mintgamai in agen stater: Mustér, Tujetsch, Breil/Medel e Trun/Sumvitg. Ils represchentants dals vischinadis furmavan il magistrat da cumin (14 commembers presidiads dal mastral) e la dretgira criminala (40 commembers). En dumondas politicas decideva il cumin che tscherniva il mastral dapi il 1472 dad ina proposta da trais preschentada da l'avat, dapi l'entschatta dal 17avel tschientaner d'ina candidatura libra. Tranter il 1742 ed il 1750 èn questas tschernas succedidas mintg'onn, dapi il 1751 mintga dus onns, e quai il glindesdi da Tschuncaisma. Tranter il 1738 ed il 1745 èn las vischnancas sa liberadas da las dieschmas claustrales. Il 1799 respectivamain 1803 ha la Cadi pers il status d'in territori suveran claustral, il cumin da la Cadi è dentant sa mantegnì fin il 1851. La Cadi aveva duas vuschs a la dieta da la Lia Grischa e dapi il 1803 dus fin tschintg represchentants en il Cussegl grond dal chantun Grischa. Il 1851 è l'anteriuera enclava da Schlans vegnida incorporada sco settavla vischnanca en il nov circuit da Mustér respectivamain en il nov

district dal Rain Anterior (district Surselva dapi il 2001). Il 1854 èn las quatter curts surmenziunadas vegnidas integradas en las ulteriuras sis vischnancas politicas anc oz existentas.

Adolf Collenberg

Sassiala

Territori che s'extendia al vest (Sursassiala) ed a l'ost (Sutsassiala) da la chavorgia da Russein. I sa tracta d'in anteriori territori d'immunitad da la claustra da Mustér. Il term Sassiala deriva dal latin *saxum*, rumantsch grip, crap. La Sursassiala cumpiglia las vischnancas da Mustér, Medel e Tujetsch ed è vegnida urbanisada durant il temp medieval tempriv sut l'influenza da la claustra da Mustér. Il sistem da curts predominava. La Sutsassiala cumpiglia las vischnancas da Sumvitg, Trun, Breil e (dapi il 1851) Schlans e fa part dal vegl territori cultural retic. Qua predominescha il sistem da vischnancas cumpactas. La divisiun en Sur- e Sutsassiala gioga anc a l'entschatta dal 21avel tschientaner ina rolla impurtanta en la repartiziun dals uffizis circitals.

Adolf Collenberg

Rain Anterior

District da dretgira civila stgaffi il 1851 cun la nova organizaziun da las dretgiras grischunas. El correspundeva territorialmain a la dretgira auta resp. al cumin da la Cadi da la Veglia Republica ed al district Funtaunas dal Rain dal Chantun Rezia 1800–03. La vischnanca politica da Schlans fa part da quest district (respectivamain dal cumin da la Cadi) pir dapi il 1851. El è vegnì schlià il 2001 ed integrà en il district Surselva.

Adolf Collenberg

Breil

Vischnanca politica, circuit Mustér, district Surselva (avant il 2001 Rain Anterior). La vischnanca cumpiglia il vitg principal da Breil, situà sin ina terrassa al nord sur la Val dal Rain Anterior e las fracziuns da Dardin-Capeder sut il vitg e Danis-Tavanasa en il funs da la val. 765 in *Bregelo*, dapi il 1943 Breil/Brigels (uffizial). 1850 1086 abitants; 1888 848; 1900 859; 1950 1169; 2000 1187.

Breil è sa sviluppà a partir dal temp roman respectivamain dal temp medieval tempriv. Il 765 ha l'uvestg Tello da Cuir regalà a la claustra da Mustér sia curt cun chasa signurila a Breil, ensemen cun bains e subdits a Dardin, Danis, Schlans e Trun. Sin il crest da S. Eusebius sa chattan restanzas d'ina fortezza cun baselgia dal temp medieval tempriv. Marmarola a l'ost da Breil era probablmain ina migiuria da l'abazia, arsa giu il 1496 (oz ina ruina). A Breil vivevan ils uschenumnads Libers exteriori da Lags, ina gruppa da ca. 200 persunas ch'è s'acquistada l'admissiun a la dretgira auta da la Cadi il 1536 e ch'ha obtegnì in'atgna dretgira civila il 1542. Breil furmava, ensemen cun Medel, la terza curt en la Cadi. La pestilenza ha chaschunà il 1550 316 victimas, il 1556 180 ed il 1631 130. L'onn 1738 han ils abitants cumprà ora las

dieschmas. La baselgia parochiala da S. Maria a Breil datescha probablmain dal temp medieval tempriv e vegn documentà il 1185 sco proprietad da la claustra da Mustér. Il 1491 è ella vegnida incorporada a la claustra. Fin en il 17avel tschientaner era S. Maria la baselgia principala da Dardin, Danis e Schlans. Sin territori communal da Breil sa chattavan en tut dudesch baselgias e chapluttas. La vischnanca tradiziunalmain purila tgrava stretgs contacts cun il Glaruna (sur il Pass da la Lembra); ella è stada, grazia als de Latour, in center politic da la Cadi durant il 17–19avel tschientaner. Ils tschancuns da via Breil-Vuorz (1870) e Breil-Tavanasa (1890) servivan era al turissem da stad ch'aveva cumenzà a flurir a partir dal 1850 (oravant tut turissem da cultura). Dapi il 1945 dispona la vischnanca da Breil d'ina piazza da tir per truppas da defensiu cunter aviuns, dapi il 1946 è ella in center impurtant da l'economia d'electricitad cun lais da serra e centralas a Breil ed a Tavanasa. Cun la construcziun dals implants da skis Pez d'Artgas (1972) è Breil daventà in lieu da sport d'enviern. Il 2005 lavuravan 58% da las persunas cun activitad da gudogn a Breil en il terz sector. La part da la populaziun da lingua rumantscha è sa diminuida mo pauc durant ils davos 100 onns: 1880 99% (lingua materna); 2000 80,5% / 88,7% (megra lingua / tuttas indicaziuns). Il territori da Scarlè al nordvest da Breil è dapi il 1911, la Val Frisal dapi il 1999 sut protecciun da la natura. Meglieraziun generala a Breil Vitg dapi il 2002. Il 2003 è la culegna da Cathomen (tudestg Tomahüs) vegnida vendida ed incorporada a la vischnanca da Sursaisa.

Adolf Collenberg

Dardin

Fracziun da la vischnanca politica da Breil, cun Capeder e tschintg ulteriurs aclauns, situada lung la via veglia da Schlans a Breil. L'abitadi Pugas (Arpagaus) è vegnì bandunà il 1800. 765 *Ardunae*. 2008 159 abitants. Sin il Grep Patnasa ed a Dardin chatt'ins craps-scalutta preistorics. L'onn 765 ha l'uvestg Tello regalà a la claustra da Mustér bains e colons a Dardin. Ils Libers da Lags residents a Dardin e Breil han giu fin il 1536 il dretg d'utilisar las pastgiras d'alp da Tschegn Dadens e Dado. Dapi il 1664 furma Dardin ina pravenda, deditgada a s. Bistgaun. L'agricultura predominescha. Meglieraziun generala a Dardin e Capeder iniziada il 1992.

Adolf Collenberg

Danis

Fracziun da la vischnanca politica da Breil, ensemen cun Tavanasa, Wali e fin il 2003 Cathomen, situada en il fund da la val. 2008 447 abitants (ensemen cun Tavanasa e Wali). L'onn 765 ha l'uvestg Tello regalà a la claustra da Mustér bains ad *Anives*. Per far frunt a la Refurmaziun ha l'avat Cristian de Castelberg erigì il 1581 a Danis ina chaplutta deditgada a la Sontga Trinitad. Suenten la separaziun ecclesiastica da

Breil il 1650 è sa constituida la plav da Danis-Tavanasa, pastorada da chaputschins fin il 1940. La construcziun da las Ovras electricas Frisal SA ha inizià suenter il 1970 in ferm svilup economic (oravant tut mastergnanza). Lieu da scola primara da la fracziun e center da scola superiura da l'entira vischnanca politica. Meglieraziun generala terminada a Danis-Tavanasa il 2001.

Adolf Collenberg

Tavanasa

Fracziun da la vischnanca politica da Breil, ensemen cun Danis, Wali e fin il 2003 Cathomen (cedi a Sursaisa). 2008 447 abitants (ensemen cun Danis e Wali). Situada a 800 m a la riva dretga dal Rain Anterior. 765 *Abbatissae* (copia), 1470 *Thafanaten*. L'Ual da S. Pieder a l'ost da Tavanasa furmava dapi il 1185 il cunfin oriental da la Cadi. En il 17avel tschientaner eran domiciliadas a Tavanasa familias reformadas ch'èn ubain convertidas al catolicissem ubain emigradas suenter il 1650. Il 1890 è vegnida costruìda la via chantunala da Tavanasa a Breil, ed il 1912 ha il vitg obtegnì ina staziun da la Viafier retica. Il 1946 è Tavanasa daventà in center da distribuiziun d'electricitad: las centralas da las Ovras electricas Frisal SA, dirigidas da las Ovras electricas da la Svizra Nordorientala (dapi il 2009 Axpo), sa chattan a Mutteins, in'ulteriura centrala ed in lai da serra al vest da Tavanasa. Il 2001 è vegnida decidida la meglieraziun generala.

Adolf Collenberg

Pass da la Lembra (Kistenpass)

Passadi a 2638 m che collià Linthal/GL cun la vischnanca da Breil, tudestg Kistenpass. La Lembra ha strusch giu dapli ch'ina impurtanza regionala. In cas singular è stà il pelegrinadi da perdunanza en il Glaruna, dal qual in avdant da Glion rapporta il 1525, menziunond l'alp crappusa da Nüschen al sidost da l'alp da Baumgarten e la magnifica punt da Panten davos Tierfeld. Il Pass da la Lembra è stà impurtant oravant tut per ils da Breil che chatschavan lur muaglia sin l'Alp Lembra; tranter il 1866 ed il 2005 han els alpeggià mo anc 600–1000 nursas en la regiun dal Mutsee. Il 1799 han truppas da l'armada austriaca traversà il pass. Il 1887 ha la secziun Wintertur dal Club alpin svizzer laschà construir la chamona dal Mutsee sin 2503 m. Il conclus federal dal 1939 da realisar ina via sur la Lembra n'è mai vegnì concretisà.

Martin Bundi



Crest da S. Eusebius cun baselgia dal temp medieval tempriv. (Carta postala dal 1940).

Lexicon Istoric Retic

Il LIR cumpiglia bundant 3100 artigels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Da vatgas, ers ed iseglia – co che l'agricultura è sa midada cun l'ir dal temp

■ **L'economia locala dals temps preistoric e roman è pauc enconuscha. Ils chats e rechats han permiss da realisar ina charta rudimentara da las colonias e da determinar approximativamain la basa da nutriment. Il clima, la topografia e la configuraziun dal terren en il territori alpin han chaschunà (e chaschunan) ina sperta transiziun dal spazi cun culturas intensivias a zonas (pli autas, spundivas, umidas u crappusas) cun in'utilisaziun extensiva.** Ils emprims documents en scrit davart l'agricultura retic-grischuna provegnan da Plinius e da Strabo e menziuneschan muvel alpin retschertgà e chaschiel delicat da la Rezia mess en vendita sin ils martgads romans.

Temp curretic

Ils sistems d'utilisaziun dal terren agricul, applitgads en il temp medieval, eran per regla concepids per l'autoprovèdiment. Avant il 1800 na vegnivan ils guauds e la cultura anc betg separads: il guaud vegniva duvrà era per la pasculaziun. Graduaziuns e superposiziuns da las zonas eran la regla, betg lur separaziun. L'utilisaziun dal terren era fitg differenta d'ina regiun a l'autra. La cultivaziun dad ers (furment, avaina, ierdi, tredi, spelta) vegniva pratigada en il temp medieval tempriv fin en regiuns pli autas ed era pli impurtanta che l'allevament da muvel. Era per il temp autmedieval è documentada ina cultivaziun dad ers intensiva en zonas autas fin a ca. 1600 m (fastizs, toponims). Il sistem dals trais terrens, usità en la Svizra Bassa dapi ca. l'onn 1000, na pudeva betg vegnir applitgà en il Grischun, perquai ch'els envierns eran qua memia crivs e memia lungs. En il Grischun dal Sid vegniva cultivà il terren durant l'entir onn. La cultivaziun en roda (ers u prads), pratigada a l'ur d'areals runcads e cultivads a moda intensiva, era derasada oravant tut en il Grischun dal Nord. Il graun alpin vegniva cultivà savens sin spundas, nua che la naiv luava fitg baud la primavaira. Talas terrasas dad ers caracteristicas, sustegnidas per part da mirs, cumparan en la plipart da las valladas grischunas e sa manifesteschan anc oz en furma da stgalims da plirs meters autezza. Cultivads vegnivan quels ers cun l'arader liber e la zappa, e sin ils auts mettev'ins il graun a madirar a fin sin chischners.

A partir dal 9avel tschientaner è l'allevament da muvel daventà pli e pli impurtant. In svilup evident da quel a disfavur da l'allevament da nursas e da chauras pon ins observar pir dapi il 13avel tschientaner. Las chauras e las nursas eran las «vatgas da latg» dals paupers e dals puranchels. Las nursas furnivan charn e launa, e las pels vegnivan elavuradas a pergamina per las chanzias dals signurs e per ils scriptoris da las claustras. En pli è attestada la produziun da chaschiel-nursa oravant tut en la Tumleasta ed il Partenz. Chavals vegnivan tegnids en il temp medieval tempriv sco meds da barat e da pajament. En il temp autmedieval han els giugà ina rolla impurtanta en la cultura dals chavaliers nobels sco chavals da turnier, da sella e da battaglia. Il portg era medemamain derasà sco animal da chasa, si impurtanza divergiava dentant d'ina regiun a l'autra; l'alpeggiavon dal portg è documentada pir en il 16avel tschientaner. La viticultura vegniva pratigada, grazia al clima pli chaud en cumparegliaziun cun oz, fin en regiuns sur 1000 m (attestada per exempel a Pleif/Vella sin 1200 m). La biera para d'avair già in impurtanza mo sco bavronda da festa. Era fritgs, legums e leguminosas na dastgavan betg



Racolta da fain e da graun, pictura murala a Santa Maria del Castello sper Mesocco (enturn 1460).



mancar en l'economia autarca. Tuttina existivan senza dubi grondas differenzas regiunalas en la tscherna e la valitaziun dal nutriment.

L'impurtanza pli e pli gronda dals vischinadis e da las corporaziuns, ch'han midà successivamain las structures feudales en il temp medieval tardiv e remplazzà la finala ils signurs feudals, ha provocà ina reorganisaziun dals dretgs d'usufruct locals e la separaziun dals dretgs da possess regionalas. Dals conflicts naschids da la reorganisaziun dals dretgs d'usufruct èn sortids, directamain u indirectamain, ils vischinadis e da quels las emprimas vischnancas. Ils Artitgels da Glion dal 1524 e 1526 han confermà l'emprest ereditar sco era l'aboliziun da tscherts impegn feudals ed han promovì l'aboliziun da la dieschma. Ils vegls dretgs feudals (dretgs signurils individuals) han fatg plazza ad in urden, tenor il qual ils possessurs da terren represchentavan, ensemen cun las vischnancas e lur portavuschs, las forzas directivas, e nua ch'els purs gronds han remplazzà las veglias elites feudals. En augment constant da tschentaments ha accumpagnà quest process.

Temp republican (16–18avel tschientaner)

L'economia agropastorala, che cumbinava la cultivaziun dad ers e l'allevament da muvel, è passada en il temp medieval tardiv en Rezia – sco en l'entir territori alpin – gradualmain a l'allevament da muvel. Ella aveva subi grondas perditas da forzas da lavur tras la pestilenza e numerusas faidas ed era esposta ad in pegiurament relativ dal clima. Il passadi da l'economia agropastorala a l'allevament da muvel n'è betg s'effectuà uschè spert ed uschè radicalmain en Rezia sco en auters lieus, cun quai che l'allevament da muvel gross (vatgas) e manidel (oravant tut nursas) predominava en las regiuns colonisadas e cultivadas da Gualsers, entant ch'els Rumantschs, domiciliads en las zonas pli bassas, cuntinuavan a pratigar in'economia da subsistenza basada era sin la produziun agrara. L'allevament da muvel gross ha remplazzà en il 14avel tschientaner quel da muvel manidel en cumbinaziun cun la cultivaziun dad ers. Tranter il 1300 ed il 1500 ha la proporziun tranter l'allevament da muvel manidel e gross (4:1) midà en il contrari (1:4). Cun l'introduziun da l'emprest ereditar e la dissoluziun successiva dal domini feudal en il temp medieval tardiv è creschì l'interess individual a racoltas en regiuns pli autas, daventadas pussaivlas grazia a megliers isegls agriculs (arader, fautsch), a novas tecnics da lavur sco

era a l'organisaziun da la lavur sezza, premissas che n'èn betg sa midadas fundamentalmain durant il temp modern tempriv. Entant ch'en il Grischun dal Nord, oravant tut en Surselva ed en il Partenz, regnava la cultivaziun alternanta (cultivaziun en roda da prads u ers), predominava en la part meridionala dal Chantun la cultivaziun permanenta (cultivaziun constanta dad ers u prads). Ina furma da cultivaziun maschadada para dad esser stada derasada en il Grischun Central. En il Partenz, en Surselva ed en autras valladas grischunas vegniva deponì il fain en clavads sparpagliads en ils auts. Quest manaschi decentralisà pretendeva lungs transports dal fain en las vals: las aclas ed ils mises vegnivan pavlads ora en roda durant l'atun e l'enviern. En il Grischun Central ed oravant tut en l'Engiadina vegniva transportà il fain cun chars e tragliuns en il vitg. La grondezza media dals manaschi purils è sa stabilisada a radund 5 ha. Il possessur d'inal bain agricul appartegneva a la classa mesauna. La derasaziun da l'allevament da muvel ha pretendì pastgs e pastgiras d'alp pli extendids. Ina da tschintg vischnancas enconuscheva la latgaria da famiglia, oravant tut ils abitadis autsituads u sparpagliads e tals cun alps cuntanschiblas facilmain. En autras vischnancas predominava l'organisaziun corporativa. L'attribuziun limitada da las vatgadas preservava las alps da la surpasculaziun. Sin las alps da l'Engiadina vegniva produci dapi ils onns 1520 chaschiel grass, ils auters purs preferivan la produziun da chaschiel magher ch'includeva era la produziun da paintg. Quest model è restà caracteristic fin lunsch viaden il 20avel tschientaner. La pasculaziun cumina era la normalità. Els intellectuals en ils circuls da la Societad dals amis da l'agricultura resguardavan la pasculaziun cumina sco impediment principal per il progress economic. Quests circuls (bainstants) eran insomma ils purtaders da las innovaziuns agriculas: il schlargiament dal sortiment da verdura, meglieraziuns en la viticultura, la pumicultura e la cultivaziun dad ers.

Durant il temp republican era la proporziun tranter la cultivaziun dad ers e l'allevament da muvel sin il plaun local fitg variabla, en general dentant sorprendentamain constanta. En il center steva però l'allevament da muvel bovin. Numericamain bain represchentadas eran las nursas e las chauras. Dasperas tegnevan ins chavals, portgs, giaglinas ed avieuls.

En ils ers vegniva cultivà graun la stad e l'enviern, surtut ierdi e seghel, dasperas leguminosas, bagiaunas ed arvegla ch'eran impurtantas era per la

meglieraziun dal terren. Il tartuffel è sa derasà pli fitg pir enturn il 1770 (fomina). En las valladas talianas dal Grischun procuravan la viticultura e culturas da chastognas per ina tscherta varietad, en la Tumleasta ed en la Val dal Rain la pumicultura e la viticultura. Fritga, verdura e puma vegnivan cultivadas, tut tenor il clima e l'autezza, en ierts e curtins privats. Al mastergn privat appartegneva era la tessaria, alimentada da gronds ers da chonv e da glin da Maiavilla fin en la Tumleasta, il Scanvetg, la Foppa, il Tujetsch e l'Engiadina Bassa.

A partir dal 1800

Fin il 1920 èn stadas l'agricultura e la selvicultura ils secturs economicils pli impurtants dal Grischun pertutgant il dumber dals occupads. In ulteriur gudogn accessori offriva en il 20avel tschientaner surtut il turissem. L'importaziun da graun bunmartgà ha diminui l'impurtanza da la cultivaziun dad ers (oravant tut da seghel ed ierdi) e reduci las surfatschas dals ers a partir dal 1850. La racolta da fain è sa concentrada en il 20avel tschientaner sin la prada grassa en areals pli bass, nua che l'engraschament pli intensiv ha remplazzà successivamain la sauziun. En consequenza da las meglras cundiziuns dal martgà ha l'allevament da muvel (oravant tut quel secundar) superà dapertut la cultivaziun dad ers sunter il 1900. A partir dal 1850 èn vegnidas fundadas chaschiaras (corporativas) en las vals grischunas. Il dumber da nursas e chauras è sa diminui a moda rasanta a partir dal 1950. En ils conturns dals centers industrials (per exempel en l'aglomeraziun da Cuira) ed en las regiuns turisticas è il dumber da vatgas restà pli elevà. Las pastgiras sur il cunfin dal guaud vegnivan utilisadas a moda extensiva tras l'economia alpestra. La modernisaziun da las alps, iniziada a la fin dal 19avel tschientaner, ha promovì chaschiaras comunablas, l'explotaziun centralisada e la construcziun da novs edificis e da vias charrablas. Chaschiel magher vegniva produci per l'agen diever, chaschiel grass e paintg per la vendita. L'economia da subsistenza predominava probablmain anc enturn il 1800, e la plipart da las entradas da las chasadas ruralas provegniva dal muvel vendi anc fin enturn il 1850 sin las fieras annualas en il Tessin ed en la Lombardia, alura oravant tut sin quellas a l'intern dal chantun Grischun e da la Svizra Orientala. Anc a l'entschatta dal 19avel tschientaner era il commerzi da barat fitg derasà (per exempel graun per puma). Fluctuaziuns dals pretschs en l'allevament da muvel han provocà verita-

blas crisas en l'agricultura, per exempel en la segunda mesada dal 19avel tschientaner ed oravant tut en il temp tranter las duas guerras mundias, durant il qual blers manaschis èn s'indebitads fermamain. L'aboliziun da la pasculaziun cumina, discutada intensivamain en il 19avel tschientaner, han ils possessurs da chauras e nursas pudì impedir.

A l'exempel da l'economia da latg èn naschidas numerusas societads per la promoziun da l'agricultura da muntogna: la Societad svizra per l'economia alpestra è s'engaschada per l'economia d'alp indeblida; dal 1864 date-scha l'emprim cataster da las alps. Il 1844 è vegnida fundada l'Uniun purila grischuna, a l'exempel da la quala èn suadadas fin il 1908 uniuns en tut ils chantuns muntagnards. Il 1863 èn s'unidas las societads chantunales a l'Associaziun svizra d'agricultura. En il 20avel tschientaner èn naschidas numerusas ulteriuras organisaziuns per la promoziun dal territori da muntogna. Il 1896 ha il Grischun fundà, sco emprim chantun da muntogna, ina scola d'agricultura professiunala (Plantahof). A partir dal 1924 èn naschidas era scolas da puras.

La Constituziun chantunala dal 1880 ha postulà explicitamain la promoziun da l'agricultura, per exempel tras premiaziuns da muvel e meglieraziuns. Corporaziuns per l'allevament da muvel, la produziun, il consum e la finanziaziun da manaschis purils han cumpletà a partir da la segunda mesada dal 19avel tschientaner las organisaziuns purilas tradiziunales d'agid vivendaivel.

Dapi il 1950 perda l'agricultura cuntinuadamain impurtanza. Las entradas dals purs da muntogna sa diminueschan constantamain, uschia che adina dapli purs, oravant tut quels pli pitschens (fin a 10 ha), ston capitular. La mecanisaziun da l'agricultura è stada indispensabla, ma sulettamain bains purils pli gronds e centralisads pudevan sa prestar quella mecanisaziun. La grondezza dals manaschis purils è sa stabilisada dapi il 1980 a ca. 25 ha. Dapi ils onns 1920 sustegna la Confederaziun l'agricultura cun mesiras urgentas, extendidas a partir dals onns 1950. Surtut la lescha davart l'agid d'investiziun dal 1974 è s'effectuada a moda positiva. Ils subsidis e las stentas dals purs sez per ina raziunalisaziun da l'agricultura han dentant mo pudì retardar la crisa ed il chal da l'agricultura da muntogna, ma betg la franar. Il 1993 hai dà ina midada da paradigma en la politica agrara da la Confederaziun: auzament dals pajaments directs als purs e reduziun da la subvenziun dals products agriculs. Dapi ils onns 1990 cultiveschan blers purs grischuns (1997 passa 30 %, 2003 passa 50 %) lur bains tenor las directivas da l'Associaziun d'organisaziuns per l'agricultura biologica. Il Grischun è a la testa da quest svilup, era perquai che l'agricultura da muntogna n'è mai stada adattada per ina produziun agrara industrial. Il chantun Grischun retschaiava – sunter il chantun da Berna – las pli bleras subvenziuns per l'economia d'alp.

Adolf Collenberg

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Dal Pass dal Spleia al Cuolm Val

Scuvertas entadim il Valragn

■ Tgi che traversa oz il Valragn sa chatta per il solit en viadi per il San Bernardin. Ma i dat anc tut outras scuvertas da far entadim il Valragn. Il viadi dad oz maina da l'ospizi dal Pass dal Spleia sur ils vitgs da Medels im Rheinwald, Nufenen e Hinterrhein enfin al Valsberg (Cuolm Val) che furma la colliaziun tar ils Gualsers da la Val S. Pieder.

Pass dal Spleia

Passadi a 2113 m che maina da Valragn (Val dal Rain Posterior) en la Val S. Giachen en l'Italia, talian Passo dello Spluga, tudestg Splügenpass. Il pass ha survegni ses num da la vischnanca da Spleia, situada al punct da partenza da la vart nord (831 *cella in spelu- ca*). En il temp medieval vegniva il Spleia era numnà Colmen d'Orso ed Urschler.

Il chat d'ina barra da fier en vischinanza dal pass cumprova ch'il Spleia vegniva frequentà gia en temps preistorics. Dues chartas da vias romanas documenteschan il diever dal Spleia: l'«Itinerarium provinciarum Antonini Augusti» (ca. 300 s.C.) menziunescha a la ruta dal Spleia tranter Cuira e Clavenna la staziun da *Tarvesede*, situada probablmain en la Val S. Giachen. En la «Tabula Peutingeriana» (terz tschientaner s.C.) è attestadas las staziuns da *Lapidaria* en il Schons, Cunareu (evtl. sin il Spleia) e *Tarvesedo*. Cuntrari als pass dal Güglia e dal Set na para il Spleia betg d'esser stà charabel en il temp roman. Entant ch'il tschancun da la vischnanca da Spleia al pass è topograficamain pauc pretensius, è la descensiu suenter la planira dal Munt Spleia (talian Monte Spluga) ordvart stappa e difficila. Fin viaden il 19avel tschientaner existivan là adina duas vias diversas: la via da sauma «di sotto» manava lung il Liro tras la chavorgia dal Cardinel ad Isola, quella «di sopra» sur il culm d'Andossi via Madesimo u Pianazzo a Campodolcino, nua che las rutas s'univan puspè.

La colonisaziun permanenta da la part sura da la Val S. Giachen (13avel tschient-

attestadas il 1396 entradas considerablas per la duana al Spleia. Da grondschma impurtanza per la prosperità dal Spleia è stada la construcziun da la via tras la Viamala ch'era l'impediment principal da la vart settentrionala da las Alps. A quella han participà tant ils abitants da Spleia sco era vischins dal Valragn e da la Val S. Giachen. Il traffic da martganzia vegniva tgirà dals ports, menziunads gia en la brev da la Viamala dal 1473. I sa tractava da corporaziuns localas da purs da sauma (berniers) che transportavan la martganzia d'ina susta a l'autra. A Spleia surpigliavan ils berniers dal Valragn Dadora la martganzia dals da Schons e transportavan quella fin a l'ospizi al Munt Spleia. Là spetgavan ils purs da la Val S. Giachen per manar la rauba a Clavenna. Quest monopol da transport dals abitants residents aveva per consequenza che la martganzia vegniva transtgargiada tshintg giadas da Cuira fin a Clavenna e viceversa. Mo la rauba d'express dastgava vegnir transportada sin via directa (uschenumnada Strackfuhr).

La situaziun strategica da la Val S. Giachen al pe meridional dal Spleia declera sia dependenza da las Trais Lias. Ella aveva dentant divers privilegis entaifer las Terras subditas dal Grischun (1512–1797): il port da la Val S. Giachen per exempel aveva ils medems dretgs sco quellas al nord da las Alps. Il traffic da transit era impurtant per l'economia regiunala. A Spleia per exempel vivevan il 1809 quaranta berniers che pratigavan a medem temp l'agricultura ed il transport da martganzia (en roda); set berniers d'express eran occupads mo cun il transport da martganzia, dal qual els eran dependents. Fin a l'entschatta dal 19avel tschientaner vegnivan utilisads per regla chavals da sauma per il transport da rauba sur il Spleia. Chars a dus ischigls paran d'esser stads grondas excepziuns. Il 1798 scriva Heinrich Joseph Johannes Graf von Bellegarde che la via saja «covernada da crappa gizza e d'ina nauscha salaschada» e che «la



Il vitget da Hinterrhein cun la via dal San Bernardin ed il Piz Valragn (1825).

sur ils cunfins svizzers fin a Spleia. Questa via correspunda per gronda part a la ruta anc oz utilisada. Al nord dal Spleia na manava la via, conform als plans da l'inschigner Carlo Donegani, betg pli tras las lavineras da l'Altberg. Al sid han ins tscherni ina lingia pli u main nova che manava sut il Munt Spleia fin a Campodolcino e che guntgiva la chavorgia dal Cardinel. Surtut da la vart sid dal pass è vegnids construids numerus galarias e refugis. Suenter las auas grondas desastras dal 1834 è la via vegnida parzialmain transferida. Il 1841 han ins erigi da la vart nord, a 2022 m, l'emprima chasa cun ina staziun da duana.

Suenter l'avertura da la via dal Spleia, è creschì il traffic da martganzia en pauc temp considerablmain. En ils decennis sequents è stà il Spleia in dals pass alpines cun las pli autas frequenzas. Sper il transport da martganzia è sa stabili plaun a plaun in traffic turistic. Ils berniers, ustiers, mastergnants e purs profitavan dal transit. Ils berniers vegnivan ussa emploiads e pajads da spediturs e d'interpresas da transport, surtut da Cuira e da Clavenna, ch'han remplazzà, cunter l'opposiziun da las vals da transit, ils ports dals purs da sauma. Il traffic da transit sur il Spleia ha cuntanschì sia culminaziun en ils onns 1850. L'avertura da las viafiers dal Brenner (1867) e dal Mont Cenis (1872) ha diminui il traffic sur il Spleia. L'avertura da la Viafier dal Gottard (1882) ha provocà in'interrupziun quasi cumpletta dal traffic da transit tras il Grischun. Ils projects per la realisaziun d'ina Viafier dal Spleia n'han gì nagin success. Dapi la Segunda Guerra mundiala è la via sur il Spleia serrada durant l'enviern.

Jürg Simonett

Medel/Valragn

Anteriura vischnanca politica, circuit Valragn, district Rain Posterior, fusiunada cun la vischnanca da Spleia il 2006. Abitadi sparglià a la via dal San Bernardin, cun las fracziuns da Dorf, Döörfl, Nühhus ed, en il pass, Aebi. 1219 *Medels*, tudestg *Medels im Rheinwald* (uffizial). 1781 139 abitants; 1850 89; 1900 69; 1950 47; 2000 46. Oriundamain in territori d'alp, utilisà da la populaziun rumantscha da Schons. Enturn il 1300 èn immigrads Gualsers derivants per gronda part da la Val Formazza. Fin il 1277 è la vischnanca stada sut la protecziun dals baruns de Sax-Mesau, alura è ella ida en possess dals de Vaz. A Aebi, al vest dal vitg, sa tegneva dal 15avel tschientaner fin il 1856 la tschentada da cumin dal Valragn. Ecclesiasticamain ha Medel/Valragn appartegnì al chapitel da S. Giovanni e S. Vittore, alura a la plaiv da Valragn e suenter l'introducziun da la Refurma enturn il 1530 a Spleia. Il 1708 è vegnida construida la baselgia. Il 1726 furmava Medel/Valragn in'atgna plaiv ch'è puspè sa reunida cun Spleia il 1886. Fin viaden il 19avel

tschientaner han ils abitants da Medel/Valragn vivi surtut dal traffic da transit sur il Spleia sco era da l'allevament da muvel e da l'economia d'alp. Las inundaziuns dal 1868 han sfurzà ils abitants da bandunar la culegna dad Aebi. Il 1955 è la scola dal vitg vegnida serrada e Medel/Valragn è s'uni al consorzi da scola da Spleia. Arrundaziun dal terren e construcziun da paralavinas 1974–84. Medel/Valragn è oz in vitg puril cun ina populaziun germanofona.

Kurt Wanner

Nufenen (Novagnas)

Vischnanca politica, circuit Valragn, district Rain Posterior. Vitg accumulà a la via dal San Bernardin, circumdà da var 15 curts exteriuras fin viaden il 18avel tschientaner. 1343 *Ovena*, 1633 *Nufena*, tudestg *Nufenen* (uffizial). 1781 366 abitants; 1850 344; 1900 206; 1950 170; 1990 121; 2000 127. Novagnas era oriundamain ina regiun dad alp dals Rumantschs da Schons, colonisada enturn il 1280 da Gualsers derivants per gronda part dal Pomat (Val Formazza). Fin il 1277 è stada suttamessa la regiun als baruns de Sax-Mesau, alura als signurs de Vaz. Fin il 1800 è Novagnas stà la pli gronda vischnanca dal circuit da Valragn, dal qual ella è restada il center politic. Al sid da Novagnas sa chattava il lieu d'execuziun (furtga) dal Valragn. Ecclesiasticamain appartegneva Novagnas oriundamain al chapitel dals SS. Giovanni e Vittore en il Mesau, ca. 1300–1696 a la plaiv da Valragn. Construcziun d'ina baselgia 1643. Atgna plaiv 1696–1874, alura puspè plaiv communal cun Valragn, reformà dapi il 1530. Fin enturn il 1880 viveva la populaziun da Novagnas da l'agricultura, da l'economia alpestra e – sco purs da sauma – dal transport da martganzia sur il Spleia ed il San Bernardin. L'avertura dal tunnel dal Son Gottard ha mess ina fin als transports da sauma e sfurzà ils purs da returnar ad ina struttura da gudogn spiramain agrara. En il 19avel tschientaner ha gì lieu in'intensiva emigraziun, oravant tut en ils Stadis Unids da l'America e la Nova Zelanda. A Novagnas è vegnida construida il 1846 l'emprima chascharia cooperativa dal Grischun (reconstruida il 1984). Meglieraziun generala 1978–84. Il 2005 lavuravan 72% da las persunas cun activitad da gudogn a Novagnas en il sector primar, 25% en il sector terziar.

Kurt Wanner

Hinterrhein (Valragn)

Vischnanca politica, circuit Valragn, district Rain Posterior. Vitg aglomerà al portal nord dal tunnel dal San Bernardin. 1219 *de Reno*, tudestg *Hinterrhein* (uffizial). 1781 171 abitants; 1850 163; 1900 147; 1950 94; 1990 68, 2000 105. Territori utilisà sco regiun d'alp avant l'immigraziun dals Gualsers en il 13avel e 14avel tschient-

aner. Fin viaden il 13avel tschientaner han exercità ils signurs de Sax-Mesau la suveranità territoriala. Il 1219 han quels regalà lur atgna baselgia da S. Pieder a la baselgia collegiata a San Vittore. Valragn è il pli vegl abitadi da Gualsers documentà en il nord dal San Bernardin: dal 1274 datescha in contract da protecturat stipulà tranter il baron Albert de Sax-Mesau ed ils frars gualsers Jakob e Hubert, dal 1286 in contract da feud ereditar negozià tranter il convent da San Vittore ed ina gruppa da colonists da lingua tudestga, derivanta per gronda part da la Val Formazza e dal Simplon. Il 1301 è attestà per l'emprima giada il vischinadi da Valragn. Dal 14avel al 19avel tschientaner han pratigà ils da Valragn, ultra da l'agricultura e da l'economia d'alp, transports da sauma sur il San Bernardin (susta a Valragn dal 1580). A la veglia via da sauma sa chatta la «Landbrügge», construida da Peter Zurr il 1692 (renovada gia il 1696). Il 1799 ed il 1800 è la vischnanca da Valragn vegnida sblundregiada tras truppas franzosas ed austriacas. Il 1960–67 è vegni construi il tunnel dal San Bernardin. A partir dal 1965 ha mantegnì la Confederaziun ina piazza da chars armads al vest da Valragn. Il 2008 lavuravan 86% da las persunas cun activitad da gudogn a Valragn en il sector primar.

Kurt Wanner

Valsberg (Cuolm Val)

Pass alpin (2504 m) che collia Val e la Val S. Pieder cun il Valragn, tudestg *Valsberg*. Chats dal temp da fier a la via da pass. A partir dal 14avel tschientaner han colonisà Gualsers l'emprim la val laterala Peil, alura la Val S. Pieder a partir dal Valragn e sur il Cuolm Val. Questa colliaziun è stada d'impurtanza regiunala tranter il Rain Posterior ed Anterior, schizunt per l'export da muvel glarunais sco prolungaziun dal Veptga. Fin en la segunda mesadad dal 19avel tschientaner furmava il Cuolm Val la colliaziun principala per il provediment da la Val S. Pieder cun vin e sal e per l'export da muvel a las fieras en il Tessin ed en l'Italia dal Nord. Bliers emploiads stagiuinals da la val gievan sur il Cuolm Val a lavurar en il Valragn. Cun l'avertura da la via Glion-Val (1879) ha il Cuolm Val pers si'impurtanza e la val è alura s'orientada vers il nord.

Jürg Simonett



En viadi sur il Pass dal Spleia.

KEYSTONE

taner) ha era rinforzà ils contacts regiunals sur il pass ch'avevan gia adina existì tranter l'investgieu da Cuira e Com. In punct central dal contract da pasch dal 1219, stipulà tranter il Schons (cun il Valragn Dadora) e Clavenna, era la segirezza dal traffic sin la ruta dal Spleia. Tut las persunas da Clavenna e dals lieus limitrofs duevan pudair traversar libramain e segiramain cun lur martganzia l'entira Val Schons da la Viamala *usque ad Spelugam* (fin a Spleia resp. fin sin il pass). Quai valeva era per las Alps da Clavenna, fittadas al nord da las Alps. Il Spleia è probablmain vegnì concorrenzà temporarmain dal Pass da Niemet (2295 m) che maina da Calantgil a Madesimo. Il 1226 ha Clavenna vuli laschar construir ina via per chars d'in ischigl da Campodolcino a Madesimo. Da là davent avev'ins access tant al Spleia sco a l'Alp Niemet, fittada da Clavenna dapi il 1204.

Il pass grischun il pli impurtant en il temp medieval era il Ser a la Via Sura, promovì da l'investgieu da Cuira. Ils conts da Werdenberg-Sargans avevan tschertgà en il temp medieval tardiv da sviar il traffic da transit lucrativ sin la Via Sut sur il Spleia u sur il San Bernardin. L'imperatur Carl IV ha però preferì il Pass dal Set ch'ha obtegni suenter il 1387 ina via charrabla. Tuttina èn

gronda part da martganzia da la regiun da Milaun fin en Germania vegn[i]a trasportada sur quest pass, il pli savens cun chavals e mills.

L'ospizi sa chattava a 1901 m a l'ur da la planira auta dal Munt Spleia. La via tras la chavorgia privlusa dal Cardinel è vegnida sanada per gronda part enturn il 1643 e suenter il 1709 ed è alura vegnida tagliada parzialmain en il grip. Era ils tschancuns sur Madesimo e Pianazzo èn vegnids renovads. Il marschal franzos Alexandre Mac Donald duai avair pers il december 1800 plirs tschients umens cun traversar il Spleia. Dapi la separaziun da la Vuclina da las Trais Lias (1797) furma il Spleia era il cunfin nazional.

En ils onns 1818–23 han ins construi, ultra da la via dal San Bernardin, l'emprima via per chars da martganzia e charrotschas sin l'entir traject dal Spleia. Suenter il Simplon ed anc avant il Gottard è la Via Sut daventada uschia la segunda via d'art sur las Alps. Il traject da Cuira sur il San Bernardin a Blinzuna è vegnì finanzià dal chantun Grischun, per gronda part dentant dal reginavel da la Sardegna-Piemont. Per il reginavel lumbard-venezian era il traffic sur il Spleia periclità, quai ch'ha motivà el da laschar construir da sia vart, ad agen quint, ina via

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Las represchentanzas grischunas en l'Assamblea federala ed en il Cussegl federal


■ Il Grischun fa part da la Confederaziun svizra dapi l'onn 1803. Tranter il 1803 ed il 1848 pudevan ils chantuns trametter in fin dus mess a la Dieta confederala che tractava en emprima lingua la politica da l'exteriur e conflicts a l'intern. Il stadi modern cun las instituziuns politicas d'ozendi è vegni stgaffi l'onn 1848. La Constituziun federala ha remplazzà la Dieta tras il Cussegl dals chantuns cun mintgamai dus represchentants chantunals. Quel furma dapi alura, ensemen cun il Cussegl naziunal, l'Assamblea federala a duas chombras e, sco tala, la legislativa da la Svizra. En la regenza federala è il Grischun stà represchentà fin qua cun trais cussegliers federali ed ina cussegliera federala: Simeon Bavier (1879–1883), Felix Calonder (1913–1920), Leon Schlumpf (1980–87) ed Eveline Widmer-Schlumpf (a partir dal 2008).

Cussegliers dals chantuns

En ils onns 1848–80 vegnivan els tschernids dal Cussegl grond (legislativa) durant la sessiun da stad (matg/zercladur) per la durada dad in onn. Dapi il 1881 succedeva l'elecziun il mars tras il pievel tenor il sistem da maiorz per ina durada da trais onns, dapi il 1974 per ina durada da quatter onns. Per garantir la paritad confessiunala (2 reformads, 1 catolic), pretendida fin il 1880, è vegni fixà il 1857 in urden da successiun exact. Ils suppliants vegnivan tschernids da la cumissiun dal Cussegl grond e stuevan vegnir confermads da quel en la proxima reuniun. L'entrada en uffizi succedeva dapi il 1855 per l'emprima sessiun ordinaria sunter l'elecziun.

Dal 1848–80 possedeavan ils Liberals reformads e catolics in monopol, exceptà ils tsching onns dal mandatari conservativ Remigius Peterelli. En ils onns 1881–91 eleveva il pievel mo represchentants da l'Uniuon federalistic-conservativa, dal 1892–1934 l'exponent liberal, l'conservativ e dal 1935–2007 l'conservativ ed l'democrat. Ils onns 1848–72 èn stads onns da midada dals mandats da l'elita signurila (Salis, Latour, Tscharnier, a Marca) a las novas elites d'origin puril e burgais, tuts cun scolaziun universitara (82 % giurists).

Adolf Collenberg



Eleccziuns dal Cussegl naziunal e dal Cussegl dals chantuns dapi il 1919.

Cussegliers nazionals

Elegids dapi il 1848 tras il pievel, l'emprim en quatter, a partir dal 1863 en trais circuits regionalis ed a partir dal 1902 en in sulet circuit electoral grischun. L'elecziun dals cussegli nazional è succedida fin il 1919 tenor il sistem da maiorz, dapi alura tenor proporz. Durada d'uffizi: 1848–1930 trais onns, dapi il 1931 quatter onns. Entrada en uffizi: per la sessiun da december da l'onn d'elecziun. Dumber da represchentants dal Grischun: 1848–62: 4; 1863–1910: 5; 1911–62: 6; dapi il 1963: 5.

Dal 1848–61 regiva exclusivitat liberala (4), dal 1863–1919 han ils Liberals trais dals 5 respectivamain 4 dals 6 mandats. Dal 1919–28 domineschan ils Conservativs cun 3 mandats, entant che la PL perda il 1925 in mandat a la PS ed il 1928 in segund a la PD. Dal 1935–59 occupan las partidas burgaisas tut ils mandats, ed alura puspè – sunter in intermez da la PS en ils onns 1959–62 (1 mandat) – fin il 1974. Dapi il 1979 è la PS represchentada cun 1 mandat, dapi il 1991 cun 2; in da quels è passà il 1999 a la PPS. Ils dus mandataris da la PPS (Brigitta Gadiant e Hansjörg Hassler) èn entrads il 2008 en la PBD ch'els han gidà a fundar sunter l'exclusiun da la secziun grischuna da la PPS en consequenza da l'elecziun dad Eveline Widmer-Schlumpf sco cussegliera federala enstagl da la reelecziun da Christoph Blocher il december 2007. Passa 68% dals total 91 mandataris èn giurists, mo 14% (15%) senza scolaziun academica. Il 1974 era vegnida elegida Elisabeth Lardelli sco emprima donna grischuna en il Cussegl naziunal. La midada da la veglia elita signurila (Bavier, a Marca, Planta, Latour, Salis, Tscharnier, Sprecher) a la nova elita academica (d'origin puril e burgais) è succedida tranter il 1848 ed il 1883. La represchentaziun confessiunala adequata e la ferma posiziun da la Surselva fin en ils onns 1980 resultava da la disciplina quasi assoluta da l'electorat catolic-conservativ (l'uschenumada Lavina nera).

Adolf Collenberg

Simeon Bavier

* 16 da settember 1825 a Cuira, † 27 da schaner 1896 a Basilea, reformà, da Cuira. Figl da Johann Baptist. ∞ Barbara nata von Salis-Seewis, figlia da Johann Jakob, bundsstalter da la Lia da las Diesch Dretgiras. Studi d'inschigner da construcziun bassa a las scolas politechnicas da Karlsruhe e Stuttgart 1841–44, alura collavuraziun, sut Richard La Nicca, a la construcziun da las vias tras las Alps dal Grischun, per exempel a la Via sursilvana ed a quella dal Bernina. Inschigner districtual a Spleia 1850–51. A partir dal 1853 è Bavier sa deditgà surtut a la construcziun da viafiers en Svizra ed a l'exteriur. Il 1861 ha el dirigì la construcziun da la filandaria da mangola Meiersboden a Cuira. Ses engaschament instancabel per la Viafier da las Alps Orientalas sa lascha declarar tras sia professiun e sia derivanza d'ina da las grondas famiglia da spediturs grischunas. Bavier ha cumenzà sia carriera politica il 1853–54 sco landamma e commember dal Cussegl grond (per il circuit da Gianatsch). Dal 1863–78 è el stà cusseglier nazional liberal. Il success da sia intermediazion sco cumissari federal a chaschun dals Scumbigls tessinai dal 1876–77 ha anc augmentà la reputaziun da Bavier che valeva gia sco capacitat sin il champ da viafiers. En l'Assamblea federala è el stà in politicher liberal moderà, ma sceptic envers la revisiun da la Constituziun federala (1872–74). Ses engaschament per ina subvenziun dal Gottard ha liberà el da la critica da promover unilateralmain la Viafier da las Alps Orientalas.

Il december 1878 è Bavier vegni elegi sco cusseglier federal cun ina gronda maioritad da las vuschs dal center liberal fin a la sanestra. Il 1879 ha el dirigì il Departament da finanzas e da duanas, il 1880–81 quel da las postas e viafiers, nua



Simeon Bavier – emprim cusseglier federal dal Grischun.

ch'el è s'engaschà per tariffas pli clerass e per ina meglra surveglianza federala da las 24 administraziuns da viafier. Il 1882 ha el dirigì, sco president da la Confederaziun, il Departament politic. Sunter sia demissiun per raschuns da sanadad il schaner 1883, è Bavier stà minister da la Svizra a Roma fin il 1895. Sias ragischs famigliaras e sia furmazion han fatg dad el in expert da la politica da traffic, sias enconuschientschas dal mund e da las linguas in mediatuor e diplomat. Sia influenza era plitost quella d'in specialist che d'in um da partida. Sunter l'abandon dal project d'ina lingua da viafier en las Alps Orientalas, ha Bavier sustegnì a moda loiala quella dal Gottard ch'el ha inaugurà il matg 1882 sco president da la Confederaziun. Cun gronda luciditad aveva el vis che l'acceleraziun dal traffic da transit alpin purtava bain avantatgs als centers lontans, ma strusch a las regiuns da muntogna perturgadas. Confundatur dal Museum retic.

Jürg Simonett

Felix Calonder

* 7 da december 1863 (Felix-Louis) a Scuol, † 14 da zercladur 1952 a Turitg, reformà, da Trin. Figl da Johann, impressari, e dad Ottilia nata Mani. ∞ 1892 Ursulina nata Walther, figlia da Thomas, directur d'ina bieraria a Napel, da Tartar. scola primara a Trin, alura scola chantunala a Cuira 1878–81 (senza conclusiun). Activitad commerciala a l'exteriur (trais onns), e sunter la matura a Turitg studegià giurisprudenza a Turitg, Minca, Paris e Berna 1885–89, dr. iur. 1889 (tar Carl Hilty). Sunter dus onns actur da la Dretgira chantunala grischuna, ha Calonder avert il 1890 in atgna pratica d'advocat a Cuira. El è daventà enconuschent tras ses engaschament en favur da la Revoluziun tessinaisa («Ein offenes Wort über die Tessiner Revolution», 1890). Dal 1891 fin il 1913 è Calonder stà commember dal Cussegl grond (president 1896 e 1899), nua ch'el è sa distinguì surtut en dumondas da dretg, da traffic e d'educaziun. Il 1893 ha el candidà, senza success, per la Regenza. A la Partida liberala dal Grischun, ch'el ha presidià durant blers onns, ha el conferì ina structura fixa. El è s'engaschà oravant tut en favur dal project per ina viafier dal Spleia. Sco commember dal Cussegl dals chantuns 1899–1913 ha el succumbì il 1912 ad Edmund Schul-

thess en l'elecziun complementara per il Cussegl federal. Ils 12 da zercladur 1913 ha l'Assamblea federala alura elegi Calonder, sco segund Grischun ed emprim Rumantsch, en il Cussegl federal (vicepresident 1917, president 1918), nua ch'el ha dirigì il Departament da l'intern fin la fin dal 1917 ed il Departament politic dal 1918 fin il 1919. Durant la chauma generala dal november 1918 ha Calonder targlinà l'emprim, alura ha el adoptà e defendi, sco president da la Confederaziun, la lingua severa proseguida dals chaus da l'armada e da la maioritad burgaisa dal Parlament. En la politica exteriura è el s'engaschà oravant tut per l'adesiun da la Svizra a la Societad da las naziuns e per il passadi da la neutralitad absoluta a quella differenziada. Per raschuns da segirtad e da politica da traffic ha Calonder sustegnì ina colliaziun dal Vorarlberg a la Svizra, el n'ha dentant betg chattà ina maioritad en il Cussegl federal ed ha perquai demissionà ils 21 da schaner 1920. Per incumbenza da la Societad da las naziuns ha Calonder surveglià dal 1922 fin il 1937 davent da Katowice l'applicaziun da la cunvegna tranter la Germania e la Pologna davant la Silesia Superiura. En il militar è Calonder stà maior e derschader superiur. Sunter il 1937 ha el manà in biro da consulenza giuridica a Turitg. Undrà cun il Curtin d'onur da la Lia Grischa a Trun.

Jürg Simonett

Leon Schlumpf

* 3 da favrer 1925 a Favugn, reformà, da Mönchaltorf/ZH e burgais d'onur da Favugn (1964). Figl da Jakob, commerziant, e da Magdalena nata Brunold. ∞ 1953 Trudi (Gertrud) nata Rupp, da Trin. scola chantunala a Cuira, studi da giurisprudenza a Turitg, dr. iur. 1951. Il medem onn ha el avert ses biro d'advocatura a Cuira. Commember dal Cussegl grond per ils democrats 1955–65 (president 1964), mastral dal circuit da Trin 1959–63. Cusseglier guvernativ 1966–74 (Departament da l'intern e da l'economia publica), sco tal ferm engaschament per l'equiliber social (tranter auter agid als purs da muntogna, perequaziun finanziaria). Cusseglier nazional 1967–74, commember dal cussegli dals chantuns 1974–79. Schlumpf ha fatg part da diversas cumissiuns impurtantas, tranter auter da quella d'experts per la revisiun totala da la

Constituziun federala. En ils onns 1974–78 è el era stà survegliader federal dals pretschs. El vala sco in dals architects da la fundaziun da la PPS (1971). Il 1979 è Schlumpf vegni elegi en l'emprim scrutini en il Cussegl federal ed ha surpiglià il Departament da traffic ed economia d'energia. En la dumonda da la promoziun da l'energia nucleara sco alternativa a l'iel ha il suveran refusà ad el il sustegn en la votaziun davart il nov artitgel d'energia (1983). En la politica da traffic ha «il bab dal tunnel dal Veraina» prosegui cun la Viafier 2000 la finimira da render la viafier cumpetitiva en confrunt cun la via, senza negliger l'amplificaziun da la rait da las vias naziunales. La politica da traffic skizzada da Schlumpf è vegnida sbittada en ina votaziun dal pievel sut ses successur Adolf Ogi. Sunter il cumbat invan cunter emetturs privats illegals (Radio 24 ed auters) ha el stgaffi il 1984 cun l'artitgel da radio e televisiun il fundament per ina convivenza da la SSR ed ils mediums electronics privats. Il 1987 è Schlumpf, qualifitgà sco um pragmatic solid cun sguard prospectiv, sa retratg nunspegtadamain da la politica. Cun excepziun dal presidi da la Pro Infirmis n'ha el betg pli surpiglià incumbensas publicas. Sut il pseudonim Rätus Telena era il giuven Schlumpf in enconuschent interpret da musica populara.

Adolf Collenberg

Eveline Widmer-Schlumpf

* 16 da mars 1956 a Cuira, reformada, da Mönchaltorf/ZH e Favugn. Figlia da Leon Schlumpf. ∞ Christoph Widmer, insch. dipl. SPF, da Tusaun e Sumiswald/BE. scola elementara a Favugn, gimnasi a Cuira, studi da giurisprudenza a Turitg, lic.iur. 1981, patenta d'advocata 1983 e da notara 1986, dr. iur. 1990 («Voraussetzungen der Konzession bei Radio und Fernsehen»). Actuara ad hoc da la Dretgira chantunala 1981–87, advocata e notara cun in agen biro 1987–98. Giurada 1985 e mastrala dal cumin da Trin 1991–97, vicepresidente da la PPS grischuna 1989–98, commembra dal Cussegl grond 1994–98. Sco emprima donna cussegliera guvernativa dal Grischun 1999–2007 (presidenta 2001 e 2005, Departament da finanzas e militar, il 2007 Departament da finanzas e vischnancas). Presidenta da la Conferenza dals directurs da finanzas Ost dal november 1999 fin l'october 2001, commembra (a partir dal 2000) e presidenta (a partir dal settember 2001) da la suprastanza da la Conferenza dals directurs chantunals da finanzas, a partir dal 2001 commembra dal comité directiv da la Conferenza da las regenzas chantunales. Actura decisiva tar l'emprim referendum chantunal en l'istorgia dal Stadi federal cunter l'uschenumà Pacht fiscal da la Confederaziun ch'il pievel ha refusà ils 16 d'avrigl 2004. Commembra (2004–08) e vicepresidente (a partir dal matg 2007) dal cussegli da banca da la Banca naziunala svizra. Elegida cussegliera federala al lieu da Christoph Blocher ils 12 da december 2007 (Departament federal da giustia e polizia, dapi l'october 2010 Departament federal da finanzas, 2012 presidenta da la Confederaziun). Quest'elecziun cunter la voluntad da sia partida ha provocà l'expulsiun da la PPS grischuna da la partida-mamma svizra e secessiuns entaifer las partidas popularas d'auters chantuns (oravant tut Berna, Glaruna, Turgovia).

Adolf Collenberg

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglia e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Tranter la Clus ed Aschera a l'entrada dal Partenz

■ Tgi ch'arriva en il Partenz nà da la Val dal Rain passa l'emprim la Clus, ina stretga situada tranter Landquart ed il Partenz Dadora. Enturn Grösch, che giascha en il fund da la val, sa gruppeschan alura ils abitadis da Seewis, Valzeina e Fanas. Las duas vischnancas numnadas il davos han fusiunà il 2011 cun Grösch.

Fracstein

Ruina da chastè en la Clus a l'entrada en il Partenz, vischnanca da Sievgia, rumantsch *Ferporta*. Il chastè da grotta consistiva d'in edifiz d'abitat fortifitgà da quatter plauns (tract principal), il mir da serra cun staziun da duana a la Landquart, la baselgia da S. Aper e l'abitaziun dal plevon al pe da la paraid-crap. En la liadira dal local d'abitat e da represchentar al terz plaun (tract principal) èn conservads sgrafits dal temp enturn il 1300: segns eraldics (dissegns da scuts cun chapelinas), chastels cun surconstrucziuns avanzadas ed auters motifs, tranter auter ina palissada. Differentes vopnas sa laschan attribuir a las schlattas aristocraticas da la regiun, per exempel als Marmels, Belmonts e Vazs. Fundà probablamain dals signurs d'Aspermont a la fin dal 12avel tschientaner, è il vast cumplex passà il 1338 als conts de Toggenburg, il 1466 han ins attribui el a l'Austria e pauc pli tard è el vegni bandunà; la baselgia dal chastè è vegnida utilisada fin ca. il 1530. Enturn il 1570 era Fracstein gia ina ruina.

Maria-Letizia Boscardin

Pardisla

Culegna che furma cun Ferrera (en Partenz) ina fracziun da la vischnanca politica da Sievgia. Pardisla sa chatta al stradun vegl tranter la Clus e la collina cun la ruina dal chastè da Solavers dal temp autmedieval. La baselgia reformada a Ferrera è vegnida construida il 1696 sco filiala da Sievgia; la baselgia catolica a Pardisla datescha dal 1898-99. En il 18avel e 19avel tschientaner è la culegna savens vegnida inundada da l'aval da Tashinas. Il 1843 è vegni construi il stradun fin a Crusch, il 1858 la via da muntogna Pardisla-Sievgia (schlargiament 1980-92). Il sviament da Pardisla datescha dal 1984-85. Pardisla è il center da commerzi e d'industria da la vischnanca da Sievgia.

Otto Clavuot

Seewis im Prättigau (Sievgia)

Vischnanca politica, circuit Sievgia, district Partenz/Tavau (avant il 2001 Landquart Sut), situada sin ina terrazza sin la spunda dretga a l'entrada en il Partenz, cun la fracziun da Ferrera-Pardisla e la staziun da viafier Sievgia-Valzeina en



Il vitg da Seewis i.P. è situà sin ina terrazza a l'entrada dal Partenz.

il fund da la val. 1224 *de Seve*, tudestg Seewis im Prättigau (uffizial). 1850 791 abitants; 1900 901; 1950 955; 1970 923; 2000 1323. Munaidas dal prim e terz tschientaner s.C. En il territori da Sievgia sa chattan era las ruinas dal chastè da Fracstein (en la Clus) e da quel da Solavers (en vischnanca da Crusch), resorti d'in chastè cun baselgia. Ils dus chastels eran en possess dals signurs che regivan sur il Partenz Dadora: il chavalier d'Aspermont ca. 1300, ils conts da Toggenburg 1344-1436 (Fracstein era, sco serra da vallada, en possess cuminaivel dals Toggenburgs e Matschs), ils chastellans de Matsch 1436-96, alura ils ducas da l'Austria fin il 1649. Ils signurs feudals han possess vasts bains e dretgs a Sievgia, fin che la vischnanca è sa cumprada libra il 1649. Il 1436 è s'unida la dretgira d'Aschera-Sievgia a la Lia da las Diesch Dretgiras nov fundada. Il 1679 è ella vegnida dividida, ed il 1851 è sa furmà il circuit da Sievgia da la mesa dretgira da Sievgia (cun Valzeina Dadens). La veglia baselgia parochiala per Sievgia e Fanas era quella da S. Maria dal chastè da Solavers. En las duas vischnancas èn naschidas baselgias affiliadas ch'èn s'emancipadas formalmain il 1487. La baselgia da S. Luregn a Sievgia, attestada il 1483, è vegnida transformada il 1756-58. La chaplutta da S. Aprus a Fracstein, menziunada il 1370, è restada ina filiala d'Aschera. Il 1587 è vegnida introducida la reformaziun a Sievgia. A Stürfis èn sa

domiciliads Gualsers tranter il 14avel tschientaner e l'entschatta dal 17avel tschientaner, lur baselgia, deditgada a s. Niclè, era ina filiala da Maiavilla. Dal 17avel fin il 19avel tschientaner ha la famiglia von Salis-Seewis gi ina gronda influenza a Sievgia. Ella possedeava tranter auter il bogh da Ganey, situà a 1300 m, frequentà en il 17avel e 18avel tschientaner e destrui il 1799. La vischnanca da Sievgia è vegnida destruida duas giadas: il 1622 tras in incendi provocà tras ils Austriacs (tranter auter sco resposta a l'assassinat da Pader Fidelis von Sigmaringen), il 1863 tras in ulteriur incendi. L'emprima chasa da scola dal vitg datescha dal 1685. La via da colliaziun Pardisla-Sievgia, construida il 1858 (schlargiament 1980-92), ha obtegni il 1889 in access a la Viafier retica. Da la buna colliaziun han profità il traffic da cura (chasa da cura dapi il 1865, oz center da reabilitaziun) ed il turissem. Cun il center d'industria e da commerzi en il fund da la val (Georg Fischer SA) han ins pudì crear numerusas piazzas da lavur en il sectur secundar. En il sectur primar predomineschan l'allevament da muvel e l'economia da latg (chascharia da model dapi il 1870). Sievgia posseda era numerusas alps. En ils onns 1850 han la vischnanca e privats cumprà ils bains da la famiglia Salis, nua ch'ins ha construi numerusas chasas d'abitat a partir dal 1863. Il chastè dals Salis, che datescha dal 1630, vegn oz utilisà sco chasa communal e sco chasa da scola. Meglieraziun generala 1962-2000.

Adolf Collenberg

Fadera

Part da la vischnanca politica da Sievgia, situada a 1057 m, tudestg Fadera (uffizial). Il num deriva da latin *feta*, rumantsch nursa, quai che cumprova la veglia tradiziun en l'allevament da nursas a Fadera. Il passadi entaglià en il spelm tranter Malans e Fadera-Sievgia per guntgir la Landquart furibunda è stà da gronda impurtanza per il traffic en il Partenz. Fin enturn il 1850 vegniva transportada la martanzia cun animals da sauma a Malans sur il Crap Fadera e l'acclau da Fadera en il Partenz Dadora. Il 1843 ha la via charrabla tras la Clus remplazzà la ruta sur Fadera, completada il 1889 cun la lingia da la Viafier retica Landquart-Claustra.

Adolf Collenberg

Valzeina

Anteriura vischnanca politica, circuit Sievgia, district Partenz/Tavau (fin il 2001 Landquart Sut). Fusiunada il 2011 a la vischnanca politica da Crusch. Abitadi sparpaglià cun bains a Valzeina Davant, Valzeina Davos e Sigg (da la vart dretga da la val). 1367 *Valzeinmas*. 1850 243 abitants; 1900 216; 1950 216; 1980 115; 2000 140. En il 14avel tschientaner èn immigrads Gualsers en il territori colonisà mo pauc da Rumantschs. Ils bains sutta-

stevan a quatter dretgiras, numnadamain a la dretgira dals Quatter Vitgs (Valzeina Davos), a quella d'Aschera respectivamente, a partir dal 1679, a la mesa dretgira da Sievgia (Valzeina Davant), a la mesa dretgira d'Aschera (Sigg) ed a la dretgira da Gianatsch (Schwendli). Il 1880 è vegni separà l'acclau Sigg (1860 39 abitants) da la vischnanca d'Aschera ed attribui a Valzeina, il 1891 èn sa reunidas las vischnancas da Valzeina Davant e Valzeina Davos. Da l'emprim millenni datescha probablamain ina baselgia consecrada a s. Sisinius. La baselgia da S. Michael vegn menziunada per l'emprima giada il 1512, enturn il 1520 sco filiala da Zezras, il 1523 sco baselgia parochiala. Valzeina è reformada dapi ils onns 1560-70. Il 19avel e 20avel tschientaner èn marcads da l'emigraziun (fin il 1980). Dapi il 1903 maina ina via charrabla da la staziun da viafier Sievgia-Valzeina a Valzeina. Ina scola primara exista a Valzeina Dadora, ina scola reala e secundara a Crusch. Il 2008 lavuravan 70% da las persunas cun activitad da gudogn a Valzeina en il sectur primar.

Otto Clavuot

Clavadätsch

Acclau situà a 1258 m en la part interna da la Val Valzaina (12avel tschientaner *Valle Prümaria*), colonisà ed urbanisà l'emprim da Rumantschs. 1375 *Talavadatsch*. Bain feudal dal chapitel catedral da Cuira, affittà avant il 1367 ad in tschert Egen von Strada, alura ad in Gualser. Il num Clavadätsch deriva dal latin *tabulatum*, rumantsch clavà, ed è daventà pli tard il num dal proprietari dal bain respectivamain da la famiglia Clavadetscher.

Martin Bundi

Grösch (Crusch)

Vischnanca politica, circuit Aschera, district Partenz/Tavau (fin il 2001 Landquart Sut). Vitg accumulà situà sin il cugn d'ina bova furmada da l'aval Tashinas, cun ils bains dad Überlandquart e Cavadura (dapi il 1874). Ca. 1340 Grusch, 1375 *Crösch*, tudestg Grösch (uffizial). 1850 614 abitants; 1880 577; 1888 681; 1900 629; 1950 726; 1970 709; 2000 1210. Territori suveran administrà dals baruns de Vaz e dals nobels d'Aspermont (13avel tschientaner - 1344), alura en possess dals signurs de Toggenburg (fin il 1436), dals conts de Montfort (1437-52) e dals chastellans de Matsch. Il domini austriac ha durà dal 1496 fin il 1649. La germanisaziun è stada terminada en il 16avel tschientaner. La baselgia da S. Jodocus, menziunà il 1495, è vegnida spazzada il 1720 ed alura spustada. Reformaziun 1561, avant appartegneva Crusch ecclesiasticamain a S. Gion/Aschera. En il 16avel-18avel tschientaner han las familias Finer, von Ott e von Salis-Soglio erigi las chasas signurilas caracteristicas a Crusch, per exempel la chasa Zum Rosengarten (actualmain museum da la valla-

da). Suenten la construcziun dal stradun (a partir dal 1843) èn sa domiciliads manaschis da mastergnanza a Crusch (tranter auter il mulin e la resgia Lietha). Las pendicularas Crusch-Danusa (1970-71), la construcziun da novas chasas tranter la vischnanca ed il sviament (dapi il 1984) sco era a Cavadura e l'installaziun d'interpresas industrialas a Crusch ed a Pardisla (tranter auter Georg Fischer SA il 1971) han permess da stgaffir novas piazzas da lavur. L'onn 2005 lavuravan 72% da las persunas cun activitad da gudogn a Crusch en il sectur secundar. Center da scola secundara e reala per las vischnancas da Sievgia e Valzeina dapi il 1988. A partir dal 2011 cun las fracziuns Fanas e Valzeina (fusiun).

Otto Clavuot

Solavers


Cumplex fortifitgà al nordvest sur la vischnanca da Crusch en Partenz. Solavers era probablamain in chastè cun baselgia dal temp medieval tempriv. Igl existan restanzas imposantas d'in lung mir da defensiun da pliras fasas. Al punct il pli aut dal terren stattan las ruinas da la baselgia da Nossadunna cun la nav gronda (13avel tschientaner) ed il chor poligonal (15avel tschientaner). En l'areal pli bass sa chattavan ils edifiz d'abitat cun paucs fastizs d'ina tur quadra imposanta e da fragments da la miraglia d'in tract d'abitat cun fanestras ad artgs gotics. Il rest da la surfabricaziun extendida na sa lascha betg cumprovar senza excavaziuns. En il 13avel tschientaner era il chastè-fortezza en possess dals signurs d'Aspermont. A chascun d'ina partiziun dals bains (1344) è passada lur ierta dal Partenz als conts da Toggenburg. Suenten la mort da Friedrich VII èn ils edifiz da defensiun e d'abitat vegnids bandunads ed èn ids en muschna. La baselgia percenter è restada anc pli ditg en funcziun, ella è dentant probablamain vegnida bandunada suenter la reformaziun dal Partenz.

Maria-Letizia Boscardin

Fanas

Anteriura vischnanca politica, circuit Sievgia, district Partenz/Tavau (avant il 2001 Landquart Sut), construida lung la via sin ina terrazza cun access da Crusch e d'Aschera. Fusiunada il 2011 a la vischnanca politica da Crusch. Segunda mesadad dal 12avel tschientaner *Phanauenes*. 1850 373 abitants; 1900 282; 1920 250; 1950 303; 1970 226; 2000 377. En il temp autmedieval e medieval tardiv pratigavan ils da Fanas l'agricultura e l'allevament da muvel sin bains dal chapitel catedral da Cuira e dals signurs d'Aspermont. Fanas ha appartegi al domini da Solavers, pli tard a la dretgira d'Aschera (sortida da quest domini), suenter la partiziun da quella a la mesa dretgira d'Aschera (1679-1729) e, fin il 1851, a quella da Sievgia. La baselgia a l'ost dal vitg, menziunada il 1447 sco filiala da S. Maria da Solavers, ha obtegni in agen plevon il 1487. Reformaziun 1560-70. Construcziun da la baselgia actuala 1754-55. La germanisaziun è stada terminada enturn il 1550. A Fanas predominava l'allevament da muvel (manaschis sin differenzas autezzas cun numerus uigls e trais alps), fin viaden ils onns 1950 era la cultivaziun dad ers. Construcziun da las vias d'access modernas 1969-76. Il 2000 eran 60% pendularis dal lieu. Il 2005 lavuravan 39% da las persunas cun activitad da gudogn a Fanas en il sectur primar, 32% en il sectur terziar (turissem da viandar, pitschna sutgera utilisada oravant tut da parasguladers). Fusiun cun Valzeina a la vischnanca da Crusch 2011.

Otto Clavuot



Grösch cun la ruina da Solavers enturn l'onn 1860.

Lexicon Istoric Retic

Il LIR cumpiglia bundant 3100 artgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

La Questione ladina e l'irredentissem talian

■ Furman il furlan, il ladin da las Dolomitas ed il rumantsch dal Grischun linguas parentadas u betg? U sa tracti gnanc d'atgnas linguas, mabain be da dialects dal talian? Cun questas dumondas è sa fatschentada l'uschenumnada Questione ladina, iniziada vers la fin dal 19avel tschientaner. Ils Ascolians (Ascoli, Gartner e.a.) han attribui las trais cuminzanzas linguisticas a la grupp da las linguas retoromanas. Tenor ils Battistians (Battisti, Salvioni e.a.) furmavan questas variantas linguisticas dentant be dialects talians conservads en in stadi arcaic. Da qua eri be in pitschen pass a l'irredentissem da l'Italia faschista che vuleva «manar a chasa», vul dir italianisar ils territoris numnads.

Friaul

Part da la regiun autonoma taliana Friuli-Giulia-Venezia cun il furlan sco lingua minoritara, dialectal Friül, talian Friuli, tudestg Friaul. Il Friaul è collià tras sia lingua e cultura stretgamain cun ils Rumantschs dal Grischun. La chapitala è Udine.


Suenter che Roma aveva sutta mess il pievels alpins a ses imperi e romanisà ils Rets, èn la lingua retoromantscha-ladina e quella furlana sa sviluppadas en in territori colonisà cumpact che s'estendeva dal Friaul a l'Adria e cumpigliava las Dolomitas, il Tirol, il Grischun ed il Vorarlberg fin en la Val dal Rain Songagliaisa ed en Surselva. A partir dal 6avel tschientaner èn entrads ils Bajuvars, in pievel german, en quest territori ed ha effectuà la division da quel en trais regiuns linguisticas isoladas ina da l'autra: ils Rumantschs en Svizra (Rumantschia), ils Ladins da las Dolomitas ed ils Furlans. Las basas militaras romanas da Cividale (*Castrum Forum Iulii*) a l'ost e d'Aquileja al sid dal Friaul èn alura daventadas centers spiertals e culturals da la regiun. Chanzuns popularas (La Vilotta) e sauts populars (La Furlana), naschids d'ina ritga tradiziun culturala, vegnan per part anc oz tgrirads, sco era l'usit dal trait schibettas che chatta sia correspondenza en quel pratigà en il Grischun. La litteratura furlana ha schendrà dapi il 13avel/14avel tschientaner poesias e chanzuns liricas, dapi il 1336 cronicas localas e dapi il 17avel tschientaner poets e scripturs renomads, oriunds era da familias aristocraticas (Collaredo, Percoto).

La Società Filologica Friulana, fundada il 1919, tgira e promova la cultura e la lingua furlana. Impuls per ina meglra conscienza linguistica e per in engaschament pli ferm en favur dal furlan èn era vegnids dal scriptur e reschissur Pier Paolo Pasolini (1922–75) ch'ha fundà l'Accademia di lingua furlana e che scriveva sez poesias en furlan. La lingua furlana vegn discurreda oz anc da ca. 500 000 persunas. Dapi il 1954 han lieu regularmain inscutters tranter ils represchentants da las uniuns linguisticas e culturalas rumantschs, ladinas e furlanas a Cuir, Urtijei/Val Gherdeina ed Udine. Suenter il grond terratrembel dal 1976 ad Udine e Gemona, ha ina grupp d'acziun grischuna participà il 1978 a la reconstrucziun.

Martin Bundi

Dolomitas

Regiun da l'Alto Adige (Tirol dal Sid), ladin Dolomites, talian Dolomiti, tudestg Dolomiten, cun diversas valladas ladinas attribuidas a differentas provinzas e regiuns: la Val Gherdeina (tudestg Gröden, talian Val Gardena), la Val Badia (tudestg Gadertal, talian Val Badia) ed il Mareo appartegnan a la provinza da Balsaun (Trentino), la Val de Fascia (tudestg Fassatal, talian Val di Fassa) a quella da Trent (medemmain Trentino), Fedom (tudestg Buchenstein, talian Fodom) ed Anpèz (tudestg Petsch-Hayden, talian Cortina d'Ampezzo) a quella da Belluno (Venezia). Tranter las Dolomitas ed il Friaul datti anc duas ulteriuras regiuns nua ch'ins discurreda ladin, numnadain il Cado-



Giorgio Lubera: «La catena mediana delle Alpi». Charta dal Grischun cun nums italianisads, cumparida il 1940 a Milaun.

re ed il Comelic. Il 2000 discurrevan anc ca. 30 000 persunas ladin dolomitane.

Las Dolomitas èn colonisadas permanentamain dapi il temp da bronz. Ellas appartegnevan oriundamain al Noricum celtic, incorporà l'onn 15 a.C. sco provinza en l'Imperi roman. A partir dal 6avel tschientaner s.C. èn entrads ils Bajuvars sur il Brenner en la Pusteria e fin a Balsaun, ed ils Langobards èn penetrads en la Val de Fascia. Enturn l'onn 1000 era l'Alto Adige già pli u main germanisà. Pli tard ha la politica colonisatorica, pratigada dals signurs feudals tudestgs, promovì la germanisaziun dal Tirol. Da ca. l'onn 1000 fin il 1818 han tut las vischnancas ladinas, exceptà quella d'Anpèz, appartegnì ecclesiasticamain a l'uevgieu da Brixen. Il tudestg era la lingua uffiziala en tut las dretgiras, cun excepziun da quella d'Anpèz. La noblezza considerava il ladin sco ina «grob welsch Sprache» ch'ha survivì mo en las valladas dolomiticadas las pli isoladas. Il dolomitan è vegnì applitgà, sper il talian ed il tudestg, dapi il temp medieval sco lingua ecclesiastica. Suenter il Concil da Trent (1563) è sa furmà in clerus ladin. Il 1856 han ins duvrà per l'emprima giada la noziun «naziun ladina», ed il 1873 ha tranter auter Graziadio Isaia Ascoli scuvert il ladin per la scienza («Saggi ladini»). Il 1918 han ils Ladins pretendì, senza success, ils dretgs d'autonomia e d'appartegnientscha a l'Austria. Suenter l'Emprima Guerra mundiala han els revendigà repetidamain lur autonomia etnica e linguistica. Era il sustegn moral da la Rumantschia n'ha già nagin effect. Il 1919 è il Tirol dal Sid vegnì attribui a l'Italia. Sut Mussolini furiva l'irredentissem. En consequenza da las restructuraziuns amministrativas è la Ladinia vegnida dividida, il ladin ed il tudestg èn vegnids scumandads. Il naufragi dal faschissem ha preservà ils Ladins da la deportaziun definitiva. Els èn dentant restads incorporads a l'Italia, e lur regiun è restada dividida. Il 1946 ha pretendì il moviment politic Zent Ladina Dolomites la reconuschientscha uffiziala dal ladin dolomitan. En l'emprim statut d'autonomia dal 1948 èn ils Ladins da las vals Badia e Gherdeina quasi vegnids ignorads. Pir en il segund statut, stipulà il 1972 per la provinza da Balsaun, han els finalmain obtegnì ina reconuschientscha acceptabla, ma anc adina insufficienta. Ils sforzs d'autonomia interpendids da vart dals Ladins d'Anpèz e da Fedom èn stads invans. Ils Fascians finalmain han stuì cumbatter ditg per obtegnair il 1977 in agen district, e la lescha che prevesa in tractament egal dals Ladins da la provinza da Balsaun n'è anc betg vegnida approvada dal stadi talian. En scola ha il

dolomitan in status fitg flavel: l'instrucziun en ladin è garantida sulettamain en las vals Badia e Gherdeina, e quai mo en l'emprima classa da la scola elementara; en la 2.–3. classa da la scola media vegn instrui ladin durant duas uras l'emna. En la Val de Fascia vegn instrui il ladin en scola primara durant in'ura l'emna. A Fedom ed Anpèz na vegn el betg resguardà en scola.

Dapi trent'onns enconuscha il ladin dolomitan ina renauschientscha. Il 1972 èn sa reunidas las differentas valladas ladinas en l'Union Generale di Ladins dla Dolomites che dispoza d'in organ uffizial, la «Usc di Ladins». L'Istitut Cultural Ladin Micurà de Rü a San Martin de Tor (Val Badia) serva d'intermediatur tranter ils Rumantschs en Svizra, ils Ladins da las Dolomitas ed ils Furlans. Sco il rumantsch en il Grischun è era il ladin dolomitan fermamain periclità, oravant tut tras il turissem e ses effects secundars. Il 1985 han ins pudì festivar il 2000avel anniversari da la Ladinia, la via a la normalità giuridica e linguistica è dentant anc lunga e crappusa. Il 1993–97 ha professor Heinrich Schmid da Turtig, il «bab» dal rumantsch grischun, elavurà directivas era per in ladin dolomitan da standard.

Manfred Gross

Graziadio Isaia Ascoli

* 16 da fanadur 1829 a Görz/A (oz Gorizia, Friaul–Venezia Giulia), † 21 da schaner 1907 a Milaun, israelit, da Görz. Figl da Leone Flaminio, commerciant, e dad Elena n. Norsa. Studi autodidactic da las linguas orientales e da la grammatuca cumparativa indoeuropeica, pli tard occupaziun cun la dialectologia. Il 1861 è el vegnì nominà professor a l'Accademia scientifico-litterara a Milaun. Il 1873 ha el publictà l'emprim tom da l'«Archivio glottologico italiano», revista fundada e dirigida dad el fin il 1901, deditgada oravant tut a tematicas dialectologicas. Sper la prefaziun, en la quala Ascoli discussa la «questione della lingua», resortan en quest tom oravant tut ils «Saggi ladini», ina descripziun da tut ils dialects retoromantschs dal Grischun fin al Friaul. Il tom 7 cuntogna las «Annotazioni sistematiche al Barlaam e Giosafat soprasiavano»; quellas èn spezialmain infurmativas dal punct da vista morfologic e lexicografic. Las contribuziuns dad Ascoli èn da grond'impurtanza per la scienza indogermanistica.

Federico Spiess

Theodor Gartner

* 4 da november 1843 a Vienna, † 24 d'avrigl 1925 a Puntina, catolic, Austriac. Figl dad Anton, uffiziant. ∞ 1887 Maria n. Graber. Studi da chemia e fisica a Vienna, studis autodidactics da franzos. Professor da romanistica a Czerno-

witz (Austria-Ungaria, oz Ucraina) 1886–89 ed a l'Universitad da Puntina 1899–1911 (emprim professor ordinari da filologia romana). Suenter in viadi en la Val Gherdeina en il Tirol dal Sid (1876) ha Gartner publictà il cudesch «Die Gredner Mundart» (1879). Sias vastas enquistas linguisticas dal Grischun fin a l'Adria han servì da basa a sia «Raetoromanische Grammatik» (1883) ed a ses «Handbuch der rätoromanischen Sprache und Literatur» (1910). Gartner vala sco confundatur da la retoromanistica.

Clà Riatsch

Carlo Battisti

* 10 d'october 1882 a Trent, † 6 da mars 1977 a Firenze, oriund da la Val di Non. Studis a Vienna. Professor da romanistica a l'Universitad da Firenze 1925, specialist tranter auter da dialectologia. En sia raccolta «Testi dialettali italiani» (1914) ha Battisti era publictà exempels da dialects rumantschs renans e ladins, preparads da Florian Melcher. Battisti ha snegà en questa cretomazia l'unitad ladina postulada da Graziadio Isaia Ascoli e declerà il rumantsch sco sutdialect lumbard ed il ladin dolomitan sco sutdialect venezian; en omadus linguatgs veseva el dialects talians conservads en in stadi pli arcaic causa l'isolaziun da quels en las muntognas. Questa optica, refutada energicamain da Robert von Planta, ha nutrì l'irredentissem. Il voluminus «Dizionario toponomastico atesino» (DTA, 1936–77) da Battisti è da grond'impurtanza per il Grischun (rumantsch), cunquai ch'el tracta era ils nums locals da la regiun vischina dal Vnuost.

Adolf Collenberg

Carlo Salvioni

* 3 da mars 1858 a Blinzuna, † 20 d'october 1920 a Milaun, pensader liber, da Blinzuna. Figl da Carlo, tipograf e librari, derivant d'ina famiglia lumbarda d'Erba, e da Martina n. Borsari, da Blinzuna. ∞ 1892 Enrichetta n. Taveggia. Gimnasi a Ligiaun, studiegia medischina a Basilea 1875–76, alura a Lipsia 1876–78, nua ch'el ha studegià linguistica indogermanica e romana, dr. fil. 1883. Docent liber d'istorgia cumparativistica da las linguas classicas e neolatinas a l'Universitad da Turin dal 1885–89, professor incumbensà da litteraturas neolatinas a l'Accademia scientifico-letteraria a Milaun 1889–90, professor extraordinari (1890–95) e professor ordinari (1895–1902) a Pavia, successur da Graziadio Isaia Ascoli (1902) a Milaun. Collavuratur dad Ascoli a l'«Archivio glottologico italiano» (directur 1901). Salvioni appartegna als pli impurtants perscrutaders da l'etimologia, linguistica istorica e dialectologia taliana e rumantscha ch'ha re-

laschè studis linguistics fundamentals, en particular davart dialects, per exempel «Lingua e dialetti della Svizzera italiana» (1907). Il 1907 ha el fundà il «Vocabolario dei dialetti della Svizzera italiana». Sco collavuratur dal periodic cultural «L'Adula» (1912), ha el cumbattì per l'italianitad dal Tessin e dal Grischun talian e rumantsch. Ses irredentissem (linguistic) è vegnì refusà dals Rumantschs e Ladins.

Michele Loporcuro

Irredentissem

Il term definescha l'orientaziun spiertala da quels che, suenter l'unitad da l'Italia (1861), han sustegnì la necessitad da liberar (talian redimere) ils territoris dal Trentino e da Triest restads sutta mess a l'Austria-Ungaria. Dapi la fin dal 19avel tschientaner han ins applitgà la noziun «irredentists», extendida en sia muntada, betg mo per designar ils aderents d'ina annexiun da la Svizra taliana a l'Italia, mabain qua e là era per denominar ils partisans spezialmain persvas da l'italianitad. Ils irredentists avevan era preni en mira ils Ladins da las Dolomitas ed ils Rumantschs dal Grischun che duevan vegnir preservads da la germanisaziun. Suenter il 1900 han linguists enturn il Tessinai Carlo Salvioni ed il Talian Giorgio Del Vecchio inizià lur cumbat cunter la germanisaziun dal Tessin e dal Grischun talian. A partir dal 1912 han els era avisà la «lingua muribunda» rumantscha, pretendend che quella na saja betg in'atgna lingua, mabain in arcun da different dialects da l'Italia dal Nord. A lur «O tedeschi, o italiani» han ils expoents rumantschs Peider Linsel e Chasper Pult (en il «Fögl d'Engiadina», 1913), Pieder Tuor (en l'«Ischi», 1912) e Caspar Decurtins (en la «Gasetta Romantscha») replitgà immediat: «Ni Italiani, ni Tudais-chs, Rumantschs vulains restar!». Il 1917 han ils irredentists proponì d'italianisar la Rumantschia e d'attribuir il Grischun ed il Tessin ad in'unitad politica e linguistica abla d'impedir – cun agid da l'Italia – la germanisaziun. La Pro Grigioni Italiano (fundada il 1918) e la Lia Rumantscha (fundada il 1919) han fatg frunt comunablamain a questas tentativas. A partir dal 1919 è il moviment irredentistic – fin alura main d'interess politic che da tempru linguistico-culturala – sa transformà en in moviment d'expansiun nazionalistic che pretendeva «cunfins natirals» per l'Italia. Al nord da l'Italia dueva l'uschenumnada Catena mediana furmar in tal cunfin (latin) cun il mund german. Mussolini ha mussà viv interess per quel plan e per l'idea da fusunar il Tessin ed il Grischun en in nov chantun numnà Renoticino. El ha confruntà qua tras la Svizra cun in problem fitg serius. Ma la refutaziun da l'irredentissem talian è stada fitg decidida era en circuls rumantschs, malgrà las simpatias che Mussolini giudeva en Svizra. Ils 20 da favrer 1938 ha il suveran acceptà il rumantsch en ina votaziun memorabla cun 91,6 % sco lingua nazionala svizra. Questa demonstraziun ha franà il moviment irredentistic, e cun la terrada da l'Italia faschista ha el alura piglià definitivamain ina fin. En l'Engiadina ha l'irredentissem provocà ina campagna da purificaziun linguistica, iniziada il 1917 sut il titel «s-chet rumantsch» (terminada il 1963). Cun la «Grammatica ladina d'Engiadina d'Ota» d'Anton Velleman (1924) ha il puter survegnì sias reglas ortograficas ed è alura vegnì purifitgà dals numerus italianissem.

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

En la Tumleasta Dadora

■ En la preschentaziun da quest'emna visita il LIR ils abitadis situads en la Tumleasta Dadora. Da Giuvaulta maina il viadi a Tumeagl nua che la via ascenda la spunda per arrivar sin la terrassa da Tràn respectivamain sur Sched a Veulden.

Rothenbrunnen (Giuvaulta)

Vischnanca politica, circuit Tumleasta, district Rain Posteriur (avant il 2001 Mantogna), situada lung la via da la vart dretga dal Rain Posteriur, cun la curt da Ravetg. 1472 *Hof Juvalt*, 1572 *zum Roten Brunnen*, tudestg Rothenbrunnen (uffizial). 1803 64 abitants; 1900 77; 1950 247; 2000 332. Chats dal temp neolitic e dal temp roman. En il 12avel respectivamain 13avel tschientaner èn vegnids erigids ils chastels da Hoch- ed Innerjuvalt. Giuvaulta ha appartegnì a Tumeagl, suenter la reformaziun a la fin dal 16avel tschientaner ecclesiasticamain ad Almen. La baselgia reformada è vegnida erigida il 1741. Giuvaulta era in lieu da passadi a la ruta da transit dretga dal Rain. Il 1828 è vegnida costruida l'emprima punt sur il Rain ed a partir dal 1836 è succedida ina correcziun dal Rain. Il 1848 è la vischnanca da Giuvaulta sa separada da Tumeagl. Dal 1779 fin il 1851 è Giuvaulta stà in vischinadi dal cummin d'Ortenstein-Val. Il 1896 è vegnida costruida la staziun da la Viafier retica ed il 1896–97 la via d'access a Giuvaulta. La funtauna da jod e da fier, che vegn menziunada gia da Johann Jakob Scheuchzer e ch'ha alimentà in bogn da cura fin il 1922, ha dà a la vischnanca il num tudestg. Il 1922 èn vegnidas realisadas la chasa d'attempads chantunala ed ina staziun externa da la clinica psichiatrica a Cazas, il 1935 respectivamain il 1961 la chasa d'uffants ed ina scola spziala cun dimora. La construcziun da l'autostrada (1983) ha effectuà ina meglieraziun generala dal fons. Part da la populaziun da lingua rumantscha: 2000 7,6% / 14,2% (meglra lingua / tuttas indicaziuns).

Jürg Simonett

Punt Arsitscha

Punt dal temp medieval en la vischnanca da Giuvaulta. La Punt Arsitscha maina sur l'auval da Veulden (Val da Pedra) a la sbuccada da quel en il Rain Posteriur, en vischinanza da la curt da Ravetg (vischnanca da Razén). Il num deriva da «punt arsa». I n'è betg enconuscent cura e pertge ch'ella è vegnida incendiada. 1368 *pont Arsetza*, 1423 *Pont Arsitscha*. La localisaziun da la Punt Arsitscha tar la baselgia da S. Gieri a Razén n'è betg comprovada. En il temp medieval furnava ella in cunfin tranter il *Ministerium Curisimum* carolingic (pli tard *Cent Cuirra*) e la *Tumillasca* (Tumleasta), alura tranter ils districts da chastellania ed ils signuradis feudals. Dapi il 15avel tschientaner separava la Punt Arsitscha las veglias corporaziuns da la Tumleasta/Mantogna e da Razén (brev da federaziun da la Tumleasta dal 1423), pli tard ils cumins ed ils vischinadis. Sur questa punt passava il traffic nord-sid da la vart dretga dal Rain.

Adolf Collenberg

Juvalta

Cun il num Juvalta vegnan designadas las ruinas da las fortizzas da Hochjuvalt ed Innerjuvalt, costruidas dals signurs von Juvalta en il territori da la vischnanca da Giuvaulta. *Hochjuvalt*: Situà sin in sparun grippus stretg e spundiv, era il chastè da Hochjuvalt (savens numnà faussamain *Niederjuvalt*) dividì en duas parts: l'areal da defensiun inferior cun la fortezza externa, situada a la riva dal Rain Posteriur, e quel superior cun l'implant principal. Da quest ultim existan restanzas da la tur principal da tschintg plauns, d'in edificiu annex, dals foss e dal mir da tschinta. La zona d'entrada è per gronda part vegnida destruida e la veglia via d'access è cuverta da glera. Da la fortezza externa è sa mantegnida sulettamain ina part dal mir, donnegia durant la



Il chastè d'Ortenstein, situà tranter Giuvaulta e Tumeagl.

construcziun da la via. Hochjuvalt è vegnì erigì probablmain en il 12avel tschientaner sco sedia dals signurs von Juvalta. En possess da l'uvestg da Cuirra il 1352, è il chastè vegnì impegnà pliras giadas en il decurs dal 15avel tschientaner. Donnegia probablmain il 1451 en la Faida da Schons, è el vegnì bandunà enturn il 1500 ed è menziunà gia enturn il 1550 sco ruina.

Innerjuvalt: Situà sin in sparun grippus a l'ost da Giuvaulta, a l'entrada en la Tumleasta, era il chastè dad Innerjuvalt (savens numnà faussamain *Oberjuvalt* u *Hochjuvalt*) dividì en ina part superioriura ed ina inferiora. En l'areal superior avevan ins erigì l'emprim (ca. 1250) ina residenza signurila a dus plauns, a la quala èn vegnids agiuntads pli tard la tur principal e l'edificiu d'abitat meridional. Ina cisterna ed in furn eran circumdads d'in mir da tschinta extern. En l'areal inferior sa chattavan ulteriurs edificis d'abitat e d'economia. Retschertgas archeologics (1980, 1982, 1990) han furnì indicaziuns impurtantas davart l'istorgia da las construcziuns ed han purtà a la glisch pitschens chats da gronda valur. Erigì dals signurs von Juvalta probablmain enturn il 1250, è Innerjuvalt vegnì bandunà pauc suenter il 1500 ed era il 1550 gia en ruina.

Maria-Letizia Boscardin

Ortenstein

Chastè abità, situà sin in sparun sur il Rain Posteriur en il territori da vischnanca da Tumeagl. Oriundamain in signuradi, alura in cummin da las Trais Lias en la Tumleasta Dadora, cunfinà tras il Rain ed il Riedbach. 1309 *Ortenstein*. Il chastè è vegnì fundà en il segund quart dal 13avel tschientaner cun la construcziun da la tur principal. Il 1275 è passada la migiuria da Tumeagl sco feud episcopal als signurs de Vaz. Quella furnava, ensem cun la baselgia ed il chastè d'Ortenstein, la sedia dals vasals, il center da la suveranità territoriala da la Tumleasta Dadora. Il 1338 è il signuradi d'Ortenstein passà als conts de Werdenberg-Sargans (fin il 1509) ch'han renvià definitivamain las pretensiuns episcopals il 1472. Il chastè è vegnì destrùit durant la Faida da Schons, el ha però pudì vegnir reconstruì il 1451 sin basa d'ina sentenza da cumpromiss. Il 1527 ha Ludwig Tschudi vendì il chastè d'Ortenstein cun tut ils dretgs signurils a Tumeagl ch'ha cedì quel a privats il 1528. Dapi alura ha appartegnì tut ils dretgs signurils al cummin suveran d'Ortenstein cun ils set vischinadis da Tumeagl (lieu da cummin), Pasqual, Dusch, Roten, Tràn, Sched e Veulden. Suenter la Reformaziun, introducida vers la fin dal 16avel tschientaner,

en Tumeagl e Pasqual sco era la gronda part da la vischnanca da Roten restadas fidaivlas a la veglia cretta. Il cummin d'Ortenstein furnava, ensem cun quel da Farschno, la dretgira auta da la Tumleasta entaifer la Lia da la Chadè. L'Affar da Tumeagl dal 1766 ha manà il 1788 a las mesas dretgiras d'Ortenstein-Muntogna (Tràn, Sched, Veulden) e d'Ortenstein-Plaun. In'academia ed ina scola purila, planisadas ad Ortenstein il 1767 respectivamain en ils onns 1850, n'han betg pudì vegnir realisadas. Il chastè è vegnì transformà il 1720–40 e suenter il 1860. Las dretgiras d'Ortenstein e da Farschno èn integradas dapi il 1851 en il circuit da la Tumleasta, oriundamain da lingua rumantscha. Il chastè è oz en possess privat.

Jürg Simonett

Tumeagl/Tomils

Vischnanca politica, circuit Tumleasta, district Rain Posteriur (fin il 2000 Mantogna), situada sin ina terrassa bassa a dretga dal Rain Posteriur. 1943–2008 uffizial Tumeagl/Tomils. La nova vischnanca cumpiglia sco fracziuns tras fusiun a Tomils (uffizial) dapi il 2009 era las anteriurs vischnancas politicas da Sched, Tràn e Veulden. 1141 in *Tumillis*, enfin il 1943 uffizial Tomils. 1803 202 abitants; 1850 226; 1900 233; 1950 266; 2000 321. Chats dal temp da bronza e dal temp roman. La migiuria episcopala è ida il 1275 en feud als signurs de Vaz. Cun il chastè d'Ortenstein, sedia dals vasals erigida il 1250 (menziunà il 1309), furnava Tumeagl il center dal signuradi territorial da la Tumleasta Dadora. Il 1527 èn ils dretgs signurils vegnids vendids al cummin d'Ortenstein ed al vischinadi da Tumeagl ch'ha fatg part da quel fin il 1851. Ecclesiasticamain ha Tumeagl appartegnì fin viaden il temp medieval tardiv a S. Luregn sper Pasqual. In emprim edificiu precursor da la baselgia da S. Mauritius, documentà il 1398 sco baselgia parochiala a l'ost da la vischnanca (oz en ruina), datescha dal 6avel u 7avel tschientaner, in segund dal temp carolingic. La baselgia parochiala, deditgada a l'Encurunaziun da Maria, è menziunada il 1474 (consecrada il 1486). Ina minorità reformada n'ha betg pudì sa mantegnair a Tumeagl. Il 1596 han las vischnancas da la Tumleasta Dadora effectuà la separaziun da lur territoris comunals respectiv. Las funtaunas da gudogn las pli impurtantas eran l'allevament da muvel, l'agricultura e la pumi-cultura. L'Affar da Tumeagl ha provocà il 1788 la divisiun dal cummin d'Ortenstein en las mesas dretgiras dad Ortenstein-Mantogna ed Ortenstein-Val. Il 1848 è sa separada la vischnanca da Tumeagl da

quella da Giuvaulta. Il 1901–04 è vegnida costruida la via charrabla da Tumeagl a Veulden. Part da la populaziun da lingua rumantscha: 1880 87,3%; 1941 58,6%; 1980 16,1% (meglra lingua); 2000 4% / 13,1% (meglra lingua / tuttas indicaziuns).

Jürg Simonett

Trans (Tràn)

Anteriura vischnanca politica, circuit Tumleasta, district Rain Posteriur. Fusiunada il 2009 ensem cun Sched, Tumeagl e Veulden a la vischnanca politica da Tumeagl. Vitg a mantun situà a 1473 m sin ina terrassa sin la spunda ost dal Rain Posteriur. Ca. 1150 *Hof ad Tranne*, tudestg *Trans* (uffizial). 1803 84 abitants; 1850 104; 1900 56; 1950 61; 2000 69. Il bain attestà il 1208 furniva graun a la claustra da Curvalda. Ils da Tràn eran purs rumantschs, per part libers da vegl ennà. La baselgia, deditgada als ss. Pieder e Paul (menziunada il 1508), vegniva administrada davent dad Almen. Fin a la spariziun da la minorità catolica a l'entschatta dal 18avel tschientaner è Tràn stà confessionalmain en discordia (Affar da Tràn). Il 1527 ha la vischnanca cumprà ora ils dretgs feudals. Il 1596 han ils vitgs da la Tumleasta Dadora inizià la separaziun da lur territori da suveranità communal. Fin il 1851 è Tràn stà in vischinadi dal cummin dad Ortenstein, a partir dal 1788 ha la vischnanca furnà cun Sched e Veulden il mez cummin dad «Ortenstein Mantogna». Ils da Tràn vivan anc a l'entschatta dal 21avel tschientaner prevalentamain da l'allevament da muvel e da l'agricultura. Dal 1918–22 è vegnida costruida la via tras la val. L'incendi dal 1944 ha destrùit ina gronda part dal vitg ch'è vegnida reconstruida (numerus bains purils sparpagliads). L'arrundaziun dal terren ha gi lieu il 1945–47. Part da la populaziun da lingua rumantscha: 1880 70,9%; 1941 75%; 1980 37% (meglra lingua); 2000 8,7% / 11,6% (meglra lingua / tuttas indicaziuns).

Jürg Simonett

Scheid (Sched)

Anteriura vischnanca politica, circuit Tumleasta, district Rain Posteriur (avant il 2001 Mantogna). Fusiunada il 2009 cun Veulden, Tràn e Tumeagl a la vischnanca politica da Tumeagl. Sched cumpiglia duas fracziuns serradas situadas aut sur la val sin la spunda dretga dal Rain Posteriur: Sched (Unterscheid) e Purz (Oberscheid). 12avel tschientaner *de Side*, tudestg *Scheid* (uffizial). 1803 219 abitants; 1850 222; 1900 156; 1950 154; 2000 139. Ina curt a Sched appartegniva en il temp medieval tardiv als conts de Werdenberg, alura als Juvalts. Il

1527 ha la vischnanca cumprà ora ils dretgs feudals. Fin en l'emprima mesadad dal 16avel tschientaner ha Sched fatg part da la plaiv da Tumeagl. La baselgia da S. Simeon vegn menziunada per l'emprima giada il 1447. La reformaziun è vegnida introducida definitivamain suenter il 1600. Fin il 1654 ha constitui Sched ina plaiv cuminaivla cun Veulden. Il 1596 han las vischnancas da la Tumleasta Dadora separà lur guads e pastgiras. Fin il 1851 è Sched stà in vischinadi dal cummin d'Ortenstein. A partir dal 1788 ha furnà la vischnanca cun Tràn e Veulden la mesa dretgira d'Ortenstein-Mantogna (tudestg *Ortenstein im Berg*). Il 1901–04 è vegnida costruida la via a Tumeagl. Las funtaunas d'entrada principals eran l'allevament da muvel e l'agricultura. Il 2005 offriva il sector primar 88% da las piazzas da lavur a Sched. Part da la populaziun da lingua rumantscha: 1941 92,4%; 1980 59,5% (meglra lingua); 2000: 19,4% / 31,6% (meglra lingua / tuttas indicaziuns). Il 2002 è vegnì substituì il rumantsch sco segunda lingua en scola primara tras il talian, e dapi il 2007 frequentan ils scolars da Sched la scola a Razén.

Jürg Simonett

Feldis (Veulden)

Anteriura vischnanca politica, circuit Tumleasta, district Rain Posteriur. Fusiunada il 2009 a la vischnanca politica da Tumeagl. Vitg a mantun situà a 1469 m sin ina terrassa sin la spunda orientala da la Val dal Rain Posteriur. 1290/98 *Felden*, tudestg *Feldis* (uffizial). 1803 156 abitants; 1850 164; 1900 130; 1950 176; 1980 107; 2000 129. Chat da munaidas romanas. In bain episcopal è menziunà a la fin dal 13avel tschientaner, ed en il 14avel tschientaner retiravan ils signurs da Rapertg la dieschma. Il 1527 ha la vischnanca cumprà ora ils dretgs signurils. Il num local rumantsch Veulden deriva, tenor Robert von Planta, dal patrun-baselgia Ipeult/Hippolytus (baselgia menziunada enturn il 1400). Reformaziun 1583. Il 1596 han las vischnancas da la Tumleasta Dadora cunfinà lur territoris comunals. L'incendi dal 1774 ha destrùit Veulden quasi completamain. Fin il 1851 è stà Veulden in vischinadi dal cummin d'Ortenstein, il 1788 è la vischnanca s'unida cun Tràn e Sched en l'atgna mesa dretgira d'Ortenstein-Mantogna. Ella è s'orientada fin viaden il 19avel tschientaner vers la Val dal Rain da Cuirra (Domat). Ils sectors economics principals èn stads fin en il 20avel tschientaner l'allevament da muvel e l'agricultura complementara. La construcziun da la via en la Tumleasta (1901–04) ha pussibilità il svilup d'in modest turissem da stad. La pendiculara da Razén a Veulden è vegnida avverta il 1958 e renovada il 2006. La plipart dals letgs per esters vegnan mess a disposiziun en abitaziuns secundaras. Il 2005 lavuravan 62% da las persunas cun activitad da gudogn a Veulden en il sector terziar. Il 2004 han furnà Sched e Veulden in consorzi da scola primara ed han substituì il rumantsch sco emprima lingua estra tras il talian. A partir dal 2007 frequentan ils scolars da Veulden la scola a Razén. Museum local da S. Ipeult, stgaffi e tgrà da Plasch Barandun. Part da la populaziun da lingua rumantscha: 1880 94,8%; 1941 72,7% (meglra lingua); 1990 25,4% / 40,2%; 2000 14,0% / 29,5% (meglra lingua / tuttas indicaziuns).

Jürg Simonett

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Da la cristianisaziun al temp medieval tardiv

Istorgia da las baselgias dal Grischun, 1. part

■ **La cristianisaziun da la Rezia n'è betg stada in process linear: ils conflicts cun il pajaniss roman e pli tard cun quel german han chaschunà regress e retardaments.** La preschientscha da quel sa reflectescha anc en ils scumonds dad isanzas pajaunas, relaschads en la «Lescha romana da Cuira» («Lex Romana Curiensis») da l'emprima mesadad dal 8avel tschientaner ed en ils chapitels da dretg da l'uestg Remedius («Capitula Remedii») da ca. l'onn 800), ma era en las isanzas popularas reticas anc attestablas per il temp modern tempriv (cults da l'aua, dal fiu, dal crap, da plantas, da champs sco era dad animals e da la fritgailvadad) che derivan da concepziuns religiusas primitivas. Las Vitas dals ss. Gaudentius, Gliezi/Luzi e Florin tradeschan pauc dal process da cristianisaziun. Statuetas da sontgs, altars ed inscripziuns sin altars en las baselgias da Cuira (S. Steivan, S. Gliezi), da Segl-Baselgia e da Buond-Muraia dattan perditga da concepziuns da dieus pajaunas, tgiradas en la Rezia romana, e las testimonianzas archeologicas da Panaduz, d'Aschera e da Cuira renvieschan a l'emprima fasa da la cristianisaziun da la Rezia enturn l'onn 400. A Ziraun sa chattava dapi il 5avel tschientaner ina baselgia baptismala, ed il cuvel pajau al sid da la vischnanca è probablamain vegni destrui da cristians (pir) en il 6avel/7avel tschientaner. A Cuira, il center da la provinza Rezia, è attestà il cristianissim tras l'uestg Asinio (451) e tras ils edificis cultics dal temp cristian tempriv. L'emprima catedrala, ina baselgiasala cun in local transversal ed in'apsida meda radunda, è vegnida construïda en l'emprima mesadad dal 5avel tschientaner. Da memorias dal temp roman tardiv (baselgias commemorativas da sontgs) èn resordidas las duas baselgias vischinantas da S. Steivan e da S. Gliezi.

Dal progress da l'organisaziun ecclesiastica sin la champagna, inizià tranter l'antica tardiva e l'emprima mesadad dal 9avel tschientaner, dattan perditga las baselgias fundadas en il temp medieval tempriv. Enturn l'onn 800 existivan ca. 230 chasas da dieu entaifer la diocesa da Cuira – in dumber elevà en consideraziun da la rara colonisaziun. La provinza Rezia appartegneva ecclesiasticamain a l'archuevstgieu da Milaun, ma a partir da ca. l'onn 600 è l'influenza franca da daventa-

da pli e pli ferma. Quai sa manifestescha per exempel en la reuniun da la pussanza seculara ed ecclesiastica en la famiglia dals Zaccons/Victorids (sco en la Gallia merovingica). Il Contract da Verdun (843) ha suttemess la Currezia definitivamain a l'Imperi dals Francs orientals. L'uestgieu da Cuira è vegni separà da Milaun ed attribui a l'archuevstgieu da Magonza. En il temp carolingic tardiv è l'uestgieu da Cuira vegni integrà en il svilup dal dretg da la baselgia imperiala franca. L'onn 849 ha l'uestg Esso inizià a Cuira la lingia dals uestgs cun nums tudestgs. Era quest fatg reflectescha la nova orientaziun vers il nord. Ils uestgs èn vegnids incumbensads cun la defensiun cunter ils inimis exteriurs (Ungaris e Saracens) ed èn vegnids rinforzads da lur vart dals imperaturs sco pitgas cunter la noblezza seculara. Uschia èsi reussì als uestgs da recuperar en il 10avel tschientaner ina part dals bains attribuids tras la Divisio als possess imperials tras donaziun (Otto I, 955, 958, 960) u barat e da schlargiar lur possess (per exempel a Meraun, a Bludenz, en la Bergaglia ed en il Schons). Enturn il 960 era la Rezia separada en numerus complex signurils sco ils contadis da la Rezia Sut, da la Rezia Sura e dal Vnuost ed ils territoris d'immunitad da las claustras da Faveras, Mustér u Son Gagl. L'uestg Hartpert era perquai ina pitga fitg impurtanta en la politica exteriura (en l'Italia), proseguïda da l'imperatur Otto I.

Las claustras temprivas en Rezia

La Rezia è vegnida cristianisada a partir dal sid, la vita monastica percenter deriva dal vest. Las claustras giugavan ina rolla da tempru plitost politic-culturala che missiunara. L'abazia da mungias da Cazas (ca. 700) è stada probablamain la fundaziun claustrala la pli veglia entaifer l'uestgieu da Cuira, suttemessa da bell'entschatta a l'uestg da Cuira. Il medem vala era per la claustra da mungias a Mistail (*Wapitinis*), fundada ca. l'onn 800. Da numnar è era l'abazia da Schänis/SG, fundada probablamain tranter il 814 ed il 823 da Hunfrid al cunfin tranter la Rezia Sura e Sut. La fundaziun da las trais claustras da paders a Mustér, Faveras e Müstair è enconuschenta mo tras intginas paucas funtaunas, per grond part tardivas. Quella da la claustra da



Baselgia da l'anteriu ospizi da S. Romerio a Brusio, custodi d'in convent d'augustins (enturn 1100).

FOTO PD

Mustér è vegnida iniziada presumablamain cun l'activitad da l'eremit francon Sigisbert, sustegnì da Placi (Placidus), probablamain in Ret. Forsa aveva gia il preses Victor (ca. 720/730), en mintga cas però ses figl Tello, fatg a la claustra da Mustér ina donaziun extendida (765). Ils Zaccons/Victorids han probablamain influenzà era la fundaziun da la claustra da Faveras (ca. 740), e paders da Faveras pudessan avair contribuì a la fundaziun da la claustra da Müstair (*Tuberis*). Decisiv è però stà l'uestg Constantius ubain Remedius. Carl il Grond compara pir en il 12avel tschientaner sco «fundatur» da la claustra. La baselgia claustrala odierna e restanzas da l'implant entir derivan dal temp da fundaziun.

Il pli tard dapi la Divisio han las trais claustras numnadas appartegnì directamain a l'Imperi francon: il 950 ha Otto il Grond renovà l'immunitad da Faveras; Mustér ha obtegnì il 960 dad Otto I il dretg d'elegir libramain l'avat ed il status d'ina claustra imperiala, e differentas donaziuns han alura rinforzà questa claustra sco guardia al Pass dal Lucmagn. A la claustra da Müstair però n'èsi betg reussì da mantegnair il status d'ina claustra imperiala: ella è stada e restada dapi il 881 in'atgna claustra episcopala. Pir en il decurs dal temp carolingic è probablamain entrada la regla benedictina era en las claustras reticas. Las claustras han dà a la Currezia novs impuls religius, culturals, politics ed economics. Pensain per exempel a las runcadas u als manuscrits pumpus dals scriptoris claustrals per la liturgia, la teologia e las contemplaziuns spiritualas sco era per fatgs giuridics ed administrativs. Menziun speziala merita il «Liber Viventium» da Faveras (suenter 800) sco product d'ina excellenta prestaziun artistica. Las numerus picturas muralas da la baselgia claustrala da Müstair offran cun ca. 100 maletgs in'unitad unica da picturas carolingicas. A la fin dal 9avel e 10avel tschientaner eran tut las claustras reticas suttemessas ad ina regressiun marcanta dal dumber da paders e da mungias. En il 12avel tschientaner ha l'Urden premonstratens inizià ina segunda unda da fundaziun da claustras: quellas da S. Gliezi/Cuira e da Curvalda. Ils urdens dals paders mendicants eran represchentads en Rezia mo tras ils dominicans a Cuira (a partir dal 1277).

Ils pli vegls patrocinis da las baselgias currettas derivan dal sid (Ambrosius da Milaun, Carphorus e Cassian dad

Imola, Eusebius da Vercelli, Proculus da Verona), quels temporarmain pli tardivs per regla dal vest (Martin da Tours, Hilarius da Poitiers, Amandus da Maastricht-Tongern, Medardus da Soissons). Il dumber da sontgs da la diocesa è pitschen, e lur patrocinis èn limitads al lieu da lur activitad: Florin/Ramosch, Gaudentius/Casaccia, Placi/Mustér, Gliezi/Cuira, Fläsch e Wangs. Ordaifer las cuminanzas monasticas sa manifestava la vita religiusa oravant tut en ils pelegrinadis tar quests sontgs populars ed en ils usits sepulcrals documentads tras l'archeologia. La diocesa da Cuira cumpigliava l'actual chantun Grischun, la Val d'Ursera, la regiun da Sargans, la part meridiunala dal Vorarlberg ed il Vnuost; il Puschlav sustatteva a l'uestg da Com. Ella consistiva da decanats che correspundevan a las grondas valladas e ch'eran probablamain plaivs grondas. Ma per blier betg tut las baselgias medievalas eran baselgias parochialas. Las associaziuns persunalas da las plaivs pli veglias èn sa transfurmadas successivamain en associaziuns territorialas, e la delimitaziun colliada cun quella ha manà anc avant l'onn 1000 a la furmaziun d'in sistem da plaivs pitschnas (baselgias filialas). Il sistem da las baselgias privatas è sa sviluppà en Rezia pir suenter la Divisio: *religiosi homines* han fundà claustras finanzadas cun lur facultad privata. In exempel è la claustra da Schänis sco abazia privata da Hunfrid e da ses ervavels (fin il 1045).

Adolf Collenberg

Baselgias e claustras dal 13avel tschientaner fin a la reformaziun

Era en il temp medieval tardiv han giugà las claustras ina rolla impurtanta per l'organisaziun ecclesiastica a l'intern da la Rezia. La claustra da Mustér ha erigi da la vart nord dal Lucmagn plirs ospizis. En la Val dal Rain Anteriu è vegnida incorporada il 1491 nov pravendas a l'abazia. En stretga colliaziun cun Mustér stevan en il 13avel e 14avel tschientaner ina cuminanza da beghinas e begards en vischinanza da la chaplutta da S. Benedetg/Sumvitg. Suenter il declin da la claustra da paders a Müstair en il temp autmedieval ha existì qua a partir da la mesadad dal 12avel tschientaner in convent da benedictinas che furmava en il temp medieval tardiv in center da la mistica eucaristica (veneraziun dal Sontgissim Sang). Las preposituras premonstratensas da S. Gliezi/Cuira e da

Curvalda èn daventadas abazias enturn la mesadad dal 15avel tschientaner. A tuttas duas ha appartegnì fin viaden il 14avel tschientaner in convent da mungias, a quella da Curvalda ultra da quai, sco claustra filiala, la prepositura da S. Giachen/Claustra. La suletta fundaziun claustrala dal temp medieval tardiv en Rezia è stada quella da S. Nicolai a Cuira. La claustra da dominicans è vegnida fundada tranter il 1280 ed il 1299 sin iniziativa da l'uestg ed ha giugà ina rolla impurtanta en il svilup da la colonia da Cuira: qua èn sa constituidas las confraternitads laicas e qua han celebrà represchentants da la noblezza bassa e mastergnants lur messas da morts.

La fundaziun da novas baselgias era l'emprim oravant tut chausa dals signurs feudals che possedeavan solitamain era il dretg da patronadi. Lur piazza ha surpiglià en il 15avel tschientaner la raspada organisada en associaziuns territorialas: vischinanzas han fundà en il 15avel tschientaner ina tschientina da chapluttas e pravendas. Talas fundaziuns han manà a la constituziun da novas plaivs. Las vischinanzas aspiravan en ina emprima fasa ad in'atgna pastoraziun locala, pli tard era a dretgs patronals. Dapli d'in quart dals plevons en uffizi cumpain vegniva custodi enturn il 1500 da fundaziuns communalas. En dapli d'in tschintgavel dals cas partecipavan ils parochians organisads en vischinanzas a la tschera dals plevons ed en dapli d'in terz dals cas controllavan els l'administraziun dal bain da la pravenda. Daspera existivan – sco corporaziuns spiritualas – il convent d'augustinas a Cazas, il convent collegiat a S. Vittore/Mesauc sco era ils ospizis a Chapella/S-chanf (fundà da la pravenda da Zuoz) e da S. Romerio/Remigio a Brüschen (custodi d'in convent dad augustins). Quests dus ospizis èn vegnids bandunads a l'entschatta dal 15avel tschientaner.

Florian Hitz



Illustraziun or dal «Liber Viventium» da Faveras (enturn 800).

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.


Da la refurmaziun al temp preschent

Istorgia da las baselgias dal Grischun, 2. part

Refurmaziun e cuntrareforma catolica

Il moviment da las plaivs, che aspirava a la dissoluziun dals dretgs suverans da l'uestg da Cuira, ha culminà en ils Artitgels da Glion dal 1526. Quels eran anc strusch liads dogmaticamain ed avevan en mira ina baselgia parochiala preconfeSSIONALA cun princips che valevan era en pravendas pli tard catolicas (almain fin a l'entschatta dal 17avel tschientaner); tuttina han els difficultà la persecuziun dal moviment evangelic tras las autoritads ecclesiasticas, facilitond qua tras sia derasaziun. Diversas pre-tensiuns dals Artitgels da Glion èn vegnidas messas en vigur contractualmain il 1541 en la capitulaziun d'elecziun cun l'uestg Lucius Iter (ils uschenunads Sis Artitgels). Tranter il 1520 ed il 1550 èn s'accumuladas las refusas da pajar tributs, ed ils dretgs feudals episcopals èn vegnids cumprads ora per pitschens imports. Dal 1558-61 e durant il guvern da Beatus a Porta è l'uestgieu stà pliras giadas curt avant la dissoluziun. A medem temp èn era sa diminuidas fermamain las funcziuns uffizialas da la diocesa: aspiraziuns a refurmas, manifestas en la segunda mesadad dal 15avel tschientaner, han chala suenter il 1527, il chapitel catedral è sa schlià per gronda part suenter il 1529, ed a partir dals davos onns 1530 mancavan il vicari general e l'uestg auxiliar.

Il center dal moviment refurmatoric era Cuira, nua che la nova cretta è s'affirmada il 1523-27 sut il plevon da la citad Johannes Comander. Cun quai che nagina sentenza n'era suandada a la Disputaziun da religiu a Glion (1526), en la quala Comander era sa defendi cunter l'accusaziun d'eresia purtada dal vicari general episcopal en la Dieta federala, ha la nova cretta pudì sa derasar senza impediments. Tranter l'emprima pregia evangelica, tegnida d'in refurmatur ambulante, e la decisiun formala da la plaiv respectivamain tranter la tscherna d'in reverenda refurmà e l'allontanament da l'equipament da la baselgia (altars, statuas, iconografia e.a.), pudevan però passar decennis. Entant che la pli-part da las plaivs da la Lia da las Diesch Dretgiras e parts da la Lia Grischa (Foppa, Tusaun, Mantogna, Schons, Avras) èn aderidas gia vers la fin dals onns 1520/30 a la Refurmaziun, han l'Engiadina e las vals vischinantas adoptà la nova cretta per gronda part tranter il 1550 ed il 1575. Singulas



Las confessiuns en las Trais Lias en la mesadad dal 17avel tschientaner.

plaivs da la Lia da la Chadé, situadas al nord dals pass alpines, han perfin fatg il pass pir vers la fin dal 16avel e l'entschatta dal 17avel tschientaner. Correspundentamain ditg ha era durà l'organisaziun d'ina baselgia refurmada. Il motor da quest process èn stads la creaziun ed il mantegniment d'ina unitad dogmatica. In'impurtanza decisiva è d'attribuir al conflict ecclesiastic dals onns 1545-71, prorut a Clavenna en il ravugl da fugitivs confessiunals tranter ils represchentants da l'ortodoxia bullingeriana (Heinrich Bullinger) e las ductrinas baptisticas respectivamain antitrinitaras. Ils cumenzaments da la Sinoda retica dateschan dal 1537, pir la Confessio retica («Confessio Raetica», 1553) cuntegna dentant in urden sinodal. En ils onns 1570 è succedida ina consolidaziun instituziunala cun la redacziun reglada d'in protocol, l'installaziun da la direcziun ecclesiastica, la regulaziun da las relaziuns cun las autoritads professiunals e l'iniziaziun d'ina

disciplina ecclesiastica en il senn calvinistic. Quai è succedi a moda parallela cun l'imposiziun da l'ortodoxia protestanta ed era collià stretgamain cun l'activitad da Durich Chiampell. L'instituziun d'ina baselgia refurmada per l'entir territori retic-grischun è vegnida concludida pir cun il mandat da morala (veritabel urden ecclesiastic) relaschà da la Dieta federala il 1628 e cun las leschas sinodals dal 1645, en vigur cun pitschnas agiuntas fin il 1808. En las plaivs han ils presbiterians imponi la disciplina ecclesiastica, colloquis regionalis da plevons survegliavan ultra da quai la gestiun da l'uffizi e la ductrina dals plevons.

L'impuls principal per la Refurma catolica è vegni dals nunzis papals a Lucerna che visitavan periodicamain l'uestgieu a partir dal 1578. Els han dirigì per regla fin viaden il 18avel tschientaner era la tscherna da l'uestg. Las directivas dals nunzis, suandadas a partir dal 1580, avevan la finamira da refurmar il chapitel catedral ed il clerus pastoral rural. Il 1599 è vegni decretà in urden fundamental per l'administraziun ecclesiastica e seculara dal chapitel catedral. Durant ils Scumbigls grischuns ha il nunzi sforzà las Trais Lias, sut la protecziun da l'occupaziun austriaca, da consentir a la restituziun dals dretgs en possess dal chapitel catedral da Cuira avant il 1526 (ils 16 Artitgels da Scappi dal 1623). La restituziun dals dretgs seculars da l'uestgieu è bain sa mussada per gronda part sco nunpussavla, sin il champ da la refurma ecclesiastica ha quella però contribuì ad ina revitalisaziun da l'activitad ecclesiastica da l'uestgieu, per exempel en la dretgira spiritala, en las visitaziuns en colliaziun cun viadis da craisma u en las tschernas da plevons. Per finir han ils nunzis cuntanschi ch'ils Sis Artitgels dal 1541 na stuevan betg pli vegnir saramentads tar la tscherna da l'uestg a partir dal 1627 e che l'indigenat prescrit dals Artitgels da Glion dal 1526 è vegni schlià il 1661. Dapi la fin dal 16avel tschientaner stevan a disposiziun era a l'intern da l'uestgieu umens da la baselgia instruids en il senn tridentin. Sco uestg refurmatoric ha Johann Flugi relaschà directivas per il clerus diocesan (1605) ch'han introduci las decisiuns dal Concil da Trent (1545-63) en il dretg ecclesiastic diocesan. Il purtader central da la refurma tridentina en il Grischun era l'Urden dals chaputschins, engaschads sut protecziun da l'occupaziun austriaca il 1621 oravant tut per recatolisar il Partenz e l'Engiadina Bassa. Suenter l'invasiun franzosa il november 1624 è il cult refurmà sa restabili plaunsieu. In'impurtanza pli gronda ha

cuntanschi l'urden en la pastoraziun en territoris catolics. Enturn il 1650 vegniva provedi radund in terz da las plaivs catolicas da chaputschins da la Missiun retica. En vista a la stgarsa dotaziun materiala da las plaivs garantivan ils paders chaputschins, sustegnids oravant tut da l'exteriur, ina pastoraziun suffizienta a custs reducidos. En la derasaziun da furmas baroccas da pietad, architettura ed art en il Grischun han els giugà ina rolla decisiva.

Confessionalissem suenter il 1650

La confessionalisaziun da las duas baselgias, accumulada tranter il 1570 ed il 1640, ha finalmain cumpiglià la populaziun rurala da l'entir territori retic-grischun ed influenza era ils conflicts tranter las faciuns politicas dal Grischun. En ils onns 1610, en maniera accentuada en ils onns 1640/50 ed en singuls cas fin viaden ils onns 1740 èn quels conflicts proruts en cumanzas confessiunals maschadadas oravant tut per il possess ecclesiastic e per il diever cultic (communabel u separà) da la baselgia, per exempel a Zezras e Sagogn. Els han incità la Dieta da fundar in Corpus catolic ed ina Sessiun evangelica (Corpus evangelic) che sa radunavan en dumondas da tempra politic-ecclesiastica en sessiuns separadas. Mecanissem instituzionalisads per schliar conflicts n'èn dentant betg sa furmads en il futur.

Suenter il chal dals conflicts en il 18avel tschientaner tempriv èn omaduas cumanzas confessiunals idas lur atgnas vias. Dals servetschs militars en l'Ollanda e dals studis absolvids savens a Halle è sa derasà il pietissem tranter ils refurmads suenter il 1710. In dals pietists principals da quel temp era Daniel Willi. A partir dal 1745 èn las Trais Lias vegnidas visitadas repetidamain d'emissaris herrnhuterans, per exempel da David Cranz, ch'han pudì guadagnar in dumber remartgabel d'aderents che dominavan per tschert temps perfin la Sinoda retica. Suenter il 1780 è sa fatg valair l'illuminessem preponderantamain refurmà.

Ulrich Pfister

Il svilup da las baselgias chantunals en il 19avel e 20avel tschientaner e lur relaziun cun il stadi

Ina caracteristica dal svilup da las baselgias en il Grischun è la posiziun ferma da las plaivs refurmadas. La davosa constituziun da la baselgia chantunala evangelic-refurmada è vegnida acceptada il 1978, la pli nova revisiun da la baselgia chantunala catolica datescha dal 1993. Ils interess politic-religius da las duas baselgias chantuna-

las grischunas èn vegnids represchentads en il 19avel e 20avel tschientaner da la Sessiun evangelica respectivamain dal Corpus catolic ch'han obtegni en il 19avel tschientaner, sco parlaments ecclesiastics, era in mandat politic da represchentaziun d'interess e da survegliaziun seculara. Ils dus cussegl èn daventads qua tras era organs da l'autonomia ecclesiastica en il stadi democratic. Quest svilup ha provocà dapi l'entschatta dal 19avel tschientaner numerusas dispitas tranter la baselgia catolica ed il stadi. En las constituziuns dal 1814/20 e 1854 prescriveva l'uschenunada clausula da paritad ch'ils uffizis chantunals stoppian vegnir occupads tenor paritad per dus terz da refurmads e per in terz da catolics. Tar la tscherna dals cusseglers dals chantuns e da la cumissiun d'educaziun è vegnida applitada la protecziun da las minoritads confessiunals. Suenter la revisiun da la Constituziun federala dal 1874, ch'ha imponi al stadi ina neutralitad confessiunala rigurusa tras la garanzia da la libertad da cardientscha, n'era pli nagin spazi per organs chantunals occupads tenor confessiun. La clausula ina paritad ha stui vegnir dismessa. En consequenza d'aspects nunciers èn las cumpetenzas concretas d'ina surveglianza tras las autoritads statalas restadas anc ditg contestadas. Quai valeva era per il dretg da cogeziun tar tschernas d'uestgs. En il 19avel tschientaner sa drizzava la resistenza catolica oravant tut cunter l'absorpziun da la scola tras il stadi e la neutralitad respectivamain l'indifferenza confessiunala intendida da quel. Enturn il 1900 è prorutta ina guerra per cudeschs da scola (tranter auter il «Sigisbert» versus il «Robinson»), ed en ils onns 1940 è naschida ina cuntraversa concernent la relaziun tranter la Baselgia ed il stadi ch'ha culminà en in cumbat cultural retardà. Il conflict è sa splegà sin il champ da la politica da partidas oravant tut tranter la Partida populara cristiansociala e la Partida democratica. La relaziun è sa schlucada enturn il 1950.

Il Segund Concil vatican (1962-65) ha alura puspè chaschunà, tras la cooperaziun successiva dals laics e da las dunnas, midadas internas da la baselgia e discussiuns ch'han provocà – surtut suenter la nominaziun da Wolfgang Haas sco uestg da Cuira tras il papa (1990) – in conflict virulent en la diocesa, en il qual era il stadi è vegni involvi, tranter auter pertutgant la renconuschientscha da la Scola auta da teologia a Cuira. La relaziun tranter la baselgia refurmada ed il stadi è restada nunperturbada. En la baselgia refurmada dominavan l'emprim las dispitas tradiziunals areguard la sanctificaziun da la dumengia e la furma dal servetsch divin. La basa ha exprimi pli e pli la voluntad da purpigliar senza la responsabladad per la furma ecclesiastica. En ils onns 1930/40 è la baselgia refurmada sa participada cun proclamaziuns e posiziuns a cuntraversas confessiunals. A medem temp ha ella era manà discussiuns internas e tematisà l'admissiun da dunnas a l'uffizi pastoral (votaziuns dapi il 1927), al qual ellas èn dentant vegnidas admissas legalmain pir il 1965. Dapi ils onns 1970 mainan omaduas baselgias chantunals era discussiuns cun las baselgias independents che pon registrar adina dapli commembers. Quai ha promovì suenter il Segund Concil vatican per in tschert temp stentas ecumenicas ch'han schendrà per exempel il 1974 la cumissiun interconfessiunala per il dialog.

Georg Jäger



Baselgia da la S. Crusch a Cuira (1969).

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Sopraporta – la part superiura da la Bregaglia

■ La barriera natirala da La Porta situada al nord da Promontogno separa topograficamain e climaticamain la Bregaglia inferiura (mediterranea) da quella superiura (alpina). La contribuziun dad oz preschenta la part Sopraporta cun las duas anteriuras vischnancas da Stampa e Vicosoprano.

Isola (Malögia)

Fracziun da Malögia, vischnanca da Stampa. Part dal territori superiur da la Bergiaglia (= furma istorica da «Bregaglia»), urbarisà a partir dal 15avel tschientaner. Anteriur aclau da stad, situà a la riva dal Lej da Segl a l'entrada en la Val Fedoz. Il 1461 è documentada ina migiuria ad Isola. D'impurtanza culturala è la Chesa Gadina, erigida il 1672, cun picturas muralas talianas. Oz è Isola in lieu d'excursiun fitg frequentà.

Adolf Collenberg

Maloja (Malögia)

District da l'Engiadin'Ota e Val Bergiaglia e fracziun da Stampa. Il district da Malögia, institui il 1851, cumpiglia ils circuit da la Bergiaglia e da l'Engiadin'Ota e s'extenda fin a la Punt Ota (ca. 5 km sur Zernez). La fracziun, situada sin 1815 m al Pass dal Malögia en la planira auta da l'Engiadin'Ota, cumpiglia ils anteriurs lieus da stad dals purs da Stampa: Malögia, Isola, Capolago, Pila ed Orden. 1244 *Malongum*, 1275 *Malodia* (preroman), tudestg Maloja (uffizial). Malögia è vegnì colonisà davent da Stampa a partir dal 15avel tschientaner. L'Hotel Kulm, che serviva era da staziun da posta, è stà avert fin il 1880. Il cont beltg Camille de Renesse ha transformà Malögia en in center da segiurn per l'aristocrazia europeica: tranter il 1882 ed il 1884 è sortids il Maloja Palace, considerà a ses temp sco l'hotel il pli luxurius da l'Europa, in hotel-chalet (l'actual Schweizerhaus), ina baselgia catolica ed il chastè da famiglia Belvédère (mai terminà). Suenter ina fluriziun enturn il 1900 ha Malögia pers cun las duas guerras mundialas l'impurtanza sco lieu da cura luxurius, ma betg sco destinaziun turistica (16 594 viagiatur cun la posta sin la ruta dal Malögia dal 1882–1900, 218 884 dal 1930–52). Las attraziuns da la regiun èn ils lais alpins, il reservat natiral ed il pli grond complex da mulins da glatscher da l'Europa. Il vitg dispona d'ina scola primara.

Adolf Collenberg

Casaccia

Anteriura vischnanca politica, dapi il 1971 fracziun da l'antieriura vischnanca politica da Visavraun, situada lung la via en la part sura da la Bergiaglia al spartavias per ils pass dal Set e dal Malögia (tur da guardia dal temp medieval, numnada Tor/La Toracia, al nord da Casaccia). 1160 *Cassache*, rumantsch attestà *Cha-*



Il Pass dal Malögia separa topograficamain l'Engiadina da la Val Bregaglia.

FOTO: PD

satscha. 1850 96 abitants; 1880 70; 1900 77; 1950 88; 1970 59. Impurtanta staziun da transit fin en il 19avel tschientaner, devastada pliras giadas da l'Orlegna. Dapi il 1535 *settima* dal cummin da Sopraporta. La baselgia da S. Gaudenzio sur Casaccia (devastada il 1551, lieu da pelegrinadi) è documentada l'onn 840 sco possess da l'abazia da Faveras. Al medem lieu sa chattava in ospizi medieval, menziunà il 1336 (ma bler pli vegl), ch'è vegnì translocà il 1520 en il «convento» da Casaccia. Ecclesiasticamain appartegneva Casaccia oriundamain a S. Maria da Porta, ed igl existiva probablmain gia baud ina chaplania da curatur. Suenter la reformaziun il 1551, è Casaccia daventà ina plaiv independenta il 1556. La baselgia, construïda suenter il 1522, è vegnida destruida il 1740 d'ina bova e remplazada il 1742 tras la baselgia odierna. Il 1745 è Casaccia daventada ina vischnanca autonoma, la pli pitschna en Bergiaglia. En il Palazzo Gadina (erigi il 1591 da la famiglia Prevosti) sa chattava fin il 1964 ina stanza da scola.

Adolf Collenberg

San Gaudenzio

Anteriura baselgia da pelegrinadi (di da Nossadonna d'avust) sur Casaccia. En il 9avel tschientaner è attestada la baselgia sco possess da la claustra da Faveras ch'ha exequi la collatura fin enturn il 1450, alura è ella ida en possess da la Bergiaglia. Tenor la legenda èn sepulidas qua las reliquias da San Gaudenzio, veneradas cun approvaziun dal papa dapi il 13avel tschientaner.

La baselgia da San Gaudenzio sa chat-

ta al pe dal Set e dal Güglia ch'eran las transversalas nord-sid las pli impurtantas dal Grischun en il temp medieval. Dapi il temp medieval tempriv ha existì sper la baselgia in ospizi (menziunà pir il 1336) che renviescha a la funcziun da basa da San Gaudenzio. Il 1359 è la baselgia vegnida reconsecrada. Il 1518 è ella vegnida reconstruida en stil gotic ed il 1523 munida da la brev da perdun dal papa. Il 1551 han devastà ils reformads la baselgia ch'è vegnida bandunada en il 18avel tschientaner. Il 1925 è la ruina da la baselgia gotica vegnida restaurada.

Adolf Collenberg

Vicosoprano (Visavraun)

Anteriura vischnanca politica, circuit Bergiaglia, district Malögia. Fusiunada il 2010 a la vischnanca politica da Bergiaglia. La pli gronda anteriura vischnanca da la Bergiaglia che consistiva da Visavraun (1067 m) e da las fracziuns da Rotticchio e Pongello. Il 1971 è vegnida incorporada l'antieriura vischnanca da Casaccia a quella da Visavraun. 1096 *Vicus Supranus*, talian Vicosoprano (uffizial). 1850 383 abitants; 1900 417; 1950 415; 1960 568 (construcziun dal mir da serra Albigna); 1970 387; 2000 429. Sur Bosca han ins chattà in crap-scalutta e sper Caslac, sur la baselgia da S. Cassian, in pitschen altar roman, deditg a Mercur, da la segunda mesadad dal quart tschientaner. Fin il 960 han appartegnì ils abitants da Visavraun a la Chadè da Com, alura a l'uvestgieu da Cuir. Sco lieu principal dal cummin da la Bergiaglia furmava Visavraun in center dals transports ed era la sedia dals ports en Bergiaglia e

da las famiglia da ministerials Castelmur e Prevost. L'uvestgieu da Cuir possedeve ina furtga (dretgira criminala) a Visavraun. Ses chastellan tegneva dretgira en l'uschenunada Tur da Senwelen, la suletta tur radunda medievala mantegnida dal Grischun. Questa tur, menziunada per l'emprima giada il 1314, deriva dal 13avel tschientaner e serviva sco staziun da duana a l'uvestgieu. Il 1591–92 è ella vegnida integrada en la nova chasa-cumin munida d'ina praschun, d'ina chombra da tortura e d'in pal da vargugna. Las localitads inferiuras da la chasa-cumin vegnivan duvradas sco magasin per rauba da duana che alloscheschan actualmain in museum. La tur quadra da Salis, construïda il 1537, è l'ensaina da Visavraun. Fin a la reformaziun (1529 respectivamain 1553) ha appartegnì Visavraun ecclesiasticamain, sco part da l'archiplaiv Bergiaglia, a S. Maria sin la Porta. La baselgia da S. Cassian, situada al nord da Visavraun, è cuntanschibla sur ina punt artgada dal 16avel tschientaner. Quella vegn menziunada per l'emprima giada il 1355, ella è dentant pli veglia. La nova baselgia reformada da la S. Trinidad è vegnida erigida il 1761 da la vischnanca cumplexsiva da Sopraporta. Il 1901 è vegnida construïda la baselgia catolica. Entant che l'agricultura gioga ina rolla subordinada, predomineschan a Visavraun il mastergn ed il turissem (pendiculara Pranzaira-Albigna, runal da skis a Casaccia). La vischnanca profita dals fits d'aua e da las taglias da las Ovras electricas Bergiaglia (mir da serra Albigna cun centrala e batschigl da cumpensaziun a Löbbia). Il 1960 è vegnida construïda ina via da sviament. Dapi il 1972 sa chattava la scola secundara da la val a Visavraun.

Adolf Collenberg

Borgonovo

Fracziun da l'antieriura vischnanca politica da Stampa. Vitg lung la via cun punt da crap dal 1699 sur la Maira. 1391 *Borgonovo*. Singuls chats dal temp da bronz e dal temp da Latène tardiv (manera). En il temp medieval tardiv, ensemen cun Coltura, S. Cassian e Piazza/Visavraun, ina da las squadras dal cummin da Sopraporta, 1859 fracziun da Stampa. La chaplutta da Borgonovo, menziunada il 1327, appartegna a Nossadonna a Promontogno. Il 1549 è vegnida construïda la baselgia evangelica da S. Giorgio, lieu da sepultura da la dinastia d'artists Giacometti. Lieu da scola secundara da Visavraun e Stampa a partir dal 1933. Sviament dapi il 1975.

Adolf Collenberg

Stampa

Anteriura vischnanca politica, circuit Bergiaglia, district Malögia, in center administrativ e cultural da la Bergiaglia, furma dapi il 2010 cun las vischnancas da Buond, Castasegna, Suogl e Visavraun la nova vischnanca politica da

Bergiaglia. Stampa cumpiglia d'ina vart las culegnas da Stampa, Borgonovo, Coltura, Montaccio e Caccior (ca. 1000 m), situadas en il fund da la val, da l'atra vart ina vasta exclava al Pass dal Malögia, a la quala appartegnan Cavril e Canova (ca. 1600 m) al pe da la bova dal Malögia sco era la fracziun da Malögia cun Isola, Orden, Pila e Capolago (ca. 1810 m), tuts anteriurs lieus da stad al cunfin occidental da la planira auta engiadinaisa. La culegna da Gualdo, tranter Borgonovo e Stampa, è vegnida bandunada en il 16avel tschientaner. 1354 *Stampa*. 1850 328 abitants; 1900 445; 1950 414; 2000 531. Sper S. Pietro è vegnids scuverts fastizs d'abitadis dal temp da Latène e dal temp roman, en pli ina fossa-batschigl (preromana) a Palü. Entaifer la cuminanza da cunfin medievala e la posteriura dretgira auta da la Bergiaglia furmava Stampa, ensemen cun las culegnas al nord da la Mürära, il cummin da Sopraporta (1535 dretgira civila). Las lavurs d'urbarisaziun en il fund da la val èn vegnidas terminadas en il 12avel tschientaner, e dapi il 15avel tschientaner exista ina colliaziun tranter Stampa e la regiun da Malögia. La gronda part dal terren era en possess dals von Salis, von Stampa, Prevost, de Castelmur e da l'uvestg da Cuir, ils dretgs suverans dal qual èn ids a la vischnanca tranter il 1367 ed il 1526. Ecclesiasticamain appartegneva Stampa a la plaiv gronda da S. Maria a la Porta, ella aveva dentant in chaplon a S. Pietro (Coltura) ed a S. Giorgio (Stampa, menziunà il 1327). La vischnanca, aderida il 1533 a la reformaziun, aveva dapi il 1549 in agen preditiont. Ella è caracterisada fermamain da l'agricultura; avant l'epoca da la construcziun da viafiars aveva era il transport cun ses mastergns respectivs ina grond'impurtanza. Il 1859 è Stampa daventada autonoma cun l'extensiuon actuala. La Ciäsa Granda dat suttetg ad ina biblioteca istorica cun var 1200 cudeschs dal 16avel–20avel tschientaner. Las Ovras electricas Bergiaglia che tutgan a las Ovras electricas da Turig èn in'impurtanta funtauna d'entradas. Blers purs da la val lavuran l'enviern en il gaud u penduleschan en l'Engiadin'Ota. Scolas elementaras sa chattan a Visavraun (dapi l'onn scolastic 2009–10) e Malögia (scola bilingua), Stampa è sedia da la scola secundara. Ca. 30 % dals abitants èn catolics. Il 2000 discurrevan 69 % da la populaziun talian, 28 % tudestg e 2 % rumantsch.

Adolf Collenberg

Coltura

Fracziun da l'antieriura vischnanca politica da Stampa dapi il 1859. A partir dal temp medieval tardiv furmava Coltura, sper S. Cassiano, Piazza/Visavraun e Borgonovo, ina da las uschenunadas squadras dal cummin da Sopraporta. Ecclesiasticamain appartegneva Coltura oriundamain a Nossadonna a Promontogno. La baselgia da S. Peder vegniva pastorada d'in chaplon, dapi il 1549 d'in plevon reformà. Menziun speziala meritan la Casa Motti (construïda en la segunda mesadad dal 17avel tschientaner), il Palazzo Castelmur (edifizi-chastè en stil gotic-mauric, construï enturn il 1840) e la chasa patriziana da la famiglia Redolfi (construïda il 1723), integrada da la vart nord dal Palazzo Castelmur. Il 1963 ha il circuit da la Bergiaglia cumprà il palaz ed ha vert quel al public.

Adolf Collenberg

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Stampa – center da la Bregaglia superiura e lieu d'origin da la famiglia d'artists Giacometti.

FOTO J. MENOLFI

Rezia romana – il Grischun dad oz sco part da l'Imperi roman

■ L'onn 15 avant Cristus han ils Romans conquistà las regiuns al nord da las Alps. Qua tras è era il Grischun dad oz vegn integrà en l'Imperi roman. Grondas parts dal chantun odiern èn vegnidas attribuidas a la provinza Raetia. L'epoca da la Rezia romana tanscha da l'emprim tschientaner a. C. fin al temp da la Currezia (ca. 500 s. C.). La Rezia vegn menziunada per l'emprima giada var 150 onns avant Cristus. Fin l'onn 15 a. C. n'enconuschevan ils Romans betg questa regiun autalpina abitada da pievels (Barbars, Rets) che invadevan adina puspè la regiun bainstanta da Com.

Las paucas infurmaziuns davart la Rezia romana, furnidas da funtaunas scrites, descrivan quella sulettain or da l'optica romana. La repartiziun da las numerusas funtaunas archeologicas correspunda per part a la spessezza da la colonisaziun actuala e cun quai a l'intensità da las exchavaziuns. Dals ca. 230 lieus da chat dal temp roman en il Grischun èn ca. 25% colonias, 6% fossas ed ils ulteriurs pertschiens chats singuls, oravant tut da munaidas.

La structura dal spazi natural dal Grischun ha provocà ina separaziun da las regiuns colonisadas tenor valladas, en las qualas èn s'unidas tradiziuns regiunalas ed influenzas estras. Durant ils 500 onns dal domini roman è sa sviluppada en questas regiuns ina cultura romana cun differents substrats indigens ch'ins ha pir cumenzà a perscrutar. Las vals grischunas orientadas vers l'ost ed il vest s'avran vers il spazi alpin oriental. En il temp imperial tempriv e surtut en l'antica tardiva existivan fermes lioms cun l'Italia dal Nord. Da l'emprim tschientaner tardiv fin il terz tschientaner èn las vals alpinas dal nord sco era l'ulteriura Rezia Occidentala s'orientadas pli fitg vers l'economia da las provinzas romanas dal nord-vest, quai che resorta tranter auter da la vaschella importada (*Terra sigillata*). La basa da viver furmavan anc adina las ritgezdas da la terra – oravant tut il fier, ma era il cristall ed il lavetsch – sco era il transport da martganzia, l'utilisaziun da las pastgiras, la selvicultura e l'agricultura. Impurtantas colliaziuns dal sid al nord manavan sur il S. Bernardin, il Set ed il Güglia en la Val dal Rain al Lai da Constanza ed al Danubi; quests passadis alpines n'avevan dentant betg la medem'impurtanza sco il Brenner u il Grond S. Bernard. Chats romans cumparan era a las rutas dal Lucmagn, da la Greina, dal Spleia e dal Bernina. L'«Itinerarium Antonini», in register da las vias romanas, e la «Tabula Peutingeriana», ina copia medievala d'ina charta romana, inditgeschan las vias probablamain charrablas sur ils pass dal Set, dal Güglia e dal Spleia.

Dals emprims contacts fin a la conquista da las Alps (15 a. C.)

Tenor ils chats archeologics eran abitadas la plipart da las vals alpinas grischunas gia avant l'occupaziun romana (emprim tschientaner a. C.). Contacts cun l'Italia sa laschan cumprovar en rars cas era per il nord da las Alps, per exempel tras chats da munaidas padanas a Cunter (Surmeir) e da vaschella fina a Cuira. Las emprimas funtaunas scrites descrivan ils abitants da las vals alpinas solitamain sco rotschas da brigants selvadis. L'onn 44 a. C. aveva Lucius Munatius Plancus pudì festivar (en Gallia?) in triumf *ex Raetis*, tuttina è l'entir territori alpin, inclus las trasversalas da l'Italia al Danubi Superiur, vegnì suttaless al domini roman pir suenter la campagna militara da Drusus e Tiberius (15 a. C.). Perditga da quai dattan oravant tut ils chats a las rutas dal Set e dal Güglia, numnadamain a Buond, sin il Pass dal Set, a Suagnign (Padnal) ed a Casti. Vers nord manavan la ruta dal Lai Rivaun ed ina via al Lai da Constanza. La populaziun indigena sa lascha strusch definir causa difficultads da datar ils chats indigens e probablamain era causa la cesura demografica da l'emprim tschientaner a. C., rinforzada



Via romana tras la Viamala.

FOTO: SERVETSCH ARCHEOLOGIC

tranter auter tras la recrutaziun sfurzada da truppas militaras (*Cohortes Raetorum et Vindellicorum*).

Temp imperial tempriv e mesaun

Il text dal Tropaeum Alpium, in monument erigi l'onn 7 u 6 a. C. en onur dad Augustus a Monaco en vischinanza da La Turbie (a ca. 480 m autezza) relata da la conquista da las Alps e menziunescha plirs pievels dal territori grischun odiern conquistads tras ils Romans. Fin enturn ils onns 20–40 a. C. furmavan il Vallais ed il Grischun, ensemen cun la regiun prealpina bajuvara, in'unitad administrativa sut in praefectus *Raetis Vindolicis Vallis Poeninae et levis armaturae*, entant che las vals dal sid faschevan part da las regiuns italicas X e XI. La provinza *Raetia et Vindelicia*, numnada pli e pli en sia furma curta Raetia, era vegnida separada probablamain gia sut l'imperatur Tiberius (14–37), il pli tard però sut l'imperatur Claudius (41–54). La dumonda, schebain Kempten (*Cambodunum*) è stada l'emprim la chapitala da la Rezia romana, remplazzada pir suenter intginas generaziuns dad Augsburg (*Augusta Vindellicorum*), avanzada ad in *municipium* en il segund tschientaner, n'è betg anc

sclerida. Ils lieus centralis a l'ost da la provinza dad 80 000 km² eran Kempten, Briganza (*Brigantium*) e Cuira (*Curia*). Gia en l'emprim tschientaner s. C. rendevan questas trais citads quasi simultanamain omagi als prinzis imperialis – quai che suttastrigta dal reminent l'impurtanza da Cuira –, demussond qua tras lur loialtad visavi l'Imperi roman. Ils edifizis romans da las citads da Kempten e Briganza èn perscrutads meglier che quels da Cuira, nua ch'ins ha scuvert en il Welschdörfli, a la riva sanestra da la Plessur, bajetgs publics e privats. Sco a Briganza cumpiglian era quels surbajegiadadas lung la via da transit. Cuira ha ina posiziun tipica per citads romanas: da qua sa spartivan las diversas vias per ils pass grischuns e qua cumenzava probablamain era la navigaziun sin il Rain vers il nord. Ils bogns, ils martgads, las chasas da commerzi, las sustas, ils tipics edifizis lungents che servivan d'abitadis e d'interpresas da mastergnanza sco era ils imports documenteschan la funcziun da center da la citad. Cumprovà è medemamain in post militar che dueva garantir la segirtad dal traffic. Funtaunas scrites davart il status giuridic da Cuira mancan; enconuschentschas pli novas fan

pensar ad in *vicus*. A partir dals onns 10–30 s. C. è s'augmentà il dumber da culegnas e da chats en las vals principalas



Relicts da l'invasiun romana tras il Surmeir.

FOTO: SERVETSCH ARCHEOLOGIC

dal Grischun. Fin alura èn vegnidas construidas las chasas era a Cuira a moda tradiziunala, vul dir en lain u sin fundaments da mirs sitgs. Dapi la mesadad da l'emprim tschientaner cumparan però pli e pli edifizis cun mirs da maula e cun tetgs da tievlas u da crap. En las vals grischunas s'alingsiavan lung la via culegnas che sumegliavan vitgs, e quai sin tuttas autezzas sur mar (p. ex. Roveredo, 300 m; Maiavilla, 515 m; Zernez, 1500 m). Las culegnas vegnivan construidas cun preferenza sin terrassas exponidas al sid u al sidost e situadas savens aut sur il flum. Perscrutada il meglier è quella rurala da Riom, construida sur precursuras dal temp da fier ed abitada cuntinuadamain, cun almain duas curts confortablas circumdadas d'in mir che devan sut-tetg era a viandants. Talas curts tschindcladas paran d'avair gi' ina funcziun particulara sco lieus da repaus a las rutas da transit. Insumma anc betg perscrutada è l'utilisaziun da las alps presumada per quell'epoca.

Antica tardiva

Chats da munaidas en la Val dal Rain Alpin ed a Cuira ed orizzonts d'incendis laschan presumar era per il Grischun temps turbulents a la fin dal terz tschientaner. Suenter la reforma imperiala tras Diocletian (284–305) è passada la Rezia a la prefectura italica ed è vegnida dividida, probablamain dal temp da Constantin (306–37), en las provinzas *Raetia prima* (chapitala: l'emprim *Brigantium*/Briganza, dapi il 5avel tschientaner (?) *Curia*/Cuira) e *Raetia secunda* (chapitala: *Augusta Vindellicorum*/Augsburg).

Las duas provinzas reticas vegnivan administradas mintgamai dad in preses (*praeses*); il commando militar aveva dentant per omaduas provinzas in *dux* staziunà probablamain ad Augsburg. A l'appartegnentscha da la Rezia a la prefectura italica ed a l'orientaziun vers il sid correspundan tranter auter era ils imports da vaschella da l'Africa dal Nord e da ceramica cun glapura verda da l'Italia dal Nord; autra rauba deriva dal nord-vest, sco la Terra sigillata da l'Argonne.

Tenor la legenda duai son Gliezi avair missiunà en Rezia a la fin dal segund tschientaner suenter Cristus. Il passadi da la religiuin antica al cristianissem è però cumprovà archeologicamain pir en il temp roman tardiv, cura ch'ins ha erigi a Cuira, Panaduz ed Aschera edifizis sacralis, bajetgs memorials e santeris dal cristianissem tempriv. Tant a Cuira sco en las vischnancas da las valladas reticas èsi da presumar pravendas adina pli grondas a partir dal quart tschientaner. La sedia episcopala a Cuira para d'esser vegnida fundada vers la fin dal quart tschientaner, ed a partir da l'onn 451 è attestà cun Asinio l'emprim uvestg da Cuira. Il passadi al cristianissem na signifitgescha betg la fin da tut ils lieus cultics anteriurs, sco per exempel in cuvel en vischinanza da Ziràn che serviva senza dubi en il quart e probablamain era anc en il 5avel e 6avel

tschientaner a l'aduraziun d'ina divinitad nunenconuschenta.

Sper las culegnas avertas, sco quellas dal Welschdörfli a Cuira, da Riom u d'Aschera, èn vegnids construids a partir da la fin dal terz tschientaner s. C. era abitadis e fortificaziuns sin collinas e crests inaccessibles, en plirs cas era en lieus cun rechats dal temp da fier. L'abitadi il pli enconuschent sper il chastè strusch perscrutà da la Curt a Cuira è quel fortifitg da Castiel-Carschling. Da turs e chastels vegnivan controllads puncts impurtants, sco la Motta Vallac/Salouf u Schiedberg/Sagogn. Tenor rechats archeologics èn svanidas plaun a plaun las structures da construiu romanas a partir dal 5avel tschientaner. Simplas construziuns da lain han remplazzà successivamain ils edifizis cun mirs da maula (per exempel a Castiel e Riom); in'exceptiun fan las baselgias sco era singuls edifizis profans represchentativs. Bliers lieus èn però vegnids colonisads vinavant cuntinuadamain d'ina populaziun da lingua romana.

Stefanie Martin-Kilcher



Statuetta da Mercur, chatta-da a Cuira. FOTO: MUSEUM RETIC

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Maiavilla e Fläsch – las vischnancas al Pass da Son Gliezi

■ **Maiavilla e Fläsch furman las vischnancas situadas il pli al nord dal Grischun al pe dal Fläscherberg e dal Pass da Son Gliezi (Luziensteig). Quest passadi en direcziun dal Principadi da Liechtenstein era pli baud da gronda muntada strategica per il Grischun.**

Maiefeld (Maiavilla)

Vischnanca politica, circuit Maiavilla, district Landquart (avant il 2001 Landquart Sut). La citadina da Maiavilla cumpiglia, ultra da Maiavilla (lieu principal dal circuit), las fracziuns da Rofels e Bovel ch'han appartegnì fin il 1633 a la vischnanca gualsra da Berg. Quart tschientaner *Magia* («Tabula Peutingeriana»), ca. 840 *Lupinis* («Urbari curretic dals bains imperials»), 1282 *Maginvelt* (copia), 1295 *ze Meienvelt*, tudestg Maiefeld (ufficial). 1850 1232 abitants; 1900 1240; 1950 1568; 2000 2368. Chats preistorics tranter auter sin il Pass da Son Gliezi. La staziun stradala romana *Magia* (probabilmente culegna), construida enturn il terz tschientaner, sa chattava al lieu da la *curtis Lupinis* (bain signuril), menziunada en l'«Urbari curretic», respectivamain da l'odiern chastè da Brandis. Da ca. la mesadad dal 10avel tschientaner fin la mesadad dal 12avel tschientaner han regì ils conts von Brengenz a Maiavilla. Il 1270/75 han ils Aspermonts laschè construir il chastè da Maiavilla, amplifitgà pli tard da Friedrich VII von Toggenburg («Neues Schloss») ed enturn il 1465 dals Brandis – l'odiern emblem da la citad. A partir dal 1355 è Maiavilla stà sutmess al domini dals Toggenburgs; suenter lur extincziun ha Maiavilla partecipà a la fundaziun da la Lia da las Diesch Dretgiras. Il signuradi e la citad èn passads en ierta a la famiglia von Brandis. Anc en il 13avel tschientaner ha ils chevaliers von Aspermont munì Maiavilla cun in mir da tschinta ed in foss. A Maiavilla, menziunà sco citad l'emprima giada il 1346, n'èn però sa svilupadas ni in'organisaziun urbana ni mastergnanzas. Il 1438 ha la citad stipulà in contract da dretg da citad (vul dir da libertad) cun ils Brandis ed ha extendì ils dretgs da giurisdicziun bassa, suandond l'exempel da Malans e Gianin. Il cussegl da citad è menziunà l'emprima giada il 1437; las radunanzas communalas vegnan salvadas dapi il 1447 en la chasa-cumin istorica. Il 1510 è attestada per l'emprima giada ina scola da citad a Maiavilla. Il sigil il pli vegl da la citad datescha dal 1610. En il 14avel e 15avel tschientaner èn sa furmadas sin il territori da Maiavilla ils abitadis gualsers da Berg («Im Berg»), cun dretgs particulars ed in'administraziun autonoma, che cumpigliava las culegnas da Stürfis, Rofels, Bovel, Vatscherinenberg e Mutzen/Guscha. Ils abitants da la fracziun da Berg han dentant obtegnì la citadina da Maiavilla pir en il 17avel tschientaner. Sut l'influenza da colonists alemannics dal nord e da Gualsers ha Maiavilla subì in process da germanisaziun a l'entschatta dal 16avel tschientaner.

Enturn il 840 è menziunà in *Lupinis* ina *ecclesia cum decima*, baselgia privata da la claustra da Faveras. Il patrocini da S. Amandus da la baselgia parochiala da Maiavilla è documentà l'emprima giada il 1105. La baselgia da S. Gliezi (sin il Pass da Son Gliezi) era ina filiala da quest'ultima. Maiavilla è aderì a la refurma il 1529.

Il 1509 han las Trais Lias acquistà il Signuradi dals ultims ertavels dals Brandis. Fin a la helvetica ha la citad già in status dubel: ella sutsteva a las Trais Lias sco part dal Signuradi ed era, sco giurisdicziun, in member suveran da la Lia da las Diesch Dretgiras. Il 1803 è Maiavilla daventada ina vischnanca autonoma da la dretgira auta da Maiavilla, a partir dal 1851 dal circuit da Maiavilla. Ina separaziun dals guauds e da las pastgiras ha gi lieu cun Fläsch il 1601, ina rectificaziun dals cunfins cun Gianin il 1610. Dapi l'antica tardiva garantiva ina navetta, che transportava persunas, chavals e



La citadina da Maiavilla furma il center dal Signuradi.

FOTO J. MENOLFI

Adolf Collenberg

manadiras, il passadi lung la Via imperiala da la regiun dal Lai da Turitg tranter Ragaz e Maiavilla. Sch'il nivel da l'aua era memia bass u en cas da furnaziuns da glatsch, vegniva la navetta remplazzada tras ina punt d'enviern u d'urgenza. Dapi il temp medieval tardiv era Maiavilla ina staziun da duana. En ils statuts communalas dal 1480 è menziunada ina susta (resp. in negozi); il negozi/la chasa da duana sper il tigl da giustia è vegnì demolì il 1911. La citad ha imponì a partir dal 1504 l'obligaziun da transtgargar la martganzia partenta per Cuira (monopol sin ils transports). A partir dal 1575 sa splegava l'entir transport vers il Lai Rivau e Turitg sur la Punt da Tardis (vischnanca da Mastrils). Il dazi sin il Pass da Son Gliezi, introducì suenter il 1851, è vegnì abolì il 1858; il medem onn è vegnida inaugurada la colliaziun a la lingua da viafier Rorschach-Cuira. Il 1861 è sa domiciliada a Maiavilla ina suernaria che n'exista oz betg pli. La colliaziun directa sur ina punt tranter Maiavilla e Ragaz è vegnida realisada il 1885. L'economia da Maiavilla è caracterisada da l'agricultura (viticultura) e dal turissem. La vischnanca è ultra da quai in center istoric d'allevament da chavals e da commerzi da muvel: il 1897 vivevan a Maiavilla 145 possessurs da muvel grond, il 1980 anc 25. Meglieraziun da las Alps 1961–64. Il Steighof è in'enclava da Maiavilla

sin territori da Fläsch. Il 1981 è vegnida erigida ina chasa d'attempads per il Signuradi, il 1991 il restaurant d'autostrada Heidiland. Maiavilla, ch'ha promovì l'industria en ils davos onns, dispona d'in center da scola cirquital e d'ina struttura professiunala, economica e demografica equilibrada. Sedia dal Center furnaziun gaud e laina, ina scola interchautunala.

Adolf Collenberg

Fläsch

Vischnanca politica, circuit Maiavilla, district Landquart (avant il 2001 Landquart Sut), situada il pli al nord dal Grischun al pe dal Fläscherberg e dal Pass da Son Gliezi. Ca. 840 *Villa Flasce*. 1850 441 abitants; 1900 383; 1950 393; 1970 317; 2000 535. Scuvverta d'ina culegna dal temp da bronz sin il Matluskopf e d'ina ulteriura dal temp da fier tempriv a Parsax, ultra da quai da quatter chaltgeras dal prim tschientaner s.C. e da munaidas dal temp roman. Durant il temp medieval tempriv ha Fläsch appartegnì al contadi francon da la Rezia Sut. En il temp autmedieval furmava Fläsch il signuradi da Maiavilla/Fläsch. Aderida a la Lia da las Diesch Dretgiras il 1436, è la vischnanca passada il 1509 (tras vendita) a las Trais Lias. Ella è stada ina landfocia da quellas ed è daventada ina vischnanca politica autonoma il 1803. La germanisaziun è stada terminada en il 14avel tschientaner. Il 1480 è menziunada ina chaplutta da S. Clau che steva da quel temp sut il patronadi da la claustra da Faveras. Il 1524 ha Fläsch adoptà sco emprima vischnanca grischuna la cretta refurmada. Separaziun da la baselgia da S. Amandus a Maiavilla 1569. Regulaziun dals cunfins cun Maiavilla 1617–1817. Lieu da bogns enconuscent tranter il 16avel e la fin dal 18avel tschientaner. L'arundaziun dal funs è stada terminada il 1979. Ils manaschis èn veg-

nids sanads grazia a la specialisaziun sin la viticultura (sectur economic impurtant dapi il 9avel tschientaner) e l'allevament da muvel u la cultivaziun d'ers. Il 2005 lavuravan 64 % da las persunas cun activitad da gudogn a Fläsch en l'emprim, 32 % en il terz sector; l'onni 2000 eran ca. 60 % pendularis dal lieu. Economia forestala impurtanta.

Adolf Collenberg

Berg

Anteriurs bains da Maiavilla, reunids en la vischnanca da Berg, cun autonomia administrativa, ma senza il dretg da burgais da la citad. Berg cumpigliava las culegnas gualsras da Stürfis, Rofels, Bovel, Guscha e Vatscherinenberg. A Stürfis, la pli veglia da quellas culegnas situada al nordvest da Sievgia, abitavan il 1333 var 30 Gualsers sin feuds ereditars. Durant il temp medieval tardiv frequentavan ils Gualsers da Berg la messa en lingua tudestga sin il Pass da Son Gliezi (chaplania), nua ch'els avevan era lur santeri. Il 1520 han els obtegnì da Maiavilla e Fläsch il dretg da cundecider en l'eleziun dal chaplon. Refurmaziun 1529. La vischnanca da Berg è vegnida schliada il 1633 tras contract da stgomi; Stürfis è sa transformà d'in aclaun ad in'alp da Maiavilla; ils 38 abitants han dischlocà a Rofels, nua ch'els han mantegnì lur autonomia, entant ch'els vischins da Rofels han obtegnì il medem onn il dretg da burgais da Maiavilla. Quest dretg han ils Gualsers dals ulteriurs aclauns pudì s'acquistar fin enturn il 1750 mo cun prender domicil a Maiavilla u cun maridar ina citadina. Guscha, attestada il 1366, dumbrava en il 18avel tschientaner var 140 abitants ed appartegna oz a la piazza d'armas dal Pass da Son Gliezi.

Adolf Collenberg

Stürfis

Anteriura culegna gualsra situada a 1580 m al nordvest da Sievgia en il Partenz. 1351 Stürfis. Colonisada da Gualsers da Tavau suenter il 1290 ed avant il 1350 ed en possess dals signurs feudals d'Aspermont, alura dals Streiffis e dal 1352–1436 dals conts de Toggenburg, suandads dals Brandis e dal 1509–1800 da las Trais Lias (cumpra). A partir da Stürfis è vegnì colonisà *Vatscherin* (1460 Vatscherin, 1462 *Vatscherinenberg*) che furmava cun Stürfis e cun las culegnas dal temp medieval tardiv Bovel, Guscha (1366 *Mutzen*) e Rofels (1468 *Rofis*) la vischnanca gualsra dad Im Berg che appartegnava politicamente ed ecclesiasticamente a Maiavilla. Las singulas culegnas, privadas dal dretg da burgais citadin da Maiavilla, eran amministrativamain autonomas. En il temp medieval tardiv dastgavan ils Gu-

alsers dad Im Berg frequentar ils servetschs divins en lingua tudestga al Pass da Son Gliezi, nua ch'els avevan era lur santeri. Suenter il 1520 han els obtegnì da Maiavilla e Fläsch il dretg da cogestiun per l'eleziun dal plevon da la chaplania e dal migiur da la curt sin il Pass da Son Gliezi. Il 1529 han els adoptà la cretta refurmada. Tras il contract da barat dal 1633 è Stürfis daventà in'alp da Maiavilla. Ils 38 abitants èn vegnids transferids a Rofels, nua ch'els possedevan l'autonomia ed in'atgna chasa-cumin, mantegnida fin il di dad oz. Els abitants da Rofels betg Gualsers han obtegnì il dretg da burgais da Maiavilla il 1633, ils Gualsers pir vers il 1750. Guscha, che dumbrava en il 18avel tschientaner fin 180 abitants, ha fatg quest pass (cunter veglia) pir il 1897. Il 1969 ha la Confederaziun cumprà Guscha per gudagnar terren per la piazza d'armas al Pass da Son Gliezi. Las duas davosas famiglias han alura bandunà Guscha, nua che duai sa chattar la tegia d'alp da «Heidi» da Johanna Spyri. A partir dal 1974 tgira la Societad Pro Guscha il relasch cultural da questa davosa culegna gualsra da Maiavilla.

Luziensteig (Pass da Son Gliezi)

Passadi tranter Maiavilla e Balzers/FL sin il territori da Maiavilla e da Fläsch, tudestg Luziensteig, Sankt Luzisteig. Istorico: *Sankt Luzi ob dem Marswald*, popular Steig. Sin il pass han ins scuvert ina sigir da crap dal temp neolitic, duas guglias da bronz, cheramica preistorica ed ina statua romana da Neptun, quarter chaltgeras e munaidas romanas dal prim al quart tschientaner. Ils Romans han utilisà il pass a partir da l'onni 15 a.C. En il Marswald èn attestads dus lieus cultics dal temp medieval tempriv, in roman ed in cristian. La legenda da S. Gliezi datescha dal 8avel tschientaner. La baselgia da Son Gliezi, erigida enturn l'onni 800, appartegnava enturn l'onni 840 al possess roial a Fläsch. Ella era oriundamain la baselgia principala da Maiavilla e Fläsch, a partir dal 1462 è ella vegnida pastorada sco chaplania da S. Amandus a Maiavilla, il 1480 incorporada en la claustra da Faveras. L'antieriura vischnanca gualsra Im Berg aveva ses santeri sper la baselgia sin il pass (fin en il 16avel tschientaner). La curt sper la baselgia serviva da dimora al migiur dals bains-pravenda.

Il pass ha d'engraziar s'impurtanza economica al fatg ch'el era, fin a l'avertura da la Viafier da la Val dal Rain (1858), la suletta colliaziun charrabla tranter il Grischun, il Vorarlberg ed il sid da la Germania (uschenunada Via tudestga, renovada il 1783/85). El steva perquai savens en il center da cumbrats militars, ed ils edifizis èn vegnids destruids pliras giadas (1499, 1620–22 e 1799 tras il general André Masséna). Vers il fund da la vallada dal Liechtenstein pon ins vesair serras militaras pli veglias. La plipart da las fortezzas odiernas èn vegnidas construidas en ils onns 1850–60. Il 1816 han ils da Maiavilla e Fläsch reglà contractualmain l'utilisaziun dal pass. Dal 1851–58 ha existì sin il pass ina staziun da duana ch'impediva da guntgir la duana da Maiavilla via Rofels-Gianin-Malans. Il Pass da Son Gliezi ha servì da piazza da scolaziun militar dapi il 1834. En l'arsenal da la piazza d'armas sa chatta dapi il 2004 in museum militar cun exponats davart il train e l'istorgia dal pass.

Adolf Collenberg



Las fortezzas dal Luziensteig e da Rohan en in'illustraziun dal 1653.

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Students grischuns a las universitads europeicas

■ **Sco universitads (era: scolas autas) vegnan designadas oz instituziuns da furmazion dal stgalim superiur u terziar. Ultra da las universitads cumpiglia questa noziun era las duas scolas autas tecnicas federalas.** Fin il 1800 han era las academias ed ils collegis, en ils quals vegnivan instruids ils plevons grischuns, gi ina funcziun universitara; en il 19avel tschientaner èn quels alura vegnids reunids ad universitads (p.ex. Turitg il 1833). Curs da basa universitars e preparandas purschevan era singuls gimnas da gesuits. Il Grischun n'ha betg disponì d'ina universitad fin a la fundaziun da la Scol'auta da teologia Cuir il 1968. Entant èn s'establids a Cuir la Scol'auta da tecnica ed architectura (dapi il 1998) respectivamain la Scol'auta da tecnica ed economia (dapi il 2000) e la Scol'auta da pedagogia dal Grischun (dapi il 2003, successura da l'anteriur Seminari scolastic) che n'èn dentant betg «universitads» en il senn tradiziunal dal pled.

Las elitas grischunas dal stadi e da la baselgia èn sa laschadas scolar fin lunsch sur il 1850 ora surtut a Turitg ed a Basilea – avant il 1800 50 % da tut ils students reformads dal Grischun – sco era ad universitads tudestgas e (pli paucs) ad universitads talianas e franzosas. Ils students grischuns immatriculads en gimnas ed academias derivavan da tut las classes socialas (qua tras eran garantidas las clamadas spiritualas), entant ch'ils students a las universitad eran fin viaden il 19avel tschientaner surtut figls da la signuria.

La preschientscha da students (e professors) grischuns a las universitads da la Svizra e da l'exteriur è perscrutada mo punctualmain e per tschertas periodas.

Las universitads svizras

A l'Universitad da Basilea (fundada il 1460) chattain nus oravant tut students da medischna e teologs reformads, ma era giurists. Dals 169 students grischuns inscrits en il 16avel tschientaner en questa universitad derivavan 103 da l'Engiadina, ed era en il 17avel tschientaner faschevan ils Engiadinais, ensemen cun commilitons dal Puschlav e da la Val d'Alvra, dapli che la mesadad dals students grischuns a Basilea. Ils blers eran figls da nobels e da plevons.

L'Universitad da Berna (fundada il 1834) ha gudagnà impurtanza per ils students grischuns pir en il decurs dal 20avel tschientaner.

L'Universitad da Friburg (fundada il 1889 sco universitad catolica) è stada da bell'entschatta in center da students catolics e rumantschs, oravant tut dapi l'instituziun da la professura da rumantsch il 1957. Il semester d'enviern 2005/06 eran immatriculads là 104 students e 139 studentas dal Grischun.

L'Universitad da Geneva (fundada il 1559) ha giugà en il 16avel tschientaner ina rolla sco lieu da studi per teologs reformads: tranter il 1563 ed il 1580 chattain nus qua 16, en il 17avel tschientaner 55 students, la mesadad da quels derivavan da la signuria. Geneva offriva actualmain era ina professura titulara da rumantsch.

L'Universitad da S. Gagl (averta il 1899), nua ch'ins sa studegiar economia, giurisprudenza e ciencias socialas, ha adina giugà ina rolla (dal punct da vista quantitativ) plitost modesta per ils Grischuns.

A la Scola da latin e da teologia a Turitg eran inscrits dal 1534–60 247 Grischuns, e l'Universitad da Turitg (fundada il 1833 tras cumpilaziun da sias anteriuras scolas autas da teologia, giurisprudenza e medischna) partiva cun Basilea la plipart dals students grischuns. Il Politecnicum da Turitg (fundà il 1855, dapi il 1911 Scola politecnica federala) era a l'entschatta en la sumbriva da l'universitad, essend il Grischun sco chantun senza industrialisaziun nunattractiv per spzialists sin il champ da la tecnica e da la



L'Universitad da Minca enturn il 1900.

scienza natirala. Correspondentamain pitschen è stà fin avant paucs decennis il dumber dals students grischuns a la Scola politecnica federala. Il 1985 ha l'Universitad da Turitg installà ina professura extraordinaria per rumantsch (vacanta dal 1996–2001), e la Scola politecnica federala ha mantegnì ina tala en ils onns 1983–97. Il 2008 eran inscrits 25 students da rumantsch (tuts sco rom lateral).

Sper las universitads èn stads ils collegis dals gesuits (Lucerna, Soloturn, Friburg, Pruntrut, Sion) dapi ca. il 1600 da grond'impurtanza per la giuventetgna catolica, surtut pervia da lur purschida parziala da curs da basa universitars e da preparandas, per exempel en teologia e filosofia. La finamira e las metodos dal stgalim gimnasial bass e mesaun eran per gronda part las medemas sco en ils gimnas a Turitg ed a S. Gagl, frequentads principalmain dals Grischuns reformads. Ils collegis dals gesuits han alura era introduci pass per pass ils «studia superiora», e gia en la mesadad dal 17avel tschientaner disponiva Lucerna d'ina facultad filosofica e teologica cumplettamain sviluppada (universitad dapi il 1985). Ils students da teologia dal Grischun frequentavan surtut ils collegis dals gesuits a Lucerna ed a Friburg.

Las universitads a l'exteriur

Germania

Las universitads en Germania han pers generalmain lur impurtanza suenter la fundaziun da pliras universitads svizras en il 19avel tschientaner. La plipart dals anteriurs studis a temp cumpelain purschids a l'exteriur èn sa reducids en il 20avel tschientaner ad insaquants paucs semesters.

Al Collegi apostolic dals gesuits a Dillingen (fundà il 1610) possedeve l'investgiu da Cuir fin il 1803 quatter fin otg piazzas da studi. Quest collegi offriva sper il gimnasi era in curs da teologia da dus onns ch'è vegnì frequentà dal 1620–1777 da 53 Grischuns (rodel incumplet). A Friburg e.Br. (avert il 1460) han studegià dal 1460–1806 72 Grischuns (da quels 32 dal 1470–1520), la plipart teologia. A partir da la reformaziun èn ils reformads guntgids a Basilea, ed era da vart catolica èn documentads per il 17avel–18avel tschientaner mo 19 students (rodel incumplet). Dal 1807–1914 han studegià là 29 Grischuns (15 medischna, tschintg filosofia resp. giurisprudenza, quatter teologia).

L'Universitad da Halle (averta il 1693) ha attratg sco center da l'illum-

nism tempri e dal pietissem numerus students svizzers: dals 196 immatriculads fin il 1806 a Halle eran 20 dal Grischun, en emprima lingia giurists, suandads da mediciners e teologs. Dal pietist da Halle, August Hermann Francke, è vegnida l'intimizaziun da fundar chasas d'orfens a Tusaun, e Johann Peter Neseemann, scolà a Halle, ha manà cun Ulysses von Salis il Filantropin a Marschlins.

En il 19avel tschientaner èn sa reducids ils contacts. Heidelberg (la pli veglia universitad da la Germania, fundada il 1386) è stà in dals centers principals da l'umanissem en il 15avel e 16avel tschientaner cun ina gronda irradiaziun sin la Svizra. Tranter il 1449 ed il 1518 han studegià là 18 Grischuns, la plipart teologia. A partir dal 1459 è quell'universitad entrada (per Svizzers) en concorrenza cun Basilea. Suenter il 1560 è Heidelberg alura daventà in center da la teologia protestanta cun contacts intensivs cun la Svizra reformada («Catechissem da Heidelberg» dal 1563, «Segunda Confessiun helvetica» dal 1566). Dal 1619–56 n'èn attestads nagins Grischuns a Heidelberg, e dal 1622–56 è l'universitad stada serrada ed ha alura giugà ina rolla marginala per students grischuns. Tranter il 1803 ed il 1914 èn documentads 211 Grischuns a Heidelberg. Dals 235 students grischuns inscrits dal 1656–1914 studegiavan 120 giurisprudenza, 63 teologia, 33 medischna, trais ciencias naturalas e 16 eran immatriculads a la facultad filosofica; la plipart derivava da la signuria e fitg blers da l'Engiadina (oravant tut teologs).

A l'Universitad dad Ingolstadt (fundada il 1459) han ils students grischuns (oravant tut Engiadinais) la pli auta frequentza en il 16avel tschientaner. En il 17avel tschientaner è quell'universitad daventada (sut la dominanza dals gesuits) ina scola d'elita per la reforma respectivamain la cuntrareforma catolica. La gronda part dals 79 students dal Grischun eran figls da la signuria catolica (blers da las familias puschlavinas de Bassus). Il 1800 è l'Universitad dad Ingolstadt vegnida transferida a Landshut ed il 1826 a Minca.

A l'Universitad luterana da Jena (fundada il 1558) han studegià Grischuns oravant tut en il 19avel tschientaner intgins semesters dretg e criminalistica.

L'Universitad da Minca, fundada il 1826 sco successura dad Ingolstadt, è stada fin il 1848 in center da la restauraziun catolica en Germania ed ha influenzà fermamain ils circuls conservativs da la Svizra catolica. Attratgs da professors

sco il publicist Joseph von Görres (1776–1848) e l'istoricher ecclesiastic Ignaz von Döllinger (1799–1890) han numerus Svizzers, oravant tut catolics, absolvi studis da teologia, istorgia u dretg (studis entirs u parzials) a quell'universitad. Tras ses students Giacun Hasper Muoth e Caspar Decurtins è ella daventada spezialmain impurtanta per la renaschientscha retorumantscha. A Minca han però era studegià numerus medis grischuns. Dals parlamentaris grischuns engaschads a Berna tranter il 1848 ed il 1920 avevan studegià 24 a Minca, tranter quels era il protestant Felix Calonder, il posteriur cusseglier federal.

L'anteriura Academia da Strassburg (fundada il 1567) è vegnida transfurmada il 1621 en in'universitad (schliada il 1794). Strassburg appartegneva dapi il 1681 al territori franzos, l'universitad ha dentant mantegnì, cun excepziun da la facultad da dretg, ses caracter tudestg e protestant. Dapi il 1621 han studegià là 55 Grischuns, da quels 24 da Cuir (rodel incumplet): 21 medischna, 19 giurisprudenza, tschintg filosofia respectivamain teologia.

L'Universitad da Tubinga (averta il 1477) è stada in center da l'umanissem ed in dals lieus da studi ils pli impurtants fin en il 18avel tschientaner; en il 19avel tschientaner è ella era stada la sedia da la «Scola da Tubinga», in institut per teologs evangelics e catolics cun ina metoda istoric-critica radicala. Avant il 1800 èn documentads mo paucs Grischuns a Tubinga. Tranter il 1800 ed il 1914 eran immatriculads 125 students, tranter auter 72 teologs evangelics e trais catolics, 27 medis e 19 giurists.

Austria

A Feldkirch, che appartegneva a l'investgiu da Cuir, è vegnì fundà il 1649 il collegi dals gesuits. La claustra da chaputschins (fundada il 1605) ed il gimnasi dals gesuits han giugà ina rolla impurtanta en la cuntrareforma grischuna. Il gimnasi vegniva sustegnì dals uestgs da Cuir cun ina contribuziun annuala e frequentà regularmain da Grischuns: 1650–1773 124 (ultra da numerus Grischuns betg registrads), 1777–1870 128 (tranter quels fitg blers da la classe dirigente catolica). L'emprova d'installar il 1773 in seminari da spirituals per l'investgiu da Cuir n'è betg reussida.

L'Universitad da Puntina (fundada il 1668) è stada en il 18avel tschientaner in lieu da furmazion impurtant per l'entira svizra catolica: dal 1671–1900 èn documentads qua radund 1100 students catolics, tranter quels 120 dal Grischun. Il 1874 han quels perfin fundà in'unium

studentica a Puntina. A la professura da romanistica, instituida da Theodor Gartner il 1899, han ils Rumantschs d'engraziar perscrutaziuns impurtantas. Dapi il 1965 exista qua in lectorat rumantsch e dapi il 1972 ina partizun da retoromanistica.

L'Universitad da Vienna è stada oravant tut in lieu da studi per teologs. Dals 112 students grischuns attestads en il 15avel e 16avel tschientaner (rodel incumplet) èn blers daventads pli tard plevons e/u notars. Il 1627 ha il papa Urban VIII concedì a students «da la Rezia» duas piazzas da studi (abolidas il 1753) cun pensiu libra en il Collegi da S. Barbara. Cun mo 23 students (malgrà las duas piazzas libras) è la frequentza stada modesta en il 17avel tschientaner.

Italia

L'Universitad da Bologna (fundada vers la fin dal 11avel tschientaner) ha giugà, ensemen cun Pavia (fundada il 1361) ina rolla mo fin viaden il 16avel tschientaner, e quai sco lieu da studis giuridics ed umanistics.

A l'Universitad da Milaun è vegnì fundà il 1579 en il rom da la reforma catolica il Collegium Helveticum per il clerus da la Svizra e dal Grischun. Fin il 1797 èn vegnids scolads là ca. 400 spirituals grischuns, tranter il 1842 ed il 1900 51.

A l'Universitad da Padua (fundada il 1222) han studegià tranter il 1530 ed il 1620 111 Grischuns. Quest'universitad ha giudi ina gronda popularitad era en il 17avel tschientaner, avend pudì sa strair sco universitad sut la suveranità veneziana a la pressiuon excessiva da la reforma tridentina (davent da Milaun). Tranter ils students grischuns inscrits qua dal 16avel–18avel tschientaner predominavan ils figls da la signuria (80 %, fitg blers Salis) e sco rom da studi la giurisprudenza (96 dals 136 students en il 16avel–18avel tschientaner). Padua era l'unica universitad taliana, nua ch'ins pudeva sa scolar en lingua taliana en giurisprudenza ed administraziun, quai ch'è stà fin il 1797 da grond'avantatg per aspirants ad uffizis en Vuclina.

A Roma sa chatta dapi il 1552 il Collegium Germanicum ch'ha concedì il 1637 a l'investgiu da Cuir duas piazzas da studi libras. En quest institut han studegià fin il 1920 tut en tut 42 Grischuns u students daventads impurtants per il Grischun. Al Collegium de Propaganda Fide (fundà il 1633) han studegià fin il 1920 ca. 35 Grischuns catolics.

Frantscha

Per l'Universitad da Paris (fundada a l'entschatta dal 13avel tschientaner) n'existan (anc) naginas datas, ella è dentant stada per temps detg impurtanta per il Grischun, essend che la Republica possedeve là tranter il 1582 ed il 1785 duas piazzas da studi libras per Lia – ils babs prestavan servetsch mercenar al retg franzos, ils figls pudevan studegiar a Paris. A l'entschatta na vegniva questa quota betg adina accordada u sfruttada effectivamain. Stipendis per studis a Paris concediva era la Lia da la Chadé. Il retg franzos era interessà da scolar giuvens Grischuns en lingua franzosa per che quels possian alura servir ad el sco uffiziers u diplomats (u interprets per tals); fin il 1700 è el vegnì concorrenza en ses intent dals stipendis spagnols accordads a Grischuns a Milaun.


Adolf Collenberg

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Porta Sura a Glion cun las vopnas da las Trais Lias.



Vista istorica da la citad da Glion (ca. 1820).

Glion – l'«emprima citad al Rain»

■ **La citad da Glion furma in impurtant center regional da traffic e furnaziun e po guardar enavos sin ina ritg'istorgia: A partir dal 1289 è attestà il dretg da fiera e suenter il 1524 ospitava la citad la Dieta federala da las Trais Lias (en roda cun Cuira e Tavau).**

Glion

Vischnanca politica, circuit Glion, district Surselva (fin il 2001 Glogn), situada en la Val dal Rain Anterior a la sortida da la Lumnezia, cun Strada (incorporada il 1978). Numnada «emprima citad al Rain». 765 *Iliande*, tudestg Ilanz (uffizial). 1835 574 abitants; 1850 663 (cun Strada); 1900 981; 1950 1640; 2000 2448.

Chats dad armas ed iseglias dal temp da bronz en vischinanza da la ruina dal chastè da Grüneck, da la dimora per attempads ed a Strada. Al pe da Grüneck han ins scuvert in deposit da stgais dal temp medieval tempriv (790/94) cun munaidas d'aur e d'argient da derivanza langobarda, carolingica ed araba e cun cliniez d'aur langobard (en il Museum retic a Cuira). Il bain signuril da Tello, menziunà il 765, sa chattava probablamain en la citad veglia odierna.

L'intschess economic e politic da Glion cumpigliava dapi il temp medieval tempriv las vischnancas da Strada, Luven e Flond sco era ils bains da Valata, Armsch e Cavrida che sa chattan oz sin territori da Sursai. L'aul da Valata furmava il cunfin occidental. Il center ecclesiastic era la baselgia parochiala da S. Martin (menziunada il 765), situada al sidvest da Glion a la cruschada da las vias per la Lumnezia e Sursai. Enturn l'onn 840 appartegnava quella baselgia cun dretg da dieschma a l'Imperi carolingic; tenor documents dal

temp medieval tardiv sa chattava là in abitadi numnà Glion Sura che n'exista dentant betg pli.

L'economia ed il traffic sa concentravan en il temp medieval tardiv sin Glion Sur che furma la citad veglia odierna. Quella era sa sviluppada enturn il bain dal temp medieval tempriv ed enturn la tur da defensiun da S. Margriata (probablamain center d'in chastè-fortezza cun ina baselgia menziunada il 1288) ad ina citad medievale cun in mir da tschinta, portals e dretg da fiera. Il 1289 è Glion attestada sco citad (*oppidum*). Il spustament dal center da la Foppa da Sagogn a Glion en il temp medieval tardiv è succedi a basa da la nova situaziun da traffic: l'emprima punt sur il Rain a Glion dirigiva il traffic directamain en la citad ch'era daventada enturn il 1380 in lieu da susta e da dazi per il traffic da transit sur il Lucmagn. En il temp medieval era Glion suttamess, ensemen cun l'entira Foppa, l'emprim a la prefectura dals baruns de Belmont, a partir dal 1400 a quella dals de Sax. A l'intern dals mirs da la citad existiva in'atgna dretgira civila. Ils tschentaments da la citad dal 1390 reglavan oravant tut ils fatgs da construcziun, la protecciun cunter incendis e l'urden economic. Il 1352, durant la Faida da Belmont, è la citad da Glion vegnida devastada parzialmain, ed il 1483 è ella arsa giu cumplettamain.

En il temp medieval tardiv existivan pliras confraternitads a Glion: quella da Nossadunna a S. Martin e quella da S. Giatgen il vegl e da la S. Crusch a S. Margriata. La baselgia da S. Martin a Glion Sura (cun chasa-pravenda e santeri) è restada la baselgia parochiala fin a la reformaziun (1526); gia avant il 1500 aveva dentant giugà la baselgia da S. Margriata la rolla

principala a Glion. Cun la separaziun da Luven (1526) e da Flond (1731) è la plaiv medievale sa limitada al territori da la citad per propi. La chaplutta da S. Clau, erigida en l'avantcitat cun il medem num a la riva sanestra dal Rain (consecrada il 1408), è daventada temporarmain impurtanta per il traffic en il temp medieval tardiv en connex cun la construcziun da la punt sur il Rain.

Il 1395 ha gù lieu a Glion l'emprim act da fundaziun da la Lia Grischa (l'uschennumnada Lia dals signurs). L'iniziant principal, Johannes von Ilanz (avat da Mustér), era oriund da Glion. A partir dal 1524 ospitava Glion, la suletta citad en la Lia Grischa, la Dieta federala da las Trais Lias (en roda cun Cuira e Tavau). A l'entschatta dal 16avel tschientaner aveva Glion cuntanschi in'impurtanza centrala en la Republica tras divers conclus impurtants che las Dietas avevan preni en questa citad: l'emprima constituziun cuminaivla (1524), ils Artitgels da Glion (1524 e 1526) ed ils edicts d'approvaziun da la cretta catolica e protestanta (libertad da cardientscha) en las Trais Lias ed en lur Terras subditas (1526 e 1557). In eveniment impurtant è stada la Disputaziun da religiu a Glion dal 1526 ch'aveva preparà la via a la reformaziun en il Grischun. Il spiert innovativ vegniva incorporà da members da las famiglia Capol e Janigg. Pauc temp suenter l'adopziun da la cretta reformada (1526) è Nossadunna sparida da la vopna da la citad da Glion. A partir da quel mument han surtut las famiglia Schmid von Grüneck e Castelberg decidi la politica da la citad. Ils Schmid han laschà eriger chasas burgaisas imposantas (p.ex. la Casa Gronda, 1677), ed il 1715 han els promovì cun sustegn da Turitg e da Berna la restauraziun dals mirs da la citad.

La resistenza dals aristocrats cunter il chalendar gregorian e l'allontanament da las sutgas dals patrizians da la baselgia da S. Margriata han provocà il 1799 ina revolta da vart dals burgais. Dapi la Helvetica e la Mediazion n'è Glion betg pli stà lieu da la Dieta da las Trais Lias (abolida). Il 1809 è sa radunà il Cussegl grond dal giuven chantun Grischun per l'emprima e davosa giada a Glion. En il 19avel tschientaner ha Glion pers era si'impurtanza sco center commercial, ella ha però pudì sa mantegnair sco lieu da fiera, spezialmain per il commerzi da muvel en Surselva. La mastergnanza ha cumenzà a prosperar (fundaziun da l'Uniu da mastergnants 1853). Il 1859 ha l'immigraziun da lavurers catolics dal conturn e da l'exterior manà a la fundaziun d'ina pravenda catolica cun in'atgna baselgia (construida il 1879).

La surconstrucziun da l'areal pli bass da l'avantcitat cun edifizis industrials, chasas, ustarias ed hotels è stada pussaivla pir suenter la correcciun dal Rain en il 19avel tschientaner. La veglia chasa-cumin al sid da la punt originara sur il Rain è vegnida demolida il 1881 e remplazzada il 1893 tras l'emprima chasa da scola primara e secundara. Glion è oz in impurtant center regional da scola e da traffic. Ina scola è attestada gia il 1536. Fin il 1969 era la scola primara separada confessionalmain. Il 1865 ha Johann Fidelis Depuoz fundà ina scola reala ed industrial per mattas (il posteriu Institut da S. Giuseppe) ed ha avert il 1868 il Spital S. Clau. Dapi il 1969 administrescha ina congregaziun da las soras dominicanas ina scola da tgrunzas e da puras en ils novs stabiliments claustrals. Glion dispoza en pli d'ina chasa d'attempads e da tgrira, d'in museum regional (installà en la Casa Carniec), d'ina scola secundara districtuala, d'ina scola reala ed auxiliara, d'ina scola professiunala e mercantila sco era da la Scola da musica Surselva. Il 1987 ha la citad obtegnì indrizz moderns per la fiera da muvel ed il 1988 in nov ospital regional. Grazia a l'avertura da la Viafier retica (1903) ed a l'amplificaziun dals meds da transport publics en ils numerus vitgs vischins durant ils ultims decennis, ha Glion pudì sa sviluppar ad in impurtant center da traffic dal chantun Grischun. Il 1961 è la bellezza punt da lain sur il Rain vegnida demolida e remplazzada tras ina punt da betun. Oz dominescha il sectur da servetschs a Glion (2005 78,3% da las persunas cun activitad da gudogn). Dapi il 1990 en ils tschains d'aua da las Ovras electricas Glion I e II in'impurtanta funtauna d'entradas. Part da la populaziun da lingua rumantscha: 1880 60,8%; 1941 50,2% (megra lingua); 2000 29,9% / 51,6% (megra lingua / tuttas indicaziuns). Il 1950 ha il tudestg remplazzà il rumantsch sco lingua maioritara a Glion.

Martin Bundi

schnanca da Glion, situada sin in sparun a l'ost da Strada sur il stradun vegl. Restanzas considerablas d'ina massiva tur d'abitat pentagonal da sis plauns, construida enturn il 1200. Ni il chastè ni la famiglia n'èn documentads en il temp medieval, il chastè è attestà en in rodel da tschains dal 1515 (*Gryenegg*). Il 1260 è documentà in *dominus de Grinenech* che cumpara pli tard savens cun il num Heinrich von Grüneck (numnà il Mit / Mutus); el è descendì probablamain da la famiglia feudala residenta da quel temp en il chastè da Carniec e segirava en servetsch da Walther de Vaz la regiun dal Pass dal Spleia fin Clavenna.

Ils Schmid von Grüneck [de Carniec] portan il titel da noblezza pir dapi il 1544. Da quel temp era il chastè probablamain gia en decadenza. Il 1811 ed il 1904 han ins chattà al pe dal chastè munaidas da Carl il Grond e dal retg langobard Desiderius, zuppadas qua en ils onns 790–94 (invasiun d'Avars). Il 1999 ha l'Associaziun grischuna dals chastels taglià las chaglias e mundà il pastg.

Adolf Collenberg

Strada

Anteriura vischnanca politica, dapi il 1978 part da la vischnanca da Glion, situada tranter Glion e Schnaus. 1850 56 abitants; 1900 50; 1950 50; 1970 41. Strada era oriundamain ina curt dal chastè da Grüneck che sa chatta en la vischnanza. En il 15avel tschientaner en immigrads Guaisers da Val a Strada. La vendita da la Lampertschalp, situada en la part interna da la Val S. Pieder (Val Zervreila), als Blegnasc il 1538 ha provocà divers process. La cunvegna dals 10 da zercladur 1537 tranter Strada e Glion preveseva l'appartegnentscha cuminaivla a la baselgia da S. Margreta a Glion. Cun fixar il cunfin territorial tranter il Rain, il chastè da Grüneck / Carniec ed il territori da Ruschein, ha dentant quella cunvegna fatg da Strada ina vischnanca politica autonoma cun obligaziun da sa participar al mantegniment da la punt sur il Rain. En il 16avel e 17avel tschientaner è la vischnanca vegnida en conflict cun Schnaus concernent il conduct d'aua per la sauaziun da la prada. En il 19avel e 20avel tschientaner consistiva Strada surtut da bains purils. Ferma germanisaziun dal vitg tradizionalmain rumantschs durant ils davos decennis.

Martin Bundi



La punt da lain sur il Rain è vegnida demolida l'onn 1961.

Carniec

Ruina da chastè sin territori da la vi-

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglia e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Istorgia da la litteratura rumantscha

■ A la differenza dals Svizzers da lingua franzosa, tudestga e taliana na disponan ils Rumantschs betg d'ina retroterra linguistica, da la quala els avessan pudì profitar. La sparpagliaziun geolinguistica e la ferma conscienza d'autonomia da las valladas grischunas han impedi ultra da quai la furmaziun d'in center politic-cultural ch'avess pudì garantir la creaziun d'ina lingua da scrittira unificgada. Ins ha empruvà da superar quest dischavantatg a la fin dal 19avel tschientaner – e puspè a partir dal 1980 cun la creaziun dal Rumantsch Grischun.



Dals origins a l'epoca da las dispartas confessionalas

En in'emprima perioda existiva la litteratura rumantscha praticamain mo en furma da legendas, ditgas, paraulas, fablas e chanzuns popularas, per exempel la «Canzun de sontga Margriata» e la chanzun dals «Trais compans con trais baretas cotschnas» che tracta da trais amis en pelegrinadi a Santiago de Compostela. L'emprima perditga d'ina tradiziun scritta è la veglia versiun interlineara da Nossadunnaun, ina translaziun rumantscha tranter las lingias d'in predi latin dal s. Pirmin, da la fin dal 11avel tschientaner (Codex 199 da Nossadunnaun).

Il basegn da scriver rumantsch è naschì a l'entschatta dal 16avel tschientaner, l'emprim surtut sin il champ giuridic: ils emprims documents redigids en lingua rumantscha dateschan dal 1519 e sa refereschian surtut a l'Engiadina Bassa; els cumpiglian ina versiun valladra dal «Statutsvertrag», stipulà tranter l'imperatur Maximilian, il duca dal Tirol e l'uvestg Paul Ziegler da Cuira («Contract da l'an 1519») ed ina lescha penala «Stattütt u trastütt da queus d'Engiadina d'suott» (1508/19). Ina tradiziun orala (p.ex. en furma da dramas biblics) existiva medemamain gia avant ils emprims stampats rumantschs. L'entschatta d'ina litteratura rumantscha marca la «Chianzun dalla guerra dalg Chiaste da Müs» (Müsch), in text politic publicg da Gian Travers, umanist da Zuoz, l'onni 1527 e daventà enconuscent, sco las perditgas da la litteratura orala, mo tras copias pli tardivas.

La produczion litterara stampada en la segunda mesadad dal 16avel tschientaner è liada surtut a la reformaziun ed a las reformas ecclesiasticas. Il basegn d'intermediar il pled da Dieu en la lingua populara e da declarar al pievel ils dogmas religios ha fatg nascher translaziuns da biblas, catechissem e chanzuns spiritualas en diversas variantas regionalas dal rumantsch, da las qualas èn sa svilupps ils tschingt idioms utilisads anc oz, numnadamain il puter, vallader, sursilvan, sursilvan e pli tard er il surmiran. Jachiam Bifrun ha translata il 1560 il Nov Testament en puter e Durich Chiampell ha publicg il 1562 psalms e chanzuns religiosas en vallader. Ils Scumbigls grischuns (1607/18–39), la Guerra da trent'onns (1618–48) e las disputaziuns confessionalas han alimentà ils conflicts religios e promovì la derasaziun da scrittiras confessionalas. Da vart reformada èn cumparidas la Bibla da Scuol (1679) en ladin e quella da Cuira (1717–19) en sursilvan, da vart catolica ha Balzer Alig ed il 1672 la Passiun, las Epistlas ed ils Evangelis en sursilvan. Tranter il 1650 ed il 1750 èn vegnidas stampadas numerusas collecziuns da chanzuns ed ovras religiosas edifitgantas, scrittiras tranter auter dal pader Zacharias da Salò, Johann Jüst Andeer e Conradin Riola bab e figl. Dal medem temp dateschan las represchentaziuns da la Passiun da Suanign, Sumvitg e Lumbrein sco era gieu da carnaval. Parallel a questa produczion religiosa èn vegnids translats dal latin e surtut dal tudestg statuts giudizials e tschentaments communalis ch'han creà ina terminologia giuridica anc fermamain caracterisada da germanissem.

A partir dal 1750 èn sa derasadas las ideas da l'illuminessem er en l'intschess rumantsch. Il plevon Mattli Conrad ha



Frontispizis da l'istorgia da la litteratura rumantscha da Gion Deplazes, cumparida 1987–1993. MAD

intimà il 1784 ils patriots en sias «Novas chanzuns spiritualas [...]» d'amar la patria cun fiduzia cristiana e da promover il bain general. Il pader Placidus a Spescha ha pretendì ina lingua da scrittira cuminaivla per la «nazium» rumantscha. Il poet politic Gieri Antoni Vieli steva tranter las partidas, el è dentant vegni deportà il 1799, ensemen cun Mattli Conrad e Placi a Spescha, dals Austriacs sco partisan «franzos». Sco aderent da la Veglia Repubblica da las Trais Lias èn sa profilads surtut dus landrehters, ils poets politics e translats da dramas Gion Teodor de Castelberg e Pieder Antoni de Latour.

La renaschientscha retorumantscha

La scola e la pressa han offert en il 19avel tschientaner dus novs spazis d'expressiun a la litteratura rumantscha. En las scolas, suttamesas tranter il 1840 ed il 1850 a la surveglianza statale, ha il chantun Grischun fatg diever l'emprim da meds d'instrucziun translats dal tudestg, ch'ins ha remplazzà a la fin dal 19avel tschientaner, en Surselva, successivamain cun ovras originals rumantschas redigidas da Gion Antoni Bühler e Giacun Hasper Muoth. En il medem temp ha il viv interess da disponer da litteratura originala dà impuls a la creaziun litterara per propi. La litteratura rumantscha da la segunda mesadad dal 19avel tschientaner era l'emprim surtut ina litteratura d'emigrants (Randulins), realisada dad auturs sco Conradin Flugi d'Aspermont, Gian Fadri Caderas e Simeon Caratsch per la lirica sco era Giovanni Mathis e Johannes Barandun per la prosa. Era pli tard èn numerus auturs, per part betg main impurtants, naschids u han vivi almain per tscherts temps a l'exteriur, sco Clementina Gilli, Pader Alexander Lozza e Peider Lansel; l'emigraziun e la nostalgia da la patria eran perquai temas frequents, per exempel en las novelas da Gion Antoni Bühler u pli tard en las poesias da Peider Lansel.

Cun la furmaziun da las partidas èn naschidas en il 19avel ed a l'entschatta dal 20avel tschientaner numerusas gasettas e revistas, da las qualas intginas èn stadas

da curta durada (14 en l'intschess ladin tranter il 1843 ed il 1938, 20 en las valladas dal Rain tranter il 1836 ed il 1951). Ils pamphlets liads a las debattas tranter las partidas politics, publicgads en quellas tranter auter dals poets sursilvans Geli Caduff e Gion Antoni Huonder, vulevan svegliar in sentiment d'identitad nazional. L'Engiadinais Peider Lansel è s'engaschà il 1913 cun ses appel fervent «Ni Talians, ni Tudais-chs, Rumantschs vulains restar!» per ina independenza rumantscha ed è s'opponì a las rivendicaziuns irredentisticas da l'Italia. Gia avant aveva il progress da la germanisaziun a donn e cust dal rumantsch manà ad in moviment per la «defensiu da la lingua materna», ispirà da l'entusiassem romantic per las tradiziuns popularas. Intgins magisters da la Scola chantunala da Cuira, oravant tut Gion Antoni Bühler, han fundà il 1885 la Societad Retorumantscha che publicgava en sias «Annalas», edidas dapi il 1886, litteratura nova ed artitgels davart la cultura rumantscha. Caspar Decurtins ha rimnà en sia «Crestomazia retorumantscha» paraulas, ditgas, chanzuns popularas e cumedias. Bühler ha creà ina lingua da scrittira rumantscha unificgada numnada «romantsch fusio-nau» ed ha appellà, senza success, en sia revista «Il Novellist» (1867–68) da scriver raquints en sia nova lingua surregiunala. In success pli grond han gi las uniuins per la tgira dals idioms regionalis (Romania, Uniuin dals Grischs, Renania, Uniuin Rumantscha da Surmeir e Lia Rumantscha, fundada il 1919 sco organizaziun da tetg da tut las uniuins linguistics e culturalas rumantschas) ch'han cumenzà a publicgar texts litterars.

La produczion litterara ha augmentà en tala maniera eturn il 1900 ch'ins discurreva d'ina «Renaschientscha retorumantscha». Tranter ils poets èn sa distinguid fin a la Segunda Guerra mundiala ils Sursilvans Gion Cadieli, Gian Fontana e Sep Mudest Nay, il Surmiran Pader Alexander Lozza ed ils Ladins Gudench Barblan, Peider Lansel, Clementina Gilli e Chasper Po. Menziun speziala en il dra-

ma, en l'epica ed en la ballada meritan ils Sursilvans Giacun Hasper Muoth, Flurin Camathias, pader Maurus Carnot e Carli Fry sco er ils Sursilvans ed ils Surmirans Tani Dolf, Giatgen Mitgel Uffer e Gion Not Spegnas ed ils Ladins Domenic Gaudenz, Men Rauch ed Artur Calfisch. Ultra da quests auturs da prosa e da quels menziunads sura han publicgà dapi la fin dal 19avel tschientaner er ils Ladins Cristoffel Bardola, Ursina Clavuot Geer, Maria Ritz, Schimun Vomoos, Balser Puorger e Gian Gianet Cloetta, ils Sursilvans Tumasch Dolf ed ils Sursilvans Giachen Michel Nay e Guglielm Gadola. La litteratura rumantscha è s'orientada fin viaden il 20avel tschientaner a las tradiziuns litteraras popularas ed a las valurs purilas sco era la defensiu da la lingua materna. Ils idioms regionalis èn restads isolads, en il cas da la Surselva catolica e da l'Engiadina reformada era per motifs confessionalis.

L'avertura a partir dal 1950

Suenter la Segunda Guerra mundiala èn las cundiziuns da la vita litterara sa midadas er en il mund rumantsch. Grazia a novas pussaivladads editorialas pudevan ils auturs publicgar ussa lur ovras er en cudeschs e betg pli, sco fin qua, mo en chalenders e revistas. Il radio e la televisiun rumantscha e l'Uniuin da scripturas e scripturs rumantschs, ch'edescha dapi il 1978 la revista «Litteratura» (successura da las «Novas litteraras», 1948–77), promovon ina chapientscha vicendaivla surregiunala. En il rom da las stentas da la Confederaziun en favur d'in barat cultural tranter las singulas cumanzas linguistics svizras han ins era cumenzà a translatar ovras rumantschas en las autras linguas nazionalas. La litteratura rumantscha ha alura entschet ad experimenter cun novas furmas e novs temas ed è s'averta als gronds currents culturals internaziunals.

Novas furmas litteraras èn stadas las novellas psicologicas, per exempel quella da Flurin Darms (en sursilvan), Selina Chözn, Anna Pitschna Grob-Ganzoni e

Jon Semadeni (en ladin) e dad Alexander Lozza (en surmiran), u las istorgias curtas ed ils romans da Cla Biert, Reto Caratsch ed Oscar Peer (en ladin) e da Gion Deplazes, Flurin Darms, Ursicin Gion Geli Derungs, Toni Halter e Ludovic Hendry (en sursilvan). Suenter il 1970 èn cumparids ils texts da prosa da Clo Duri Bezola, Göri Klainguti, Jon Nuotclà, Rut Plouda e Dumenic Andry (en ladin), Silvio Camenisch e Flurin Spescha (en sursilvan e rumantsch grischun) sco era Leo Tuor ed Arno Camenisch (en sursilvan); intgins da quests auturs han gi success er en il rest da la Svizra cun versiuns da lur ovras en las autras linguas nazionalas. Dapli che 90 % dals radund 50 romans en lingua rumantscha derivan dal temp suenter il 1950. Fablas, ditgas e paraulas vegnivnan ussa utilisadas per in sguard critic sin il preschent. Ils Sursilvans Leonard Caduff, Toni Halter, Ludovic Hendry e Theo Candinas ed il Ladin Andri Peer han experimenter novs furmas, usitadas en la litteratura mundiala, sco la cronica litterara ed il diari litterar.

Il drama patriotic, ina furma antruras derasada (Giusep Durschei, Men Rauch, Curo Mani), ha pers impurtanza en il tranterguerras. A sia piazza è sa fatg valair il teater engaschà sin il plaun sociopolitic che tematisava problems regionalis, cun las ovras da Jacques Guidon, Tista Murk, Jon Nuotclà e Jon Semadeni (en ladin) e da Theo Candinas (en sursilvan). Bunas translaziuns da dramas moderns, per exempel da Max Frisch e Friedrich Dürrenmatt, han amplifigà il spectrum da la litteratura rumantscha. En la fasa da pionier dals radios svizzers èn era naschids giesus auditivs e films d'auturs sco novs genres en lingua rumantscha. Gion Antoni Derungs ha avert la litteratura rumantscha er a l'opera rumantscha, utilisond librets dal Sursilvan Lothar Deplazes e dal Surmiran Giovanni Netzer.

En la lirica han furmas, motifs e temas tradiziunals (glorificaziun da la natura e da la patria, enreschadetgna) pers medemamain lur impurtanza. La produczion pli recenta renunzia savens a rimas e strofas regularas; ella s'orientescha als currents moderns europeics e preferescha furmas pli subjectivas sco l'introspeziun u la protesta politica. Menziun speziala tranter ils poets naschids avant il 1939 meritan ils Surmirans Alexander Lozza, Antonia Sonder, Gion Peder Thöni e Peder Cadotsch, ils Sursilvans Flurin Darms, Gion Deplazes, Hendri Spescha e Teresa Rütters-Seeli sco era ils Ladins Luisa Famos, Chatrina Bott-Filli, Andri Peer ed Armon Planta. Tranter ils exponents da la generaziun suandanta han chattà surtut la lirica da Felix Giger, Arnold Spescha (en sursilvan) sco era Tina Nolfi, Rut Plouda e Leta Semadeni (en ladin) in'attenziun pli gronda.

Fin l'entschatta dal 21avel tschientaner han mo paucs auturs, ultra da Flurin Spescha («Fieu e flomma», 1993) e Linard Bardill («Fortunat Kauer», 1998), fatg diever dal rumantsch grischun, elavurà da Heinrich Schmid a l'entschatta dals onns 1980, sco lingua litterara. La lingua da standard vegn percenter duvrada stediain in translaziun da texts spezialisads e da litteratura da diever. Per ils auturs (oravant tut) da la generaziun giuvna, che publicgeschan per part er en lingua tudestga, n'è il rumantsch betg pli in sectur protegi, mabain ina da las furmas d'expressiun pussaivlas en in mund en transformaziun rapida. Gion Deplazes

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Regiun da Lai: Da Valbella al chastè da Belfort ed a la punt da Solas

■ Las vischnancas da Vaz, Lantsch e Brinzauls giaschan sin ina terrassa situada tranter la regiun da Cuira e la Val d'Alvra. Ils singuls abitadis èn per part segnads fermamain dal svilup turistic dal 20avel tschientaner. En il center da la regiun celebrescha in crap commemorativ la Lia da Vazerol dal 1471 legendara. Da quel onn datescha bain in'allianza tranter singulas lias; la Lia da Vazerol n'ha dentant ni ina realitad istorica ni ina tala da dretg constituizional.

Lai/Valbella

Fracziuns da la vischnanca politica da Vaz, tudestg Lenzerheide/Valbella (uffizial). Lieus da cura da stad e d'enviern, situads en ina cuntrada furmada d'ina bova preistorica, cun las alps Lavoz al vest e Scharmoim a l'ost. Dals 2586 abitants da la vischnanca da Vaz vivevan il 2006 radund 2000 a Lai/Valbella.

Al Rothorn da Parpan han ins explotà minerals da fier durant il 15avel e 16avel tschientaner. L'auta vallada da Lai/Valbella, regiun dad acias fin vers la mesadad dal 19avel tschientaner, era colliada cun l'uschenumnada Via Sura, amplifitgada il 1836–40, che manava als pass dal Set e dal Güglia. Suenter la construcziun da la via dal Meir (1869) e l'avertura da la lingia da la Viafier retica Cuira–Tusaum–S. Murezzan (1903) ha il traffic sur ils pass pers temporarmain si'impurtanza. Il 1895 è vegnida projectada ina lingia da transport electrica da Cuira a Lai/Valbella; la prorupziun da l'Emprima Guerra mundiala ha impedì l'entschatta da sia construcziun prevista per il 1914. Il 1936 han ins schlargià e catramà la via d'autos.

Il 1882 è vegni avert l'emprim Hotel Kurhaus a Lai/Valbella. Il manaschi da cura era limità a l'entschatta a la stagion da stad. Insaquantas famiglias da purs èn allura sa decididas d'abitare durant l'entir onn a Lai/Valbella. Gia il 1886 è vegnida erigida l'emprima baselgia catolica a Lai/Valbella. Il 1903–04 ha inizià il traffic d'enviern a Lai/Valbella, ed il 1906 è vegnida construida l'emprima chasa da scola. Il 1914 possedeveva Lai/Valbella sis hotels, ed en ils onns 1920–40 èn suadads ulteriurs hotels e chasas da vacanzas. Il 1936 han ins construi la funiculara Val Sporz (schlieusas tratgas da sughets) ed il 1941–42 ils runals Tgantieni e Scalottas. Dapi il 1950 regna ina gronda activitad en il sectur da construcziun da chasas da vacanzas ch'ha fatg da Lai/Valbella in'abitadi sparpaglià. L'emprim plan da zonas datescha dal 1981. Cun la construcziun da las pendicularas dal Rothorn (1963) è era vegnida avverta la vart da l'ost da la val al turissem. Construcziun – sin iniziativa da la vischnanca – dals implants da sport Danis SA da la vart dal vest 1972 (fusiun da la Rothornbahn & Scalottas AG e da la Bergbahnen Danis Strätz AG a la Lenzerheide Bergbahnen AG 2005). Il 2007/08



Valbella en direziun Lai (enturn il 1900).

disponiva Lai/Valbella da 1415 letgs per esters en l'hotellaria (ca. 14 600 en la parahotellaria resp. en abitaziuns secundaras), ed ins ha pudì registrar 1,01 miu. pernottaziuns en total, 23 % da quellas en l'hotellaria. Ils culms da la regiun da Lai/Valbella vegnan cultivads anc oz. Las duas alps appartegnan a la vischnanca e vegnan chargiadas sin basa cooperativa.

Toni Cantieni

Vaz/Obervez

Vischnanca politica, circuit Alvaschagn, district Alvra, situada en ina vallada alpina furmada da glatschers tranter Cuira e la Val d'Alvra, cun las fracziuns da Lain, Muldain, Zorten, Lai/Valbella e la culegna da Solas. Ca. 840 villa Vazzes, tudestg Obervez, uffizial Vaz/Obervez. 1850 886 abitants; 1888 768; 1900 868; 1930 1337; 1950 1489; 2000 2691. Ina colonisaziun en il temp carolingic è cumprovada. Sondagis a Nivagl, probablamain l'antierur chastè da famiglia dals baruns de Vaz al sid da Zorten, han purtà a la glisch fastiz d'edifizis da lain d'ina emprima fasa da colonisaziun (10avel–11avel tschientaner) e da mirs da tschinta da diversas periodas da construcziun (11avel–13avel tschientaner). Ils pitschens objects chattads èn d'ina qualitad e ritgezza che mussa ch'ils abitants appartegnevan ad ina classa sociala elevada. Il 1337 è Vaz passà tras ierta dals de Vaz als conts de Werdenberg-Sargans. Il vischinadi da Vaz, ch'è sa cumprà liber il 1456, ha furmà ensemen cun las vischnancas da Stierva e Mut, situadas da la vart sanestra dal Meir, il cumin da Vaz. La part sut dal clutger da la baselgia parochiala da Zorten, deditgada a s. Donatus e menziunada il 1218, datescha dal

temp romanic tardiv, ina reconstrucziun da quella dal temp gotic tardiv (1499). La baselgia odierna è vegnida construida tranter il 1874 ed il 1875 (restaurada il 1970). Fin il 1517 ha appartegnì era Parpan a la plaiv da Vaz ch'è restada fidaivla a la cretta catolica durant la reformaziun. La baselgia da S. Gion Battista a Muldain, menziunada il 1508, è vegnida reconstruida en ils onns 1673–77 en stil baroc e restaurada il 1990. La baselgia da S. Gliezi a Lain, menziunada medemamain il 1508, è vegnida reconstruida il 1678–80 e restaurada il 1962. Las duas baselgias baroccas stattan sut la protecziun da monuments.

Fin il 1900 han pratigà ils abitants da Vaz surtut l'agricultura (cultivaziun dad ers, produczion da latg, allevament da muvel) e la selvicultura. Las alps e las pastgiras vegnivan utilisadas cuminaivlamain. Blers sa rendevan utro a lavurar en l'industria u en l'hotellaria. Il svilup turistic a Lai/Valbella, inizià enturn ils onns 1920, ha transfurmà la struttura economica. Il 2005 lavuravan 19 % da la populaziun cun activitad da gudogn a Vaz en il sectur secundar, 75 % en il sectur terziar. Part da la populaziun da lingua rumantscha: 1920 73 %; 1941 55,9 % (meglra lingua); 2000 5 % / 19 % (meglra lingua / tuttas indicaziuns).

Toni Cantieni

Solis (Solas)

Abitadi en la vischnanca politica da Vaz, situà a 1122 m sin ina terrassa a sanestra da l'Alvra, tudestg Solis (uffizial). L'areal è documentà per l'emprima giada il 1330 en l'urbari da Vaz sco possess dals baruns da Vaz. El sa chatta ad ina veglia via da colliaziun dal Schons sur Sameast (1859 m) e Mut Sura (1860 m) a las punts sur l'Alvra ed a Vaz. L'urbari menziunescha in obir hof ze soles, in andir hof ze soles ed in hof bi dien Bruggen. L'emprim abitadi correspunda a l'odierna vischnanca da Mut, il segund a Solas per propi ed il terz a Frasteals a dretga da l'Alvra. Mut era gia a l'entschatta dal 14avel tschientaner ina culegna gualsra dals da Vaz e vegniva numnada avant il 16avel tschientaner Ober-Solis (rumantsch Solas Sura). La menziun dal 1365 unz uff die Mutten riguarda mo la Muttner Höhi (2003 m) che furmava in cunfin territorial. Il num Mut è vegni transferì pli tard era a la culegna permanenta da Solas Sura e da Mut Sura. Gia il 1330 existivan pliras punts (hof bi dien Bruggen) a Frasteals (Punt Vedra, Punt da Solas); en vischinanza da quellas èn construidas las punts modernas da la Viafier retica e da la via d'auto Solas. Quai cumprova l'impurtanza strategica da l'antierura colliaziun tranter il Schons e la Val d'Alvra sur Vaz.

Martin Bundi

Lantsch/Lenz

Vischnanca politica, circuit Belfort, district Alvra. Vitg lung la via situà a 1294

m sin ina terrassa sin la spunda dretga da l'Alvra. 831 Lanzas, tudestg Lenz, uffizial Lantsch/Lenz. 1710 215 abitants; 1850 353; 1900 363; 1950 355; 2000 485. Fastiz d'abitadis che van dal temp da fier tempriv fin a l'epoca romana. L'«Urbari curretic dals bains imperialis» (ca. 840) menziunescha tranter auter la baselgia da S. Maria (oz baselgia da sepultura), in bain roial sco era tschains tributars da dus albierts. Lantsch era en possess dals signurs da Belfort; dal 12avel tschientaner fin il 1338 han ils baruns de Vaz exercità la suveranità territoriala. Sco part dal signuradi da Belfort, integrà en la Lia da las Diesch Dretgiras dapi il 1436, è Lantsch passà successivamain als Toggenburgs, Montforts e Matschs ed il 1477 a l'Austria. Dasperas existiva ina communitad da servs ecclesiastics da la Lia da la Chadè, ereditara da la migiuria episcopala da Lantsch, ch'appartegneva al signuradi da Greifenstein. En il rom da la bipartiziun da la dretgira da Belfort (1613) en las mesas dretgiras da Belfort Dadora e Belfort Dadens (cun mintgamai in'atgna dretgira civila) è Lantsch vegni incorporà a l'emprima. Il 1652 è vegnids cumprads ora ils davos dretgs austriacs. La chaplutta da S. Cassian, situada a la via per Lai, è menziunada il 1405, entant che l'actuala baselgia parochiala catolica da S. Antoni da Padua, construida il 1656 dals chaputschins, è vegnida consecrada il 1663. Ils abitants da Lantsch pratigavan surtut l'allevament da muvel e l'agricultura, els han dentant era chattà in gudogn supplementar en il traffic da transit en direziun dals pass dal Set (la via charrabla dal qual è vegnida construida il 1387–90), dal Güglia e da l'Alvra sco era vers la Val da la Landwasser. Lantsch furmava in dals quatter ports a l'uschenumnada Via Sura e disponiva d'ina susta sco era dal dretg da duana. Il 1834–40 è vegnida construida la via dal Güglia, charrabla sin l'entir tschancun, ed il 1870–73 quella da la Val da la Landwasser che sa sparta a Lantsch per Tavau. La construcziun da chasas da vacanzas, iniziada en ils onns 1960, è s'intensivada en ils onns 1970. A l'entschatta dals onns 1980 era il dumber d'abitaziuns da vacanzas superiur a quel da las abitaziuns abitadas durant l'entir onn. Il 2006/07 disponiva la vischnanca da 563 letgs per esters (80 % en abitaziuns da vacanzas) e 200 plazs da campadi. Total pernottaziuns: 32 324. Part da la populaziun da lingua rumantscha 2000: 36,7 % / 51,3 % (meglra lingua / tuttas indicaziuns). L'on 2000 èn l'emprima e la segunda classa primara vegnidas fusiunadas cun Brinzauls.

Jürg Simonett

Brien/Brinzauls

Vischnanca politica, circuit Belfort, district Alvra. Vitg aglomerà situà sin ina terrassa al nord da l'Alvra, cun la culegna Vazarouls a la via dal Güglia. Ca. 840


Brienzo, 1222 Brienzo, tudestg Brienz, uffizial Brienz/Brinzauls. 1808 111 abitants; 1850 191; 1900 158; 1950 172; 1980 95; 2000 117. En il 12avel tschientaner center economic da l'investgieu da Cuira. In'antierura tur en il vitg (ruina remplazzada il 1880) appartegneva probablamain als signurs da Brinzauls, menziunads il 1259. Fin il 1851 ha Brinzauls parti l'istorgia politica dal signuradi da Belfort. La baselgia, menziunada per l'emprima giada l'on 840 (patrocini da S. Calixt 1519), è sa separada da Lantsch il 1526, Surava da Brinzauls il 1725. Sper l'allevament da muvel e l'agricultura avevan Brinzauls e Lantsch entradas tras il dazi a l'Alvra. Il 1869–83 eran las vischnancas da Brinzauls e da Surava politicamain unidas. Construcziun da la via charrabla tras la Val da la Landwasser 1870–73. Incendi dal vitg 1874. Dischlocaziun da bains purils (o.t. las stallas) ordaifer il vitg a partir dals onns 1960. Dals set lieus da lavur a Brinzauls eran il 2005 quatter en il sectur primar, in en il sectur secundar e dus en il sectur terziar. L'on 2000 ha Brinzauls fusiunà cun la scola primara da Lantsch. Part da la populaziun da lingua rumantscha: 1880 98,6 % (meglra lingua); 2000 31,6 % / 52,1 % (meglra lingua / tuttas indicaziuns).

Jürg Simonett

Belfort (chastè)

Ruina da chastè situada a l'ost da Brinzauls sur la via per Alvagni sin in grip tranter duas chavorgias profundas. Dal chastè principal (chastè sura) èn sa mantegnidas la tur principala cun in edifiz d'abitare anness da tschintg plauns (al nord), ina cisterna radunda en la curt e l'imposant tract meridional, renovà pliras giadas. Ina stgala tagliada en il grip collia la curt cun l'avantchastè (chastè sut). Las parts las pli veglias dateschan da ca. l'on 1200. Il chastè da Belfort, attestà per l'emprima giada il 1222, era la sedia principala dals baruns de Vaz, construi sin terren runcà. Suenter l'extincziun da la lingia masculina (1338) è Belfort passà sco center dal signuradi da Belfort tras la figlia Kunigunde als conts de Toggenburg ed è daventà la sedia da la prefectura. Ils 14 da mars 1499 han assagli ils Grischuns il chastè ed han mess el en tschendra. Lavurs da sanaziun 2002–07 (Uniu Pro Ruine Belfort).

Maria-Letizia Boscardin



Punt da Solas (enturn il 1820).

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiu online: www.e-lir.ch; versiu stampada: www.casanova.ch u en mintga libreria.

Il svilup da la populaziun grischuna

■ Per il temp medieval pon ins revelar mo punctualmain il svilup demografic en il territori da l'odiern chantun Grischun. Tenor calculaziuns approximativas è s'augmentada la populaziun da la Rezia da 30 000 sin 60 000 persunas tranter il 6avel ed il 14avel tschientaner. La densità da la populaziun variava fermamain tranter las vals principalas fritgaivlas cun lur fieras e citads (Maivilla, Glion, Cuira) e las vals laterales isoladas cun lur vischnancas paupras. La creschientscha demografica dal temp medieval sa basava d'ina vart sin in surpli da naschientschas e da l'autra vart sin immigraziuns da regions prealpinas dapi il temp medieval tardiv sco era dal vest e dal sid durant il 12avel–14avel tschientaner (p.ex. ils Gualsers).

Temp premodern

La populaziun è creschida da ca. 75 000 persunas enturn il 1500 a max. 100 000 enturn il 1600 ed è sa diminuida fin il 1750 a ca. 71 000 persunas (en cuntrast cun la Svizra Bassa creschenta). Suentar il 1750 ha ella puspè cumenzà a crescer, cumbain a moda fitg modesta: il 1800 ha ina dumbraziun inuffiziala relevà 72 903 persunas. En il Grischun dal Sid è la populaziun sa diminuida anc pli ferm en il 17avel e 18avel tschientaner; en las Terras subditas (Vuclina, Buorn e Clavena) vivevan probablmain a la fin dal 18avel tschientaner approximativamain 90 000 persunas.

Per Cuira è attestada enturn il 1350 ina diminuziun da la populaziun, cumpensada tras l'immigraziun da glied da las regions dal Grischun sco era tras l'affluenza da mastergnants dal l'intschess dal Lai Rivaun e dal Lai da Constanza suenter l'incendi dal 1464. La citad ha obtegnì qua tras in nov profil architettonic e linguistic. Il stgaudament dal clima dal 1531–65 ha permess d'intensivar l'agricultura e la cultivaziun da graun era en regions pli autas. Era las separaziuns da pravendas renvieschan ad ina creschientscha da la populaziun durant quel temp. Las runcadas e colonisaziuns da territoris pli auts tras Gualsers en vegnidas terminadas a la fin da questa perioda chauda. Il pegiurament subsequent dal clima, ils Scumbigls grischuns respectivamain la Guerra da trent'onn (europeica), epidemias da pestilenza e crisas en il provediment dal pajais han depopulà il Grischun. Da la pestilenza, ch'ha infestà periodicamain il territori grischun tranter il 1349 ed il 1635, eran pertutgadas oravant tut las vischnancas situadas a las vias da transit. Cun excepziun da las epidemias dal 1628–35 ha la malsogna pudì vegnir franada bain svelta grazia a la topografia variada e fragmentada, a controllas severas ed a la collavuraziun cun citads lumbardas. Autras malsognas d'infeziun sco la virola e la tubercolosa, ma era fominas (surtut tranter il 1771 ed il 1773) han provocà durant tscherts temps in augment da la mortalità, en particular da quella d'uffants. Ma la populaziun sa restabiliva mintgamai spert grazia a l'augment da las naschientschas, quai ch'è daventà visibel a moda marcanta oravant tut suenter ils Scumbigls grischuns. Tals augments eran dentant mo

passagers e na manavan betg ad in augment demografic a lung termin, perquai che la societad tradiziunala adattava il dumber d'abitants a sias pussaivladads economicas cun limitar ils matrimonis e promover l'emigraziun. Las valladas alpinas internas faschevan part da las zonas d'emigraziun las pli impurtantas da la veglia Svizra. Surtut nauschas racoltas, savens en consequenza d'influenzas negativas da l'aura, augmentavan la disposiziun a l'emigraziun. Sper l'emigraziun temporara (Randulins) è s'establida era l'emigraziun definitiva en diversas furmas, particularmain a la fin dal 18avel tschientaner. Dal 15avel fin al 18avel tschientaner èn stads il Veneto e la Lombardia las destinaziuns principalas da l'emigraziun commerziala grischuna, a partir dal 18avel tschientaner èn emigrads ils Grischuns en differents stadis da l'Europa.

La diminuziun da la populaziun grischuna en consequenza da guerras e crisas ha manà a translocaziuns en il 17avel e 18avel tschientaner. Ils Gualsers han bandunà lur colonias pauc productivas sin ils auts ed han acquistà bains en las vals. La consequenza è stada in pitschen moviment da migraziun interna en il Grischun e la germanisaziun da vitgs rumantschs. Ils singuls bains ed ils aclauns, ch'eran las furmas d'abitadi predominantas durant il temp medieval, han fatg plazza a vischnancas serradas en il temp modern tempriv. La separaziun consequenta tranter vischins e fulasters/enderses ha mantegnì l'equiliber tranter il svilup da la populaziun stabla en las vischnancas e la productività agrara da quellas. Ils fulasters na pudevan betg maridar a bainplaischir ed eran suttames al sistem da l'endogamia che garantiva la cultivaziun da bains abels da segirar la subsistenza ad in fiu. Il sistem da la partiziun reala ha dentant diminui la grondezza dals manaschis. La renunzia bunamain totala d'acceptar novs vischins en il 18avel tschientaner ha manà ad in bass potenzial d'innovaziun da la societad ed è responsabel per il grond augment dal dumber d'abitants betg sedentars.

19avel tschientaner

La populaziun grischuna è s'augmentada tranter il 1850 ed il 1888 annualmain per 1,5%, vul dir da 89 895 sin 94 810 persunas. La flaivla digren da la populaziun da 30 a 25% e la mortalità pli bassa ch'en l'ulteriura Svizra han effectua in aut surpli da naschientschas. En l'emprima mesadad dal 19avel tschientaner è stada la creschientscha demografica probablmain in pau pli auta. Il princip da l'autarchia, dretgs d'ierta variabls tenor regions, la vegliadetgna da maridar elevada e l'obligaziun a l'endogamia èn restads facturs decisivs e caracteristics per il chantun Grischun agrar fin viaden il 20avel tschientaner. Il servetsch mercenar ha mantegnì sia impurtanza fin en ils onns 1840. Alternativas eran il «ir giu'l Schuob», pratitgà tranter il 1817 ed il 1850 da ca. 700 uffants e giuvenils l'onn (Schuobacheclers), sco era autras activitads artisanalas a l'exteriur (oravant tut pastiziers e cafetiers). Ins emigrava per regla cun l'intenziun da turnar pli tard en patria. En consequenza



Concentraziun e «desertificaziun» furman duas problematicas constantas en il svilup demografic dal territori alpin.

FOTO BG/PIXELIO

da la Revoluziun franzosa, da la fomina dal 1816–17 e da la miseria dals onns 1848–50 èn blers Grischuns sa decidids d'emigrar per adina, oravant tut en l'America dal Nord. Fin suenter il 1850 ha il maun public gi da cumbatter surtut cunter la paupradad e l'integraziun dals n-Grischuns sedentars, da las stirpas vagantas e da singuls viagiants. Cun introducir il dretg da burgais per l'entira Svizra (1848) ed obligar las vischnancas da conceder il vischinadi ad esters e vagants, han ins chattà ina soluziun unitara ma malgista che privilegiava quella vischnanca – savens pli bainstantas – ch'avevan refusà categoricamain quella glied paupra. Las midadas structuralas ch'han manà a la perdita da la funcziun economica dals vagants han accelerà l'exclusiun da quels, inchargiand las vischnancas burgaisas cun grevazzas che surpassavan lur pussaivladads finanzialas.

Fin il 1850 è stà il traffic da martganzia sur ils pass alpines vers il sid, sper l'agricultura, la funtauna da gudogn la pli impurtanta. La derutta dal traffic da transit en consequenza da la construcziun da las viafiers tras las Alps, da la fin dals servetschs mercenars e da las midadas structuralas en l'agricultura han inizià ina depopulaziun ch'ha cumpiglià a l'entschatta surtut il Grischun Central, alura tut las regions perifericas. La cumpart da las persunas activas en l'agricultura è sa diminuida da 69% il 1860 a 46% il 1910. Las destinaziuns tradiziunals da l'emigraziun en l'Europa e surmar han pers lur impurtanza, entant che la Svizra Bassa ha gudagnà successivamain attractività. Tranter il 1888 ed il 1910 è la populaziun grischuna creschida per 11,4% l'onn sin 117 069 abitants. La mortalità dad uffants e creschids è sa diminuida svelta suenter il 1895 grazia ad in meglier provediment medicinal. Il surpli da naschientschas è s'augmentà dal 1901 fin il 1910 a 7,2% l'onn.

Bunamain uschè impurtanta è stada l'immigraziun. Cuira ha consolidà sia


posiziun da center administrativ regional, l'industrialisaziun è dentant strusch reussida. La realisaziun da l'infrastructura en ils centers turistics e da la rait da vias e viafiers han fatg dal chantun d'emigraziun in pajais d'immigraziun. Las migraziuns internas e l'immigraziun en ils centers turistics respectivamain als gronds plazzals han transfurmà per temps la fatscha d'entiras regions. La chapitala Cuira (1850 6183 abitants; 1900 11 532) ed ils centers regionalis sco Tavau (1850 1680 abitants; 1900 8089) èn creschids svelta ed a moda persistenta. La part dals Svizzers immigrads e dals esters è s'augmentada regularmain en relaziun cun la populaziun residenta, muntond il 1910 en l'entir Chantun a 17%, en ils district da Landquart Sura e da Maloja schizunt a 32–35%. Quel onn lavuravan 27% da las persunas cun activitad da gudogn dal Grischun en il sector terziar (1860 9,5%), 26% en il sector secundar. Las regions perifericas èn dentant strusch vegnidas tangadas da l'immigraziun ed han era profità mo pauc dal provediment sanitar meglierà.

20avel tschientaner

L'Emprima Guerra mundiala ha introduci ina fasa cun in svilup demografic retardà ch'ha durà – interrut d'in restabiliment en ils onns 1920 – fin il 1941. La populaziun è creschida en consequenza dal surpli da naschientschas, entant che la bilantscha da la migraziun è restada negativa. Las structures tradiziunals èn dentant sa midadas era en regions perifericas. La vegliadetgna da maridar è sa sbassada, perquai che la pussaivladad da chattar in'occupaziun ordaifer l'agricultura permetteva da maridar senza surprendre il bain puril. Il mument da la maridaglia ed il cumporment reproductiv èn s'adattads a quels da la populaziun dal rest da la Svizra. La crisa economica e l'entschatta da la Segunda Guerra mundiala han sminui la quaida da maridar, e pir en ils onns 1941–50 è il dumber da matrimonis puspè creschì en cumparegliaziun cun il decennì precedent. La rata da divorzis è sa multiplitgada tranter il 1870 ed il 1950 en tut per duas giadas e mez, cun fitg grondas differenzas regionalas e localas. L'Emprima Guerra mundiala ed ina politica pli restrictiva han manà ad ina reducziun da la cumpart dals esters (per gronda part lavurers esters domiciliads mo temporarmain) ch'ha cuntinuà en consequenza da la crisa economica mundiala prorutta en ils onns 1930. Las regions agraras han subi ina depopulaziun sensibla en ils onns 1920–30. Durant la crisa economica mundiala è quella sa retardada, ed en intgins districts ha cumenzà in moviment da migraziun sin da la Svizra Bassa. En ils onns 1941–2009 è creschì il

dumber d'abitants per ca. 49%. En in'emprima fasa (fin il 1970) è s'augmentada la populaziun per 7,2% l'onn. La creschientscha rapida dal dumber da naschientschas en tut ils districts e la rata da mortalità retardada han chaschunà in augment dal surpli da naschientschas. L'aspetativa media da la vita è muntada da 67,7 onns (umens) respectivamain 72,6 onns (dunnas) il 1950 a 76,6 respectivamain 82,4 onns il 1999. La bilantscha dals moviments migratorics è restada negativa en in'emprima fasa, la cumpart dals esters è dentant tuttina s'augmentada da 8,1% il 1950 a 14,9% il 1970 respectivamain a 15,2% il 2001. L'immigraziun considerabla dad esters cuntrastava cun l'emigraziun anc pli numerusa da Grischuns. Sco en il 19avel tschientaner returnan dentant blers da quels suenter la pensiun. Tranter il 1970 ed il 1980 è sa ralentada la creschientscha demografica. La midada da tenuta envers il maridar, la famiglia e la sexualità sco era l'emancipaziun da las donnas han provocà a partir dal 1965 ina diminuziun marcanta da la rata da naschientschas (effect da la pirla). Quest svilup n'è, per motivs socials e religius, betg sa manifestà al medem mument en las differents parts dal chantun Grischun: en ils centers urbans ed en las vischnancas a las vias da transit ha el inizià pli baud ch'en las regions agraras perifericas. Era motivs religius han giugà ina rolla. En ils davos decennis dal 20avel tschientaner è la populaziun grischuna puspè creschida pli spert en consequenza da la bilantscha positiva dals moviments migratorics (per l'emprima giada dapi il 1910, en media per 6,8% l'onn). Cumbain che l'augment da la populaziun grischuna, inizià il 1950, è s'avischinà plaun a plaun a la media svizra, han ils territoris periferics subi ina reducziun da la populaziun per part massiva. Tranter il 1941 ed il 2000 è sa diminuida la part da las persunas activas en l'agricultura da 38,4% a 5,7%. Las regions autsituadas han cumenzà a sa depopular e bleras culegnas da muntogna èn vegnidas bandunadas. Quest process da «desertificaziun» e la concentraziun dals abitadis en ils fons da las vals furman dapi il temp modern tempriv constantas en l'istorgia da la populaziun dal Grischun.

Werner Meyer



Statistica da la populaziun grischuna 1850–2000.

Lexicon Istoric Retic

Il LIR cumpiglia bundant 3100 arttgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Lü giascha sin ina terrassa sulegliva a 1920 m.



Müstair en direcziun dal cunfin da stadi Svizra/Italia.

FOTO CH/PXLIO

Da Tschieriv a Müstair – ils abitadis da la Val Müstair

■ **La Val Müstair cumpiglia ils vitgs da Tschieriv, Fuldera, Lü, Valchava, Sta. Maria e Müstair. Dapi il 2009 furman las anteriuras sis vischnancas la vischnanca da vallada Val Müstair.**

Tschieriv

Anteriura vischnanca politica, circuit Val Müstair, district En, situada entadim la val cun in territori che s'extenda al vest sur il Pass dal Fuorn fin a Buffalora, cun la Val Nügglia integrada il 1918 en il Parc Naziunal Svizzer. Fusiunada il 2009 a la vischnanca politica da Val Müstair. Tschieriv sa cumpona da las gruppas da chasas Aintasom-Tschieriv, Chasuras, Plaz ed Orasom-Tschieriv. 1432 *Zirff*, tudestg Cierfs (istoric). 1835 155 abitants; 1850 145; 1900 146; 1930 126; 1950 165; 2000 154. Chats da stgaglias dal temp da Hallstatt en in cuvel en vischinanza da Cuel. Colonisaziun e cultivaziun dal terren durant il temp medieval tardiv a partir da la claustra da Müstair. Explotaziun da grondas quantitads da minerals da fier al Pass dal Fuorn ed a Buffalora en il 14avel e 15avel tschientaner. Il 1471, suenter dispietas tranter la claustra da Müstair ed ils chastellans von Matsch, è vegnida consecrada l'emprima chaplutta. Tschieriv appartegnava oriundamain a la plaiv da Müstair, a partir da la fin dal 15avel tschientaner a quella da Sta. Maria. La reformaziun è vegnida introducida en ils onns 1530. Dal 1654 fin il 1817 ha Tschieriv disponì d'ina atgna plaiv, alura è la vischnanca s'unida ecclesiasticamain cun Fuldera (domicil dal plevon) e Lü. Il 1762 è la Val Müstair sa cumprada libra da tut ils dretgs austriacs. Dapi il 1854 era Tschieriv ina vischnanca autonoma. Economicamain da temprà prevalentamain agricola, promovava Tschieriv dapi ils onns 1960 in turissem moderà (avertura dal territori da skis Minschuns cun runals 1976). Il 2005 lavuravan 13 % da las persunas cun activitad da gudogn a Tschieriv en il sectur primar, 78 % en il sectur terziar. Part da la populaziun da lingua rumantscha: 1980 95,5 % (lingua materna); 2000 77,3 % / 92,2 % (megra lingua/tuttas indicaziuns). Paul Eugen Grimm

Fuldera

Anteriura vischnanca politica, circuit Val Müstair, district En. Fusiunada il 2009 a la vischnanca politica Val Müstair. Situada sin plirs ventagls alluvials da la vart dretga dal Rom. Il vitg da Fuldera cumpiglia las duas parts da Fuldera Dora e Fuldera Daint. 1322 *Faldiera*. Il num deriva dal latin fundaria, rumantsch furn da luentar metal, e designava oriundamain l'entira part interna da la val cun la regiun da minieras a Buffalora da l'autra vart dal Pass dal Fuorn. 1835 179 abitants; 1850 123; 1900 98; 1950 118; 1990 105; 2000 115. A Fuorn, al spartaviis per Lü, sa chattava probablamain ina taverna romana. En il

temp medieval tardiv ha la claustra da Müstair promovì la colonisaziun e la cultivaziun dal terren. La vischnanca è vegnida destruida durant la Guerra svabaisa (1499) e durant ils Scumbigls grischuns. Refurmaziun ca. 1530 (2000 57,4 % refurmads, 40,9 % catolics). Attestada è ina baselgia consecrada a s. Roc. Il 1708 è vegnida construida la baselgia refurmada odierna cun in agen reverenda dapi il 1714. Il 1762 è la Val Müstair sa cumprada libra da tut ils dretgs austriacs, ed il 1854 è Fuldera daventada ina vischnanca autonoma. Amplificaziun da la via dal Fuorn 1870–72. Ferma depopolaziun da la val en il 19avel tschientaner (1835–50: –31,3 %, 1870–1900: –63,2 %). Drenascha da la Palü dals Lais en il rom da la Battaglia dal graun durant la Segunda Guerra mundiala. Fin il 2005 disponiva Fuldera ensemen cun Lü e Tschieriv d'ina atgna scolina e d'ina atgna scola primara (1.–3. classa a Fuldera, 4.–6. classa a Tschieriv). Dapi alura sa chatta la scolina a Valchava, la scola primara (per tut ils uffants da la val) a Müstair e la scola secundara e reala (medemamain per l'entira val) a Sta. Maria. Sper l'agricultura e l'allevament da muvel existan actualmain a Fuldera duas interpresas da mastergnanza (scrinaria e firma da construcziun) ed in hotel cun restaurant gastronomic. Svilup turistic moderà dapi ils onns 1960 (center da passlung da la val, turissem da stad e d'enviern). Part da la populaziun da lingua rumantscha: 2000 74,8 % / 93,9 % (megra lingua/tuttas indicaziuns). Realisaziun d'ina nova chasa communal cun biro da posta e butia 2001. Paul Eugen Grimm

Lü

Anteriura vischnanca politica, circuit Val Müstair, district En, situada a 1920 m (vischnanca la pli autsuada da l'Europa) sin ina terrassa sulegliva da la vart sanestra dal Rom, antruras cun l'aclaun da Lüsai, ma senz'il fund da la val. Fusiunada il 2009 a la vischnanca da Val Müstair. 1466 *Lug*. 1835 74 abitants; 1850 95; 1900 59; 1950 56; 2000 62. Colonisà a partir dal 12avel tschientaner en il decurs da la cultivaziun promovida da la claustra da Müstair. A la via da sauma da Lü sur il Pass da Costainas en l'Engiadina Bassa sa chattava probablamain ina staziun da berniers. A la fin dal 15avel tschientaner appartegnava Lü a la plaiv da Sta. Maria. La refurmaziun è vegnida introducida enturn il 1530. Dapi alura è la vischnanca colliada ecclesiasticamain cun Fuldera (cun in agen plevon dal 1824–27). Vischnanca autonoma 1854 fin il 2008. Cun l'amplificaziun da la via charrabla sur il Fuorn (1870–72) è ella vegnida isolada anc pli fitg che avant. Lü cultivava durant tscherts temps granezza, l'allevament da muvel predominescha dentant anc oz. Part da la populaziun da lingua rumantscha: 2000 82,3 % / 87,1 % (megra lingua/tuttas indicaziuns). Il 2009 han Jitka e Václav Ourednik avert a Lü in observatori d'astronomia. Paul Eugen Grimm

Champatsch (Valchava)

Alp sin territori da la vischnanca da Valchava, situada a ca. 2100 m da la vart sanestra da la Val Müstair a la ruta da Tschieriv/Lü sur il Pass da Costainas en la Val S-charl. Emprima documentaziun il 1466. L'Alp Champatsch vegniva chargiada a medem temp da Tschieriv, Lü-Lüsai e Valchava, probablamain gia dapi il 14avel/15avel tschientaner. La tegia e la plipart dals edifizis da lain dateschan dal 1825. Menziun spziala merita il cuvier (refugi per il muvel), mantegni per gronda part en ses stadi originar. Examinaziuns exactas dal 1987 han purtà a la glisch a Champatsch duas culegnas d'alp pli veglias, menziunadas probablamain en in document dal 1706 sco Gross-Champatsch e Klein-Champatsch (numnada era Alpetta). Il 1870–71 ed il 1880 è Valchava s'acquistà ils ultims dretgs d'astg e pastg da Tschieriv e Lü. Il 1989 è vegnids translocads ils edifizis da l'Alp Champatsch al Museum al liber Ballenberg (Brienz/BE). Inauguraziun da l'Alp Champatsch nova il 1986. Adolf Collenberg

Valchava

Anteriura vischnanca politica, circuit Val Müstair, district En, construida lung la via tranter Sta. Maria e Fuldera, cun las fracziuns autas da Chaunt e Valpaschun. Fusiunada il 2009 a la vischnanca politica da Val Müstair. 1331 *Valchava*. 1850 208 abitants; 1900 218; 1950 252; 2000 202. Valchava è vegni colonisà d'enturn da la claustra da Müstair e furmava cun Tschieriv, Lü e Fuldera l'uschenumna Terzal Daint. La baselgia existiva gia il 1418, la refurmaziun è vegnida introducida en ils onns 1530, cun agens plevons dal 1783–1870. La baselgia catolica è vegnida consecrada il 1896. Durant la Guerra svabaisa (1499) e durant ils Scumbigls grischuns è la vischnanca vegnida devastada il 1621–22. Sut domini austriac 1728–62. La vischnanca da Valchava moderna ha preni si'entschatta il 1854. Il 1862 han boas devastà grondas parts dal terren cultivà. A Valchava appartegnava era l'exclava enturn l'Alp Champatsch, ils edifizis vegls da la quala è vegnids transferids al Museum da Ballenberg. La vischnanca viva da l'agricultura, da l'allevament da muvel, dal mastergn e d'in turissem moderà. La chasacumin alloschescha la Biblioteca Jaura (biblioteca da vallada) ed il Museum Chasa Jaura (museum da vallada). Part da la populaziun da lingua rumantscha: 2000 80,7 % / 89,6 % (megra lingua/tuttas indicaziuns). Paul Eugen Grimm

Santa Maria en Val Müstair

Anteriura vischnanca politica, circuit Val Müstair, district En, situada al spartaviis per il Pass da l'Umbrail. Fusiunada il 2009 a la vischnanca politica da Val Müstair. A l'abitadi, construì en furma da crusch, appartegnan las cullegnas autas da Craistas, Büglios e Pütschai sco era l'aclaun da Sielva cun l'ospital cirquital. 1850 437 abitants; 1900 385; 1950 420; 2000 327. En il temp autmedieval è naschids emprims bains a Sta. Maria, erigids sin iniziativa da la claustra da Müstair e tras urbanisaziuns exequidas da gliued libra. Enturn il 1167/70 è documentada la chaplutta da *Sancte Mariae in Silvaplana*, a la quala regorda il num odiern Sielva. La chaplutta episcopala è ida tras donaziun a la claustra da Müstair ed era ina giada ina renumada destinaziun da pelegrinadi. En il 13avel tschientaner existiva a Sta. Maria in pitschen convent da canonis ed in ospizi. A la fin dal 15avel tschientaner è daventada la vischnanca da Sta. Maria in'atgna pravenda. Grazia a la posiziun favuravla al spartaviis per l'Umbrail ed al passadi en la Val Fraele (talian Valle di Fraele) è ella daventada il lieu principal da la val. Durant la Battaglia a la Chalavaina (1499) ed ils Scumbigls grischuns (1621–22) è il vitg vegni destrui, il 1630 è sa derasada la pestilenza ed il 1764 è arsa giu ina part da Sta. Maria; l'incendiari culpavel è vegni executà. Dal 1799–1800 è Sta. Maria vegnida implitgada en las campagnas dals Austriacs e Franzos. Da l'occupaziun dals cunfins dal 1914–18 existan anc numerus fastizs sin il Pass da l'Umbrail. La refurmaziun è vegnida introducida a Sta. Maria tranter il 1526 ed il 1530. La baselgia gotic-tardiva dal 1492 ha servi durant in lung temp ad omaduas confessiuns. Suenter la mort da la davosa persuna catolica a Sta. Maria il 1837 (ina dunna), è il maletg da l'altar deditg a s. Maria vegni purtà en ina procession solenna en la claustra da Müstair. Il 1762 è la vischnanca sa cumprada libra dal domini temporar austriac. Ina vischnanca en il senn modern è daventada Sta. Maria il 1854. L'agricultura gioga anc a l'entschatta dal 21avel tschientaner ina rolla impurtanta. Integins manaschis industrials (tranter auter ina garascha ed ina stiva da taiser) sco era in turissem moderà (plirs hotels, restaurants e butias), il qual è sa sviluppà en la vischinanza dal Parc Naziunal e dal territori da skis da stad al Pass dal Stielva, offeran ulteriuras pussavladads da gudogn. Part da la populaziun da lingua rumantscha: 2000 69,7 % / 81,7 % (megra lingua/tuttas indicaziuns). Paul Eugen Grimm

Müstair (vitg)

Anteriura vischnanca politica, circuit Val Müstair, district En. Fusiunada il 2009 a la vischnanca politica Val Müstair. Fracziun la pli gronda da la Val Müstair, construida lung la via oradim la val il pli a l'ost da la Svizra. A l'antierur territori communal da Müstair appartegnava era la Val Mora che sbucca vers il Lai da Livign. Entschatta dal 9avel tschientaner *monasterium Tuberis*, tudestg fin il 1943 Münster (uffizial). 1835 513 abitants; 1850 475; 1900 599; 1950 776; 2000 745. Sut la stalla al nord da la claustra han ins chattà la fundamenta d'in edifizis che datescha probablamain dal temp da bronz tardiv. La claustra da benedictinas cun la baselgia carolingica a trais absidas dal davos quart dal 8avel tschientaner ha marcà fermamain l'istorgia da la vischnanca. Enturn la claustra sa gruppan migiurans; ina curt signurila dal 10avel tschientaner pudess esser stada ina donaziun da l'imperator Otto I a l'uvestg da Cuira. La vischnanca da Müstair è sa separada da Tuer (Vnuost) probablamain en il 13avel tschientaner. Il 1239 è attestà per l'emprima giada in martgà, nua ch'i vegniva vendi ed exportà oravant tut ponn grisch. Il 1367 è la dretgira da la Val Müstair entrada en la Lia da la Chadé. Avant la Guerra da la Chalavaina (1499) era Müstair in lieu da reuniun da las truppas grischuns, alura è la vischnanca vegnida destruida tras truppas austriacs. Cuntrari a las autras vischnancas da la val, n'è quella da Müstair betg vegnida refurmada. Durant ils Scumbigls grischuns è ella puspè vegnida demolida. Il 1696 han chaputschins surpiglià la pastoraziun dal vitg; lur ospizi datescha dal 1709. Il 1728 ha l'uvestg da Cuira vendi la Val Müstair a l'Austria, il 1762 è quella vegnida reacquistada. Il 1854 è Müstair daventada ina vischnanca autonoma. Dapi ils onns 1970 è sa domiciliadas diversas interpresas commercialas ed industrialas a Müstair che giuda in svilup turistic moderà, tranter auter grazia al Parc Naziunal Svizzer ed a la claustra. L'onn 2005 lavuravan 62 % da las persunas cun activitad da gudogn a Müstair en il sectur terziar. Part da la populaziun da lingua rumantscha: 1990 91 % / 98 % (lingua materna); 2000 72,9 % / 85,8 % (megra lingua/tuttas indicaziuns). Paul Eugen Grimm

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Las constituziuns da la Republica da las Trais Lias e dal chantun Grischun

■ La Republica da las Trais Lias na possedeve nagina constituziun en il senn modern dal pled, mabain ina retscha da brevs, reformas, artitgels ed ulteriurs documents legislativs. Il LIR preschenta il svilup da las funtaunas da dretg statalas da lur origin a la constituziun actuala. Per il temp preistoric mancan las funtaunas da dretg. Suenter la conquista da las Alps l'onn 15 a.C. han ils Romans introduci en Rezia lur dretg. Quel è restà en vigur era sut il domini ostrogotic (ca. 500) e parzialmain perfin sut quel francon (536, annexiun da la Raetia prima a l'Imperi francon en furma d'ina provinza ecclesiastica pli u main autonoma, l'uschenumnada Raetia curiensis, rumantsch Currezia). Dals Francs, representads dal gavel fin il 8avel tschientaner tras ils Zaccons/Victorids, èn tradids la Lex Romana Curiensis (8avel tschientaner) ed ils Capitula Remedii da ca. l'onn 800. Cun la «Divisio» (806) ha Carl il Grond cedi ina part dals bains episcopals ad in cont e creà qua tras la basa materiala dal ducadi retic. Il Contract da Verdun (843) ha attribuì la Rezia a l'Imperi ostrofranco e transferì l'uvestgieu da Cuir a da Milaun a quel da Maganza.

Constituziuns da la Republica

Fin en il temp medieval tardiv han ils signurs feudals determinà il dretg. Sper lur dretg signuril, fixà per part en scrit, existivan era dretgs d'isanza, tradids a bucca u tras la pratica da mintgadi. En il decurs dal declin da la pussanza feudala en il temp medieval tardiv e dal svilup da la suveranità da dretgiras e vischinadis (15avel/16avel tschientaner) han intgins signurs feudals mess en scrit il dretg tradi en uschenumnads cudeschs dal pajais (tudestg Landbücher), amplifitgond quels tenor basegn cun novs tschentaments. Ils cumins han impedi quasi mintga tentativa d'unifitgar il dretg interpredida da vart da las Lias. La Lia Grischa possedeve in dretg civil parzialmain unifitgà (p.ex. in dretg d'ierta u in dretg da concurs), la Lia da las Diesch Dretgiras dapi il 1633 in dretg d'ierta ed in dretg matrimonial communal che sa basava sin la Brev da biadi (tudestg Eniklibrief) dal 1469. Tenor quella na vegniva l'ierta dal bab betg pli transferida al tat, mabain al biadi (Enikli, v.d. Enkel). Il dretg criminal era l'element central da la suveranità dals cumins. Quel dretg n'han els cedi a nagin – mo la Lia Grischa possedeve ina dretgira d'appellaziun, las autras duas constituivan ina tala da cas a cas a basa da las dretgiras vischinantas (succurs). Las relaziuns intertas da las singulas Lias vegnivan determinadas en brevs federalas.

La Republica da las Trais Lias na possedeve betg ina constituziun statala en il senn modern dal pled, mabain mo insaquantas leschas ed ordinaziuns. Tranter il 16avel ed il 18avel tschientaner han las Lias decretà las suandantas constituziuns fundametalas: la Brev da pensius (1500), la Brev da federaziun (1524), ils Artitgels da Glion (1524 e 1526), il Kesselbrief (1570), la Brev dals trais sigils (1574), la Refurma dal pajais (1603, 1684, 1694) e l'Urden da malefiz (1716).

Il 1486 han las Lias relaschà en connex cun lur campagna en Vuclina ed a Buorn in regulativ davart la schuldata mobilisada – l'emprim act legislativ cuminaivel. Quel scumandava a mintga schulda ed uffizial sut paina da mort, dischonor u expropriaziun da tschertgar profit privat a donn e cust da las Lias. La Brev da pensius dal 1500 scumandava d'acceptar da pussanzas estras pensius, provisius, regals e daners da recrutaziun che cumpromettevan – suenter la victoria a la Chalaivina – l'unitad e la pasch interna da las Lias. La Brev da federaziun dal 1524 ha fixà en 32 artitgels la constituziun fundametal da la Republica: sia finamira, ils

VIVA LA GRISCHA
Atun 2000 nr. 1
La gasetta davart la nova constituziun chantunala

Pertge che la revisiun da la constituziun è necessaria

Tge che vegn midà

Co che las regiuns pudessan vesair ora en l'avegnir

Tgi che collavura per la nova constituziun

Co che Vus pudais participar a la discussiun

ina nova constituziun per in chantun restà giuven: ils uffants da Tavau guardan cun optimism in l'avegnir.

Gasetta d'infurmaziun en vista a la revisiun da la Constituziun chantunala dal 2003.

dretgs e las obligaziuns da ses commembers, la legislaziun ed il dretg da guerra. La giurisdicziun è vegnida reglada mo per cuntraversas tranter las Lias sco era tranter quellas e persunas privatas, cumins e vischinadis. Ina dretgira republicana superiura n'è dentant betg vegnida installada. La brev vegniva da temp en temp publicada ed engirada. Ils Artitgels da Glion dal 1524 e 1526 eran influenzads en lur tenuta critica ed en lur cuntegn da la publicistica dals purs da la Germania (Artitgels da Memmingen) e da la reformaziun. Els han tranter auter privà praticamain l'uvestg da ses domini secular, surlaschà a las plais da tscherner la confessiun e d'eleger il plevon e reglà las dieschmas. En stretg connex cun quels artitgels stattan ils Sis Artitgels dal 1541 che segiravan ils dretgs dal pievel visavi la baselgia che mintga uvestg stueva engirar davant la Lia da las Diesch Dretgiras. Per sfurzar da respectar la Brev da pensius dal 1500 e supprimer las sollevaziuns anarchicas che semnavan inquietezza e discordia, han las Lias decretà il 1551 in scumond da visitar las vischnancas senza permissiun uffiziala (drizzà cunter ils ambassadurs e negoziants esters) e relaschà il 1574 la Brev dals trais sigils. Cun smantschar a grevas painas da corp e possess han ins empruvà da terminar – senza success – ils cumbats arbitrars da partidas, instigadas e finanziadas da las pussanzas estras en concorrenza per la schuldata grischuna e la controlla resp. il diever dals pass. Cun l'instrument da las dretgiras nauschas duavan ils culpants vegnir mess a pantun ed ils mulsiessers e propagandists da tut gener obligads da resguardar il Kesselbrief dal 1570. Quella brev scumandava da traffitgar (tudestg *kesselen*) cun uffizis e sentenzias e pretendeva da mintga uffizial d'engirar ch'el haja acquistà ses uffizis senza «praticas» (cumpra d'uffizis). La Lia da las Diesch Dretgiras e la Lia Grischa avevan gia relaschà in tal scumond il 1561 ed il 1569. Ils Artitgels da las bandieras dal 1586 han repeti ed amplifitgà ils Artitgels da Clavenna dal 1585. Els han fixà la confessiun catolica e protestanta sco su-

lettas admissas en las Terras subditas e proclamà la libertad da tscherna tranter quellas. Ultra da quai han els reglà plirs affars en Vuclina.

Essend che tut quellas leschas na vegnivan betg u mo malmain resguardadas, han ils cussegls e cumins decidì ina refurma e medura generala, realisada cun la Refurma dal pajais dal 1603. Ils interess particulars da famiglias e clans, la corrupziun per part immanenta al sistem ed ils Scumbigls grischuns proruts il 1607 han bainprest fatg da quella refurma maculatura. Cun dretgiras nauschas han las partidas semnà terror ch'ha era impedi l'applicaziun dals Artitgels da Tusaun, relaschads suenter la dretgira nauscha dal 1618. L'organisaziun da las Terras subditas e da lur relaziuns cun la Republica durant ils Scumbigls grischuns è vegnida fixada tranter auter en il Contract da Lindau (1622) ed en il Contract da Monzon (1626). Quels èn dentant stads da curta durada e da pitschen effect ed èn vegnids remplazzads il 1639 tras il Capitulat da Milaun ch'ha restitui las Terras subditas als Grischuns e reglà da là davent las relaziuns tranter ils suverans grischuns e lur subdits. La Sentenzia da Waser dal 1644 regardava l'elecziun dal chau da la Lia da las Diesch Dretgiras. Las reformas dal pajais dal 1684 e 1694 manifesteschan ina stagnaziun en il process da refurma, confermond, cun pitschnas modificaziuns, las leschas vertentas. Il 1700 ha la Lia da la Chadè midà il modus d'elecziun dal bundspresident (chau-lia) cun la Sentenzia da Malans, ma francà la predominanza da la citad da Cuir. L'Urden da malefiz dal 1716 cuntegneva in urden processual per la dretgira comunabla da las Lias per malfatschents esters ed in excerpt da l'uschenumnada Carolina (Peinliche Halsgerichtsordnung) da l'imperatur Carl V dal 1530 per diever facultativ dals cumins. Il davos act legislativ da la Republica è stada la refurma dal pajais dal 1794, decretada a chaschun da la radunanza extraordinaria a Cuir. Quella ha era tractà ils plants dals cumins da la Lumnezia (18) e Foppa (5) e decidì d'instituìr

ina dieta periodica d'inquisiun e puniziun da malfats ed abus commess a donn e cust dal stadi. Sia dretgira ordinaria duava consistier da 50 commembers per Lia e sa radunar mintgamai ils 5 da zercladur, la dretgira nauscha duava cumpigliar diesch commembers en total. Il 1794 han ins era decidì da publictar ils recess da la Dieta federala da las Lias en tudestg, talian ed – in novum impurtant – en sursilvan e latin. Il 1797 (sperdita da la Vuclina) respectivamain il 1799 (Helvetica) è la Republica da las Trais Lias vegnida schliada.

Da la Helvetica a la Constituziun chantunala dal 1851 e 1854

Il contract da fusiun cun la Republica helvetica (21 d'avrigl 1799) e sia constituziun han pudì vegnir realisads mo parzialmain en consequenza da l'occupaziun franzosa ed austriaca e da la resistenza a l'intern dal pajais. L'impurtanza da la Constituziun da Malmaison dals 29 da matg 1801 (de facto l'emprima constituziun dal chantun Grischun) è s'effectuada plitost en il futur ch'è en il preschent. Il decret da Napoleun d'incorporar il Grischun sco chantun Rezia a la Republica helvetica, relaschà ils 24 da zercladur 1801, ha alura francà la sort da quel sco part integrala da la Confederaziun svizra. La Constituziun da Mediazion dal 1803 ha restitui las structures vegl-republicanas. Il nov urden legislativ (Cussegl grond) ed executiv (regenza centrala a Cuir) è stà in pass innovativ e – dal punct da vista dal dretg public – fundametal e decisiv per il svilup dal Grischun ad in stadi modern. La Constituziun chantunala dal 1814 correspunda en tut ils aspects centrals a quella da la Mediazion ch'è vegnida amplifitgada ed adattada a las novas relaziuns. Innovaziuns: la centralisaziun è vegnida rinforzada cun ceder al Cussegl grond tranter auter il dretg d'eleger la Regenza e la Dretgira d'appellaziun e cun garantir il principi da parità confessiunala en uffizis e cumissius chantunala (dus reformads, in catolic). L'artitel 34, che prenda in quorum da dus terz dals cumins (cirquits) per revisiuns constituzionalas

(pli), ha impedi las sis tentativas da revisiun interpredidas tranter il 1834 ed il 1850. La Constituziun federala dal 1848 ha finalmain sfurzà la refurma. Il prim da settember 1850 è vegnida acceptada la nova organisaziun da las dretgiras (entrada en vigur il prim d'avrigl 1851) ed il Cudesch da dretg penal, concepi da Vincenz (von) Planta e Johann Baptista (von) Tscharner. Ils 30 da november 1853 ha il suveran acceptà la nova Constituziun chantunala (entrada en vigur il prim da favrer 1854) ch'ha recepì las propostas elavuradas da l'Unìun reformista, presidiada da Peter Conradin (von) Planta. Las innovaziuns principalas cumpiglian: in rinforz fitg modest da la Regenza; l'installaziun da la Dretgira chantunala e da las 14 dretgiras districtualas civilas (en analogia als 11 districts administrativ-giuridics dal chantun Rezia) e dals 39 circuits da dretgira criminala; la dismesa da las Lias; il principi individual sco basa da la suveranità – vul dir la totalità dals votants – enstagl dal pli collectiv; l'attribuziun dals deputads dals cumins al Cussegl grond tenor il dumber da lur populaziun e l'aboliziun da lur vusch tenor instrucziun (l'uschenumnada vusch comiziala, consegna, parola) en favur dal votum liber.

Revisiuns ed amplifaziuns

Suenter duas refutaziuns (1869 e 1876) ha la revisiun dal 1880 introduci l'iniziativa (5000 sutscriziuns), redefinì il referendum e prescrit l'elecziun dals dus cussegliers dals chantuns sco era la supervisiun da la Regenza sur las dretgiras e l'administraziun communal. La Constituziun chantunala dal 1892 (revisiun totala) è ida en vigur il prim da schaner 1894. Ella ha creà la Regenza da tschintg commembers, prescrit lur elecziun libra tras il pievel (mintga trais onns) ed institui il sistem departamental. Ultra da quai ha ella suttames las numerusas cumissius a la Regenza e subi insaquantas midadas ed adattaziuns, per exempel l'incumpatibilitad d'uffizis, la reducziun da las sutscriziuns per l'iniziativa populara a 3000. Il sistem federalistic sco principi è vegni mantegnì. La ca. 500 midadas d'artitgels fatgas en ils ultims 100 onns èn stadas adattaziuns urgentas concernent ils dretgs politics (1962, 1980), il referendum da finanzas (1965, 1973), la revisiun dal dretg administrativ e l'instituziun da la Dretgira administrativa chantunala (1967), il dretg da vuschar da las dunnas (1971), las competenzas da la Regenza (1971), la lescha communal (1974) ed auter pli. Las set tentativas interpredidas dapi il 1931 per introducir la procedura d'elecziun dals deputads tenor proporz èn vegnidas refusadas dal suveran grischun. La revisiun totala da la Constituziun chantunala, acceptada dal suveran ils 18 da matg 2003, ha liberà l'antieriura constituziun da ses ballast e creà ina nova basa. Ins ha dentant anticipà la revisiun da l'organisaziun da las dretgiras (en vigur dapi il prim da schaner 2001). Quella ha privà ils circuits da la dretgira criminala, cedi quella als districts (fin qua decasteris civils) e professionalisà la giurisdicziun. Il «model grischun», ina maschaida dals systems da maiorz e proporz, ha dentant stui succumber per paucas vuschs a la procedura (tradiziunala) da l'elecziun dal Cussegl grond tenor maiorz.

Adolf Collenberg

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Ils abitadis da la Muntogna da Schons

■ Las vischnancas da la Muntogna da Schons sa chattan sin terrassas bassas e pli autas a sanestra dal Rain Posteriur e cumpiglian ils abitadis da Donat, Pazen, Farden, Lon, Maton, Vargistagn, Casti e Clugén.

Muntogna da Schons

Denominaziun da la spunda sanestra da la Val Schons, cuverta cun pauc gaud. Fin en il temp medieval tardiv ha vivi ina cuminanza da purs libers, ils uschenumnads Libers da la Muntogna da Schons, en quella regiun. Intgins privilegiads abitavan en il funs da la val. Il 1204 han ils *homines liberos de Saxammo* affittà sco cumproprietaris l'alp Niemet. En il contract da pasch dal 1428, stipulà tranter Clavenna ed ils vischinadis da la Val Schons, cumpara il mastral dal cumin da la Muntogna da Schons cun in agen sigil. Ils Libers da la Muntogna da Schons exercitavan la giurisdicziun civila probablmain en atgna competenza. Lur corporaziun pudeva decider autonomamain davart l'utilisaziun da gauds, pastgiras ed alps. Il lieu da reuniun sa chattava a Padagn en il territori da la vischnanca da Maton. La giurisdicziun criminala suttasteva als suverans comitals en la Val Schons. Ils dretgs da disponer da terrens e persunas, attribuids als Libers da la Muntogna da Schons, n'èn betg sclerids en detagl. Il plant preschentà il 1434 dals conts de Werdenberg-Sargans concernent la refusa da pajar tributs da prefectura sa drizzava era cunter ils Libers da la Muntogna da Schons. Suenter la Faida da Schons, prorutta a l'entschatta dals onns 1450, e la liberaziun da la val dals dretgs feudals il 1458, èn ils Libers da la Muntogna da Schons s'unids al cumin da Schons.

Jürg Simonett

Donat

Vischnanca politica, circuit Schons, district Rain Posteriur, cun las fracziuns da Donat e Pazen-Farden (fin la fin dal 2002 atgna vischnanca politica). Vitg situà lung la via al pe da la Muntogna da Schons a sanestra dal Rain Posteriur, cun ils quartiers da Curscheglias, Tarvisch e Tšcharvi. Ca. 1150 *ad Anede*, tudestg Donath (uffizial fin il 2002). 1835 167 abitants; 1850 188; 1900 128; 1950 118; 2000 133. Necropola dal temp da bronz tempriv a Surses. Enturn il 1150 era Donat ina gronda curt episcopala cun in'agricultura intensiva ed allevament da muvel. Al nordost da la vischnanca sa chattava la culegna bandunada da Scarsuir. Il 1204 è menziunada per l'emprima giada sin la Muntogna da Schons ina veglia comunitad da purs libers ch'exercitava autonomamain la dretgira bassa. Ils dretgs da suveranità territoriala èn passads dals signurs de Vaz a quels de Werdenberg, il 1456 puspè a l'uestg da Cuira. La Val Schons è sa cumprada libra il 1458. Ecclesiasticamain appartegneva Donat a S. Martin a Ziràn (il 1463 è menziunada la chaplutta da S. Gieri). Refurmaziun enturn il 1530. A partir dal 1627 ha Donat constituì ina plaiv cuminaivla cun las vischnancas da la Muntogna da Schons inferiura, a partir dal 1863 puspè cun Ziràn. Fin il 1851 è Donat stà in vischinadi dal cumin da Schons e furmava cun Pazen, Farden, Casti e Clugén ina dretgira civila. Construcziun da l'emprima via charrabla 1901–02. Donat è il center scolastic da la Muntogna da Schons e la sedia da la mastralia da la val. Il 2005 lavuravan 57 % da las persunas cun activitad da gudogn a Donat en l'emprim sector (meglieraziun generala dapi il 1983). Part da la populaziun da lingua rumantscha: 1880 99 %; 1941 89 % (lingua materna); 2000 53,8 % / 75,6 % (meglra lingua/tuttas indicaziuns). Jürg Simonett

Pazen-Farden

Anteriura vischnanca politica sortida il 1875 da la fusiun da Pazen e da Farden



Vitget da Lon cun vista panoramica sur la Val Schons.

FOTO M. GYGER

(fin il 2002 uffizial Patzen-Fardün). Dapi il 2003 fracziun da la vischnanca politica da Donat. Adolf Collenberg

Pazen

Part da la vischnanca politica da Donat (dapi il 2003) e da la fracziun da Pazen-Farden, circuit Schons, district Rain Posteriur. Fin il 2002 ha Pazen appartegnì a la vischnanca politica da Pazen-Farden, cun la fusiun a la vischnanca da Donat han obtegnì ils nums rumantschs validitad uffiziala. Culegna serrada en la part sut da la Muntogna da Schons, unida cun Farden dapi il 1875. 1204 *Pazens*, tudestg Patzen. 1835 44 abitants; 1900 (cun Farden) 64; 1950 64; 2000 64.

Il territori communal appartegneva al terren colonisà e cultivà gia a l'entschatta dal 13avel tschientaner, cun allevament da muvel e cultivaziun dad ers. A partir dal 1204 è attestada sin la Muntogna da Schons ina vischnanca da purs libers cun in'atgna dretgira bassa. Ils signurs da Pazen, menziunads il 1219, eran ministerials episcopals. Ils dretgs suverans en la val han exequì successivamain ils de Vaz, ils de Werdenberg ed, a partir dal 1456, l'uestgieu da Cuira. Il 1458 èn ils da Schons sa cumprads libers. Ecclesiasticamain appartegneva Pazen a S. Martin/Ziràn. Il 1407 è vegnida fundada la chaplutta da S. Nicl a Farden (cun plevon). La refurmaziun ha gi lieu avant il 1538. Il 1627 è la vischnanca da Pazen sa separada ecclesiasticamain da Ziràn ed è s'unida cun Farden, Donat, Casti e Clugén ad ina plaiv. Fin il 1851 ha Pazen furmà cun ils vischinadis surmenziunads ina dretgira bassa entaifer il cumin da Schons. Construcziun dal stradun 1904–06, meglieraziun generala a partir dal 1980. La culegna viva oravant tut da l'allevament da muvel. Part da la populaziun da lingua rumantscha: 1980 83 % (lingua materna); 1990 63 % / 83 %; 2000 (Pazen-Farden e Donat) 53,8 % / 75,6 % (meglra lingua/tuttas indicaziuns). Jürg Simonett

Farden

Anteriura vischnanca politica, circuit Schons, district Rain Posteriur. Dapi il 1875 part da la vischnanca da Pazen-Farden, fusiunada il 2003 cun la vischnanca politica da Donat. Vitg situà a 1164 m en la part inferiura da la Muntogna da Schons. 1219 *de Faldao-ne*, tudestg Fardün. 1835 65 abitants; 1999 39. Il chastè-fortezza da La Tur (betg attestà) era probablmain la sedia dals signurs de Pazen. Legat da la chaplutta da S. Niclos 1407. Refurmaziun avant il 1538. Fin il 1851 ha Farden

furmà, entaifer il cumin da Schons, ina dretgira civila cun ils vischinadis da Pazen, Donat, Casti e Clugén. Construcziun dal stradun da Donat 1904–06. L'allevament da muvel predominescha. Part da la populaziun da lingua rumantscha 2000 (cun Pazen e Donat): 53,8 % / 75,6 % (meglra lingua/tuttas indicaziuns). Jürg Simonett

Lon

Vischnanca politica, circuit Schons, district Rain Posteriur. Vitg a mantun situà a 1582 m en la part sura da la Muntogna da Schons. Enturn 1150 *Laune, Lune*; 1219 *de Laone*, tudestg Lohn (uffizial). 1780 126 abitants; 1850 97; 1900 75; 1950 62; 2000 50. L'existenza d'ina veglia via auta per guntgir la chavorgia da la Viamala para oz pauc probabla. Gia a l'entschatta dal 13avel tschientaner era il terren da Lon urbanisà e cultivà (allevament da muvel e cultivaziun da graun). Dapi il 1204 è attestà sin la Muntogna da Schons ina cuminanza da purs libers cun in'atgna dretgira bassa. Signurs territorials èn stads, en successiun, l'uestg da Cuira, ils baruns de Vaz, ils conts de Werdenberg ed, a partir dal 1456, danovamain la diocesa. Il 1458 ha l'entira val cumprà ora ils dretgs signurils. Igl existan fastizs d'ina chaplutta dal 12avel tschientaner. Il process da separaziun da la pravenda da S. Martin a Ziràn ha inizià il 1460 cun la fundaziun da la chaplania da S. Maria ed è vegni terminà il 1538 cun l'instituziun da la cuminanza parochiala en la part sura da la Muntogna. Vers la mesadad dal 16avel tschientaner ha Lon aderì a la refurma. Fin il 1851 ha la vischnanca furmà in vischinadi dal cumin da Schons e constituì ina dretgira civila cun Maton e Vargistagn. Il 1904–06 è vegnida construìda la via charrabla. Il 2005 offriva il sector primar tut las piazzas da lavur en la vischnanca. Part da la populaziun da lingua rumantscha: 1980 100 % (lingua materna); 2000 52 % / 76 % (meglra lingua/tuttas indicaziuns).

Jürg Simonett

Maton

Vischnanca politica, circuit Schons, district Valragn. Il vitg accumulà, situà a 1521 m, furma il center da la part sura da la Muntogna da Schons. Ca. 840 *in Mentaune*, tudestg Mathon (uffizial). 1780 123 abitants; 1850 111; 1900 74; 1950 65; 2000 52. L'*ecclesia* menziunada en l'«Urbari curretic dals bains imperials» enturn il 840 correspunda probablmain a la baselgia da S. Martin da Ziràn. La tur d'abitat annectada ad ina chasa da purs datescha

dal 12avel/13avel tschientaner. Gia en il 13avel tschientaner tempriv vegniavan pratitgadas en il vitg l'allevaziun da muvel e la cultivaziun dad ers. Dapi il 1204 era preschenta sin la Muntogna da Schons ina comunitad da purs libers cun in'atgna dretgira bassa che sa radunava a Patagn (tudestg Pathein) sper Maton. Ils dretgs signurils, exercitads dals Vazs, alura dals Werdenbergs ed a partir dal 1456 da l'uestg da Cuira, èn vegnids cumprads ora il 1458. Ecclesiasticamain ha Maton fatg part da la plaiv da S. Martin a Ziràn fin a la refurmaziun. Il 1538 è vegnida instituìda ina plaiv autonoma sin la Muntogna Sura. Il 1728 han ins construì ina nova baselgia a Maton. Fin il 1851 ha Maton constituì in vischinadi dal cumin da Schons e furmava cun Vargistagn e Lon ina pitschna dretgira civila. La via charrabla è vegnida realisada il 1904–06. Il 2005 eran occupads dus terzs da la populaziun cun activitad da gudogn en il sector primar. La meglieraziun dal funs è vegnida terminada il 2005. Part da la populaziun da lingua rumantscha: 1990 80 % / 84 %; 2000 53,9 % / 82,7 % (meglra lingua/tuttas indicaziuns). Jürg Simonett

Casti-Vargistagn

Vischnanca politica, circuit Schons, district Rain Posteriur, constituìda il 1923 da la fusiun da las duas anteriuras vischnanca politica da Casti e Vargistagn, tudestg Casti-Wergenstein (uffizial). 1930 40 abitants, 1950 52; 1970 36; 2000 56. Jürg Simonett

Vargistagn

Anteriura vischnanca politica, circuit Schons, district Valragn, situada a 1485 m sin la Muntogna da Schons sura, reunida dapi il 1923 cun Casti a la vischnanca da Casti-Vargistagn. 1219 *Vergasteno*, tudestg Wergenstein (uffizial). 1808 85 abitants; 1850 68; 1900 22; 1920 23. Necropola dal 6avel e 7avel tschientaner, collocaziun d'in chastè, senza renviaments documentads. In sviament aut da la Püntcrap e da la Viamala vala oz sco betg probabel. La refurmaziun ha gi lieu avant il 1538. Chaplutta da S. Calixt (menziunada il 1538). Dal 1924–26 è vegni construì il stradun a Vargistagn ed il 1931 l'Hotel Piz Vizàn en possess da la Schweizerischer Metall- und Uhrenarbeiterverband (SMUV). Il 2004 è vegni avert il Center da Capricorns (center d'infurmaziun ed innovaziun). Per garantir il manaschi da l'hotel e promover il center regional è vegnida constituìda il 2003 ina Fundaziun Capricorn. Part da la populaziun da lingua rumant-

tscha: 2000 (Casti-Vargistagn) 55,4 % / 71,4 % (meglra lingua/tuttas indicaziuns). Jürg Simonett

Casti (Val Schons)

Anteriura vischnanca politica. Culegna serrada, situada en la part sut da la Muntogna da Schons, fusiunada il 1923 cun Vargistagn a Casti-Vargistagn. 1204 *ad Castellum*. 1835 29 abitants; 1850 27; 1900 23; 1920 20. Fastizs d'ina culegna fortifitgada dal temp medieval tempriv e dal temp autmedieval en il conturn da la baselgia che datescha dal 12avel tschientaner (patrocini nunenconuscent). Terren colonisà ed urbanisà gia a l'entschatta dal 13avel tschientaner. Il 1204 è documentada per l'emprima giada sin la Muntogna ina vischnanca da purs libers cun in'atgna dretgira civila. Ils dretgs suverans avevan l'emprim l'uestg da Cuira, alura ils baruns de Vaz ed ils de Werdenberg e suenter il 1456 puspè l'uestg da Cuira. Il 1458 è la val sa cumprada libra dals dretgs feudals. Ecclesiasticamain è la vischnanca da Casti sa separada da S. Martin a Ziràn pir suenter la refurmaziun (ca. 1530–35). Il 1627 furmava la culegna ina plaiv cuminaivla cun Donat, Pazen, Farden e Clugén, fin il 1851 ha ella constituì ina dretgira civila cun ils vischinadis surmenziunads entaifer il cumin da Schons. Construcziun da l'emprima via d'autos 1924–26. A Casti-Vargistagn, che viva oravant tut da l'allevament da muvel e da l'economia d'alp, è il rumantsch anc adina la lingua maioritara: 1880 99 % (lingua materna); 2000 55,4 % / 71,4 % (meglra lingua/tuttas indicaziuns). Jürg Simonett

Clugén

Anteriura vischnanca politica, circuit Schons, district Valragn. Fusiunada il 2009 cun la vischnanca politica dad Andeer. Vitg accumulà al pe da la Muntogna da Schons. 1243 *de Cloduno*. 1835 50 abitants; 1850 59; 1900 31; 1950 62; 2000 33. Gia a l'entschatta dal 13avel tschientaner terren colonisà ed urbanisà, cun allevament da muvel e cultivaziun da graun. Ruina dal chastè da Cagliatscha dal 13avel tschientaner. Il 1204 è documentada per l'emprima giada ina vischnanca da purs libers sin la Muntogna da Schons cun in'atgna dretgira civila. Ils dretgs suverans en la val han exercità l'emprim l'uestg da Cuira, alura ils de Vaz ed ils de Werdenberg e suenter il 1456 puspè l'uestg da Cuira. Il 1458 è la Val Schons sa cumprada libra. Ecclesiasticamain appartegneva Clugén a S. Martin a Ziràn. La baselgia datescha dal 12avel tschientaner (evtl. S. Sampley, menziunà ca. 1500), las picturas muralas realisadas en il stil dal Maister da Vuorz da ca. l'onn 1350. Refurmaziun 1530. Dal 1627–1894 ha Clugén furmà ina plaiv ensem cun las vischnancas da la part sut da la Muntogna da Schons, fin il 1851 in vischinadi dal cumin da Schons ed ina dretgira civila cun Donat, Pazen, Farden e Casti. Access a la via chantunala a Pignia Bogn 1951. Il 1981 ha la vischnanca purila, orientada vers Andeer, inizià la meglieraziun generala. Part da la populaziun da lingua rumantscha: 1880 100 %; 1941 61,3 % (lingua materna); 2000 3,0 % / 15,2 % (meglra lingua/tuttas indicaziuns). Jürg Simonett

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

L'hotellaria tranter fluriziun e crisas

■ «Hotellaria» è in term collectiv utilisà en la statistica svizra uffiziala per designar las diversas furmas da l'alloschament, saja quai l'hotellaria per propi (hotels, pensiuns, motels, chasas da cura, albierts) u la parahotellaria (chombras, abitaziuns da vacanzas, albierts da giuventetgna, campadis e.a.). La denominaziun sa referescha a manaschis ch'offran a giasts cunter pajament alloschi e dunsena, sa distinguend uschia da la restauraziun (senza alloschi) e da las chasas d'utilitad publica betg accessiblas a tuts.

Hotels da citad a las vias da transit

L'hotel (betg determinà sco noziun ni dal punct da vista giuridic ni economic) en il senn d'in lieu d'alloschament pli grond e da qualitad – per exempel l'Hotel Schwanen a Lucerna il 1835 – è entrà en diever en citads svizras en ils onns 1830 cura che l'augment dal traffic commercial e dal dumber da viagiatur surpassava las capacitads dals albierts. A l'entschatta d'ina hotellaria destinada a la recreaziun ed a la reconvalescenza dals giasts stevan ils hotels cun bogns da cura, per exempel a Ragaz Bogn (1841 respectivamain 1868), Tarasp u S. Murezzan (1860–64). En ils onns 1870 en suandads hotels da cura (curas climaticas, curas d'aua e da scotga) e sanatoris construids en regions pli autas, per exempel a Tavau, Claustra, Mustér, Flem ed Arosa.

Hotels sco lieus da recreaziun

Il success da l'alpinissem ha promovì a partir da la mesadad dal 19avel tschientaner l'hotellaria al pe da las Alps (surtut a Lucerna ed ad Interlaken), en vischnancas da muntogna e perfin sisum las muntognas dal spazi alpin e prealpin (surtut en la Svizra Interna, l'Engiadina, la Part Sura Bernaisa ed il Vallais): dapi il 1865 en vegnids erigids hotels pli pitschens e pensiuns e gia a partir dal 1875 gronds hotels da luxus, l'emprim a S. Murezzan Bagn, alura a S. Murezzan Suvretta ed en autras vischnancas da l'Engiadina. Il stil architectonic dals hotels e la gestiun dals manaschis s'orientava als giavischs dals giasts esters che provegnivan fin il 1914 surtut da l'Engalterra, da la Germania, da la Russia e dals Stadis Unids da l'America e che tschertgavan la bellezza da la natira, ma era in ambient social elevà. Igl en naschids hotels-palazis cun vista sin las muntognas, savens munids cun salas da giu (p.ex. l'Hotel

Bernina a Samedan, il Palace a S. Murezzan). Tals hotels duevan satisfar als basegns d'ina clientella bainstanta (aristocrazia e classa mesauna industrial e bancara) che restava ditg. L'hotellaria da luxus è era stada quella ch'ha rendì enconuscenta la Svizra sco pajais turistic d'emprima classa a l'exteriur. Als giasts da vacanzas da la classa mesauna offrivan ils hotels pitschens, las pensiuns ed ils albierts alloschis pajabels. Il svilup e la qualitad excellenta dals hotels en d'attribuir a l'epoca dals pioniers a singuls hoteliers ed a lur dinastias (Kienbergers, Bons, Badrutts e.a.) ch'eran savens parentads in cun l'auter e ch'han transmesso lur savair e lur chapital d'ina generaziun a l'autra.

Fluriziun e crisas da l'hotellaria dal 1914-45

En proporziun cun la populaziun aveva la Svizra Interna enturn il 1900, anc avant il Grischun, la pli gronda densitad d'hotels. In augment nuninterrut da giasts tranter il 1890 ed il 1914 ha manà a la gronda fluriziun da l'hotellaria grischuna. L'hotellaria da luxus, fermamain chapitalisada, è alura stada spezialmain suttaosta a crisas: l'absenza surtut da giasts esters durant l'Emprima Guerra mundiala ha mess l'hotellaria e las vischnancas dependentas da quella en ina profunda crisa finanziaria e sociala. L'hotellaria, colliada cun l'economia publica, era entant davenada l'emploidra la pli impurtanta. Perquai han surtut il chantun da Berna ed il Grischun, pertutgads fermamain da la crisa, empruvà da sustegnair cun agid da la Confederaziun l'hotellaria cun mesiras d'urgenza: il 1915 è vegnida introducida la concessiun uffiziala per novs hotels (clausula da necessitad vertenta fin il 1952); a la convenziun davart las tariffas interpretadas per evitar falliments en suandadas las fundaziuns da l'Uffizi naziunal svizzer dal turissem (1917/18), da l'Uniu grischuna da hoteliers (1918) e da la Schweizerische Hotelreuehand AG (cun sedia a Turig), ina societat fiduziaria per la sanaziun da l'hotellaria (1921). Cun investiziuns massivas, oravant tut en l'infrastructura sanitar, han numerus hotels fatg gronds debits e blers en ids facticamain da las familias fundaturas a las bancas. En il temp tranter las guerras mundialas en vegnids erigids era implants da transport locals ed a partir dal 1925 vias d'autos ch'han avert la cuntrada, en in'emprima fasa al turissem da stad.



«Grand Hotel Surselva» a Flem, erigi l'onn 1907.

Suenter il 1930 han runals da skis (ils emprims en vegnids averts a Tavau il 1934) promovì il turissem d'enviern. La crisa economica mundiala è s'effectuada en maniera ordvart negativa sin l'hotellaria grischuna: il dumber da pernottaziuns è sa diminui da 4,1 miu. il 1929/30 a 3,3 miu. il 1938/39 respectivamain a 2 miu. il 1939/40. Durant la Segunda Guerra mundiala ha l'occupaziun dals hotels cun giasts svizzers e persunas internadas pudì mitigiar la crisa (pernottaziuns 1940–45: 2,8 miu. en media).

L'epoca dal turissem da massa

La nova partenza suenter il 1945 è stada difficila, malgrà l'augment da las frequenzas da giasts. En confrunt cun l'hotellaria a l'exteriur, construida en tutta prescha sin las ruinas relaschadas da la guerra, ha quella svizra stui vegnir suttaossa ad ina renovaziun da la substanz architectonica. Ils custs da construcziun elevads e la fermezza dal franc svizzer han dentant impedì la modernisaziun da l'hotellaria. La stagn d'enviern aveva pudì far in svilup allegraivel grazia a las diversas pussaivladads da far sport; blers hotels n'eran dentant, per mancanza da stgouda-

ments, betg preparads. La concorrenza da l'exteriur pli favuraivel aveva sfurzà ultra da quai a sbassar ils custs, tranter auter cun raziunalisar ils process da lavur e spargnar forzas da lavur. Tuttina frequentavan adina damain giasts ils hotels en Svizra. La mobilitad creschenta ha alura promovì il turissem dal di e la parahotellaria, e l'augment dal standard da vita ha rendì las vacanzas a l'ester pli bunmargà.

A partir dal 1945 han las differentas furmas da l'hotellaria subì ina revitalisaziun: ils manaschis da cura (centers da rehabilitaziun, clinicas autalpinas, bogns da cura e.a.) en vegnids amplifitgads ed ils manaschis per passants (motels, hotels-garni e.a.) renovads; las interpresas da vacanzas activas (hotels da famiglia, hotels da sport) han integrà novas purschidas en lur program d'activitad (kurs, simposis, congress). En numerus lieus dal Grischun è sa furmada ina monocultura turistica, da la quala en sa fatsg dependents era ils mastergns e l'agricultura. Enturn il 1960 ha il turissem d'enviern superà quel da stad. Tranter il 1945 ed il 1980 è l'hotellaria s'augmentada per ca. 30 % pernottaziuns, fin il 2000 è il dumber sa diminui per ca. 7 %, dapi alura crescha el puspè, cumbain fitg plaun. A l'augment considerabel da pernottaziuns en l'hotellaria en ils onns 1980 (fin a 6,9 miu. il 1990/91) è suandada ina regressiun cuntinuanta a ca. 5,6 miu. il 2003/04, alura in augment a ca. 5,9 miu. il 2006/07. La midada structurala dals manaschis d'hotel è ida surtut a disfavour da las fatschentas pitschnas e mesaunas (fin a 50 letgs).

La parahotellaria

Fin il 1940 ha l'hotellaria caracterisà ils lieus turistics, a partir dal 1945 surtut la parahotellaria. Quella aveva sias antecessuras en las «chombras per giasts» affittadas da privats en il 19avel tschientaner. En ils onns 1860 ha il Club alpin svizzer cumenzà a construir sias chamonas en las muntognas, suandadas da las chamonas dals amis da la natira. A partir dals onns 1920 en vegnids erigids, tenor il model tudestg, albierts da giuventetgna. Durant il tranterguerras han era privats construi chasas da vacanzas ed instituziuns socialas han investì en chasas ed abitaziuns da vacanzas (colonias da vacanzas). En ils onns 1950 ha inizià il turissem da massa, provocond en il spazi alpin in enorm boom da construcziun cun entiras colonias da chasas ed abitaziuns da vacanzas en possess dad esters (segundas abitaziuns). Intginas da

quellas (p.ex. a Lags-Murschetg) furman veritablas colonias da vacanzas, abidades mo temporarmain. Cun l'introducziun da l'uschenumnada proprietad en condomini (1965) en vegnidas adimplidas las cundiziuns legalas per la construcziun da chasas d'appartaments cun abitaziuns d'atgna proprietad. La construcziun dischordnada tras segundas abitaziuns è vegnida franada levamain tras la reducziun da las zonas da construcziun e tras la limitaziun da la vendita da terren da bajegiar ad esters. Plazzas da campar, fittadas per grond part durant l'entir onn ad ina clientella stabla, han survegnì in'infrastructura adina pli pretensiusa. En ils onns 1970 en vegnids en moda hotels d'appartaments (residenzas en proprietad cun colliaziun ad ina infrastructura d'hotel). Bainbaud ha il dumber da letgs da la parahotellaria superà quel dals hotels e da las pensiuns. En ina ulteriura fasa d'expansiun en era ils implants da transport vegnids schlargiads massivamain (p.ex. a Lags e Suagnign). Las cifras da pernottaziuns han stagnà a partir dal 1980 ed en alura sa diminuidas da 14,7 miu. il 1990/91 ad 11,9 miu. il 2002/03. Il process da restructuraziun da l'hotellaria n'è anc betg terminà, era sch'ils hotels ed ils manaschis da cura han pudì schlargiar lur capacitad dapi la guerra fin il 2000/01 per 12 %. L'hotellaria è dentant vegnida superada da la parahotellaria per quai che riguarda la purschida da letgs: la part da quella importava il 1980/81 77 % dals letgs (ca. 54 % da las pernottaziuns), il 2002/03 73 % (ca. 52 %). Bleras vischnancas promovon dapi intgins decennis in turissem moderà. Il chantun Grischun da sia vart sustegna surtut quellas furmas dal traffic d'esters cun in aut grad da competitivitad sco era ils lieus che pon concurrer ad in nivel internaziunal. Gia en l'emprima mesadad dal 20avel tschientaner generava il turissem en buns onns 30–40 % da las entradas dal Grischun, en la segunda mesadad dal tschientaner è quella cumpart schizunt s'augmentada a ca. 50 %. Jürg Simonett



L'Europa bainstanta sa scuntra en ils lieus da cura. (San Murezzan, december 1930).

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Da Castaneda fin a Rossa – en viadi tras la Val Calanca

■ La Calanca furma ina val laterala situada en il district Moesa. Il circuit cumpiglia las otg vischnancas da Castaneda, Sta. Maria en Calanca, Buseno, Arvigo, Braggio, Selma, Cauco e Rossa. L'economia da la val è adina sa basada sin l'allevament da muvel; la suletta industria furma quella da las chavas da granit ad Arvigo. Bliers abitants da la Val Calanca han gudagnà tschienteners a la lunga lur paun da mintgadi en l'emigraziun. Fin il di dad oz è la vallada marcada d'ina ferma depopolaziun.

Castaneda

Vischnanca politica, circuit Calanca, district Moesa, situada a l'entrada en la Val Calanca sin ina terrassa orientada vers il Mesauc. Attestada per l'emprima giada il 1295. 1808 129 abitants; 1850 188; 1860 232; 1900 178; 1950 182; 1960 151; 2000 221. Ina necropola dal temp da fier, enconuscenta dapi ca. 1850, e fastiz d'in abitadi en ils contorns da la baselgia da Castaneda en vegnids perscrutads sistematicain dapi il 1928. En ils onns 1978–80 han ins en pli chattà a Pian del Remit al nordvest da la baselgia sut ina stresa dal temp da fier fastiz d'in abitadi e d'in arader dal temp neolitic. En il temp modern ha Castaneda suandà il destin da la Val Calanca ed è daventada, sco ils auters abitadis da la val, ina vischnanca autonoma pir il 1851. La baselgia parochiala (menziunada il 1544), consecrada l'emprim al s. Salva-der, pli tard a s. Steivan, è vegnida transfurmada il 1633 en il stil baroc e restaurada il 1932–33. Filiala da Sta. Maria en Calanca, baselgia da la plaiv dapi il 1848. Menziun speciala merita era la chasa signurila (en in nausch stadi) dal chavalier Giovanni Antonio Gioiero ch'ha giugà ina rolla en ils Scumbigls grischuns. A Castaneda sa chatta dapi il 1982 la scola primara per l'entira Val Calanca. Sin giavisch d'Adele Duttweiler, la vaiva da Gottlieb Duttweiler, ha la federaziun da las cooperativas Migros laschà construir il 1987 sur Castaneda ina clinica da medischina complementara (chasa da cura Al Ronc). Suenter sia serrada il 1999 en ils edificis vegnids renovads e mess a disposiziun ad auters intents. L'onni 2000 lavuravan 24% da las persunas cun activitad da gudogn a Castaneda en il sector terziar, 33% gievan a lavurar utro, oravant tut a Roveredo e Blinzuna. L'agricultura era oriundain il sector economic principal a Castaneda; il 1999 existiva anc in sulet manaschi puril ed intginas interpresas da construcziun. Il 1999 han ins installà en la nova chasa communal in'expoziun permanenta davart la preistorgia da Castaneda.

Cesare Santi

Santa Maria en Calanca (vischnanca)

Vischnanca politica, circuit Calanca, district Moesa, situada a 949 m sin ina terrassa orientada vers il Mesauc. 1219 sancete Marie in Calanca. 1808 207 abitants; 1850 206; 1900 163; 1950 202; 2000 111. En la Val Calanca han ins scuvert intginas fossas dal terz tschientaner a.C. En il 13avel tschientaner han ils de Sacco/de Sax acquistà da nobels locals la tur medievale che dominescha, ensem cun la baselgia parochiala, il vitg. Fin il 1796 ha Santa Maria en Calanca appartegnì al vischinadi da Calanca, alura a la Val Calanca dadora ed è daventada autonoma il 1851. La baselgia parochiala, menziunada dapi il 1219, è deditgada a s. Maria Assunta (l'Assumziun da Maria) ed è la baselgia principala da la val e lieu da processions dapi il 17avel tschientaner. L'edifici ad ina nav cumpiglia differents stils e numerus frescos, tailas en ieli ed auters motifs decorativs; l'altar grond originar, construi il 1512 dad Ivo Strigel, vegn conservà dapi il 1887 en il Museum istoric da Basilea. La part da persunas cun occupaziun da gudogn a Santa Maria en Calanca è fitg bassa, intginas abitants pratitgeschan anc a l'entschatta dal 21avel tschientaner l'agricultura e l'allevament da muvel.

Cesare Santi

Santa Maria en Calanca (chastè)

Ruina d'in chastè sin ina spunda grippusa



Santa Maria en Calanca cun sia baselgia e ses chastè.

MAD

sur la baselgia parochiala en la vischnanca da Santa Maria en Calanca. A l'emprima periodo (forsa anc avant il 1200) appartegnan ils fastiz d'in mir da tschinta, che suonda en maniera irregulara l'ur dal grip, e d'in tract d'abitare en la part settentriunala (fragments da liadira cun restanzas da picturas en rument). Da la segunda periodo (ca. 1300) deriva l'imposant donjon pentagonal (ina tur da defensiu e d'abitare). Il plaun il pli inferiur vegniva duvrà sco cisterna, dus plauns superius eran equipads cun cheminés e latrinas. La conclusiun superiura consistiva d'ina platta da defensiu. Il chastè era oriundain ina sedia da l'aristocrazia locala (1203 ser Anricus de Calanca). En il 13avel tschientaner è el passà als Saxs ch'han laschà construir il donjon. Residenza da members da la famiglia Sax, documentada il 1291, 1296 e 1316. Il chastè sez è attestà pir en il 15avel tschientaner (il document dal 1253, redigi en il castro Calanca, è ina falsificaziun dal 15avel tschientaner). Il chastè è vegni bandunà probablmain en il decurs dal 15avel tschientaner.

Werner Meyer

Buseno

Vischnanca politica, circuit Calanca, district Moesa. Fin il 1851 ha Buseno appartegnì a la vischnanca da Calanca, dapi alura è ella ina vischnanca autonoma. 1611 575 abitants; 1803 344; 1850 248; 1900 198; 1950 241; 1990 97; 2000 110. Il center da Buseno, che dat al vitg il num, sa chatta sin ina terrassa sin la spunda dretga da la Calancasca. A Molina, sut il vitg, sa chatta in lajet artificzial. Buseno cumpiglia era ils aciauns da S. Carlo (mises) e Giova; quest ultim appartegneva antruras a S. Vittore ed è vegni attribui a Buseno il 1899 tras votaziun chantunala. La baselgia parochiala, consecrada il 1438 als ss. Pieder ed Antoni avat, è vegnida amplifitgada il 1776 e restaurada il 1990. Il 1984–88 è vegnida erigida a Giova la nova baselgia, deditgada a Nossadonna da Fatima. La plipart dals abitants da Buseno vivan anc oz da l'agricultura e da l'allevament da muvel. La vischnanca ha subi a ses temp ina ferma emigraziun da vaidrers en Frantscha e da vendiders da rascha en Austria ed en Germania.

Cesare Santi

Arvigo

Vischnanca politica, circuit Calanca, district Moesa. 1453 Arvicho. Lieu principal da la val e sedia da la dretgira cirquitala, incorporaziun da Landarenca 1980. 1691 400 abitants; 1733 352; 1850 110; 1900 155; 1950 115; 2000 (incl. Landarenca) 92. Il 1496 entran il Mesauc e la Val Calanca sco otgavla dretgira auta en la Lia Grischa; la Calanca daventa ina da las quatter squadras (cumin) da questa dret-

gira auta ed Arvigo ina mesa degagna (vischinadi). Il 1590 daventa Arvigo ina chaplania, il 1611 ina plaiv. La baselgia da S. Luregn, menziunada il 1453, vegn reconstruida en il 17avel tschientaner e restaurada en il 19avel tschientaner. Auters edificis sacrali en las chapluttas da la Madonna Addolorata (Nossadonna da las dolurs, 17avel tschientaner) e da S. Gion Nepomucen (ca. 1710). La populaziun d'Arvigo viveva en emprima lingia da l'allevament da muvel e da la pasculaziun. En ils tschientaners passads en blers emigrads sco vaidrers e vendiders da rascha en Baviera ed en Austria. Il 1920 han ins cumenzà ad explotar plattamorta verda (paragnais). Il 2001 occupavan duas firmas da granit var 60 persunas.

Cesare Santi

Landarenca

Anteriura vischnanca politica, circuit Calanca, district Moesa. Fracziun da la vischnanca politica d'Arvigo dapi il 1980. Situada a 1272 m sin ina terrassa sin la spunda dretga da la Calancasca. 1550 Lan Darencha. 1773 117 abitants; 1850 71; 1900 72; 1950 37; 1970 20; 1990 14. Landarenca ha appartegnì a la vischnanca da Calanca fin il 1851, alura è ella stada autonoma fin il 1980. Landarenca è accessibel mo cun ina teleferica averta il 1961 davent da Selma (ca. 400 m pli bass) u sin ina senda da sauma. La baselgia da Landarenca, menziunada il 1529, è deditgada als ss. Bernard e Niclà; ella è vegnida transfurmada pliras giadas, oravant tut en il 17avel tschientaner, e restaurada en ils onns 1969–74. Landarenca è stada la segunda vischnanca dal Grischun (suenter Cuir) a conceder il dretg da vuschar a las dunnas sin plaun communal (1968). Il 2007 devi anc in manaschi puril a Landarenca, ils auters abitants cun activitad da gudogn penduleschan fin a Blinzuna.

Cesare Santi

Braggio

Vischnanca politica, circuit Calanca, district Moesa, situada a 1320 m sin ina terrassa da la vart sanestra da la Val Calanca, cuntanschibla mo cun ina teleferica (construida il 1961) e sur ina via da sauma. 1419 Braggio. 1850 123 abitants; 1900 108; 1950 98; 1990 54; 2000 62. Braggio fascheva part sco mesa degagna da la vischnanca da Calanca, il 1851 è ella daventada ina vischnanca autonoma. La baselgia parochiala da S. Bartolomeus, menziunada gia il 1611, è vegnida consecrada cun il santeri il 1633. L'economia d'alp e las entradas dals emigrants (vaidrers, vendiders da rascha) han furmà ditg la basa economica da Braggio. I dat anc oz diversas familias da purs a Braggio. Arrundaziun dal terren 1934, novs rempars da lavinas 1976. Il plan re-

gulativ communal datescha dal 1979. Il 1973 è la scola communal vegnida serrada e transfurmada en in albiert per giuvenils.

Cesare Santi

Selma

Vischnanca politica, circuit Calanca, district Moesa, situada a 931 m sin la spunda sanestra da la Calancasca. 1683 300 abitants; 1733 200; 1830 93; 850 73; 1900 71; 1950 60; 1970 34; 1990 31; 2000 44. Fin il 1796 ha Selma appartegnì a la Squadra Calanca, dal 1796 fin il 1851 a la Val Calanca dadens, dapi alura furma ella ina vischnanca autonoma. La baselgia parochiala, consecrada als ss. Giachen e Peder, è vegnida erigida en ils onns 1662–67 en sia furma actuala sin ils fundaments d'in edificiu dal 1582, cun la medema dedicaziun. La chaplutta pli veglia è quella da S. Roc al Ponte (16avel tschientaner), pli tardiva en quella da S. Antoni da Padua (1716, restaurada il 1900) e da Nostra Signora di Einsiedeln al Monte (1773). En ils tschientaners passads en emigrads numerus abitants da Selma sco vaidrers en Frantscha e sco martgadants da rascha e catram en Austria ed en Germania. A l'entschatta dal 21avel tschientaner pratitgeschan ils da Selma anc in pau agricultura. Selma enconuscha in remartgabel turissem da stad e d'enviern, particularmain da giuvens, era grazia a l'infrastructura turistica ed a la pendulara che furma dapi il 1961 (sper ina senda) la suletta colliaziun cun Landarenca.

Cesare Santi

Bodio

Fracziun da la vischnanca politica da Cauco, situada a 955 m sin la spunda dretga da la Calancasca. 1476 Poggio. Bodio cumpiglia ina dunsaina chasas, var 15 uigls ed insaquants graners sin palafittas. En il center dal vitg sa chatta la chaplutta da Nossadonna da Loreto, erigida il 1650 e deditgada oriundain a s. Bernard da Siena. La via principal da la val passa tras il center dal vitg.

Cesare Santi

Cauco

Vischnanca politica, circuit Calanca, district Moesa, situada a 1132 m sin la spunda sanestra da la Calancasca sin il cugn d'ina bova dal temp preistoric. A Cauco appartegnan era las fracziuns da Bodio (anc abitada), Lasciallo e Masciadone. 1683 ca. 400 abitants; 1803 149; 1850 120; 1900 104; 1950 92; 1990 30; 2000 37. Politicain la Val Calanca ed è daventada ina vischnanca autonoma il 1851. La baselgia da S. Antoni Avat è menziunada per l'emprima giada il 1497; erigida sco baselgia parochiala il 1633, è ella vegnida engrondida e munida d'in nov clutger il 1683 e restaurada il 1978–89. A Cauco existivan intgins mulins ed ina traja per ela-

varur il crap da lavetsch. Menziun speciala meritan era las numerusas acias da Cauco (oz bandunadas) che servivan antruras a l'economia d'alp; quella constituaiva, cun l'allevament da muvel e l'emigraziun periodica, la basa economica principal da la populaziun.

Cesare Santi

Santa Domenica

Anteriura vischnanca politica, circuit Calanca, district Moesa, dapi il 1982 fracziun da la vischnanca politica da Rossa, situada a 1040 m al punct il pli stretg da la Val Calanca. Il vitg guarda quasi a perpendicul sin il flum Calancasca. 1733 191 abitants; 1808 280; 1850 102; 1900 110; 1950 41; 1980 23. Fin il 1796 ha Santa Domenica appartegnì a la vischnanca da Calanca, dal 1796 fin il 1851 a la Val Calanca dadens. Il 1851 è daventada la vischnanca autonoma. La baselgia parochiala, deditgada a s. Domenica, è ina da las pli impurtantas baselgias baroccas dal Grischun; ella è vegnida erigida il 1664–72 da l'architect Giovanni Serro sin in edificiu dal 1414 e conserva numerus picturas da gronda valur, tranter auter frescos da Francesco Antonio Giorgioli. La chaplutta da la Madonna Addolorata (Nossadonna da las dolurs) datescha dal 17avel tschientaner, quella da l'Immacolata dal 19avel tschientaner. Las chasas han ina basa da crap ed ina part sura da lain, intginas en decoradas cun frescos dal 17avel e 18avel tschientaner.

Cesare Santi

Augio

Part da la vischnanca politica da Rossa, situada a 1034 m a la riva dretga da la Calancasca. 1850 168 abitants; 1900 109; 1950 102; 1980 45. 1301 Augio. Il 1496 furmava Augio ina da las mesas degagnas (vischinadis) da la vischnanca da Calanca. Vischnanca autonoma 1851–1982, alura incorporada en la vischnanca politica da Rossa. L'actuala baselgia, deditgada a s. Giuseppe ed a s. Antoni da Padua, datescha dal 1784; ella sa chatta al lieu d'ina chaplutta construida avant il 1683. L'economia d'Augio è stada liada da tuts temps a l'allevament da muvel e durant tschientaners a l'emigraziun. Cun daners dals emigrants d'Augio, activs sco vaidrers en Frantscha e vendiders da rascha en la Baviera ed en il Tirol, è vegnida erigida en il 18avel tschientaner tranter auter la Casa Spadino (oz center cultural La Cascata).

Cesare Santi

Rossa

Vischnanca politica, circuit Calanca, district Moesa, situada a 1088 m entadim la Val Calanca. Dapi il 1982 cumpiglia Rossa las anteriuras vischnancas dad Augio e Santa Domenica. 1694 Rossa. 1683 450 abitants; 1773 331; 1850 186; 1900 181; 1950 117; 1980 51; 2000 132. Fin il 1851 ha Rossa appartegnì a la vischnanca da Calanca e dal 1796 fin il 1851 a la Calanca dadens, alura è ella daventada ina vischnanca autonoma. La baselgia parochiala, deditgada a s. Bernard, è vegnida construida tranter il 1677 ed il 1684. Rossa posseda diversas chapluttas, consecradas a s. Carlo al Sabbione (1694), a Nossadonna da la Naiv (1683, a Valbella), a s. Maria Madlaina al Calvari (1691), a Nossadonna dal Sang, a Nossadonna dal Rusari (18avel tschientaner) ed a s. Roc (1725). En ils tschientaners passads en emigrads numerus da la Val Calanca sco vaidrers e raschers en Frantscha, Austria e Germania. Oz vegn anc pratitgà l'allevament da biestga (muvel e nursas), cumbain en dimensiuns blier pli modestas che pli baud.


Cesare Santi

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Sullevaziun dal Partenz cunter il domini habsburgais il 1622. (Gravura dal 17avel tschientaner).



Il signuradi da Tarasp è restà fin il 1803 en possess austriac. (Carta postala, enturn il 1900).

Las relaziuns tranter la dinastia von Habsburg e la Republica da las Trais Lias

■ Il num da famiglia deriva dal chastè da Habsburg che giascha en il chantun Argovia dad oz. L'onn 1273 è Rudolf von Habsburg daventà imperatur tudestg; a partir dal 1438 enfin la fin da l'imperi l'onn 1806 ha la famiglia occupà quasi nuninterruttamain questa posiziun da pussanza. Cumbain ch'il center da la pussanza territoriala da la famiglia è sa spustà vaira baud en direcziun da l'Austria odierna, èn las relaziuns cun la Republica da las Trais Lias restadas ordvart entretschadas (en spezial en las Otg Dretgiras ed en l'Engiadina Bassa). Pir il 1803 ha il chantun Grischun surpiglià il signuradi da Tarasp; il domini da Razén è schizunt restà fin il 1809 en possess habsburgais.

Il 1282, suenter la mort dal cont Rudolf V von Rapperswil, è l'imperatur Rudolf von Habsburg sa patronà da l'avugadia imperiala sur la Val d'Ursera ch'el ha alura cedi a ses figls. Il 1382 ha la val obtegni la brev da libertad ed il 1410 il dretg da vischinadi da l'Uri ed è ida qua tras a perder per ils Habsburg e per la claustra da Mustér ch'aveva pudì mantegnair tscherts dretgs en la val.

Il 1325 ha Ludwig von Bayern reconuschì l'imperatur Friedrich von Habsburg sco cunregent, ma il profit è stà pitschen. En consequenza è ses frar Albrecht II von Habsburg s'occupà pli intensivamain da l'estensiun dal domini territorial ed economic, oravant tut en l'Austria. Il 1335 han ils Habsburg acquistà il domini en il ducadi imperial da la Carinzia, ed il 1363 ha la duchessa Margareta Maultasch cedi il Tirol al duca Rudolf IV von Habsburg. Il Tirol furmava ina punt tranter il possess dals Habsburg en Rezia, en la Confederaziun ed en l'Austria e vegniva regi dal cont dal Tirol che residava a la curt da Puntina. Il 1363 han ils von Matsch cedi sut squitsch politic lur feud da Tarasp al cont von Tirol. La pressiu creschenta da vart da quest vischin nov e privlus è era sa manifestada en la fundaziun da la Lia da la Chadé (1367) ed en las faidas dal 1388–1415 tranter l'uvestg Hartmann II von Werdenberg-Sargans (sustegni dals signurs ed avugads von Matsch) cunter l'Austria e Razén. Il 1464 ha Ulrich IX von Matsch vendi il chastè ed il domini da Tarasp per 2000 renchs al duca Sigmund von Habsburg. Il passadi dal domini dals von Matsch als Habsburg ha gi tranter auter per consequenza che Tarasp è restà catolic. Quest feud tirolais è restà en possess dals Habsburg fin il 1803, daventond «ina nauscha spina en l'egl» da l'Engiadina Bassa e da la Republica retica (Jacob Anton Vulpis, «Historia Raetica»). Dal 1421–1803 possedeve l'Austria era l'avugadia legitima sur la claustra da Münstair (exequida illegitimamain sco feud ereditar).

Tensiuns politic-giuridicas e guerras

Las relaziuns giuridicas d'obedienscha eran fitg diffusas en la regiun da l'Engiadina Bassa, da la Val Müstair e dal Vnuost. Suenter la Sentenzia da cumpromiss da Gluorn dal 1471 concernent ils subdits dal ducadi tirolais en l'Engiadina Bassa, è alura prorutta il 1475 la Guerra da las giaglinas, e las tensiuns politic-giuridicas en la regiun èn finalmain explodidas en la Battaglia a la Chalavaina (1499). Il 1470 ha Sigmund von Habsburg cumprà dal cont Hugo von Montfort-Tettnang las sis dretgiras interiusas da la Lia da las Diesch Dretgiras ch'el ha vendi als conts von Matsch e reacquistà il 1477. Il 1496 ha l'avugà Gaudenz von Matsch vendi las duas dretgiras exteriuras d'Aschera e da Castels a Maximilian. L'avugà austriac sur las (ussa) Otg Dretgiras ha transferi sia sedia a Castels.

Il 1497 ha Maximilian acquistà tras barat dals Zollerns il signuradi da Razén ch'ha permess als Habsburg da controllar il traffic da transit en il Grischun (regiun da La Punt/Rehanau cun Razén, Panaduz, Favugn e Domat) e da far valair sia influenza sin la Lia Grischa (al signuradi da Razén appartegnivan era Sursaiisa e Tenna) e qua tras era sin la politica da la Republica da las Trais Lias. Il signur feudal da Razén proponiva numnadamain minga trais onns ils trais candidats per l'uffizi da landrehter e controllava ils plis da ses domini. Suenter esser vegni administrà da differentas famiglias indigenas (Marmels, Stampas, Plantas, Travers), è il pegn vegni cumprà ora il 1696 ed il signuradi è vegni suttaless fin il 1803 directamain a l'administraziun tras la Chasa Habsburg-Austria. Il 1819 è el vegni annectà sin fundament dal conclus dal Congress da Vienna dal 1815 al chantun Grischun.

Tranter Habsburg-Austria e Habsburg-Spagna

Suenter la Guerra svabaisa han ils contracts conclus il 1500 ed il 1503 a Feldkirch stabili la pasch e determinà ils cunfins ed ils dretgs da las Lias, da l'uvestg e da l'Austria (fin 1641/42). A la Republica da las Trais Lias èsi reussi d'impedir in'expansiun da l'Austria en l'Engiadina Bassa, ed era l'uvestg da Cuira ha pudì defender ses dretgs feudals (subdits da la Chadé) ed ecclesiastics en il Vnuost. Las tensiuns ed alianzas dal temp suenter il 1530 avevan per ordinari motivs confesziunals. En il 16avel tschientaner èn daventads ils servetschs mercenars en favur da l'Austria pli e pli impurtants, els n'han dentant mai cuntanschì la dimensiun da quels en favur da la Frantscha.

Tranter il 1556 ed il 1714 è la lingia Habsburg-Spagna, possessura dal domini en il ducadi da Milaun, stada d'impurtanza primordiala per las Lias, oravant tut per la politica proseguida da vart catolica. La Spagna aveva demonstrà sia pussanza cun



Maximilian von Habsburg (imperatur a partir dal 1508) ha consolidà il possess da famiglia en il Grischun dad oz. (Albrecht Dürer, 1519).

eriger il 1603 la fortezza da Fuentes a Collico sisum il Lai da Com, ed ella è stada omnipreschenta en la politica grischuna durant ils Scumbigls grischuns. La lingia Habsburg-Austria ha profità da quest'ocasiun ed è sa patronada il 1618 da la dretgira d'Untervalven (subdits episcopals). Il 1621–22 ha ella occupà cun forza armada sut il commando dad Alois Baldirun las valladas grischunas tranter Cuira e l'Engiadina Bassa ed ha dictà il settember 1622 a las Lias il Contract da Lindau ch'ha privà quellas tranter auter da las Otg Dretgiras e da l'Engiadina Bassa. Suenter la terza invasiun austriaca dal 1629 e l'interludi franzos dal 1632–36 (Rohan) han il Capitulat da Milaun (1639, Capitulats da Milaun) ed il Contract da Feldkirch (1641 e 1642) puspè attribui las Terras subditas a la Republica da las Trais Lias e restabili ils cunfins ed ils dretgs d'avant las invasiuns ed occupaziuns militaras estras. L'uvestg ha dentant desistì da la giurisdicziun seculara en las dretgiras da Danuder, Gluorn e Damal ed il 1657 era en quella da Schludern.

Dal 1639–1714 èn las Lias puspè stadas sut l'influenza dals partisans da la Spagna-Milaun, represchentada dals ambassadurs Casati. Il 1649–52 èn las Otg Dretgiras sa cumpradas libras da l'avugadia austriaca, il 1652 era l'Engiadina Bassa (senza Tarasp).

L'emprova da cumprar ora il signuradi da Razén n'è dentant betg reussida. Durant la Guerra da successiun spagnola (1701–14) han millis Grischuns cumbattì da la vart franzosa (Louis XIV) cunter l'alianza imperiala da Leopold I, al qual il Grischun ha permess plirs passagis da truppas. Suenter la Pasch da Rastatt (mars 1714) ha l'Austria regi sur il ducadi da Milaun, e la Republica è tuttenina stada circumdada da trais varts da l'Austria. Ella è alura sa distanziada politicamain da la Frantscha per s'orientar, ensemble cun ils Salis sco exponents dals interess austriacs, a l'Austria. Suenter il 1714 è sa fatg valair adina pli ferm il dretg penal da la Carolina. Il 1726 han las Lias signà cun l'Austria-Milaun il Segund Capitulat da Milaun, ed il 1728 ha l'uvestg Joseph Benedikt von Rost vendi la Val Müstair a l'Austria (cumprada enavos il 1762 cun perdita da Tuer). La renovaziun dal (Terz) Capitulat da Milaun il 1763 ha provocà in desaster: la Republica da Vaniescha ha expulsa per vendeta tut ils mastergnants e commerziants grischuns (plirs millis) da ses territori, dond qua tras a l'emigraziun grischuna in auter caracter e novas destinaziuns.

La fin da la dominanza austriaca en il Grischun

En spetga d'attatgas franzosas e sin du-

monda da las autoritads grischunas han truppas austriacas occupà l'october 1798 il Grischun, ellas èn dentant vegnidas rebattidas il 1799. Il Contract d'armistizi da Parsdorf ha attribui a l'Austria l'Engiadina sco zona d'occupaziun ch'è vegnida guvernada pauc temp (stad 1800) da la Regenza interimala «austriaca», presidiada dad Anton von Salis-Soglio, davent da Zernez.

Il 1803 ha l'Acta da Mediazion privà l'Austria dal domini grischun, ed en il Tractat da Schönbrunn dals 14 d'october 1809 han ils Habsburg cedi il signuradi da Razén a Napoleun. Il Congress da Vienna ha alura surdà il 1815 al chantun Grischun la cumplaina suveranità entaifer ses territori, ed il 1819 è Razén vegni annectà formalmain al Grischun. L'Austria ha obtegni las anteriuras Terras subditas (Buorm, Vulcina e Clavenna). Las ultimas emprovas da reacquistar ils bains grischuns pers tras la confisca èn vegnidas interprendidas cun success modest en ils onns 1830.

La preschientscha dals Habsburg en il Grischun è sa limitada a partir da quel mument a singuls represchentants. Suenter sia abdicaziun sfurzada è Carl I, l'ultim imperatur da l'Austria-Ungaria, vegni exilià en Svizra, ed intgins da ses uffants han passentà l'enviern 1919/20 e 1920/21 a Mustér (en il Hotel Lucmagn). Sia consorta, Zita von Bourbon-Parma, ha tschernì sco residenza da vegliadetgna la claustra da S. Gion a Zerras, nua ch'ella è morta il 1989. La lunga ed intensiva preschientscha dals Habsburg respectivamain da l'Imperi habsburgais en il Grischun sa reflectescha era en las vopnas da las Lias, dretgiras e vischnancas.

Il topos da l'Austria sco inimia incharnada da la Confederaziun, colportà en l'istoriografia svizra e grischuna oravant tut dapi Aegidius Tschudi (16avel tschientaner), gioga ina rolla bler pli modesta en il Grischun. L'integrasiun legala dals dominis e dals dretgs feudals austriacs (Tarasp, Razén, Otg Dretgiras e.a.) en il corp politic e giuridic da la Republica da las Trais Lias e lur vischinanza, per ordinari paschavla, n'han betg pudì far nascher ina tenuta antiaustriaca ferma avunda per nutrir in affect analog a quel da la tradiziun da libertad da la Confederaziun.

Adolf Collenberg

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Tavau – dals bains dals Gualsers al lieu da cura e da congress

■ La regiun da Tavau è vegnida urbanisada en in'emprima fasa da purs rumantschs e colonisada silsunter tras Gualsers. En il 19avel tschientaner è Tavau sa sviluppà ad in center internaziunal da cura e da vacanzas e furma oz – sper Cuira – il sulet abitàdi en il Grischun cun varga 10 000 abitants.

Pass dal Wolfgang

Passadi a 1631 m che collia Claustra cun Tavau. Il Wolfgang appartegna a l'intschess idrografic da la Landquart. Tenor Durich Chiampell (ca. 1570) sa numnava quel intschess antruras *Badingiu*, vul dir cuntrada da guauds da badugns. En quella existiva a ses temp ina chaplutta, erigida a l'ur da la via e deditgada a s. Wolfgang, ma ida en muschna gia dal temp da Chiampell. A chaschun da la construcziun da la Viafier retica il 1890 ha il Wolfgang obtegnì in'atgna staziun. En sia vischinanza existan oz in hotel, ina chasa da cura (clinica alpina per asmaticers), diversas interpresas e chasas da vacanzas. *Martin Bundi*

Davos (Tavau)

Vischnanca politica, circuit Tavau, district Partenz/Tavau (fin il 2001 Landquart Sura), situada en la Val da la Landwasser, cun las fracziuns da Tavau Vitg, Tavau Plaz, Frauenkirch, Glaris e Monstein e cun plirs aclaus en la val principala (Laret, Wolfgang, Clavadel, Spina e.a.) e divers abitàdis en las vals laterals dal Flüela, Dischma e Sertig, a partir dal 2009 era cun la fracziun da Tain. Tenor la surfatscha è Tavau la segund gronda vischnanca da la Svizra e la pli gronda vischnanca dal Grischun. 1213 *Tavaus*, tudestg Davos (uffizial). La vischnanca politica da Tavau correspunda al circuit da Tavau e cumpiglia in territori che s'extendan dal Schwarzsee (Laret) sur l'intschess da la Landwasser fin a la chavorgia al pe dal Silberberg (Monstein). L'uschenumna Oberschnitt (vallada largia) cunfinescha sut Frauenkirch cun l'Unterschnitt (streggia cun numerus valluns). 1850 1680 abitants; 1888 3891; 1900 8089; 1930 11 164; 1950 10 433; 2000 11 417.

Singuls objects dal temp da bronz, scuverts sin l'Alp Drusatscha, al Lai da Tavau ed al Pass dal Flüela, cumprovan l'existenza d'ina ruta da transit preistorica dal Partenz a Tavau e Susch. La vallada è dentant vegnida urbanisada e colonisada pir en il temp autmedieval da purs rumantschs, immigrads da la Val d'Alvra e da l'Engiadina. Il pli vegl document datescha dal 1213 e cumprova la cultivaziun originara dal terren a Tavau tras Rumantschs (prada e pastgiras) che pajavan tributs a lur suveran, il chapitel catedral da Cuira, en furma da nursas e da chaschiel produci sin il bain da Kristis (bandunà pli tard). Il 1297 è quest bain, in regal da la chaplutta da Brinzlaus a Bolgen, passà als Wildenbergs. Enturn il 1280 aveva Walter IV von Vaz domicilià là Gualsers e fusiunà ils dus bains rumantschs cun 12 bains gualsers ad ina cooperativa. En la brev da vasalladi e da tschains dal 1289 è attestads tributs considerabels en furma da chaschiel, nursas e ponn e l'obligaziun da prestar servetsch militar, ma era libertads personalas ed il dretg d'execuir la giurisdicziun bassa e da metter in agen mastral. La giurisdicziun criminala vegniva exequida dals baruns de Vaz. Suenten lur extincziun è il domini passà il 1338 tras ierta als Toggenburgs, il 1436 als Montforts-Tettngang ed il 1466 a la Chasa d'Austria (Habsburg). Il 1649 è la vischnanca da Tavau sa cumprada libra da quel domini.

L'emprima baselgia (patrun: s. Maria, s. Gion Battista, s. Niclà) è attestada il 1335 a Tavau Plaz. Questa baselgia, consecrada a s. Gion, era la baselgia principala da la regiun da Tavau ed aveva trais chaplanias: quella da S. Teodul a Tavau Vitg (construida enturn il 1350), *unser frowen*



Sco sedia dal WEF furma Tavau oz in lieu da congress da renum mundial.

kilch a Frauenkirch (menziunada il 1466) e la chaplania da S. Niclà a Glaris (enturn il 1350). Enturn il 1500 è menziunada la baselgia da S. Gion sco *frye pfarkilchen*. La collatura appartegnava a la vischnanca da Tavau ch'ha adoptà la cretta reformada il 1526. En il 17avel e 18avel tschientaner èn las suandantas chaplanias daventadas plaivs autonomas: Glaris cun Monstein il 1654, Frauenkirch cun Sertig il 1680 e Tavau Vitg cun Laret il 1680. Il 1719 è Monstein sa separà da Glaris ed ha engaschà in agen plevon. Novas baselgias èn vegnidas construïdas a Monstein (1668), Sertig (1699) e Laret (1793). Chapluttas bandunadas existan sin il Wolfgang ed a Pedra en la Val dal Flüela (menziunada il 1562 sco *hof by der cappel*, oz Dörfli). La vischnanca da Tavau disponiva a l'entschatta dal 21avel tschientaner da 15 baselgias. La gronda part dals abitants è reformada.

Il 1328 ha Tavau cumprà da Susch la Val dal Flüela ed extendì qua tras sias pastgiras communalas. A l'entschatta dal 14avel tschientaner èn emigrads Gualsers da Tavau ad Arosa ch'è daventà in vischinadi da Tavau (separaziun 1851). Ils numerus bains da Tavau èn sa sviluppads a las fracziuns istoricas che decidan anc oz en atgna cumpetenza davart dumondas da scola e da sepultura e che disponan per part dad atgnas facultads (vala era per la nova fracziun da Tain). L'emprima ediziun dal «Davoser Landbuch» datescha dal 1596. La schientscha politica da la gliued da Tavau è sa manifestada il 1564 suenten l'incendi da la veglia chasa communal, in edifiz da lain substituì d'ina chasa da crap renaschimentala, realisada sper la baselgia principala tenor ils plans da Hans Ardüser cun ina stiva gronda (sala dal cussegl cun picturas da vaider) ed ina stiva lunga. Tavau era la chapitala da la Lia da las Diesch Dretgiras (fundada il 1436) ed ospitava en roda cun Cuira e Glion mintga tschintgavel onn la Dieta da las Trais Lias. En la stiva lunga vegnivan salvadas la Dieta sezza e las radunanzas communalas, en la stiva gronda las sedutas da dretgira.

A partir dal 14avel/15avel tschientaner è la regiun da Tavau vegnida germanisada tras Gualsers. Economicamain han predominà dal 14avel al 16avel tschientaner l'allevament da muvel (chaschiel, export da muvel, ponn da launa-nursa), l'explozaziun da metals en las minieras al Silberberg en l'Unterschnitt (Monstein, fin il 1848; export dals metals ad Alla, Balsaun, Buorm e Sunder) sco era l'import da graun e da sal dal Tirol sur il Pass dal Flüela e da vin (sauma) da la Vuclina sur il Sca-

letta. Grazia al success economic a l'exteriur han las veglias chasas da lain pudì vegnir engrondidas u remplazzadas tras chasas da crap. La pestilenza, guerras e fomins han provocà a l'entschatta dal 17avel tschientaner ina ferma depopolaziun. Il destin da Tavau vegniva determinà oravant tut da las famiglias Beeli, Buol, Güler, Jenatsch, Sprecher e Valär ch'han laschà eriger dal 16avel al 18avel tschientaner chasas burgaisas represchentativas.

Cun la scuverta da la forza curativa dal clima alpin per malsognas dal lom en il 19avel tschientaner ha Tavau cumenzà a sa transformar ad in center internaziunal da cura e da vacanzas. Il 1841 ha avert Luzius Rüedi ina chasa per uffants malsaus dal lom e da las glondas dal culiez. Enturn il 1853 ha scuvert il medi Alexander Spengler il clima curativ da Tavau sco remedi cunter la tuberculosa. A partir dal 1865 è sa sviluppà Tavau ad in lieu da cura permanent cun sanatoris, hotels ed in'emprima viafier. Ils giasts da cura ed ils fugitivs politics han conferì a Tavau in caracter internaziunal (Thomas Mann, Ernst Ludwig Kirchner e.a.). La populaziun è creschida considerablmain. Sper edifizis erigids en il stil floreal e neoclassicist èn vegnidas construïdas a Tavau a partir dal 1900 chasas en novas furmas e stils, per exempel las chasas cun tetg plat u en stil cubic (Pfleghard & Haefeli: Sanatori Schatzalp; Rudolf Gaberel: Chasa da cura, chasa-cumin). In factur essenzial per il svilup dal lieu da cura è stà la lingia da la Viafier retica Landquart-Tavau, avverta il 1890. Il pionier da questa colliaziun è stà l'hotelier da derivanza ollandaisa Willem Jan Holsboer ch'era sa domicilià a Tavau il 1867. Suenten il 1900 è Tavau daventà in impurtant lieu per sports d'enviern. En ils onns 1920 (onns dad aur) è Tavau sa sviluppà ad in impurtant lieu da vacanzas, tranter auter grazia a las concurenzas da sport cun participaziun internaziunala (p.ex. Spengler-Cup dapi il 1923). Suenten la crisa economica mundiala è Tavau sa transformà d'in center da cura da la noblezza ad in lieu da cura e da sport per in e scadin: il 1930 cun la construcziun da pendicularas e runals (Funiculara Parsenn) e da l'emprim runal cun staffa dal mund a Bolgen 1934. Fin a la Segunda Guerra mundiala ha alluschà Tavau ina gronda colonia da Tudestgs attratga tranter auter dal Fridericianum, ina scola d'internat da la Germania, avverta il 1878 e refundada il 1946 sco Scola media alpina svizra. A Tavau residava era il manager da la sezziun svizra da la NSDAP, Wilhelm Gustloff, assassinà il 1936 dal student gi-

dieu David Frankfurter. Las novas meto-das, sviluppadas en ils onns 1950 cunter la tuberculosa, han fatg svanir la plipart dals sanatoris a Tavau. Il 2000 existivan anc 10 sanatoris, da quels quatter da l'exteriur, oravant tut clinicas per curar allergias. La construcziun moderna dal Center da congress (1969) e da l'Hotel da congress (1982) ha attratg in turissem economic fitg lucrativ a Tavau (tranter auter il Forum economic mundial WEF). Ils davos onns ha Tavau vivì in boom da construcziun, oravant tut en consequenza dal svilup d'in turissem da massa bunmartgà. Il 2000 aveva Tavau 19 funicularas, 17 runals, pliras patineras, bogns, ina halla da sport sin glatsch (dapi il 1981), plazzas da golf e da tennis sco era scolas da skis e da passlung. Il 2005 lavuravan passa 80% da las personas cun activitad da gudogn a Tavau en il sector terziar, strusch 4% en l'agricultura. Tavau posseda in sistem da scola bain sviluppà, in spital regiunal ed ina chasa d'attempads, ina biblioteca regiunala, il Museum da minieras grischun (a Schmelzboden/Monstein), il Museum Ernst Ludwig Kirchner (a Tavau Plaz) ed in museum regiunal (en l'anteriura pravenda da Tavau Vitg). Tavau è la sedia da l'Institut federal per la perscrutaziun dal guaud, da la naiv e da la cuntrada e da l'Institut svizzer per la perscrutaziun dal clima autalpin e da la medischna. L'infrastructura da Tavau patescha oravant tut dal traffic d'autos. Malgrà il svilup dal traffic public (bus locals, autos postals, Viafier retica, Funiculara Parsenn) e la chanalisaziun dal traffic privat (traffic en direcziun unica sin vias da transit) stagnescha il traffic savens durant la stagiun auta; ils effects da la polluziun da l'aria sin l'ambient (guaud ed auter) èn evidents.

Las autoritads politics da la vischnanca e da la regiun da Tavau consistan dal cussegl grond (legislativa), dal cussegl pitschen (executiva) sco era d'in mastral che presidescha omadus cussegls. Quests gremis vegnan elegids mintga trais onns la terza dumengia da matg da la mastralia regiunala (Landschaftsbsatzig). Omadus cussegls èn attestads dapi il 1468. Il dretg da vuschar da las dunnas sin plaun local è vegnì introduci il 1970. Il circuit da Tavau exista dapi il 1851 ed è territorialmain identic cun la vischnanca da Tavau. La mastralia circquitala (Kreisbsatzig) elegia mintga trais onns l'emprima dumengia da matg a l'urna il president circquital, l'intermediatur (derschader da pasch), la dretgira circquitala (dretgira penal d'emprima istanza fin il 2001) ed ils deputads. *Martin Bundi*

Clavadel

Aclau en la vischnanca politica da Tavau, situà a 1664 m a l'entrada en la Val Sertig. Il num Clavadel deriva dal latin *tabulatum*, rumantsch clavà. A l'entschatta da la colonisaziun da la regiun en il temp medieval tardiv sa chattava qua probablmain mo in clavà. Fin viaden il 19avel tschientaner consistiva Clavadel da bains purils. En ils onns 1830 han ins erigi a Clavadel in bognd da zulper (daventa victima d'in incendi il 1892), il 1890 ina chasa da cura ed il 1902-03 in sanatori, incorporads il 1916 en il Sanatori Wald/Turitg (oz clinicas da reabilitaziun/Zürcher Höhenkliniken Wald und Davos). Sper chasas da persunal, numerus chalets ed in hotel a Clavadel, è actualmain era l'Alp Clavadel (1934 m) accessibla ed abitada l'entir onn. Construcziun da la Chasa dals amis da la natira 1933. *Martin Bundi*

Sertig

Il num Sertig designescha ina val sco era in pass e deriva dal latin *surgere*, rumantsch s'elevar, u dal talian dal nord *sortiva*, rumantsch funtauna. L'emprima menziun *Sertix* datescha dal 1400. La val laterala sanestra da la regiun da Tavau cumpiglia plirs bains, per exempel Clavadel e Gaschurna, sco era Sertig-Dörfli (1861 m). Il Sertig aveva da pajar tschains al chapitel catedral da Cuira. L'emprima colonisaziun è succedida tras Rumantschs, immigrads per part probablmain dal Montafun. A partir dal 14avel tschientaner èn immigrads Gualsers. Sertig-Dörfli era enturn il 1562 ina culegna permanenta, ed il 1699 possedeava la val in'atgna baselgia. Da la fin dal 18avel tschientaner derivan recipientes ed uras da lain construïds dals abitants da Gaschurna. Dal Chüelptal maina ina senda sur il Pass dal Sertig (2739 m) als lais da Ra-vais-ch e tras la Val Tuors a Bravuogn. Il pass n'ha g'ingain'impurtanza per l'istorgia dal traffic da transit e serva oz sulettamain ad intents turistics ed alpinistics. Dapi il 1999 exista a Sertig-Dörfli in nov hotel (Walsershaus), avverta la stad e l'enviern. La Val Sertig posseda in territori d'alp apprezzà ed ina via cun colliaziun d'auto postal durant ils mais da stad. *Martin Bundi*

Monstein

Fracziun da la vischnanca politica da Tavau, situada a 1626 m al sid da Tavau sin la spunda sanestra da la Val da la Landwasser. 1494 *Mastein*, *Mustein*; 1526 *Mostein*. 1689 178 abitants; 1900 127; 2001 177. Il num deriva dal latin *monasterium* e sa referescha probablmain ad in bain claustral (*curtis*) ed a servs da la claustra da Curvalda. Monstein ha furmà a partir dal 1654 ina plaiv cun Glaris, da la quala la vischnanca è sa separada il 1719, constituind ina pravenda cun in agen reverenda. L'emprima baselgia, construïda en ils onns 1668-70, è vegnida bandunada il 1896, cura ch'ins ha realisà in edifiz nov al nord dal vitg. La populaziun da Monstein, che posseda atgnas alps, viva oravant tut da l'agricultura. Il servetsch d'auto postal collia il vitg cun la staziun Tavau-Glaris da la Viafier retica. La scolina e la scola elementara da la fracziun èn indizis per la vitalitad da Monstein. Il 1999 è vegnida fundada l'Uniun Pro Monstein. *Martin Bundi*


Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Lain – ina materia prima tschertgada da vegl ennà.

FOTO R. STURM/PIXELIO



Svilup da la surfatscha dal gaud en il chantun Grischun.

LIR

Selvicultura – l'utilisaziun dals gauds atras ils tschientaners

■ En il temp preistoric na furmava il gaud che creschiva sin il territori da la Svizra odierna betg simplamain ina cuntrada tranter autras, mabain in stadi originar dal spazi natural. Cura che l'uman è daventà sedentar, ha el cumenzà a colonisar e cultivar il terren a donn e cust dal gaud. Tras l'utilisaziun intensiva dal gaud (materia prima, pasculaziun) è quel daventà pli e pli ina part dal spazi vital e da la producziun agrara. Pir la politica forestala dal 19avel tschientaner ha mess in term a l'exploitaziun dal gaud per intents agrars, cun la finamira da cuntanscher ina promoziun persistenta da l'economia. Il ferm svilup economic suenter la Segunda Guerra mundiala ha revelà l'impurtanza ecologica e la valur dal gaud sco spazi per il temp liber.

Temp preistoric e temp roman

Fin a la fin dal temp mesolitic (ca. 5000 a.C.) pon ins quintar cun in gaud per gronda part natural. La situaziun è sa midada decisivamain en il temp neolitic, cura che l'uman è passà ad in' economia agrara ed è intervenì tras quai cun effect duravel en ils sistems ecologics. L'exploitaziun e la runcada dals gauds en vischinanza da culegnas ha fatg nascher novas furmas da la cuntrada e da la vegetaziun. Malgrà las intervenziuns pli e pli grondas dals umans en la cuntrada forestala tras la pasculaziun e l'exploitaziun da laina dad arder per l'elavuraziun da minerals da metal, sco per exempel en il Surses dapi il temp da bronz, pon ins presumar che las Alps e las Prealps settentrionalas eran anc dal temp da la conquista romana per gronda part cuvertas da gaud. Il temp roman n'era betg mo caracterisà d'ina expansiun marcanta dal terren cultivabel tras manaschis agriculs, ma era tras l'existenza da numerusas branschas economicas cun in grond basegn da laina: chasas da lain, l'export da rascha, il bitum e la tieula dal territori alpin (Strabo). Tenor Plinius il vegl vegniva flottada laina da la resch da las Alps en l'Italia dal Nord, e perfin a Roma vegniva quella utilisada per construir edifizis represchentativs.

Dal temp curretic al 18avel tschientaner

En l'urden d'utilisaziun agricul-collectiv da quel temp na sa laschava il gaud betg cunfinar cleramain dal rest dal terren cultivabel. El serviva a l'economia da laina e vegniva utilisà per ir a chatscha (schetga), per pascular il muvel manidel e gross e per engraschar ils portgs (gauds da ruver); el furniva era mel, pumaraida, fritga selvadia, bulieus, ragischs ed ervas. Tut las chasadas basegnavan laina dad arder per cuschnar e stgaurar e da temp en temp era laina da construcziun. A las industrias che consumavan grondas quantitads da laina – sco las fundarias da minerals da

metals – concedivan ils regents era dretgs d'utilisar il gaud per garantir il manaschi a lung term. En regiuns cun blera laina ed en intschess idrografics cun auas flottablas vendevan ils signurs territorials respectivamain lur successurs, ils vischinadis, a martgadants da laina periodicamain il dretg da schmerscher entiras surfatschas da gaud, per exempel en l'Engiadina Bassa per las salinas dad Alla.

La colonisaziun ed urbanisaziun tras ils umans en il temp medieval è vegnida considerada ditg sulettamain sco act da destrucziun dal gaud e sco conquista da terren per la cultivaziun dad ers. Ma gist en il temp da la colonisaziun e da la cultivaziun intensiva dal terren en il temp autmedieval è progredi il process d'urbanisaziun en etappas ed a moda relativamain planisada, essend che betg tut il terren da gaud na s'adattava per cultivar grenezza. Terrens main fritgaivels vegnivan surlaschads suenter onns d'utilisaziun agricula (ers) savens puspè cumpletamain al gaud. Ultra da la disposiziun dal spazi natural dirigivan era facturs economic, signurils e demografics il process da l'urbanisaziun. L'urbanisaziun dal terren tras runcadas vegniva effectuada surtut da nobels (p.ex. ils baruns de Vaz), baselgias (l'investgieu da Cuir) e claustras (Mustér, Curvalda, Müstair). Sco signurs feudals profitavan quels dals tschains e da las dieschmas dal nov terren cultivà en furma da tributs en naturalias. En ils onns 1180 ha deliberà il papa ils benedictins da la dieschma sin novas runcadas (Neubruchzehnt). Per ils purs runcaders sez cunvegna la lavur dira: els pudevan utilisar il terren urbanisà per vita duranta. En ils territoris prealpins e nordalpins cun abitadis sparpagliads han ils purs runcaders stgaffi oravant tut novs bains per muvel e novas tegias da chaschar (il pli bain visibel è quai en la Stussavgia). Els cultivavan tranter auter era ers, ina part bainquant pli gronda da lur terren explotavan els dentant a moda extensiva sin las pastgiras. L'expansiun da l'allevament da muvel en il temp medieval tardiv ha provocà ina expansiun zuppada dals pastgs libers da gaud sin il stgalim alpin ed ha contribuì – sper il clima – al sbassament dal cunfin superiuor dal gaud. Las activitads d'urbanisaziun eran accumpagnadas da mesiras da protecciun dal gaud, ma la separaziun dals gauds da protecciun cunter l'arida e bovias (gualts ambanieus, gods muoings, gods avuados, jüradas, schetgas) e dals gauds da diever è attestada en il Grischun pir en il 16avel tschientaner. Il muster da la distribuziun dal gaud, sco quai ch'el sa manifestescha en ils territoris colonisads enturn il 1600, è restà tut en tut identic fin a las reimplantaziuns en il 19avel tschientaner.

La regaglia da gaud era en il temp medieval tempriv en ils mauns dal retg, pli tard en possess dals conts ed en il temp

medieval tardiv finalmain en quel dals vischinadis. Ils spazi d'utilisaziun da las differentas colonias sa cuvivan parzialmain savens, e cura ch'els abitadis èn s'avischinads in da l'auter e ch'els purs han cumenzà a pratigar surtut l'allevament da muvel gross, èn naschids pli e pli conflicts per cunfins da pastgiras, per l'utilisaziun da gauds e per ils dretgs da passadi. Cun reparter ils dretgs d'usufruct e termar ils territoris d'utilisaziun (lung auals, flums, plantas marcantas u puncts topografics caracteristics) empruvavan las autoritads dad accumadar ils conflicts. Las veglias e grondas vischnancas avevan per regla il surramaun sur ils vischinadis e las corporaziuns. Conflicts d'usufruct naschivan era a l'intern da las vischnancas tranter differentas gruppas socialas u tranter vischins e fulasters/enderses. In dretg illimità a l'astg e pastg avevan mo ils vischins. La distribuziun da las parts da laina succedeva tras il guardian forestal u tras il selvicult ch'exequivà quella ensemen cun ils giurads per regla en il gaud sez. Mintga requirant aveva alura da smerscher sez la laina attribuida ad el e da pinar e manar quella a chasa entaifer in termin fixà. Las lavurs da gaud eran las pli impurtantas lavurs dals purs durant l'enviern. I valeva en general il princip dal basegn, vul dir che mintga usufructuari stueva pudair cuvrir sez agen basegn da laina dad arder e da diever. La quantitad da laina attribuida dependeva pia da la grondezza dal bain e da l'economia da famiglia. Scumandada era la vendita da laina ordaifer l'associaziun d'utilisaziun. Vers la fin dal 18avel tschientaner propagavan circuls docts sco la Societad dals amis da l'agricultura en il «Sammler» la protecciun dal gaud cunter la surexplotaziun da quel e proponivan novas furmas d'utilisaziun, per exempel (cun pauc success) l'aboliziun da la pasculaziun cumina (era) en il gauds.

19avel e 20avel tschientaner

Il stadi dal gaud e l'utilisaziun da quel èn stads era suenter il 1800 sut l'ensaina d'in grond augment dal consum da laina. Las runcadas exequidas per l'exploitaziun da laina senza novas emplantaziuns e l'utilisaziun dal terren urbanisà per l'agricultura han provocà ina diminuziun massiva da la surfatscha da gaud en l'emprima mesadad dal 19avel tschientaner. Cun il passadi dals dretgs d'utilisaziun communal e rural als novs possessurs da gaud (vischins dal lieu, burgais, vischnancas burgaisas e corporaziuns) durant e suenter la Helvetica èn vegnidas stgaffidas en blers lieus novas premissas per la disposiziun dal gaud. Il 1822 ha publicgà il maister selvicult bernaies Karl Albrecht Kasthofer ses «Memorial über die Einführung einer besseren Waldwirtschaft in Graubünden» ch'è daventà il brevier dals cultivaturs forestals grischuns e ch'ha fructifigà il «Waldbüch-

lein» da Peter Conradin von Planta (cumpari il 1848). Suenter ils gronds donnas tras las auazuns dal 1834, provocadas tenor ils idrologs e politichers d'ina exploitaziun abusiva dal gaud, ha relaschà il Cussegl grond il 1836 l'emprima ordinaziun davart l'utilisaziun dals gauds ed ha engaschà, suenter la nova catastrofa d'auazuns dal 1839, in inspectur forestal chantunal (Johann Buol) d'elavurar, en collavuraziun cun las vischnancas, in plan per in'exploitaziun e reimplantaziun precauta dal gaud. Las vischnancas, che possedeavan la pli gronda part dals gauds, èn sa dustadas cunter la limitaziun da lur dretgs d'utilisaziun tras il Chantun ed han continuà cun ils tagls radicals. Suenter ina reorganisaziun da la selvicultura il 1851 e l'engaschament da selviculturs cirquitals èn ils decrets vegnids exequids a moda pli efectiva. La Societad forestala svizra ha adoptà il 1856 l'argumentaziun davart la «rolla dal gaud en l'economia da la natira» ed ha pretendì dal Cussegl federal da laschar examinar il stadi dals gauds e dals auals selvadis en muntogna. Ils rapports dals professers dal Politecnicum da Turitg han rendì attent en maniera impressiunanta al stadi alarmant, ma pir novas catastrofes d'auazuns (p.ex. il 1868) han manà a l'art. 24 da la Constituziun federala revedida dal 1874 ch'ha conferì a la Confederaziun il dretg da la surveglianza suprema sur la polizia da construcziuns idraulicas e sur la polizia forestala en l'auto muntogna. Per exequir l'incumbensa constitutiva han ins institui il 1875 l'Inspectur forestal federal (oz Uffici da selvicultura) cun il Grischun Johann Wilhelm Fortunat Coaz sco emprim inspectur forestal superiuor federal. La veritabla svieuta en la politica forestala è succedida cun la lescha federala dal 1876 davart la polizia forestala. L'introducziun da l'obligatori da stabilir in plan d'utilisaziun dal gaud aveva la finamira da garantir in'exploitaziun persistenta; la partiziun reala e la vendita da gauds publics èn vegnidas scumandadas. La pli impurtanta disposiziun è stada probablmain l'obligaziun da mantegnair ils gauds (scumond da runcar) e d'amplifigar quels là nua ch'ins pudeva stgaffir, tras reimplantaziuns, novs gauds da protecciun. Uschia han ins pudì realisar en l'entira zona prealpina tranter il Lai da Constanza ed il Lai da Geneva, oravant tut en regiuns periclitadas d'erosiun, novas plantaziuns da gaud extendidas (en il Grischun tranter auter ils gauds dad Escher, p.ex. a Morissen). L'onn 1919 han fundà 59 vischnancas e sis corporaziuns la «Selva» ch'ha surpiglià l'organisaziun dal commerzi da laina.

En il decurs dal 20avel tschientaner è s'augmentà l'effectiv dal gaud en Svizra, oravant tut grazia a las reimplantaziuns, per dapli che 40 % a ca. 30 % da la surfatscha totala dal pajais l'onn 1995 (Gri-

schun 1950 en total 166 472 ha; 1997 189 739, vul dir ca. 26,5 % da la surfatscha dal Chantun). Surfatschas pli grondas èn vegnidas tagliadas mo durant la Segunda Guerra mundiala en il rom da la Battaglia dal graun. La diminuziun da la surfatscha agricula, cultivada a moda extensiva dapi ils onns 1970, ha favurisà l'avanzament dal gaud. En il davos quart dal 20avel tschientaner è la relaziun da la societad cun il gaud sa midada fundamentalmain. Il profit economic tras la producziun da laina ha pers si' impurtanza, la valur dal gaud per la cuntrada e l'ecologia sco era sia funcziun sco areal da recreaziun e da temp liber èn percenter daventadas impurtantas. La nova relaziun cun il gaud è era sa mussada en la discussiun davart la mort dal gaud ch'era daventada en ils onns 1983–85 en Svizra tudestga il tema central sin il champ da la politica ambientala. Suenter differentas revisiuns pli pitschnas è la lescha da polizia forestala vegnida remplazzada il 1991 tras la lescha federala davart il gaud. En il tractament dal gaud han ins midà suenter il 2000 successivamain d'ina cultivaziun schematica, basada sin la vegliadetgna da las plantas, ad ina selvicultura che tegna quint pli fitg da la natira.


Ils 27 e 28 da favrer 1990 ha l'orcan Vivian terrà en il spazi alpin immensas surfatschas da gaud, en il Grischun oravant tut sisum la Surselva (Val Medel, Mustér).

Selviculturs, guardians da giuradas e da gauds da diever na giudevan a l'entschatta dal 19avel tschientaner en general nagina scolaziun specifica. Il Politecnicum, fundà il 1855 a Turitg, offriva dapi il cumenzament ina «scola forestala». Per sustegnair la pratica e la scienza tras la perscrutaziun han ins fundà (en agiunta a l'institut a Birmensdorf/ZH) il 1935 l'Institut per la perscrutaziun da naiv e l'avinias a Tavau. En ils onns 1960 è vegnida introducida la scolaziun professiunala per postgers, e la furmaziun dals selviculturs è vegnida surdada a la Scola da selviculturs a Maiavilla ed a quella da Lyss/BE, purtada dal concordat interchantunal. Possessurs da gaud en il Grischun 1980: Confederaziun 224 ha; Chantun 840; vischnancas e corporaziuns 159 034; privats 14 374.

Adolf Collenberg

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



La stretga da Porclas è colliada fermamain cun la legenda da las «valorusas Lumnezianas». LITOGRAFIA ENTURN IL 1820



Vella – il lieu principal da la Lumnezia.

En la part dadora da la Val Lumnezia

Scuvertas tranter Porclas e Vattiz

■ **Geograficamain è la Lumnezia rumantscha spartida en duas parts: a la Lumnezia Sut appartegnan ils vitgs che giaschan en il fund da la val, situads al stradun en direziun Val S. Pieder; la Lumnezia Sura cumpiglia ils vitgs al pe dal Piz Mundaun e Piz Sezner e tanscha enfin a Vrin.** Noss viadi maina oz en la part dadora da la Val Lumnezia, en ils abitadis situads al pe dal Mundaun.

Porclas

Portals, saivs u mirs da serra en stretgas da la val a Trin e Cumbel. Il toponim deriva dal latin *portula* e cumpara era a Scharons, Vaz ed en il Mesauc. A Cumbel designescha il num Porclas (a 1019 m), localisà al stradun 1 km al sid dal cunfin communal cun Luven, il cunfin tranter ils circuits da la Lumnezia e da la Foppa. A Porclas existiva antruras probablmain ina serra da la val. Il portal anc oz existent (construì probablmain enturn 1300, restaurà il 1858 ed il 1912) ha in artg a piz e pudeva vegnir serrà cun duas alas. La stretga vegn era numnada Porta da femnas, sa referind a la legenda, tenor la quala las dunnas lumnezianas duain avair cumbattì qua ils 12 da matg 1352 cunter ina truppa dal cont de Werdenberg en la Faida da Belmont.

Martin Bundi

Cumbel

Vischnanca politica, circuit Lumnezia, district Surselva (avant il 2001 Glogn), situada lung la via a l'entrada en la Val Lumnezia. Ca. 825 *Cumble*, fin il 1983 *Cumbels*. 1850 278 abitants; 1900 342; 1910 275; 1941 331; 1950 298; 1990 257; 2000 288. Quatter chats da fossas dal temp precristian. A partir dal 13avel tschientaner, ensemen cun las autras vi-

schnancas da la Lumnezia, part dal feud da l'investgieu da Cuira, administrà dals signurs de Belmont. La porta da las dunnas a Porclas fa endament il sustegn militar presuntiv da las dunnas lumnezianas durant la guerra cunter ils conts de Werdenberg-Sargans (1352). Il 1371 avevan ils Lumerins ils dretgs suverans, a partir dal 1390 ils signurs de Sax-Mesauc. Il 1538 è Cumbel sa cumprà liber da l'investgieu ed ha furnà fin il 1851, ensemen cun Peiden e Camuns, in vischinadi. L'onn 825 è documentada la chaplutta da S. Murezi sper Valgronda. La baselgia da S. Steffan, erigida probablmain a l'entschatta dal 16avel tschientaner, ha appartegnì fin il 1653 a quella da S. Vintschegn a Pleif/Vella. En ils onns 1649–1923 è ella vegnida pastorada da paders chaputschins, alura da spirituals seculars. Dapi il 1970 collavura Cumbel stretgamain cun Morissen (meglieraziun generala 1968–96, cooperaziun en fatgs da scola e d'uniuns dapi il 1980). Il 2005 lavuravan var 17% da las personas cun activitad da gudogn a Cumbel en il sector primar resp. secundar, 66% en il sector terziar, numerus pendularis ordaifer. Il 1977 è vegnida construìda a Cumbel ina chasa d'attempads per la Lumnezia. Part da la populaziun da lingua rumantscha: 2000 85,1%/92,7% (meglra lingua/tuttas indicaziuns).

Adolf Collenberg

Morissen

Vischnanca politica, circuit Lumnezia, district Surselva (avant il 2001 district Glogn), situada al pe sid dal Piz Mundaun sur la via da la Lumnezia. 1210 *Mureizens*. 1850 250 abitants; 1900 163; 1950 297; 2000 211. Territori abità probablmain da vegl ennà. Dal 13avel fin il 15avel tschientaner èn attestads mi-

nisterials omonims. Enturn il 1290 possedeve l'investgieu da Cuira bains feudals a Morissen. Fin il 1370 ha Morissen fatg part sco feud episcopal a la prefectura dals Belmont, alura a quella dals de Sax-Mesauc. Il 1538 ha la vischnanca cumprà ora ils dretgs feudals episcopals. La baselgia da S. Giachen e S. Cristoffel, menziunada il 1345 e consecrada suenter la reconstrucziun dal 1867–68 a S. Giachen e S. Filip, è stada fin il 1907 ina filiala da la baselgia da S. Vintschegn a Pleif/Vella (chaplania 1702, curazia 1806). Situada a la via da transit da Sursaisa al Cuolm Val, è Morissen s'unì economicamain en il temp medieval tardiv cun Surcuolm, il vischinadi «da l'autra vart da la muntogna». Il 1630 èn las duas vischnancas sa separadas en consequenza d'in conflict permanent per l'utilisaziun dal gaud e da la pastgira sin la spunda nord dal Piz Mundaun (pastgira cuminaivla cun Surcuolm fin il 1895). La vischnanca purila rumantscha, basada sin l'allevament da muvel e l'economia da latg, ha realisà il 1973–79 ina meglieraziun generala. A l'entschatta dal 21avel tschientaner sa distingua la vischnanca tras numerus pendularis a Glion e Domat, pauc commerzi local ed in svilup turistic limità (chalets da vacanzas). Consorzi da scola cun Cumbel dapi il 1980, a partir da l'onn da scola 2009/10 era cun Suraua (scola primara Lumnezia Dadora). In center communal exista dapi il 1992. Il 2005 eran occupadas 77% da las personas cun activitad da gudogn a Morissen en il sector primar. Part da la populaziun rumantscha: 2000 91,5% 95,3 % (meglra lingua/tuttas indicaziuns).

Adolf Collenberg

Vella

Vischnanca politica, circuit Lumnezia,


district Surselva (avant il 2001 Glogn), situada sin ina terrassa en la part centrala da la Lumnezia, cun il vitg da Vella e la baselgia da S. Vintschegn sut il vitg a Pleif (cun la chasa-pravenda e la chasa dal caluster). Ca. 840 *ad sanctum Vincentium* [...] *in valle Leguntia*, 1290–98 *ad Ville*, *apud Villam*, tudestg Villa (uffizial fin il 1987). 1808 199 abitants; 1835 301; 1850 229; 1900 272; 1950 418; 1990 398; 2000 441. A Pleif existan fastizs d'in abitadi dal temp da bronz tardiv e chats da munaida da la sava dal terz al quart tschientaner. La baselgia parochiala da S. Vintschegn cun sia substanza architettonica romanico-gotica (reconstruìda il 1661–62), menziunada per l'emprima giada enturn l'onn 843 sper in bain roial, valeva sco bain feudal imperial. Pli tard è ella ida en possess dals Welfs ed enturn la mesadad dal 10avel tschientaner al chapitel catedral da Constanza. Il 1204 aveva il prevost dal chapitel da Constanza il dretg da patronadi sur la baselgia. En il 14avel tschientaner era ella en possess dals signurs de Belmont, il 1371 dals baruns de Sax-Mesauc (iarta) ed il 1483 da l'investg da Cuira. La baselgia (en possess dal cumin da la Lumnezia) era il center d'ina gronda pravenda da vallada che cumpigliava l'entira regiun da la posteriura dretgira auta da la Lumnezia. Durant la colonisaziun intensiva tras ils Gualsers è sa separada la Val S. Pieder ecclesiasticamain da Pleif (ca. 1300). La baselgia da S. Maria a Degen/Fraissen era sa liberada gia pli baud ed aveva furnà in'atgna pravenda pitschna. Lumbrein è sa separada tranter il 1345 ed il 1442, Duvin il 1526, Surchasti cun Tersnaus e Camuns il 1528, Vrin il 1597, Surcuolm il 1643, Cumbel il 1653, Vignogn il 1697, Degen cun Rumein e Vattiz il 1891, Morissen il 1907 e Peiden il 1910. A la fin dal 13avel tschientaner èn idas diversas miigiurias en possess episcopal. Grazia a sia funcziun da center ecclesiastic ed a l'influenza da la famiglia patriziana de Mont, ch'ha appartegnì a la classa dirigenta da la Lumnezia e da la Lia Grischa dal 15avel fin il 19avel tschientaner, è Vella daventà il lieu principal da la val. A Vella sa raduna la dretgira cirquitala ed – en roda cun auters lieus – era il cumin. La vischnanca dispona dapi il 1887 d'ina scola secundara cirquitala. Dapi l'avertura da las Pendicularas Val Lumnezia SA (1970) è vegnì mess a disposiziun dapli spazi d'abitat per il turissem (d'enviern). Il 2002/03 offriva Vella 494 letgs en la parahotellaria. Entant che l'agricultura tradiziunala tschessa, creschan dapi il 1980 ils secturs secundar e terziar. Meglieraziun generala 1977–2007. Part da la populaziun da lingua rumantscha: 2000 83,9%/92% (meglra lingua/tuttas indicaziuns).

Ursus Brunold

Degen

Vischnanca politica, circuit Lumnezia, district Surselva (fin il 2001 Glogn). La vischnanca è situada sin ina terrassa 200 m sur la val dal Glogn e cumpiglia, ultra da la plav da Degen sortida da las trais curts da Fraissen, ils dus aclauns da Rumein e Vattiz. Ca. 840 *HigenaelEgenae* (Degen), *villa Ramnensis* (Rumein), 1325 *Vatigis* (Vattiz), tudestg Igels (fin il 1983). 1808 232 abitants; 1850 255; 1900 214; 1950 323; 2000 247. Durant il temp medieval è l'istorgia da Degen sa splegada en accord cun quella da la Lumnezia. Ecclesiasticamain furmavan las trais curts da Fraissen, ensemen cun Zervreila en la Val S. Pieder, gia avant il 1345 ina plav independenta da la baselgia da vallada da Pleif/Vella. Degen-Vitg, Rumein e Vattiz èn vegnids incorporads pir il 1891 en la plav da Degen. Sco la baselgia da S. Victor vegn era quella da Nossadonna menziunada gia en l'«Urbari curretic dals bains imperials» (ca. 840). La baselgia cun sala ed apsida, consolidada en furma da trapez, datescha probablmain dal 8avel tschientaner. L'altar grond è vegnì consecrà il 1491, l'edifiz actual il 1504. Dapi la fin dal 13avel tschientaner dispona Degen era d'ina chaplutta, deditgada a s. Bistgaun. En il context da la pietusadad barocca èn naschidas ulteriuras chapluttas a Rumein (1669) ed a Vattiz (1700). Il legat da vasts bains tras famiglias indigenas (1712/37) ha obligà la claustra da Mustér da laschar pastorar la chaplania da Rumein en permanenza tras in conventual. Il 1923 ha Degen obtegnì l'access a la via lumneziana, construìda il 1886–87. Il 1930 è l'aclaun da Vattiz vegnì destrù quasi totalmain tras in incendi. La vischnanca da Degen è stada ina da las emprimas en il Grischun ch'ha arrundà il fons (1942–47 e 1968). Il project per la realisaziun d'ina culegna da vacanzas (Vallada Nova) sur Vattiz, lantschè en ils onns 1975–80, n'è betg vegnì concretisà. Planisaziun locala 1974 e 1990, meglieraziun da fons Degen-Vignogn 1968–99. Il 2005 lavuravan 55% da las personas cun activitad da gudogn a Degen en il sector primar, 22% en il sector secundar e 23% en il sector terziar.

Duri Blumenthal



L'Open Air Lumnezia a Degen è il pli grond festival da musica en il liber dal Grischun.

Lexicon Istoric Retic

Il LIR cumpiglia bundant 3100 arttgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Sulegl, precipitaziuns e temperatura da l'aria furman las cumponentas las pli impurtantas dal clima.

FOTO R. STURM/PIXELIO



Las relaziuns climaticas preistoricas sa laschan per exempel eruir cun agid da provas da glatsch.

FOTO PD

Dals temps glazials al stgaurament global

Las influenzas reciprocas tranter il clima e l'uman

■ **Cun il term clima vegn designada la sequenza caracteristica da fenomens meteorologics durant ina perioda da temp ed entaifer areals determinads. Las cumponentas las pli impurtantas èn la temperatura da l'aria, las precipitaziuns ed ils effects dal sulegl. Las relaziuns geograficas e topograficas, en spezial quellas da las Alps, èn impurtantas per il clima da la Svizra.** Il clima influenzescha tras midaments da l'ambient era ils process demografics, economics, politics e sociologics e vegn da sia vart influenzà dad intervenziuns tras l'uman. Causa sia posiziun intermediara a l'ost da las Alps Centralas vegn influenzà il Grischun da trais differentas zonas climaticas: da la zona cun las spundas nord, da la zona alpina interna (valladas dal Rain e sias affluenzas) e da la zona meridionala (Engiadina e las vals talianas).

Dals temps glazials fin il 8000 a.C.

Las fasas culminantas dals trais davos temps glazials Mindel, Riss (avant 180 000–120 000 onns) e Würm (avant 115 000–10 000 onns) eran caracterisadas dad in clima fitg fraid e sitg e da la mancanza da guauds. Las temperaturas medias annualas eran inferiuras a 10 °C. La fin d'in temp da glatsch intermediar ed il passadi al temp da glatsch suandant eran marcads d'ina derasaziun pli gronda da fains ed ervas. Characteristic per il davos temp da glatsch intermediar è il clima frestg moderà cun grondas quantitads da plievgia favuravla a la creschientscha da guauds da dascharina e da feglia. L'entschatta e la fin da quel temp eran caracterisadas da fasas d'erosiun marcantas. Al zenit dal Würm (avant ca. 20 000–18 000

onns) cun ses clima extremamain fraid e bunamain desertic (temperatura annuala media var 12–15 °C pli bassa che oz) èn ils glatschers s'extendids il pli ferm e guauds n'existivan betg. Las temperaturas medias da stad eran en il territori odiern da la Svizra per 8–10 °C pli bassas che quellas actualas. En il temp glazial tardiv dal Würm è succedi en plirs stausch in stgaurament global signifitgant avant ca. 16 000, 14 500, 13 000 e 10 000 onns. En il Preboreal, suenter la fin dal davos temp glazial avant 10 000 onns, èn sa prolungadas las periodas da vegetaziun per ca. quatter fin tschintg emnas, faschond muntar il cunfin dal guaud en las Alps per ca. 400 m. Ils glatschers alpins èn luads ed èn sa reducids a dimensiuns dal temp modern.

Conradin A. Burga

Da l'onn 8000 a.C. fin il di dad oz

Tenor las enconuschientschas actualas è il clima sa sviluppà en il spazi alpin svizzer dapi la fin dal davos temp glazial pli u main sco suonda: a l'epoca da la chalur maximala tranter ils onns 7400–4900 a.C. sa chattava il cunfin da naiv ca. 200–300 m pli aut che oz, il cunfin dal guaud aveva cuntanschì si' autezza maximala. Dapi alura han provocà intervenziuns umanas (oravant tut runcadas, pasculaziun, explotaziun da metals, export da laina) ina reducziun dal cunfin da guaud. Duas regressiuns climaticas (ca. 4100–3800 e 3600–3200 a.C.) sa laschan datar en il temp neolitic. Las periodas da chalur pli lungas (ca. 2800–1000 a.C.) durant il temp neolitic tardiv ed il temp da bronz han permess ina colonisaziun ed urbanisaziun pli intensiva en autezzas pli elevadas. Tenor il stadi da las enconuschientschas da la preistorgia e da l'istorgia tempriva n'han las fasas da fradur postglazialas en las Alps betg chaschunà in'interrupziun da la colonisaziun.

Tranter las fasas fraidas dal temp da fier (ca. 1000–300 a.C.) ed il passadi da l'antica tardiva al temp medieval tempriv nascha l'Imperi roman en ina perioda chauda (ca. 250–400 s.C.) ch'ha promovì la colonisaziun, il svilup economic ed il trafic en las Alps. Ad ina fasa chauda pli lunga (optimum climatic) durant il temp roman è suandà enturn ils onns 400–800 s.C. in segund pegiurament dal clima. En quest temp èn ils glatschers avanzads almain trais giadas fermamain (ca. 440, 600 e 800 s.C.). Vers la fin dal 8avel tschientaner è il clima puspè sa stgaurà. Las fasas pli chaudas durant il temp medieval èn sa limitadas al 10avel e 13avel tschientaner (enturn il 1100 avanzament da glatschers pli pitschens). Cun ina sperta diminuziun da la temperatura l'enviern ha inizià enturn il 1300 il temp glazial pitschen. En quella perioda han donnegia oravant tut stads fraidas ed umidas pli frequentas repetidamain l'agricultura alpina: las pastgiras autalpinas restavan l'entir onn cuvertas da naiv, l'utilisaziun da las alps era limitada pervi da navadas frequentas, la raccolta da fain cun plievgia influenzava a moda negativa la prestaziun da latg e blera granezza na vegniva betg a madiranza. Quels donns han provocà vers la fin dal 19avel tschientaner adina puspè grondas miserias. Envierns umids han chaschunà repetidamain catastrofes da lavinas, e la lunga perioda da stads fraidas dal 1812–60 è stada la pli marcanta dapi il temp aut-medieval. Plievias fermas e frequentas durant la stad avanzada e l'atun han provocà ina seria d'inundaziuns catastrofals era en il Grischun (p.ex. il 1834 ed il 1868), per las qualas ins deva la culpa a las runcadas. Era al sid da las Alps eran ils envierns – cun excepziun d'intgins paucs onns – pli fraids e solitamain era pli sitgs che quels dal 1901–60. La fasa la pli fraida



La societad agrara tradizionala era exposta fermamain a las midadas dal clima.

FOTO PD

è stada durant ils emprims onns dal 1890. Fin enturn il 1835 èn stadas las primavairas al sid pli fraidas che quellas al nord da las Alps ed ultra da quai era sitgas, las temperaturas èn alura creschidas considerablamain, entant ch'ellas èn restadas bassas al nord da las Alps fin ca. l'onn 1860.

En il 20avel tschientaner è la marschauna avanzada fin il mument da la culminaziun da la chalur da stad (1945–53) ed è alura puspè sa retardada fin il 1980, oravant tut en consequenza d'in augment da precipitaziuns durant l'enviern e la primavaira. Entant che l'accumulaziun dad auazuns e da bovas en la segunda mesadad da la perioda climatica (1961–90) na po betg vegnir interpretada sco signal d'ina midada dal clima, inditgescha ina seria extraordinaria dad envierns miaivels dapi la fin dals onns 1980 in midament evident da las relaziuns climaticas. Periodas cun ina bassa frequenza d'inundaziuns èn stadas en il Grischun ils onns 1590–1690, 1707–50 e 1876–1975, talas cun ina frequenza pli auta ils onns 1560–88, 1760–80 (punct culminant 1771–73) e 1868–1927. Las inundaziuns da la fin dal 20avel tschientaner èn anc consequenzas da fenomens climatics pli u main natirals, ed era per l'augment dal cunfin da la schelira permanenta n'han ins anc naginas indicaziuns garantidas. Las emprimas registraziuns sistematicas da l'aura per il Grischun èn vegnidas fatgas en la segunda mesadad dal 18avel tschientaner en il chastè da Marschlins.

Effects da midadas climaticas sin las societads agraras

A basa da las enconuschientschas actualmain segiradas pon vegnir perscrutads ils effects da l'oscillaziun climatica sin societads agraras – sco quai ch'il Grischun era ina a ses temp – fin ca. l'onn 1860. Igl è da presumar che l'entira producziun da nutriment e chalira da quellas societads, che sa basava per gronda part sin la pro-

ducziun da biomassa (aliments, pavel, laina), dependeva da la successiun da las constellaziuns climaticas. L'instabilitad da questas relaziuns sa reflectescha en fermas oscillaziuns dals pretschs dal graun che determinavan il decurs da la conjuntura a term mesaun. Per diminuir ils ristgs da producziun e d'existenza avevan questas societads sviluppà ina seria da strategias (products substitutivs, spezias maschadadas, producziun sin divers stgalims topografics, reservas). Il chaud ed umid dals mais da primavaira influenzavan en general a moda positiva las raccoltas en tut las culturas sco era l'allevament da muvel – il fraid e bletsch consequentamain en maniera negativa. In effect spezialmain disfavuravel sin il svilup dals pretschs avevan primavairas fitg fraidas e stads (oravant tut il fanadur) cun bleras precipitaziuns. Quai valeva surtut sche la calamitad meteorologica u climatica s'extendeva sur plirs mais e/u onns. Temps fraids e lungs envierns sco era periodas cun plievias excessivas durant la primavaira diminuivan la creschientscha da l'erva, stenschentavan la semenza, impedivan la fluriziun e retardavan l'entschatta dal pavar verd. Precipitaziuns cuntinuantes e la mancanza da sulegl durant il fanadur laschavan bain madirar il graun, ma ils grauns umids vegnivan mifs en ils arcuns u magliads dad insects. En il pavel mancavan las substanzas nutritivas, quai che diminuiva la prestaziun da latg durant l'enviern e s'effectuava a moda negativa sin il retgav tras l'allevament da muvel. L'iva crudava e na madirava quasi betg, la vendemia era stgarsa ed il fritg asch.

La plipart da las chareschias e dals formazs dals davos tschientaners è d'attribuir a la cumbinaziun da quests facturs. Onns catastrofals da tal gener (p.ex. a l'entschatta dals onns 1770) eran la consequenza da constellaziuns climaticas generalas e permanentas che s'effectuavan a moda sumeglianta sin vastas parts da l'Europa Centrala. Periodas accumuladas d'influenzas climaticas han contribuì a la detensiun da la situaziun u al pegiurament dals problems socials ed èn s'effectuadas tras midaments da l'atmosfera sociala en cumbinaziun cun auters facturs (p.ex. cun la pestilenza) era sin la cultura, la politica e la societad.

Christian Pfister



Il cunfin dal guaud sa sposta adina puspè – per motivs climatics e pervi da l'influenza da l'uman.

FOTO: G. HAVLENA/PIXELIO

Lexicon Istoric Retic

Il LIR cumpiglia bundant 3100 artgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

En las vischnancas da S-chanf e Zuoz

■ Il viadi dal LIR tras l'Engiadin'Ota cumenza cun la preschentaziun dals abitadis situads en la part sut da la vallada, al cunfin tar l'Engiadina Bassa. Il viadi maina da Ciuos-chel sur las vals laterales Susauna (en il nord) e Trupchun/Chaschauna (en il sid) en ils vitgs da S-chanf e Zuoz.

Ciuos-chel

Fracziun da la vischnanca politica da S-chanf, construida lung la via sin in plateau sur l'En tranter S-chanf e Brail al cunfin cun l'Engiadina Bassa. 1327 in *Zinusclo*, tudestg Ciuuskel (istoric). 1999 85 abitants. La baselgia reformada (cun santeri ed in agen reverenda dal 1658–1834) datescha dal 1615. Ciuos-chel era a ses temp in lieu da transtgardiada per il traffic da sauma tras l'Engiadina e sur il Scaletta. Il 1850 è il vitg, che dispoza da sis tipicas chasas engiadinaises cun bellezzas sgrafits, vegni svià.

Constant Wieser

Chapella

Ospizi e chaplutta en la vischnanca politica da S-chanf, erigi da la plaiv gronda da Zuoz enturn il 1250 en vischinanza da la chaplutta da S. Niclà a l'entrada en la Val Susauna, a la cruschada da la via da sauma Tavau – Engiadina / Buorm. L'edifizi originar aveva in plaun. Avant il 1300 han ins agiuntà dormitoris ed en il 14avel tschientaner engrondi il vestibul ed il refectori per in plaun. Enturn il 1530 èn suandadas duas stivas goticas per l'administraziun. L'ospizi vegniva pastorà oriundamain da fraters predicaturs da Com (probablmain emprima residenza dominicana en Svizra). Pli tard è el vegni transfurmà en ina chasa da paupers e malsaus da Chamues-ch, Madulain, Zuoz e S-chanf. A la fin dal 18avel tschientaner è quella vegnida serrada ed è alura passada sco bain rural als Perinis. Dapi il 1967 sa chatta a Chapella la Fundaziun Chapella, in center da furmazion per giuvenils. La chaplutta da S. Niclà, menziunada il 1209 (cunpatrun S. Duri, 1285), è vegnida erigida probablmain en il 11avel tschientaner sco baselgia romanica cun sala, absida radunda ed ina bella tur (mantegnida). Il 1524 è ella vegnida amplifitgada en stil gotic tardiv (chor, tabernachel, sacristia). Utilisada



Ina part dal vitg da S-chanf a l'entrada da l'Engiadin'Ota.

10

sco baselgia dals reformads da Ciuos-chel e Susauna fin viaden il 18avel tschientaner, è la chaplutta alura ida plaun a plaun en decadenza (conservada dapi il 1981 suenter perscrutaziuns archeologicas). Fundaziun da la Societad Open Air Chapella l'on 2000.

Constant Wieser

Susauna

Fracziun da la vischnanca politica da S-chanf, situada a 1682 m en la val laterala cun il medem num che collia l'Engiadin'Ota sur il Pass dal Scaletta (era S-challetta, 2606 m) cun Tavau. 1285 *Sauzana*, 1521 *Zuzauna*. Enturn il 1200 è vegni erigi a Chapella a l'entrada en la Val Susauna in ospizi cun chaplutta, documentada il 1290/98 sco *ecclesia sive hospitale s. Udalrici*. L'utilisaziun da la part interna da la val sco champ d'exercizi per las truppas da defensiun cunter aviuns (Flab), staziunadas a S-chanf, ha necessità suenter il 1950 la translocaziun d'ina part da la populaziun da Susauna a Chapella.

Adolf Collenberg

Pass dal Scaletta

Pass a 2606 m che collia Tavau via il Dürrboden en la Val Dischma e l'Alp Funtauna en la Val Susauna cun S-chanf en l'Engiadin'Ota, numnà era S-challetta. Il Scaletta ha obtegnì ses num dal tschancun da la vart engiadinaisa che furma ina stgala. En il temp medieval era il Scaletta la part centrala d'ina colliaziun intra-alpina d'impurtanza locala e regionala che manava da Cuira sur il Pass da la Striera a Tavau e da S-chanf sur il Pass dal Chaschauna a Livign e Buorm. Surtut ils da Tavau utilisavan quella ruta per exportar lur products agriculs en Vuclina e per importar vin e graun. Lur urden da sauma dal 1596 numna emprima lingia la via «gen Veltlin über Scaletta». D'enviern eri difficil da tegnair avert (rutnar) il pass. Repetidamain han lavinas sepulì umans ed animals. La construcziun da la via charrabla sur il Flüela (1866–67) ha interrut il traffic da sauma sur il Scaletta. Il project per ina viafier da Landquart via Tavau, Samedan e Malögia fin a Clavenna (cun in tunnel sut il Scaletta), preschentà il 1890, n'è betg vegni realisà. Martin Bundi

Pass da Chaschauna

Passadi a 2694 m che maina da S-chanf en l'Engiadin'Ota sur la Val Chaschauna (cun l'Alp Chaschauna a 2210 m) e la Val Federia a Livign ed a Buorm, tudestg Casannapass. 1465 *Val Casana*, 1490 *Caschauna*. En il temp medieval è il Chaschauna stà in passadi impurtant per il traffic alpin local, utilisà en il 14avel–16avel tschientaner surtut dals da Tavau e dals Engiadinaises per exportar muvel ed importar vin. Per Buorm e Livign era quest pass la colliaziun pli directa a Cuira (Alpisella – Chaschauna – Scaletta – Sapüner Steig – Scanvetg – Cuira). Il Chaschauna vegn menziunà en in rapport da l'emissari venezian Giovanni Battista Padavino dal 1605. Il zercladur 1499, suenter la Battaglia a la Chalavaina, è arrivà il cont von Sonnenberg cun in'armada imperiala da var 12 000 umens dal sid sur il Chaschauna ed ha devastà l'Engiadina. L'atun 1620 è in'armada da Confederads e Grischuns sa rendida sur il Chaschauna ed il Fus-chagn (talian Foscagno) a Buorm per reacquistar – senza success – las Terras subditas occupadas dals Austriacs. La stad e l'atun 1635 han truppas dal Duca de Rohan utilisà il Chaschauna. Oz vegn il pass frequentà mo pli sporadicamain da turists. L'antieriura caserna taliana al sid dal Chaschauna (2601 m), transfurmada en in'ustaria, vegn visitada stediain.

Martin Bundi

S-chanf

Vischnanca politica, circuit Engiadin'Ota, district Malögia, cun las fracziuns da Ciuos-chel e Susauna a la ruta dal Scaletta per Tavau. Vitg lung la via, situà a 1662 m a la riva da l'En, punct da partenza per il Pass dal Chaschauna. 1137/39 *Scaneves*, 1356 *Scanevo*, tudestg Scafns (istoric).

1781 423 abitants (da quels 169 fulasters); 1806 450; 1850 439; 1900 402; 1950 460; 2000 620. Il 1932/33 han ins mess a la gliisch sin la collina Botta Striera (2050 m) al nord da S-chanf restanzas d'in abitadi preistoric, utilisà dal temp da bronz mesau (Cultura da Melaun) fin il temp da Latène. Il 1527 ha la vischnanca da S-chanf cumprà ora las dieschmas episcopales (graun) ed il 1543 è ella daventada in vischinadi autonom da l'Engiadin'Ota (fragmentaziun politic-territoriala) cun ina surfatscha da 13 000 ha. La baselgia da S. Maria è menziunada il 1450, l'edifizi nov en stil gotic tardiv datescha dal 1493, il clutger è pli vegl (14avel tschientaner?). Il 1518/20 è la vischnanca da S-chanf sa separada da la plaiv gronda da Zuoz, la cretta reformada ha ella adoptà pir il 1570 suenter la mort dal spiritual catolic zunt stimà. Ils cudeschs da baselgia documenteschan in'impurtanta emigraziun da mastergnants tranter il 17avel e l'entschatta dal 20avel tschientaner. La piazza da tir da Zuoz e S-chanf, installada per la defensiun cunter aviuns, è vegnida translocada il 1976 en la regiun da l'antieriura baselgia da pelegrinadi da S. Güerg. Cun ils tschains da l'aua e dal Parc Naziunal Svizzer furma quella la funtauna d'entradas principala da la vischnanca. Part da la populaziun da lingua rumantscha: 1880 86,4%; 1980 74,5% (lingua materna); 2000 51,8% / 67,9% (megra lingua / tuttas indicaziuns). Constant Wieser

Zuoz

Vischnanca politica, circuit Engiadin'Ota, district Malögia. Antieriura chapitala dal cumin e da la dretgira auta da l'Engiadin'Ota. Il center vegl da la vischnanca aglomerada è situà sin la spunda dal Munt Albanas ed è circumdà da novs quartiers periferics. Ca. 840 *Zuzes*. 1781 423 abitants; 1850 378; 1900 425; 1930 969; 1941 693; 1950 779; 1960 1001; 2000 1353.

Culegna dal temp da bronz tardiv e dal temp da fier da la Cultura da Melaun sin la collina Chastlatsch (1848 m). Probablmain lieu d'etappa d'in sistem da traffic interalpin dal temp roman tardiv e dal temp medieval tempriv. Il 1137/39 ha l'investg da Cuira, che possedeve gia il bain Dorta (oz part dal vitg) e la suveranità en l'Engiadin'Ota, acquistà fons dals conts da Garmerten (Germania dal Sid) cun in grond bain a Zuoz e la baselgia da S. Luzi. Il 1244 ha nominà l'investg Volkart Andreas Planta da Zuoz chancelier da l'Engiadin'Ota, iniziand qua tras la predominanza da la famiglia Planta e dal vischinadi da Zuoz ch'ha durà fin il 1798. Il 1367 è Zuoz entrà en la Lia da la Chadé (pravenda gronda La Plaiv) tras il mastral Thomas Planta cun la sigla communal da l'Engiadin'Ota. Il 1462 è sa constituída la vischnanca complessiva.

La baselgia da S. Luzi, menziunada per l'emprima giada il 1137/39, è vegnida re-

construida enturn il 1200 (nav odierna e part inferiura dal clutger); il 1507 è ella vegnida renovada en stil gotic tardiv, medemamain la baselgia secundara da S. Caterina (1509), menziunada il 1438. Las charplinas permanentas tranter Zuoz e Samedan han provocà il 1438 la separaziun dal cumin d'Engiadin'Ota (ma betg da la dretgira auta) en in Sur ed in Suot Funtauna Merla che correspundeve territorialmain a La Plaiv. Il 1492 èn vegnidas vendidas las davosas entradas episcopales a la vischnanca d'Engiadin'Ota. Il 1526 ha pers l'investg ils dretgs suverans (seculars) tras ils Artitgels da Glion. Durant la Guerra svabaisa han ils abitants da Zuoz mess fiu a lur citadina per stgatschar qua tras l'inimi. Cun la communalisaziun a partir dal 15avel tschientaner èn sa separadas successivamain las vischnancas da S-chanf (1518), da La Punt-Chamues-ch (1528) e da Madulain (1534). Il 1554 ha Zuoz aderi a la cretta reformada. Il commerzi, ils transports e la conquista da la Vuclina (1512) avevan effectua ina flurizium economica e spiertala: fundaziun d'ina scola da latin, codificaziun dal puter / entschatta da la tradiziun litterara rumantscha, students da Zuoz ad universitats a l'ester, teater religius e profan, chant choral. Las imposantas chasas signurilas e burgaisas ch'èn restadas a medem temp chasas purilas documenteschan architectonicamain quest svilup. Sper las veglias familias aristocraticas dals Plantas, Juvaltas e per part era dals Salis è sa furmada en il 15avel e 16avel tschientaner ina nova classa dominante, parzialmain nobilitada tras l'imperatur ed enritgida tras commerzi ed uffizis politics: ils Travers, Schucans, Raschërs, Jecklins, Wietzels, Danzs e Geers. Suenter ils Scumbigls grischuns (1607/18–39), dals quals Zuoz n'aveva betg patì fermamain, ha inizià in'emigraziun per motivs economics. En consequenza da la perdita da la Vuclina (1797), da l'aboliziun dals privilegis politics (1798) e d'ina ulteriura depopulaziun, che na pudeva betg vegnir cumpensada dals immigrants da Tavau, dal Grischun Central e da las vischnancas reformadas da la Surselva, è Zuoz puspè sa sviluppada ad ina simpla vischnanca pura.

Gia avant la construcziun dal stradun, iniziada il 1836, disponiva l'Engiadin'Ota da bunas vias charrablas; ma pir l'avertura da l'Alvra e dal Flüela han promovì il progress economic. Il 1903 ha Zuoz obtegnì ina colliaziun cun la Viafier retica a Bever, il 1913 è vegnida averta la lingia Bever-Zuoz-Scuol. Dapi la fin dal 19avel tschientaner è Zuoz sa sviluppada ad in lieu da cura cun plirs hotels. Cun la fundaziun dal Lyceum Alpinum (1904) e l'avertura da la scola d'igiene Bellaria (1909) e da la scola secundara communabla per La Plaiv, è Zuoz daventà il center da scola regional. Dapi ils onns 1950 è sa sviluppada il turissem al sector economic il pli impurtant cun la construcziun da runals, d'ulteriurs hotels e da chasas da vacanzas. La mecanisaziun da l'agricultura, fin alura predominanta a Zuoz, ha provocà ina reducziun dals bains purils per dus terzs (stabiliments moderns a l'ur da la vischnanca). Clavads ed uigls vids en il vitg èn vegnids transfurmads en chasas d'abitat, resguardond il meglier pusaveil il maletg istoric dal vitg. Il 1980 han tut las familias domiciliadas a Zuoz pli ditg che 50 onns obtegnì il dretg da burgais. Zuoz furma actualmain il center economic e cultural da La Plaiv. Part da la populaziun da lingua rumantscha: 1880 85,2%; 1941 56,0%; 1980 38,9% (lingua materna); 2000 25,8 / 46,5% (megra lingua / tuttas indicaziuns). Constant Wieser

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Baselgia reformada da Zuoz, aquarel dal 1903.



Frescos e statua da Carl il Grond en la claustra da Müstair.



La Churburg a Schluderns regorda a l'anterior domini territorial dal prinzi-uestg da Cuira en il Vnuost. FOTO PD

Currezia

Istorgia dal Grischun da la cristianisaziun al temp autmedieval

■ Il term «Currezia» designescha l'istorgia medievals dal Grischun tranter la dissoluziun da l'Imperi roman e la fundaziun da las trais Lias (ca. 500–1350). En ils emprims tschientaners cumpigliava la Currezia dentant in territori bier pli vast ch'il Grischun odiern. Sia fluriziun culturala ha la Currezia conusch en il temp carolingic (8avel/9avel tschientaner). Silsuenter è l'intschess da pussanza politica sa reduci marcantamain (spertida dal Vnuost e da la Rezia Sut). Da l'otra vart èn sa fatgas valair en la Rezia Sura dapi il 12avel tschientaner numerusas pussanzas ecclesiasticas e secularas, pli tard era corporaziuns communalas. Da questas èn resortidas en il 14avel e 15avel tschientaner las trais Lias (Lia Grischa, Lia da la Chadé, Lia da las Diesch Dretgiras) ed il 1524 la Republica da las Trais Lias. La Currezia, 905 *Retia Curiensis*, numnada era *Churwalchen* (p.ex. 885 *in pago Retia, quod alio nomine Chureuual appellatur*), è resortida da la provinza romana Raetia prima ed era territorialmain l'emprim identica cun l'uestgieu da Cuira. Il svilup politic-territorial da la Currezia po vegnir reconstruì mo parzialmain: il cunfin a Meraun è vegnì fixà enturn l'onn 590 suenter cumbat tranter ils Francs ed ils Langobards, las parts settentriunalas èn vegnidas attribuidas en il 7avel tschientaner a l'uestgieu da Constanza. A l'uestgieu da Cuira appartegnevan en il temp medievals il territori dal chantun Grischun odiern (senza il Puschlav), la Val dal Rain fin al Hirschsprung, la regiun da Sargans, la Planira da la Linth, las parts settentriunalas dal Glaruna, la Val d'Ursera, l'odiern Principadi dal Liechten-

stein, il Vorarlberg fin e cun Götzis, il Paznaun ed il Vnuost fin a la Passer.

Da l'Imperi ostrogotic a l'Imperi francon

L'uestgieu da Cuira para d'esser vegnì fundà gia en il quart tschientaner. L'emprim uestg documentà è Asinio (451). Elements da la lingua da baselgia rumantscha mussan che la Currezia è per gronda part vegnida romanisada e cristianisada tranter il 5avel ed il 6avel tschientaner. Theoderich ha integrà la Rezia en l'Imperi ostrogotic sco bastiun cunter ils Germans (furmla da nominaziun da ca. 506 per il dux militar dad omaduas provinzas reticas, brev d'admoniziun dal 507–511 al dux Servatus). Probablmain pauc suenter il 536 è la Rezia passada a l'Austrasia francona, la part orientala dal domini dals Merovings (Neustrien era la part al nord-vest tranter la Loire e la Schelde). En consequenza da la suveranità indeblida dals Francs en il 7avel ed a l'entschatta dal 8avel tschientaner ha la Currezia cuntanschì ina posiziun autonoma a l'ur da l'Imperi ch'ha permiss a la famiglia indigena dals Zaccons/Victorids da surpigliar la pussanza. Quels han eventualmain d'engraziar lur status ad in'allianza matrimoniala cun in francon Zacco (dux militar en il 6avel tschientaner?).


Dals Merovings a Carl il Grond

Il Testament da Tello (765), ina donaziun da l'uestg a la claustra da Mustér, inzietscha ina seria da funtaunas singularas da grond'impurtanza (perfin sin il champ europeic) per l'istorgia curretica da l'epoca merovingica e carolingica. Quest testament palaisa oravant tut la colonisaziun, la situaziun sociala ed ils dretgs da possess en la Val dal Rain da Mustér a Sargans. Analisis linguistics e diplomaticas, ma era retscher-

tgas archeologicas recentas (trais baselgias claustrals da Mustér dal temp merovingic tardiv ed il chastè da Schiedberg/Sagogn, sedia presuntiva dals Zaccons) cumprovan l'autenticità dal document ch'è probablmain ina redacziun amplifitgada da dus texts anteriurs. Ils Zaccons occupavan ils dus uffizis seculars ed ecclesiastics principals, numnadamain quel dal preses e quel da l'uestg. Cura che Carl il Grond ha integrà pli ferm ils Alemans en l'Imperi francon ed ha conquistà il 773–74 l'Imperi langobard, ha el sutminà pass per pass l'autonomia politica da la Currezia, regiun impurtanta per il traffic da transit: enturn l'onn 773 ha el confermà Constantius sco rector ed uestg ed ha affirmà l'urden giuridic curretic, cun resalva da la fidaivladad. Il successur da Constantius, Remedius, era probablmain in Franc (correspondenza cun Alkuin, directur da la scola da la Curt imperiala, instituida da Carl il Grond). Suenter la mort da quel l'onn 806 ha Carl il Grond introducì la constituziun da contadi, separà las duas pussanzas (l'ecclesiastica e la seculara) ed ils bains da l'uestgieu e dal contadi. Al contadi appartegnevan ils bains liads a l'uffizi dal cont ed ils bains che l'Imperi aveva cedì sco benefizis a ses vasals, probablmain oravant tut per segirar las vias da transit. Cunter la privaziun arbitrara d'ulteriurs bains episcopals (oravant tut baselgias e reliquias), interprendida probablmain en ils onns 824–25 tras il cont Roderich, ha l'uestg Victor III inoltrà avant l'onn 831 quatter plants a Ludwig il Pietus; per augmentar l'effect da ses plants ha el era menziunà las perditas dal 806 (ca. 200 baselgias, trais claustras e.a.). La *divisio inter episcopatum et comitatum* (segund plant da ca. l'onn 825) po sa referir mo a la partiziun dals bains, dentant betg a quella, consecutiva, da la pussanza ecclesiastica e seculara tranter l'uestg indigen Victor ed il cont francon Hunfrid. Las trais supplicas instantas èn capodovras diplomatics; ils plants davart la pregiudicaziun da la vita religiusa e dals duars socials da la baselgia eran probablmain giustifitgads. Enturn l'onn 831 ha Ludwig restituid intgins paucs bains. En ils onns 830 ed 840–43 è la Currezia vegnida cumpigliada, sco regiun da cunfin, en las grondas cuntraversas per l'egemonia e la repartiziun da l'Imperi carolingic.

La Currezia sco part da l'Imperi ostrofranco

En connex cun il Contract da Verdun da l'onn 843 stat l'«Urbari curretic dals bains imperials» che datescha da ca. l'onn 840 e che permetta da concluder che l'administraziun dals bains roials era separada da quella dal contadi en general. Ins po era constatar in'organisaziun roiala dal traffic (per part d'origin roman) cun la ruta principala da Maiavilla via Cuira, Lai, il Guglia ed il Set en




Copia da l'Urbari curretic dals bains imperials dal 9avel tschientaner. La pagina inditgescha il possess «in Toverasca» (Val dal Rain Anterior).

Bergiaglia e cun quella da Zuoz via Ardez, S-charl e la Val Müstair en il Vnuost. Cun il Contract da Verdun en la Currezia vegnida incorporada l'onn 843 a l'Imperi ostrofranco. L'uestgieu da Cuira è vegnì separà da l'archuestgieu da Milaun e suttaless a quel da Magonza. Quai ha promovì la germanisaziun, iniziada l'onn 806, da la classa dirigenta e dal dretg en la Currezia. Sia fluriziun culturala, garantida oravant tut tras l'uestgieu da Cuira e tras las claustras da Mustér, Müstair e Faveras, ha la Currezia gi en il temp carolingic. Sco center da furmazion ha Cuira irradià fin a S. Gagl. L'eleganta scrittira retica (p.ex. quella dal «Liber viventium» da Faveras) è vegnida remplazzada enturn l'onn 820 tras la minuscla carolingica, entant che la pergamina retica è vegnida substituìda pir en il 11avel–12avel tschientaner tras quella germana, sigillada, e tras la pergamina notariala taliana. Da la splendor artistica da la Currezia en il temp medievals temprius dattan perditga oravant tut las baselgias claustrals da Müstair e Mistail e la chaplutta da S. Benedetg a Damal. La «Lescha romana da Cuira» dal 8avel tschientaner – ina versiun redigida da la «Lex Romana Visigothorum» – preschenta il dretg da disa da la Rezia sin basa dad interpretaziuns falladas e diversas. Enturn il 800 ha l'uestg Remedius decretà leschas ecclesiasticas («Capitula Remedii»). D'ina qualitat litterara remartgablà è per exempel la «Vita» da s. Gliezi che datescha da la fin dal 8avel tschientaner. Per ils onns 850–950 èn las funtaunas pli raras; la Currezia aveva probablmain pers si'impurtanza politica ed economica sco regiun da cunfin e da transit ed era vegnida integrada en il nov ducadi da la Svevia, fundà l'onn 917.

Svilups entaifer il Sontg Imperi Roman

En la segunda mesad dal 10avel tschientaner è la Currezia puspè daventada ina regiun da transit impurtanta, ed ils uestgs da Cuira han sustegnì ils imperaturs ottons. Tenor funtaunas posteriuras è la Currezia vegnida separada en il 10avel tschientaner en trais contadis: en la Rezia Sut (fin a la Landquart), en la Rezia Sura ed en il Vnuost (conts: surtut ils Hunfrids, Guelfs, Brengens ed Udalrichs). Quests contadis èn sa schliads en il 12avel tschientaner. En il Vnuost èn sa fatgs valair ils conts tirolais a partir dal 1141. En la Rezia Sut e Sura èn naschidas dapi il 12avel tschientaner numerusas pussanzas ecclesiasticas e secularas, pli tard era corporaziuns communalas. Il svilup dal temp carolingic al temp autmedieval ed al temp medievals tardiv sco era la constituziun da las pussanzas èn fatgs complexs e – per mancanza da funtaunas – difficils da reconstruì; il meglier sa laschan eruir quels dals signuradis claustrals. Il svilup dal domini episcopal è enconuschent mo per part, malgrà las donaziuns dals Ottons (Bergiaglia, mesa civitas da Cuira, dretgs d'incassar dazis e taglias, da batter munaida e.u.v.). Varsaquantas valladas, per exempel l'Engiadin'Ota, sa laschan identifitgar cun ministeris da l'«Urbari curretic dals bains imperials». En la regiun da Vaz Sura para probabl la cuntinuitad funcziunala (betg genealogica) d'in benefizi carolingic al domini feudal dals baruns de Vaz. Il contadi da Lags, ina communitad eterogena da persunas furmada en il temp medievals tardiv, ha probablmain sias ragischs instituziunalas en il temp medievals temprius. Evidentas èn la cuntinuitad da l'uestgieu da Cuira dal quart/tschintgavel tschientaner fin il di dad oz, si'appartegnentscha a l'archidiocesa da Magonza dal 843–1802 sco era la cuntinuitad linguistica dal latin vulgar al retoromansch. En l'intschess da l'anterior contadi da la Rezia Sura èn sa svilupadas en il 14avel–15avel tschientaner las Trais Lias, da las qualas è resortì en il 19avel tschientaner il chantun Grischun.

Lothar Deplazes



Extensiuon da l'uestgieu da Cuira en il temp medievals.

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Il chastè situà en il vitg da Haldenstein è vegni erigi ed amplifitgà en il decurs dal 16avel e 17avel tschientaner.

FOTO O. ITEM



Las ruinas dals chastels-fortezza Haldenstein (davantvart) e Lichtenstein sin ina gravura da William Tombleson (ca. 1830).

Haldenstein – anteriur signuradi situà en la regiun dals Tschintg Vitgs

■ **Las vischnancas situadas en la Val dal Rain tranter Cuira ed il cunfin settentrional dal chantun Grischa furman dapi il 2001 il district Landquart.**

Quel consista dals dus circuits Tschintg Vitgs e Maiavilla ed è sortì da l'antierur district da Landquart Sut (che cumpigliava era ils circuits da Sievgia e d'Aschera). Il viadi dal LIR tras il district Landquart cumenza cun infurmaziuns generalas davart il circuit dals Tschintg Vitgs e cun preschentar la vischnanca da Haldenstein.

Tschintg Vitgs

Oriundamain dretgira auta dals Quatter Vitgs, sortida dal signuradi episcopal d'Aspermont, a partir dal 1803 dretgira auta dals Tschintg Vitgs, dapi il 1851 circuit dal district da Landquart Sut (dapi il 2001 district da Landquart). Ils quatter vitgs da Zezras, Eigias, Termin e Vaz Sut, alliads cun la Lia Grischa dapi il 1440, cumparan a partir dal 1450 sco subdits da l'uestg, dapi il 1468 sco titulars d'in mandat en il Cussegl dals 24, institui dal l'uestg sut pressiu dals vischinadis. Enturn il 1516 possedeavan els atgnas leschas (approvadas dal l'uestg) concernent il dretg d'ierta, il dretg da preacquist ed il dretg testamentar. Suenter la retratga dal chastellan episcopal d'Alt-Aspermont il 1524 han ils Quatter Vitgs cumprà ora singuls dretgs feudals da l'uestg (liberaziun totala 1649), e dapi il 1526 tschernivan els il mastral en atgna autonomia. Il 1527 è documentà in agen sigil da cumin. Sutdivididas en quatter cumins, uschenunadas terzas (Termin ed Eigias furmavan ina terza) han las vischnancas constitui fin il 1803 la dretgira auta dals Quatter Vitgs entaifer la Lia da las Diesch Dretgiras. Entant che Zezras disponiva, sco lieu principal, da divers dretgs spazials, ha Termin obtegnì in agen derschader per cas criminals. Il 1803 è l'antierur signuradi da Lantsch Sut vegni integrà, a l'entschatta sut protesta da la vart catolica, en ils Tschintg Vitgs. La repartiziun e la represchentanza politica succedivan dapi alura en set parts. Ils cumins e la dretgira d'appellaziun eran responsabels per cas civils e per la polizia bassa, il landrat per cas d'ingurias pli simpels e per la quieteza publica, la dretgira auta per cas criminals e per cas d'ingurias pli grevs. Il landamma, ch'alternava tenor confessiu, presidiava il landrat. La populaziun reformada disponiva ad Eigias d'ina dretgira consistoriala per litas en famiglias e dispitas matrimonialas. Il 1851 è

la dretgira auta dals Tschintg Vitgs d'entradura in circuit dal district da Landquart Sut; Valzeina Dadens (fin alura part da la vischnanca da Termin) è passada al circuit da Sievgia. Il circuit dals Tschintg Vitgs ha mantegnì ses num, consistiva però da las set vischnancas da Zezras, Eigias, Termin, Vaz Sut, Lantsch Sut, Mastrils (vischnanca da Zezras fin il 1854) e Says (vischnanca da Termin fin il 1880). Il 2008 è Says puspè daventada ina part da la vischnanca da Termin, ed il 2012 han las vischnancas da Eigias e Mastrils fusiunà a la vischnanca da Landquart.

Adolf Collenberg

Haldenstein (Lantsch Sut)

Vischnanca politica, circuit Tschintg Vitgs, district Landquart (enfin il 2001 Landquart Sut), anteriur signuradi (fin il 1803) e chastè. Il vitg aglomerà, situà al nord da Cuira a la riva sanestra dal Rain, ha ina fatscha d'impurtanza nazionala. Sin la spunda dal Calanda, a 1400 m, sa chatta l'acclau Batänja ch'era abità fin il 1868. 1149 *Lanze*, 1370 *Lentz inferior*, tudestg Haldenstein (uffizial, entrà en diever ensemen cun la germanisaziun a partir dal 14avel tschientaner). 1803 349 abitants; 1850 492; 1900 464; 1950 521; 2000 808.

Chats dal temp neolitic, dal temp da bronz mesaun e dal temp da fier tardiv sin l'uschenumnà Hexabödeli al nord dal chastè da Lichtenstein ed en vischinanza dal chastè da Haldenstein sco era la scuverta d'in champ da fossas sin l'uschenumnà Stein dattan perditga d'ina colonisaziun tempriva. En l'areal dal chastè han ins chattà restanzas d'ina colonia romana dal prim tschientaner (tardiv) fin il quart tschientaner s.C.

Signuradi

Il territori dal signuradi da Lantsch Sut appartegnava en il temp autmedieval a la curt roiala da Cuira. L'onn 960 ha regalà l'imperatur Otto I il signuradi ed il gaud Oldis (en vischinanza da Lantsch Sut) a l'uestg Hartpert da Cuira. Il 1050 ha Heinrich III transferì a l'uestg era l'entir territori da gaud da Lantsch Sut ch'è daventà qua tras ina part da la domena d'immunitad episcopala. Tranter il 1180 ed il 1282 è Lantsch Sut passà, probablmain sco feud episcopal, als baruns von Lichtenstein. Suenter lur extincziun è Lantsch Sut vegni attribui als chevaliers von Haldenstein, documentads per l'emprima giada il 1260. Oriundamain ministerials episcopals, pli tard dals baruns de Vaz, en quels vegnids involvids a la fin dal 13avel tschientaner en il cum-

bat da pussanza tranter l'uestg ed ils de Vaz. A la fin dal 14avel tschientaner è la lingia masculina s'extinguida, e suenter la mort dad Anna von Haldenstein, restada senza descendenza, è passà il domini il 1404, suenter cuntaias ereditarias, a sia cusrina Ursula von Hohenems e ses consort Peter von Grifensee. Il 1424 ha quel acquistà tut ils dretgs a Lantsch Sut ed ha surdà l'acclau Seuil als frars Batänjer. Suenter il 1460 è Lantsch Sut passà a ses schender Heinrich Ammann von Grüningen, suenter la mort da quel als signurs de Marmels. Tras maridaglia cun Hilaria de Marmels è alura Jean Jacques de Castion, ambassadur franzos tar las Trais Lias, vegni en possess dal signuradi da Lantsch Sut. Il 1567 ha Gregor Carl von Hohenbalken acquistà Lantsch Sut, pli tard Heinrich von Tägerstein ed il 1608, cunter l'opposiziun dals subdits, Thomas von Schauenstein. Il 1611 ha quel obtegnì da l'imperatur il titel da barun ed il 1612 il dretg d'asil sco era ils dretgs da batter munaida, da tegnair fiera e d'amplifitgar la vopna. Dal dretg da batter munaida han ils baruns profità fermamain fin en il 18avel tschientaner, lur munaidas han dentant gi per temps in nausch renum. Il 1701 è Lantsch Sut passà tras ierta als Salis-Maienfeld ch'han exercit la suveranità fin il 1803. Il 1701 ha Johann Luzi von Salis abolì la sclavaria. La barunia da Lantsch Sut n'ha mai fatg part dal sistem d'alleanzas da las Trais Lias, ha però stipulà il 1558 cun quellas in contract da proteccziun, mess en vigur pir suenter lungas dispitas cun ils lieus confederads che regivan a Sargans.

Il signuradi da Lantsch Sut aveva trais chastels: il chastè da Haldenstein, erigi enturn il 1150 sin in grip sur la vischnanca, era la sedia da famiglia dals chevaliers von Haldenstein e furmava il center dal complex da bains signurils. Il 1299 han amplifizaziuns dal chastè, exequidas senza permissiu, provocà in conflict tranter l'uestg e Johann de Vaz. Abità anc il 1695, è il chastè vegni destrui il 1769 e 1787 parzialmain tras terratrembels; il chastè da Lichtenstein, construi en il 12avel tschientaner sin in spelm al nord da la vischnanca, era la sedia dals signurs von Lichtenstein; suenter lur extincziun a la fin dal 13avel tschientaner è el passà als signurs von Haldenstein. Il chastè era abità anc il 1400 ed è vegni bandunà probablmain en il 15avel tschientaner; il chastè-cuvèl da Grottenstein, il temp d'origin dal qual n'è betg enconuscent, sa chatta al pe d'ina paraid-crap dal Calanda.

Vischnanca

Lantsch Sut ha appartegnì ecclesiasticamain dapi il 1436 a la claustra da S. Glièzi a Cuira. La baselgia, menziunada enturn il 1150, è vegnida remplazzada il 1732 tras in nov edifiz; ella è la suletta baselgia da la diocesa da Cuira deditgada a s. Geleon. Enturn il 1616 ha Thomas von Schauenstein introduci la reformaziun a Lantsch Sut. En il 14avel tschientaner è la colonia oriundamain rumantscha vegnida germanisada. Il 1803 (Mediazion) è la vischnanca da Lantsch Sut vegnida attribuida sco vischnanca politica autonoma al cumin dals Quatter Vitgs. Il 1825 è ella daventada la vittima d'in incendi, ed era il 1943 fiss ella per il nair da l'ungla puspè vegnida destruida tras in terribel incendi da gaud al Calanda. Suenter l'inundaziun dal 1868 è il Rain vegni mess en rempars, ed ins ha qua tras pudì gudagnar terren cultivabel. Il 1971 ha ina bova sutterrà parts da la vischnanca. Il 1896 è vegnida construida la staziun da la Viafier retica da Lantsch Sut sin territori da la citad da Cuira. Ina punt da betun remplazza dapi il 1972 la veglia punt da lain cuverta sur il Rain. In deposit dad ieli, planisà en ils onns 1980 en ina chaverna, n'ha betg pudì vegnir realisà per raschuns geologicas e politicas. Il 2005 disponiva la vischnanca da Lantsch Sut da set manaschis agriculs e da pliras interpresas industrialas sco era d'in implant da glera. Malgrà la vischinanza da Cuira ha Lantsch Sut subi in svilup moderà en il sectur da construcziun. Dapi il 1990 en 65–70 % da las personas cun activitad da gudogn a Lantsch Sut pendularis dal lieu.

Al cunfin sid da la vischnanca da Lantsch Sut è vegni erigi a l'entschatta dal 16avel tschientaner in grond chastè. Tranter il 1544 ed il 1548 è quel vegni amplifitgà tras Jean Jacques de Castion ed equipà a moda luxuriosa, tranter auter cun ritgas tavladiras transferidas pli tard en il chastè da Köpenick a Berlin. Il 1731 è il chastè vegni engrondi per in plaun tras Gubert von Salis, ed il 1732 è el vegni destrui quasi totalmain tras in incendi, ma restitui immediat. La Chasa Saluz ha alloschà a partir dal 1761 in seminari, transferì il 1763 en il tract nord dal chastè da Lantsch Sut ed il 1771 en il chastè da Marschlins. Il 1832 è il chastè da Lantsch Sut passà als Salis-Soglio ed è vegni transformà danovamain enturn il 1900. Il 1922 è el passà a la famiglia Batänjer ed appartegna dapi il 1966 ad ina fundaziun. En ils onns 1986–2005 è il chastè vegni restaurà per gronda part; sedia da l'administraziun communal da Lantsch Sut.

Silvio Margadant

Batänia

Acclau situà a 1400 m al Haldensteiner Calanda, vischnanca da Lantsch Sut. Il term Batänia deriva dal latin *punctanea*, rumantsch pitgogna. Il temp da colonisaziun è intschert, ma probablmain identic cun quel da Sevils, ina culegna da stad pregualsra attestada il 1274, en possess e cultivada da Lantsch Sut. Il 1424 è Batänia (Sevils) passà sco feud ereditar als trais frars Batenier (Pattänien). Da quel temp fin il 1868 era l'acclau abità durant l'entir onn, cun in'atgna scola primara fin il 1868. Dapi il 1926 exista la Corporaziun Batänia, dapi il 1978 l'Uniu Batänier che tgira actualmain la culegna abitada per intents da vacanzas.

Adolf Collenberg

Calanda

Massiv da muntogna che s'estenda da Vaz Sut a Tumein tranter la Val dal Rain Grischna e la Val Tamina/SG. Il punct il pli aut dal Calanda è il Haldensteiner Calanda (2805 m). La spunda ost è ina cuntrada natirala e cultivada, fermamain segmentada. 1424 *uf Galanden*. Il num Calanda deriva dal latin *calare*, rumantsch sbuvar. Las Tumas (collinas conicas) a Domat èn il resultat da bovas preistoricas dal Calanda. Bovas pli grondas èn idas giu a Favugn (1841–44) ed a Lantsch Sut (temp recent). En il temp medieval han existi pliras culegnas permanentas sin la spunda ost dal Calanda, tranter quellas Batänia (1400 m). Per ils onns 1588–1618 existan indizis d'ina miniera al Calanda (Kupfergrüblen en la Val Laschein). Tranter il 1809 ed il 1861 ha il sindicat Goldene Sonne explotà aur al sidvest da Favugn. Il 1891 è vegnida erigida la chamona Calanda da la secziun Rezia dal Club alpin svizzer (2073 m), destruida tras ina lavina il 1914 e reconstruida il 1917. Il 1943 ha il militar provocà in grond incendi da gaud al Calanda. Il 1969 han ins reintroduci cun success capricorns.

Martin Bundi

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Da Bavania pon ins admirar anc en blers lieus l'usit dad «ir cun la steila» sco qua a Surava.

FOTO N SIMMEN



Il Chalandamarz (sin la foto ad Ardez) vegn attribui a la gruppa fitg veglia dals cortegis da canera.

KEYSTONE

Tradiziuns ed usits en terra rumantscha

■ L'intschess linguistic rumantsch è ritg da vegls usits savens ingenius da pro-vegnientscha pajauna, romana u vegl cristiana che vegnan cultivads anc oz en las differentas valladas.

Bavania

Festa da la giuventetgna dal vitg en l'Engiadina Bassa (era: Babania), a Domat (Buaneia) ed en la Val dal Rain Anterior (Buania) che cuntegna sco element central il «trar oura las marusas» (Engiadina), las «bugadeias» (Domat), «las signuras» (Riein, Pitasch). En la plipart da las vals suttamettevan las cumpagnias da mats tut las mattas ad in avugà ch'era responsabel per lur cumportament moral. Ad Ardez tiravan ora las mattas da Bavania lur marus, l'uschenumna marus da la zecla. Er a Domat vegnivan furmads ils «pèrs per in onn» tras la sort. L'usit è spari bunamain dapertut en il decurs dal 20avel tschientaner, sco era il «ir a mattaus» da quel di. Ad Ardez percenter vegn cultivà anc oz da Bavania il Bal da la schocca cotschna: il suentermezdi dals 6 da schaner tiran ora las mattas lur «char»; vers saira visita mingina ses marus per dar enconuscent ad el la sort. Sco simbol da la praschunia imperativa metta ella al mat in bindel cotschen enturn culiez; quai oblighescha quel da procurar che sia «marusa» possia sautar savens la saira da bal. En vitgs catolics ha lieu da Bavania il «ir cun la steila». Trais mats, travestids sco ils retgs Chasper, Meltger e Baltasar, portan sin ina stanga ina gronda staila cun ina laterna tras il vitg e chantan (escortads magari d'in chor u d'ina suita) chanzuns dals Trais Retgs, per las qualas els vegnan recompensads cun in regal (daners e.a.). Ina furma probablmain pli veglia da quest usit è quella ch'ils mats gievan cun stgellas d'ina chasa a l'aura e clamavan «Buania, Buania», ed or da fanestra vegnivan bittadas nuschs, tschaschas e paira tosta.

Chalandamarz / Calonda mars

Festa da la giuventetgna derasada pli baud en l'Engiadina (Chalandamarz) ed en il Grischun Central (Calonda mars). Il Chalandamarz vegn attribui a la gruppa fitg veglia dals cortegis da canera ch'avevan oriundamain tranter auter era il scopo da svegliar la fritgaivladad. Tenor il chalendar roman valeva il prim da mars (*Calendae Martii*) sco entschatta da l'onn. Quel di va la giuventetgna da scola cun plumpas, zampugns e stgellas, decoradas per part cun flurs da palpiri da tuttas colurs, tras las vias e giassas e stgatscha l'enviern cun chanzuns da primavera. La saira ha alura lieu il Bal da Chalandamarz. Quest usit ha survivi mo pli sco festa d'uffants en l'Engiadina, la Val Müstair, la Bergiaglia, il Puschlav, il Surmeir e la Val d'Alvra. Cun «Uorsin» han Selina Chönz ed Alois Carigiet rendi enconuscent il Chalandamarz sin l'entir mund. L'usit vegn ultra da quai dechant en numerusas chanzuns rumantschas.



I n'è betg scleri sche l'usit da «l'hom strom» signifitga la stgatschada simbolica da l'enviern u sch'el va enavos sin l'usit oriund da l'aduraziun dal sulegl.

FOTO LO

Dretgira nauscha

Instanza morala parastatala convocada antruras a moda veglia u formala sin fundament da la pratica giudiziala ordinaria da la Veglia Republica, numnada era dretgira dals mats. Da questa dretgira è naschidas en Surselva las «dretgiras nauschas denter Tscheiver e Cureisma» che rendevan public a moda ironica surpassaments morals e narradads commessas en vischnanca. Sco giustizia arbitrara (giustizia da Lynch), l'emprim spontana, alura pli e pli reglada, ha la dretgira dals mats exercit fin a sia aboliziun en il 18avel tschientaner (Engiadina, Puschlav) respectivamain a ses scumond chantunal il 1856 quasi dapertut pura giustizia populara senza basa legala. Ella furma l'instanza morala en vischnanca era là nua che las leschas n'avevan nagina vigur (nauschas disas, dispitas matrimonialas, afferas d'amur). Cun far star mal ils «putgants» davant il public, bagnar els en il bigl u stgellar ora els vegnivan ils vischins savens tirannisads. Questas dretgiras eran structuralmain fitg diversas. Ellas vegnivan regnidas durant tscherts dis da l'onn sut tschiel avert (Cadi, Lumnezia), a chaschun dad accusaziuns (Panaduz) u ina giada l'emna / il mais. Reactivada a Mustér il 1989.

Hom strom

Veglia isanza pratigada a Scuol. La damaun da l'emprima sonda da faver van ils mats da Scuol tar ils purs a ramassar strom che vegn alura entretschà cun art ad in um da strom. Il suentermezdi vegn l'Hom strom transportà a l'anterior lieu da dretgira (Gurlaina) ed ars la saira. Oriundamain (ed enfin l'entschatta dal 20avel tschientaner) vegnivan ars trais umens da strom (per mintga terzal in) en lieus determinads (Vi, Clozza, Praem / Scuol Sor). I n'è betg scleri sche quest usit signifitga la stgatschada simbolica da l'enviern u sch'el va enavos sin l'usit oriund da l'aduraziun dal sulegl.

Parada

La parada dals giuven, il pli savens en uniforma militara e cun arma, manava – e maina per part anc adina – las processions a l'ocasiun da festas ecclesiasticas catolicas, suandada da las bandieras da las uniuns dal vitg. La furma la pli festiva e tradiziunala da quel usit vegn anc tgirada a Domat. En il Puschlav ed il Surses è la parada vegnida remplazzada sut pressiu dals chapuschins tras confraternitats. A quellas appartegna probablmain era la Processiuun dals confrans, in usit lià a la baselgia e cultivà il Di da las olmas (2 da november) en il Surses. Las confraternitats religiosas vegnivan cultivadas anc fin a l'entschatta dals onns 1960, oz sa preschentan ellas dentant mo anc a Sur.

Plaz da filar / filadè

Sairada da trategniment, a la quala las dunnas sa radunavan cun lur filadè. Numnà era Tramagl da filar u Tramagl da filadè. A quest «ir a plaz / plazzin» en stiva da filar ha Tumasch Dolf deditg ses famus gieju cun chant «La stiva da filar» (1924).

Punschadurs / Puntgadurs

Purtaders d'in vegl usit pajaun deditg a Bacchus, il dieu dal vin. Quest usit vegniva tgirà en il 16avel tschientaner en la regiun da sur il gaud da Flem (Surselva).

Schlitteda / Schlittada

Usit da la giuventetgna engiadinaisa d'origin betg enconuscent. Festa da divertiment senza fund istoric. Ina dumengia da schaner bardigliavan ils giuvenils chavals per ir cun ina giuvna en schlitta d'in vitg a l'auter. En ina ustaria passentav'ins alura cun spaisa, bavronda e chant in per uras allegraivlas. Oz sa partecipeschan era pèrs maridads a la Schlitteda / Schlittada ch'è daventada oravant tut en l'Engiadin'Ota in'attraziun turistica.

Silvester / Bumaun

En il Grischun rumantsch chattan ins differentas furmas dad usits da Silvester e Bumaun. A Tinizong en il Surmeir p. ex. festivesch'ins ina sort da chant da Silvester. Mats elegids van vers mesanotg da S. Silvester tras il vitg, chantond la chanzun «paclang» (paclauna) ed esprimind giavichs. La damaun da Bumaun (Bumang) van alura ils mats da chasa en chasa a giavichar in bun onn nov. En Surselva gievan (e van per part anc oz) tut ils scolars da Bumaun da chasa en chasa a «cattar bienmaun»: els giavichan in «bien niev onn» e survegnan per quai intgins raps. En la Val Tujetsch vegnivan figliols e figliolas envidads da lur padrins e madritschas tranter l'entschatta da december e Bavania (Buania) al «bienmaun» («ir per bienmaun») – in past ordvart festiv, suandà da divertiment e terminà vers saira cun la surdada dal regal als figliols ed a las figliolas.

Stapfer / Stopfer

Quest usit gia daditg spari vegniva cultivà en Surselva almain en il 16avel tschientaner. El vegniva tgirà da commembers d'in tschertgel cultic, ina sort da mastergnanza da nars che festegiava en cuirass vegls usits da primavera e da tscheiver che finivan en ina sort d'extasa.

Trair paliets

Usit cultivà en Surselva anc en ils onns 1950 dals mattatschs a l'entschatta da la bunatscha / marschauna. D'in lain senza roma vegniva taglià in paliet (ina frizza) da 20–30 cm lunghezza cun in piz davantvart, ina pala davosvart ed ina crenna al punct da gravitaziun. Il paliet vegniva tratg cun ina «gaischla» (ina corda vi d'in bastun, omadus da ca. 50 cm lunghezza). Cun quel usit vegniva stgatschà l'enviern.

Trair schibettas

Quest usit deriva dal temp precristian. El vegn anc cultivà sco «usit da l'amur» a Danis-Tavanasa ed a Dardin sco era a Vaz Sut. La saira da l'emprima sonda suenter mesemna da la tschendra tiran ils mattatschs e giuvenils umens cun in lung bastun las schibettas ardentes (rudellas da lain) d'ina collina sur il vitg guador en la val. Las schibettas vegnan deditgadas mingamai ad ina mattatscha u giuvna («Oh, tgei biala schibetta per la Maria»). Alura van ils buobs a pushegn tar lur adurada.

Tscheiver

Usit da l'ir cun mascras per las giassas, cultivà tradiziunalmain en las regiuns catolicas dal Grischun rumantsch, celebrà dapi la mesadad dal 20avel tschientaner (sche insomma) mo pli sco tscheiver dals scolars la gievgia grassa. La cursa da mascaradas – in usit pajaun per scurrentar l'enviern – aveva a Domat fin avant paucs onns in caracter tradiziunalmain particular (cun las

renumadas mascras d'Albert Willi), ed il Tscheiver finescha là cun la gievgia grassa e betg cun la mesemna da la tschendra. Ils muments culminants dal Tscheiver èn, ultra da la gievgia grassa, il «margis bel». Quest usit vegn per part puspè vivifitgà – sco attractivitat turistica – u reintroducì (p. ex. en vitgs protestants). Adolf Collenberg

Mantinadas

Usit pratigà da la giuventetgna grischuna da Bumaun, da tscheiver, da primavera u durant in spusalizi, sursilvan Mantinadas, surmiran Mintinadas, vallader Mantinadas / Mattinadas, puter Mantinedas. Quest usit deriva apparentamain d'ina festa da musica e saut organisada per beneventar la primavera ed il resvegli da la vegetaziun. A quai regordan versets d'uffants da la Bergiaglia, ma era las Mantinadas da Vrin e Lumbrein: in giuven porta ina giuvna (poppa da strom) en in vonn e sauta cun ella en rudè, accompagnads dal chant da la giuventetgna. Las Mantinadas en Surselva eran per regla in cortegi costumà, organisà en tscherts vitgs da la giuventetgna a la fin dal tscheiver (a Trun cun l'um selvadi, il vegl e la veglia). A Vella gievan ils giuvenots il mardi da tscheiver da chas'en chasa tar las giuvnas, faschevan là in ceremonial e dumandavan in dun per festivar alura la saira en cuminanza (documentà il 1820). En Engiadin'Ota eran las Mantinedas in usit da spusalizi. La saira dal di d'annunzia dal spusalizi sa radunava la giuventetgna dal vitg davant la chasa dals spus, tegneva plets e fascheva printgas, sautava e sa divertiva fin che quels offrivan ina tschavera u pajavan in bal. A quest eveniment regorda era l'usit dal Vin da cavals, derasà en la Foppa (Flond) ed a Trin: la cumpagnia da mats barricadava la via al spus e laschava puspè passar el pir suenter ch'el aveva deponì ina spendradira che relaschava el dal ravugl da la giuventetgna nubila. En l'Engiadina designava il term Mantinadas / Mantinedas era simplmain il chantar e sunar dals mats la notg sut las fanestras da las mattas, quai che regorda a l'usit dal Ir a mattaus. A Ramosch, Tschlin ed en auters vitgs engiadinais celebrava la giuventetgna las Mantinadas ils 2 da schaner cun in cortegi, suandà d'in past festiv cun musica da saut. Las Mantinadas èn svanidas quasi complettamain en il Grischun dapi il 19avel tschientaner e surtut suenter la Segunda Guerra mundiala.

Martin Bundi

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Filisur e Bravuogn

En la part superiura da la Val d'Alvra

■ **Il viadi dal LIR maina questa giada entadim la Val d'Alvra, en las vischnancas da Filisur e Bravuogn. Filisur giascha a la confluenza da la Landwasser e da l'Alvra e furma in center da traffic regional. Tant a Filisur sco er a Bravuogn è vegni explotà ed elavurà minerals da fier fin viaden il 19avel tschientaner. Il turissem a Bravuogn profite-scha da la via da scarsolar da Preda-Bravuogn; dapi il 2012 en pli dal Museum da viafier Alvra.**

Filisur

Vischnanca politica, circuit Bravuogn, district Alvra, situada a 1084 m lung la via da la vart dretga da l'Alvra, cun l'acclau da Valplana (1504 m) sin la spunda sanestra da la Val da la Landwasser. 1262 *villa Fallisour*. 1803 164 abitants; 1850 280; 1888 273; 1900 644 (construcziun da la Viafier retica); 1910 333; 1950 375; 2000 466.

Chats da fragments d'objects dal temp da bronz a Filisur. La part superiura da la Val d'Alvra era vegnida colonisada da Rumantschs en il temp autmedieval, ils culms da Valplana da Gualsers en il 15avel tschientaner. En il conturn da Filisur sa chattavan migiurias ed ina curt suttamesas al chastè da Greifenstein (a la fin dal 12avel tschientaner), residenza dal chastellan sur la vischnanca. Il 1394 è il signuradi da Greifenstein passà dals Wildenbergs, Werdenbergs e Matschs a l'uestg da Cuira ch'ha transfurmà il chastè en in center administrativ da la regiun. Il 1537 ha la vischnanca cumprà ora ils dretgs signurils episcopals. Il vischinadi da Filisur disponiva d'ina atgna dretgira civila entaifer il cummin da Bravuogn (fin il 1851). Ecclesiasticamain ha Filisur appartegnì a Bravuogn fin il 1496. La baselgia, consecrada als ss. Giosch e Flurin, datescha dal 1495 (pli tard deditgada a s. Martin), quella da Valplana dal 1681. Refurmaziun enturn il 1590.

En la regiun cun bler guaud è vegni explotà fin il 1848 metal ed elavurà en la fundaria centrala da Bellaluna. Sper l'agricultura e l'allevament da muvel pratigava la populaziun da Filisur anc autras activitads liadas al traffic da transit. Il schlargiamet da la via da l'Alvra (1855–58) e l'avertura da la lingia da la Viafier retica en l'Engiadina (1903) ed a Tavau (1909) han fatg da Filisur in impurtant center da traffic stradal e ferroviar. In'attracziun è il viaduct sur la Landwasser al nord dal vitg (part dal Patrimoni cultural mundial da l'Unesco). Meglieraziun generala il 1942. A l'entschatta dal 21avel tschientaner sa chattavan a Filisur in'interpresa d'orticultura, pliras resgias sco era la centrala da l'Ovra electrica Alvra-Landwasser SA, averta il 1967. Il 2005 lavuravan 18 % da las persunas cun activitad da gudogn a Filisur en il sectur secundar, 45% en il sectur terziar. La germanisaziun è stada pratica-

main terminada a la fin dal 19avel tschientaner. L'aspect dal vitg regorda fermamain a quels da l'Engiadina e vegn considerà sco bain cultural d'impurtanza nazionala. *Jürg Simonett*

Valplana

Fracziun da la vischnanca politica da Filisur, situada a 1504 m da la vart sanestra da la Landwasser, visavi Tain, numnada era Valplan, tudestg Jenisberg. 1482 *Fallploun*, *Fallkaeven*. Il num rumantsch originar, Valcheva/Valcava, documentà fin il 1693, n'è betg pli usità. L'anteriura terrassa dad aclas, abitada da Rumantschs, è vegnida colonisada da Gualsers en il 15avel tschientaner. Explotaziun da minerals da fier dapi la fin dal 14avel tschientaner (elavuraziun a Bellaluna). Sco colonia da lingua tudestga e refurmada dapi ca. l'onn 1590 era Valplana in unicum en la regiun. La baselgia evangelica datescha dal 1681. Enturn il 1850 abitavan set famiglias (ca. 40 persunas) a Valplana, il 1991 11, il 2004 15. La fin da l'industria da minieras ha provocà suenter il 1850 in'onda d'emigraziun. La scola, averta il 1896, è vegnida fusiunada cun Filisur il 1905. Punt remartgabla sur la Landwasser. *Adolf Collenberg*

Greifenstein

Domini, cummin e dretgira auta en la Val d'Alvra, numnads suenter il chastè da Greifenstein en vischinanza da Filisur. 1233 *Gripenstein*. Il chastè da Greifenstein, erigì en il 12avel tschientaner, furmava il center dal domini cun il medem num e cumpigliava las vischnancas da Filisur, Bravuogn, Latsch e Stugl. Il 1394 è il chastè passà dals signurs de Wildenberg, Werdenberg e Matsch a l'uestg da Cuira ch'ha fatg da quel il center administrativ da la regiun. Il 1537 han las vischnancas da la dretgira da Greifenstein (numnada era dretgira da Belfort) cumprà ora ils dretgs signurils episcopals. Singuls libers da la Lia da la Chadé, suttamesa a Greifenstein, avdavan en l'uschenunada Quarta exteriura (Latsch, Surava e Brinzauls) che furmava ina part da la dretgira da Belfort. Savens hai dà conflicts pervia dals dretgs e duairs da quests vischins esteriurs. A la dretgira auta da Greifenstein appartegniva, ultra da Greifenstein, era il cummin da Vaz cun ils vischinadis da Vaz, Stierva e Mut. Il 1851 furmava Greifenstein ensemen cun Tain il circuit da Bravuogn. Vaz è vegni integrà en il circuit d'Alvaschagn (omadus district d'Alvra). *Jürg Simonett*

Bellaluna

Anteriura culegna da minieras, situada a 1086 m a las rivis da l'Alvra sin territori da Filisur al cunfin cun Bravuogn. La fundaria, construida d'Albertini & Cia, è vegnida transferida a l'entschatta dal 19avel tschientaner da Bravuogn a Bellaluna. Il



Bravuogn cun la chasa da cura (a sanestra). Fotografia dal 1906.

1834 ha in incendi da guaud destrui ina part da l'implant. La miniera da Bellaluna è vegnida messa ord funcziun il 1848. La nova via da l'Alvra, construida il 1888 tras Bellaluna, ha chaschunà la destrucziun d'insaquants edifizis e da la fundaria. A sanestra da l'Alvra en sa mantegnids l'edifiz d'administraziun e d'albiert per miniers, utilisà periodicamain sco ustaria fin il 1988, ed in conduct che provediva l'anteriura resgia cun aua dal flum. A dretga da l'Alvra existan restanzas da dus furns da crap, d'in furn da metal e da la fundaria. Il 1982 ha l'Uniiun dals amis da las minieras dal Grischun sanà ils dus furns da crap. *Martin Bundi*

Crap da Bravuogn

Crap marcant e paraid-crap al vest da Bravuogn. Il Crap da Bravuogn (ca. 1300 m) era a ses temp in grond impediment per il traffic commercial sur il Pass da l'Alvra. Fin viaden il 17avel tschientaner stuev'ins sviar el da la vart nord sur Pensch (1500 m). Il 1695 ha la vischnanca da Bravuogn incumbensà ils dus tagliacrappa Peter Zurr e Peter Tschler da Tusaun da realisar tranter Bellaluna e Bravuogn ina nova via tras il Crap da Bravuogn cun ina pendenza pli regulara. Per l'emprima giada en l'istorgia da las Trais Lias han ins utilisà per quest intent pulvra naira. La nova via tras il Crap da Bravuogn era 2,7 m largia ed aveva mirs da sustegn e plazzettas per sa cruschar. Ella è vegnida averta al traffic da chars il 1696. Il Crap da Bravuogn vala sco ovra d'art en la construcziun da vias e serva anc oz, grazia a renovaziuns permanentas, al traffic d'autos. *Martin Bundi*

Bravuogn

Vischnanca politica, circuit Bravuogn, district Alvra, situada lung la via al Pass

da l'Alvra, cun Preda e las duas culegnas Latsch (autonoma fin il 1912) e Stugl (autonoma fin il 1920), situadas sin terrassas da la vart dretga da la val. 1209 *de Bregonio*, uffizial Bergün/Bravuogn, talian *Bergogno* (istoric). 1571 542 abitants; 1803 495; 1850 637 (cun Latsch e Stugl); 1900 1537; 1910 715; 1950 608; 1970 451; 2000 520. Chats dal temp da bronz a Bravuogn e conturns. Ils Rumantschs avevan colonisà ed urbanisà pir en il temp autmedieval la part sura da la Val d'Alvra. Il 1154 è attestada ina curt episcopala a Latsch, il 1270 in bain a Stugl. Dal 12avel tschientaner datescha il domini dals signurs von Greifenstein che residavan probablamain a Bravuogn en la tur medievale situada en il center dal vitg. Il 1394 è il domini passà dals signurs von Wildenberg, Werdenberg e Matsch a l'uestg da Cuira. Enturn il 1400 menziunescha l'urbani episcopal duas migiurias e 27 huobas a Bravuogn. Il 1537 è Bravuogn sa cumprà liber dals dretgs feudals. Da la baselgia principala, construida il 1188 e deditgada als ss. Peder e Flurin, è Filisur sa separà il 1496, Latsch e Stugl il 1620. Refurmaziun 1577–90. Ils vischinadis da Filisur, Latsch e Stugl possedeavan atgnas dretgiras civilas. Bravuogn era il lieu principal dal cummin cun il medem num (dapi il 1854 dal circuit da Bravuogn, cun Tain e Filisur) ed aveva in lieu d'execuziun. Sper l'allevament da muvel e l'agricultura han permess era l'explotaziun e l'elavuraziun da minerals da fier in'existenza dal 16avel tschientaner fin viaden il 19avel tschientaner. Il traffic sur l'Alvra aveva obtegnì dapli impurtanza suenter ch'ins aveva perfurà il Crap da Bravuogn (1696) e realisà la via moderna sur il pass (1865). Quai declera l'orientaziun da Bravuogn vers l'Engiadina. Dal 1860–75 ha existì ina fabrica da quadrels al Crap Alv. La Viafier da l'Alvra (1903) ha promovì il turissem (chasa da cura 1905). Preda è abità dapi alura durant l'entir onn. Il turissem d'enviern profite-scha da la via da scarsolar da Preda-Bravuogn e dals implants da skis, construids suenter il 1959. Il 2006 lavuravan 61 % da las persunas cun activitad da gudogn a Bravuogn en il terz sectur. Meglieraziun generala 1975–76. Center da perscrutaziun da la Scola politecnica federala/secziun allevament d'animals sin l'Alp Crap Alv. La part da la populaziun da lingua rumantscha è sa diminuida da 80% il 1880 a 10,6%/26,9% (megla lingua/tuttas indicaziuns) il 2000. *Jürg Simonett*

Latsch

Anteriura vischnanca politica. Vitg a mantun da la vischnanca da Bravuogn, situà a 1588 m sin ina terrassa al nordost da Bravuogn. 1154 *de Lacis*. 1579 113 abitants; 1808 112; 1910 112; 2001 61. La part sura da la Val d'Alvra era vegnida colonisada

da Rumantschs en il temp autmedieval. Il 1154 è documentà a Latsch in bain (*curtis*) episcopal, il 1523 la chaplutta da S. Niclà. Il 1590 ha la vischnanca aderì a la refurmaziun, il 1620 è ella sa distatgada da la baselgia-mamma da Bravuogn per furmar in'atgna plaiv, da la quala Stugl è sa separà il 1689. Latsch ha g' in'atgna dretgira civila fin il 1851 ed è stada ina vischnanca autonoma fin il 1912. A Latsch vegn pratigà l'allevament da muvel e l'agricultura, e fin en il 19avel tschientaner han ins era explotà qua minerals da fier. La via charrabla per Bravuogn è vegnida construida il 1891. *Jürg Simonett*

Stugl

Fracziun da la vischnanca politica da Bravuogn, situada sin ina terrassa sin la spunda nord sur Bravuogn, autonoma fin il 1920. Ca. 1150 *de Stule*, tudestg Stuls (uffizial Stugl/Stuls). 1579 68 abitants; 1808 44; 1850 64; 1900 42; 1910 69. La part dadens da la Val d'Alvra è vegnida colonisada da Rumantschs pir en il temp autmedieval. Enturn il 1270 possedeava il chapel catedral da Cuira bains a Stugl. La chaplutta da S. Gion vegn menziunada per l'emprima giada il 1523. Refurmaziun il 1590. Il 1620 è Stugl sa separà ecclesiasticamain da Bravuogn ed il 1689 era da Latsch. Stugl ha possess in'atgna dretgira civila fin il 1851. Ils abitants vivevan da l'allevament da muvel e da la cultivaziun dad ers. Il 1903 ha Stugl obtegnì in'atgna staziun da la Viafier da l'Alvra, colliada il 1904–05 cun la via d'access al vitg. *Jürg Simonett*

Crap Alv

Culegna temporara en la vischnanca da Bravuogn, situada al Pass da l'Alvra a 2036 m. 1552 *Crap alf*. Il 1654 è attestà a Crap Alv in albiert, reconstruì il 1874. El era l'unic lieu da repaus tranter Bravuogn e La Punt en l'Engiadina fin a l'entschatta dal 19avel tschientaner. Dal 1860 fin il 1875 ha existì ina fabrica da quadrels a Crap Alv. Suenter l'avertura da l'ospizi sin il pass (1871) e da la Viafier da l'Alvra (1903) ha Crap Alv pers s'impurtanza. La via da pass, construida tranter il 1864 ed il 1866, è actualmain serrada l'enviern. La Scola politecnica federala da Turitg maina a Crap Alv ina staziun da retschertga per l'allevament d'animals. *Jürg Simonett*


Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



L'enconuscent viaduct sur la Landwasser al nord da Filisur.

KEYSTONE



Exempels per las activads multifaras dal Servetsch archeologic: Conservaziun da las restanzas da la baselgia sepulcrala da Son Steffan a Cuira.



Analisa DNA da las restanzas presuntivas da Gieri Genatsch.

Invista en la lavur dal Servetsch archeologic dal Grischun

■ Il term «archeologia» deriva dal grec archaios (vegl) e logos (scienza) e signifitava oriundamain la perscrutaziun da las epocas istoricas situadas avant l'invenziun da la scrittira. Ozendi è l'archeologia ina scienza ordvart spezialisada che perscrutescha in vast spectrum da chats da las pli differentas epocas istoricas. La preschentaziun dad oz dat in'invista en la perscrutaziun archeologica en il Grischun e si'istorgia.

Archeologia

Scienza dal temp antic, rendida accessibla tras exchavaziuns, quai vul dir tras chats e rechats. L'archeologia na s'occupa oz betg sulettamain da las epocas da l'umanitad anteriuras a la scrittira (preistorgia ed istorgia tempriva), ma bain era da chats e rechats dal temp medieval e modern, per exempel perscrutaziun da chastels, da centers municipals, d'areals industrials. L'archeologia è ina scienza giuvna en il Grischun. En il 19avel tschientaner han ins rimnà en il Grischun sulettamain chats dal temp antic e dal temp preistoric e protoistoric. En quest connex èn vegnids fundads la Societad istoric-antiquara dal Grischun (1870, oz Societad istorica dal Grischun) ed il Museum retic (1872). Dal 1902 datescha ina da las emprimas exchavaziuns archeologicas sin territori grischun, exequida en la Custorei (areal da la halla da fier) a Cuira. Il 1903 han Jakob Heierli (1853–1912) e Wilhelm Oechsl (1851–1919) publictà lur «Urgeschichte Graubündens mit Einschluss der Römerzeit».

Tranter il 1930 ed il 1950 ha l'archeologia grischuna fatg in grond progress grazia al selvicultur Walo Burkart che tgirava en uffizi d'onur la col-

lecziun archeologica dal Museum retic. El ha organisà e rendì publicas numerusas exchavaziuns da perscrutaziun. I sa tracta da las exchavaziuns dal champ da fossas a Castaneda sco era d'exchavaziuns d'abitadis a la Muotta/Falera, al Petrushügel/Cazas ed a Crestaulta/Surin. Era diversas autras personalitads èn sa rendidas meritavlas tras exchavaziuns e publicaziuns, en l'emprima fasa da la perscrutaziun archeologica grischuna per exempel Fritz Jecklin, Hans Conrad (ch'è s'engaschà oravant tut per la perscrutaziun archeologica da l'Engiadina: pass dal Güglia e dal Set, Muotta da Clüs/Zernez, ed auter), Walter Sulser (ch'ha procurà per numerusas exchavaziuns da baselgias).

Il 1960 ha cumenzà ina nova fasa en l'archeologia grischuna che s'estenda fin il di dad oz. Il Museum retic ha tschernì quel onn Hans Erb sco emprim conservatur en uffizi cumplain ch'è stà responsabel tranter auter per la perscrutaziun archeologica dal terren en il chantun Grischun. Ins pudess numnar quest temp la fasa da las exchavaziuns d'urgenza e da salvament. Il 1967 han las autoritads grischunas instituzionalisà in servetsch archeologic chantunal. Quest uffizi ha l'incumbensa principala da segirar las exchavaziuns archeologicas dal terren periclitadas tras l'activitad intensiva en il sectur da construcziun, quai vul dir da las scuvrir tenor ils criteris scientifics, da las documentar cun disegns e fotografias e da las publictar tenor pussaivladad. Christian Zindel è vegnì elegì sco emprim archeolog chantunal dal Grischun. Il Servetsch archeologic dal Grischun ha surveglià numerusas exchavaziuns, per exempel da las culegnas dal temp neolitic da Tec Nev/Mesocco, Welschdörfli/Cuira e Pian del



Sondagi ad auta tecnologia da la culegna preistorica da Crestaulta/Lumbrein.

Remit/Castaneda (agricultura pratigada cun l'arader), da las culegnas dal temp da bronz da Padnal/Suagnin, Tummihügel/Maladers e dal champ da fossas dal temp da fier da Coop/Mesocco. Fitg impurtantas èn las exchavaziuns en il vicus roman a Cuira ed en la *mutatio* romana a Riom; ma era las numerusas exchavaziuns da baselgias en il Grischun e las lavurs da perscrutaziun en la citad veglia da Cuira han purtà fin ussa resultats extraordinaris

Jürg Rageth

Servetsch archeologic dal Grischun

L'archeologia grischuna è stada fin en ils onns 1960 in ressort dal Museum retic. A partir dal 1926 ha il selvicultur Walo Burkart tgirà en uffizi d'onur la collecziun archeologica. L'onn 1960 è Hans Erb vegnì tschernì sco emprim conservatur dal Museum retic en uffizi cumplain, responsabel tranter auter era per la perscrutaziun archeologica dal terren en il chantun Grischun. Il 1967 è il servetsch archeologic chantunal vegnì instituzionalisà cun Christian Zindel sco emprim archeolog chantunal dal Grischun (suandà il 1989 dad Urs Clavadetscher). La collecziun archeologica e l'entira infrastruttura administrativa e scientifica èn vegnidas dischlocadas en il chastè da Lantsch Sut ed il 2007 a Cuira. Il Servetsch archeologic dal Grischun, integrà en l'Uffizi da cultura dal Grischun dapi il 2003, ha oz ils suandants pensums centrals: exchavar lieus da chat archeologics, perscrutar la construcziun d'edifizis da valor istorica, gidar a far restauraziuns, conservar (archivar) ed evaluar scientificamain ils objects chattads ed ils lieus da chat impurtants. Il Servetsch archeologic dal Grischun renda accessibel las scuvertas al public tras re-

ferats, visitas guidadas e publicaziuns. El dispona dapi il 1997 d'in agen labor dendrocronologic, en il qual la laina po vegnir datada cun ina precisun dad in onn. Las coniferas, numnadamain il pin, il laresch, il sember ed il tieu, utilisadas il pli savens sco laina da construcziun en il Grischun, permettan dataziuns absolutas fin en il quart millenni a.C. Il labor dendrocronologic po vegnir utilisà era da privats. L'organ da publicaziun dal Servetsch archeologic dal Grischun è il rapport annual.

Adolf Collenberg

Walo Burkart

* ils 25 d'avrigl 1887 a Magden/AG, † ils 28 da november 1952 a Cuira, da Merenschwand/AG, burgais d'onur da Castaneda, nua ch'el è vegnì naturalisà il 1934 cun sia famiglia. Figl da Sebastian, plevon cristian-catolic, e dad Anna n. Koch. ∞ Judith n. Lorez. Gimnasi a Basilea, studegià inschigneria a la Scola politecnica federala Turitg 1906–09, inschigner forestal diplomà. Assistent a l'Uffizi da selvicultura dal Grischun 1912, selvicultur circuital 1916. Il 1926–51 ha el dedigà ses temp liber a la preistorgia ed è daventà il pionier da la perscrutaziun archeologica en il Grischun. Curatur da la collecziun archeologica dal Museum retic a partir dal 1926. Burkart ha chattà e descrit sco emprim las culegnas preistoricas da Crestaulta e Cresta Petschna a Lumbrein-Surin sco era quella da Muotta/Falera, Caschligns/Cunter, Petrushügel/Cazas e var duas dunsainas autras. Numerusas publicaziuns surlonder en il «Bündner Monatsblatt» ed il «Jahrbuch der schweizerischen Gesellschaft für Ur- und Frühgeschichte». Commemember da la suprastanza da la Societad svizra per la preistorgia 1937–46, commemember

d'onur da la Societad istorica dal Grischun 1950.

Jürg Rageth

Hans Erb

* ils 6 d'avust 1910 (Hans Emil) a Turitg, † ils 13 da settember 1986 a Cuira, reformà, da Turitg. Figl dad Emil Heinrich e da Frida n. Oetiker. ∞ Martha Elisabeth n. Furrer. Gimnasi e studis d'istorgia, d'istorgia d'art e da geografia a Turitg, dr. fil. 1940. Erb è stà in dals emprims archeologs svizzers per il temp medieval. A partir dal 1932 ha el interpredi diversas campagnas archeologicas en il Grischun (Belmont, Riòlta Bassa, Grepault-Trun ed auter) ed en blers auters chantuns da la Svizra. Scolast gimnasial ad Aschera 1943–60. Conservatur dal Museum retic 1960–75, dasperas archeolog chantunal fin il 1967. Erb ha transformà il Museum retic d'ina collecziun chantunala d'antiquitads en in museum modern. Iniziant e confundatur da la Societad grischuna per ils chastels; commemember e referent en numerusas uniuns chantunales e federalas. El ha publictà ina trentina da texts, oravant tut davart l'archeologia e la scienza museala.

Adolf Collenberg

Christian Zindel

* ils 28 da zercladur 1931 ad Oberurnen/GL, † ils 29 d'avust 1996 a Cuira, reformà, dad Oberurnen. Figl da Christian, scrinari, e da Maria n. Baruffol. ∞ Alice n. Fritsche. Gimnasi ad Appenzell, mag. oec. a S. Gagl 1955. Magister al gimnasi da Kaltbrunn/SG 1962–67. Sper la scola è Zindel sa participà permanentamain ad exchavaziuns (per part sco manader, per exempel a Cuira-Welschdörfli-Areal Dosch, a Tumein, e.a.) ed è sa scolà a Turitg tar Emil Vogt. Il 1967 è el daventà l'emprim archeolog chantunal dal Grischun. Sco tal ha el mess en pe il Servetsch archeologic dal Grischun e dirigì quel fin il 1989. Zindel è s'interessà oravant tut per il temp preistoric: Carschenna/Seglias, Tec Nev/Mesocco, Areal Ackermann e Zindel/Cuira, Pian del Remit/Castaneda e.a. El ha inizià la construcziun da l'edifiziu da protecziun sin l'Areal Ackermann (1975) e dirigì las lavurs da spendrament da las picturas romanas.

Adolf Collenberg



Dataziun d'objects da lain cun agid da la dendrocronologia.

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.

Da Mustér al Pass dal Lucmagn

■ Suenter la preschentaziun da la claustra benedictina (mira LQ dals 15 da favrer 2012) suonda oz l'artitgel davart la vischnanca politica da Mustér. Il vitg da Mustér furma il lieu principal da la Cadi e giascha al spartaviis per ils Pass Alpsu/Cuolm d'Ursera (en il vest) e Lucmagn (en il sid). Silsuenter cuntinuescha il viadi tras la Val Medel e maina sur Curaglia enfin al cunfin tessinais.

Disentis/Mustér

Vischnanca politica, circuit Cadi, district Surselva (avant il 2001 Rain Anterior). Mustér è la pli gronda da las set vischnancas da la Cadi ed era il lieu principal dal circuit. La vischnanca cumpiglia Mustér Vitg (center) ed ils vischinadis da Mompé-Tujetsch, Segnes, Acletta, Funs/Clavaniev, Disla, Cavardiras e Mompé-Medel (meglieraziun generala 1984–98). Cun excepziun dals dus Mompés cumpiglian ils vischinadis mingamai plirs abitadis. 765 *Desertina*, 1127 *monasterium Desertinensis*, tudestg Disentis (uffizial Disentis/Mustér). La culegna da Brulf, situada da la vart dretga dal Rain Anterior, è vegnida sutterrada d'ina bova il 1689. Mustér è il center da la Sursassiala. La vischnanca sa chatta al spartaviis per il Cuolm S. Maria/Lucmagn ed il Cuolm d'Ursera ed è il punct da colliaziun da la Viafier retica e da la Viafier dal Matterhorn-Gottard (antruras Viafier Furca-Alpsu/VFA). Dapi il temp medieval tardiv è Mustér il lieu da cumin. 1850 1260 abitants; 1900 1359; 1950 2330; 2000 2172.

Chats dal temp da fier en la curt interna da la claustra (2007) e singuls chats dal temp da bronz e dal temp roman a la periferia da la vischnanca da Mustér. Era sch'ins suppona singulas culegnas per ils temps preistorics, è la *Desertina* tranter la Curreeza e l'Italia lumbarda vegnida colonisada pir a partir dal 7avel/8avel tschientaner. L'istorgia da Mustér è colliada stretgmain cun l'abazia e cun ses domini, la Cadi. A partir dal 1285 possedeavan ils subdits claustrals a Mustér, ultra da la claustra e dals ministerials, in agen sigil. Entant che las curts ed ils aclaus en restads politicamain senz'impurtanza, han ils abitants da Mustér Vitg surpiglià ina rolla directiva en la Lia Grisca. En consequenza da la reformaziun ha Mustér engaschà a partir dal 1522 in maiordom per survegliar la facultad claustrala, ed ils vischins avevan perfin il dretg d'eleger l'avat (1538–1614). A partir dal 14avel tschientaner èn sa domiciliads Gualsers en il territori da Mustér, surtut a Mompé-Tujetsch ed a Mompé-Medel. Ils colonisats da lingua tudestga èn s'assimilads a la lingua rumantscha. Ina vengina da lur bains ed aclaus èn vegnids bandunads. Ils chastels feudals dal temp autmedieval, tranter quels Travaulta, Ragisch e Chischliun, èn ids en muschna. L'origin da la baselgia principala da S. Gion-Battista, menziunada per l'emprima giada il 1261, n'è betg sclerì. La plaiv da Mustér è vegnida incorporada il 1491 a la claustra, possessura da la collatura, a la quala ap-

partegnevan era las plaivs da Tujetsch e (fin il 1500) da Medel. Dal 1648–1818 han exequì chaputschins la pastoraziun a Mustér, alura paders benedictins, dapi il 1879 plevons seculars. Cavardiras è daventà in benefizi da chaplania il 1713, Segnes il 1773. La baselgia da S. Gada, construida il 1100 a la via veglia en la Val Medel, è la pli impurtanta da las 14 baselgias e chapluttas da Mustér.

Il 1251 cumpara la Cadi per l'emprima giada sco persuna giuridica. Suenter il 1643 possedeava la vischnanca la giurisdicziun cumplaina. L'emprima costituziun communal è entrada en vigur il 1848, e cun l'introducziun da la Constituziun chantunala è Mustér daventada ina vischnanca politica. La funtauna da s. Placi, menziunada il 1740, ha la pli gronda concentraziun da radium da la Svizra ed è vegnida explotada suenter il 1870 per ils bogns da l'hotel da cura Disentiserhof, situads a l'entrada dal vitg. Il 1857 ha Mustér obtegnì in access a la nova via chantunala sur il Cuolm d'Ursera. Il medem onn è vegnida fundada la Stampa Romontscha (stamparia e chasa editura), editura da la Gasetta Romontscha.

Mustér Vitg ha gi fin a la fin dal 19avel tschientaner ina modesta fluriziun. Il turissem da stad ed il commerzi e mastern han prosperà pir suenter la colliaziun a la Viafier retica (1912) ed a la Viafier Furca-Alpsu (1926). Il 1952 ha Pius Condrau fundà la chasa editura *Desertina* ch'è sa deditgada l'emprim a la litteratura rumantscha, pli tard a l'art, a la cultura ed a l'istorgia. Ella è vegnida vendida il 1994 a la Gasser SA ed è passada il 1997 puspè sco chasa editura autonoma a la Casanova Druck und Verlag AG. Dapi il 1960 è Mustér Vitg il center da scola dal vischinadi, mo Segnes maina vinavant ina scola primara. Il liceum, installà il 1927 da la claustra, è daventà in center da furmaziun regional cun la renconuschientscha sco gimnasi tras la Confederaziun il 1944. Suenter il 1965 è sa stabilida a Mustér in'industria (Landis & Gyr fin il 1988, dapi alura Distec cun fabricaziun da furmas e d'apparats). Dapi l'avertura da las Penicularas Péz Ault (1971) è Mustér sa sviluppà a moda rasanta ad in center turistic. La vischnanca gioga ina rolla da pionier sin il champ da la telecomunicaziun e da l'energia solara (Ovra solara Deserta-sol). Il cussegl communal, che cumpiglia 21 commembers dapi il 1973, vegn elegì libramain, igl è dentant usit da resguardar tut ils vischinadis; quels giaudan in'administraziun economica parzialmain autonoma. Il 2005 lavuravan 9% da las persunas cun activitad da gudogn a Mustér en il sectur primar, 62% en il sectur terziar. Part da la populaziun da lingua rumantscha: 2000 75,3% / 86,3% (meglra lingua / tuttas indicaziuns). *Adolf Collenberg*

Medel/Lucmagn

Vischnanca politica, circuit Mustér, district Surselva (avant il 2001 Rain Anterior), situada en l'intschess dal Rain da Medel. Il territori communal correspon-



Vista generala da Mustér. Maletg da Johann Ludwig Bleuler, 1818.

da a quel da la Val Medel d'ina lunghezza da 16 km che collia la Surselva cun il Tessin e cumpiglia set fracziuns sparpagliadas ad in'autozza da 1332 fin 1621 m sur mar: Curaglia (vitg central), Soliva, Mutschnengia, Platta (lieu da patronadi, santeri da la val), Druval/Matergia, Pardé, Fuorns, S. Gions. Ina tschuncantina d'antieriurs bains ed abitadis da stad (tranter auter Pali, Biscuolm, Casura) n'èn betg pli abitads. 1315 *de valle Mederis*, tudestg Medels im Oberland (uffizial fin il 1943). 1850 609 abitants; 1900 536; 1950 614; 1960 835; 2000 470. Davent da Mustér è vegnida colonisada en il temp medieval tempriv la part externa da la val, en il 12avel e 13avel tschientaner la part centrala, ed en il temp medieval tardiv è vegnì avvert l'intschess dal Lucmagn era nà da la Val dal Blegn. Ils Gualsers han participà mo a l'ur a quest process, per exempel a Mutschnengia. A la fin dal 14avel tschientaner devi var 60 abitadis en la Val Medel che steva sut il domini territorial da la claustra da Mustér. Il 1355 ha la glicud da la Cadi dentant obtegnì in agen mastral ed il 1526 respectivamain il 1643 la suveranità giudiziala. Il 1744 ha la vischnanca da Medel cumprà ora las dieschmas claustrals. La baselgia da vallada a Platta (menziunada il 1338), consecrada a s. Martin, era affiliada a la plaiv da S. Gions a Mustér. Il 1454 è ella daventada autonoma, il 1500 in'atgna plaiv. Il 1642 è vegnida erigida a Curaglia la chaplania da curazia, deditgada a s. Clau. L'abazia da Mustér administrava ospizis a S. Gagl (menziunà il 1261), a S. Gions ed a S. Maria (menziunads il 1374). Il pli tard a partir dal 1366 fin viaden il 17avel tschientaner ha ella explotà argient en la Val Medel. Il vitg è vegnì collià cun la rait da vias il 1780; la nova via dal Lucmagn è vegnida avverta il 1875 e la via chantunala construi-

da en ils onns 1956–63. Dapi il 1929 viva la Val Medel da tschains d'aua considerabels (tranter auter dal lai da serra da S. Maria). Il dumber dals bains purils è sa diminui fermamain en la vischnanca tradiziunalmmain purila, entant ch'il turissem d'enviern ed il traffic sur il pass èn s'augmentads. La meglieraziun generala è succedida il 1981–2001. Scolas primaras existan a Curaglia ed a Platta, ils scolars secundars penduleschan dapi il 1973, ils scolars reals dapi il 1980 a Mustér. Il 2005 lavuravan anc 55% da las persunas cun activitad da gudogn en la Val Medel en il sectur primar. Part da la populaziun da lingua rumantscha: 2000 92,8% / 96,0% (meglra lingua / tuttas indicaziuns). Dapi il 2000 cumparan ils «Piogns», ina revista da la Val Medel. *Adolf Collenberg*

Curaglia

Lieu principal e fracziun da la vischnanca politica da Medel/Lucmagn, situà a 1332 m a la via dal Lucmagn. 1995 325 abitants. Il num Curaglia appartegna probablmain a *Curwalia*, ina furma secundara da *Churwalchen* (documentada il 1095). 1578 *Curaglien*, 1617 *Curallia*. Il 1642 è vegnida erigida a Curaglia la chaplania da curatur, deditgada a s. Clau. Curaglia era ina staziun da duana situada a l'emprima via realisada tras la chavorgia da Medel a la fin dal 18avel tschientaner. Il vitg furma il center administrativ da la vischnanca da Medel cun scola primara e chasa d'attempads per l'entira val. Il 1990 ha l'orcan Vivian destrui la giurada da Curaglia. *Adolf Collenberg*

Son Gagl (Lucmagn)

Il pli vegl ospizi da l'abazia da Mustér (11avel/12avel tschientaner), situà a 1660 m a la ruta dal Lucmagn. La chaplutta, consecrada als ss. Gagl e Martin, vegn menziunada il 1221, l'ospizi il 1261. Son Gagl è il pendant da l'ospizi a Casatscha (vischnanca da Luorscha/TT) al sid dal Pass dal Lucmagn. En il temp medieval tardiv han existi, sper Son Gagl, l'ospizi da S. Maria (pli impurtant), erigì il 1374 sin il pass, ed ina susta a S. Gions. L'ospizi da Son Gagl, reconstrui il 1688 e renovà il 1929, è oz bandunà. *Adolf Collenberg*

Pass dal Lucmagn

Passadi alpin a 1918 m che collia la Val dal Blegn (TI) cun la Val Medel, situà a 20 km da Mustér ed a 19 da Luorscha. 1136 *Loco Magno*, istoric *Cuolm da S. Maria*. Frequentà gia en il temp medieval tempriv, ha il Lucmagn gudagnà impurtanza en il temp autmedieval e medieval tardiv d'ina vart cun la politica da controlla dals pass alpines proseguida dals imperators germans ch'avevan extendì en il 12avel e 13avel tschientaner per curtas periodas lur domini sin la Val dal Blegn, da l'autra vart cun l'intensificaziun dal traffic commercial (proablmain era quel dal

muvel vers l'Italia dal Nord). En il temp medieval vegniva il Lucmagn utilisà savens da pelegrins. A partir dal 15avel tschientaner ha el pers s'impurtanza en favur dals pass dal Spleia, dal S. Bernardin e dal S. Gottard, servind mo pli al traffic local u sco ruta alternativa per la traversada da las Alps. En il temp autmedieval èn vegnids erigids ospizis cun chapluttas sin il Lucmagn: sin la spunda sid l'ospizi dals umiliads da Casatscha (menziunà gia il 1104, utilisà era sco susta) e quel da Camperio (menziunà il 1254); sin la spunda nord ils ospizis da S. Gion, da S. Gagl (1261) e da S. Maria (erigì il 1374 tras l'avat da Mustér, restaurà il 1582 ed amplifitgà il 1928).

La claustra da Mustér, che possedeava grazia a donaziuns bains fin en Lombardia, controllava la ruta sin la spunda nord dal Lucmagn; sin la spunda sid organisavan las *fagie* (unitads amministrativas e fiscalas da la val) ed ils vischinadis il traffic e procuravan per il mantegniment da la via. Taxas da transit e da transport vegnivan incassadas lung la ruta. Il 1333 han la Val dal Blegn e Com signà in accord davart la segirezza da la via dal Lucmagn; il 1376 èn la Val dal Blegn e la Cadi sa garantidas vicendaivlamain il liber transit da las martganziis. En il temp medieval tardiv ha la claustra da Mustér impegnà als vischinadis da la Val dal Blegn e da la Leventina las pastgiras e las Alps al Lucmagn ch'han anc oz ina tscherta impurtanza. En ils 1850 èn vegnids elavurads projects per la construcziun d'ina viafier sur il Lucmagn, ma la Confederaziun ha optà il 1869 per la lingia dal Gottard. Pauc pli tard, il 1872, è vegnida inaugurada da la vart grischna la nova via charrabla cun sias galarias pittorescas da Mompé-Medel; quella da la vart tessinaisa è vegnida realisada il 1874–77. Il 1878 han ins institui in servetsch da diligenzas (charrotschas da posta), ed il 1911 èn entrads in servetsch davart tessinaisa ils emprims autos postals, quai ch'ha favurisà l'arriv da turists. La via dal Lucmagn è alura vegnida amplifitgada e megljerada cun la construcziun da novs tschancuns (quel cun la galaria dal Scopì al nord e quel da Campra suenter Pian Segno al sid) en ils onns 1960–80. Per promover il turissem è il pass avvert dapi il 2001 era durant la stagione d'enviern. *Sonia Fiorini*

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



La Val Medel cun Curaglia (foto) sco lieu principal ha ina lunghezza da 16 km e collia la Surselva cun il Tessin. FOTO J. MENOLFI

«Aint in alp aisa bella vita» – mitus e realitad da l'economia alpestra

■ L'ir ad alp è ina furma d'utilisaziun da pastgiras alpinas cun ina lunga tradiiziun; si'istorgia dat perditga tant da cunfinatads sco er da midadas e rupturas en il svilup da l'agricultura. En pli dat la preschentaziun dad oz in sguard als mitus e las legends ch'han savens creà in maletg idealisand da la vita d'alp.

Economia alpestra

Furma speziala da l'utilisaziun da pastgiras en regiuns alpinas che cumpiglian, tenor la statistica dal 2005, ca. 1900 km² dal chantun Grischun (la gronda part tranter 1600 e 2800 m) e sa repartan sin 771 alps (319 pitschnas e fitg pitschnas, 298 mesaunas e 154 grondas), da las qualas 530 alps da muvel. Il temp d'alpeggiaziun munta ad 80–90 dis l'onn per muvel bovin, a 110–115 per chauras e nursas.

Il spustament da la cultivaziun dad ers e da l'allevament da muvel mandel a l'allevament da muvel gross en il temp medicival tardiv ha gi per consequenza la transformaziun dad ers en prada e l'avertura da pastgiras d'alp autalpinas. Tras l'utilisaziun da las alps ha quest areal pudì vegnir utilisà (per gronda part) a moda extensiva, permettend in augment dal dumber da muvel gross per ca. in quart ed in levgiament per ils purs durant il temp da la racolta da stad.

Las furmas da possess e da manaschi en l'economia alpestra divergiavan. Il model ideal postulescha in svilup da l'economia d'alp pratigada da singulas famiglias a l'integraziun da quellas en corporaziuns pli grondas, parallel cun l'augment da la concentraziun dals abitadis. Savens vegnivan las pastgiras d'alp emprastadas da signurs feudals (massers) ad associaziuns da bains u a vischnancas ch'èn alura daventadas corporaziuns autonomas. Daspera existivan alps da vischnancas, surtut en il Grischun ed il Glaruna. Las alps en possess communal vegnivan savens era administradas a moda corporativa. En il territori alpin central predominava generalmain la chascharia corporativa, en l'intschess nordalpin percenter quella individuala. Cunquai che las pastgiras d'alp eran situadas, dal punct da vista dals centers dals abitadis, en ina zona periferica u cunfinanta, è naschì cun l'augment da l'intensitad da l'utilisaziun il squitsch da concorrenza. Perquai eran cuntraversas per pastgiras d'alp adina era conflicts per l'utilisaziun da quellas, oravant tut per cunfins da pastgiras, per dretgs da pasculaziun limitads en territoris esters, per dretgs da tagliar laina e per dretgs da pasadi. Il privel d'ina surexploitaziun existiva era a l'intern da las singulas corporaziuns d'alp, ed ils conflicts per dretgs da cultivaziun alpestra eran savens d'impurtanza per la politica territoriala, per exempel en il cas da la separaziun da l'antierur vischinadi da Morissen-Surcuolm (17avel–19avel tschientaner). La produziun da chaschiel magher, da tschigrun e da paintg (pli bler pussaivel) sin las alps dal Grischun ha predominà dal 16avel tschientaner fin viaden



Malgrà la modernisaziun ha l'economia alpestra mantegnì tscherts tratgs arcaics.

FOTO K. W. MÜLLER/PIXELIO

il 20avel tschientaner. Sin 100 kg chaschiel resultavan avant il 1850 62–72 kg paintg e 33–46 kg tschigrun; 1943 40 / 13; 1983 15–25 / 0). Ca. 60% dal chaschiel produci dapi il 1970 è chaschiel trais quarts grass, 40% chaschiel grass. Il pli tard en il 17avel tschientaner han ins cumenzà a duvrar quagl enstagl da latg sgromà per producir chaschiel. La produziun durant l'enviern era ed è (causa la durada pli gronda) pli intensiva che quella da stad.

Gronds elevaturs da muvel pudevan sa distgargiar cun emprastar parts da lur muvel per la stadagiada a manaschi pitschens. Tar las vischnancas e corporaziuns alpestras n'eran talas praticas betg bainvesidas e savens schizunt scumandadas, quai vul dir ch'il muvel da purs che na faschevan betg part da la corporaziun era exclus e che massers pudevan alpeggiar mo vatgas pavladas sur enviern cun agen fain (da là deriva la noziun sursilvana envernonda).

Las pastgiras d'alp n'eran betg distribuidas regularmain en il Grischun. Valladas autalpinas cun ina purschida excessiva da pastgiras d'alp (p. ex. Sursaisa, Arosa, Avras) pudevan offrir plazzas d'alpeggiaziun che vegnivan acceptadas gugent da las vischnancas che disponivan mo da paucas pastgiras sin l'agen territori (p. ex. da la Lumnezia, Cuira, Suogl). En pli arrivavan mintg'onn grondas scossas da muvel dal sid sin las pastgiras d'alp betg explotadas al cunfin meridiunal dal Grischun. Ils fitadins bergamasc avevan pudì extender massivmain lur surfatschas da pastgiras d'alp grazia a la diminuziun demografica dal Grischun en il 18avel tschientaner; lur preschientscha è dentant vegnida limitada vers la fin dal 19avel tschientaner causa l'importaziun dad epidemias ed è svanida fin a l'Emprima Guerra mundiala. Enturn il 1800 eran affittadas 60 alps u parts dad alps a pasturs talians che alpeggiavan là, sper auter muvel, ca. 45 000 nursas, ed anc il

1873 han els alpeggià 40 000–45 000 nursas, 5000–8000 arments gross e ca. 2000 chauras en il chantun Grischun. En il 20avel tschientaner vegniva transportà il muvel pli e pli savens cun la viafier u cun camiunas da la Svizra Nordorientala e vischinanza da las alps grischunas. Il 1944 eran quai 9372 arments, 7318 nursas e 762 chauras, il 2005 11 668 arments, 10 668 nursas e 588 chauras.

Il persunal da las alps dal Grischun dal Sid e dal Grischun Central derivava fin ca. l'onn 1960 prevalentmain da l'exteriur vischin, entant ch'il Grischun dal Nord recrutava oravant tut persunal indigen, savens da la Surselva. La statistica dals signuns mussa per il 2005 ina maioritad da derivanza estra (bunamain tuts da la Germania e dal Tirol dal Sid) e, tranter ils Svizzers, intgins paucs Grischuns. A la fin dal 19avel tschientaner ha l'economia d'alp cumenzà a sa modernisar plaunsieu. La furma d'alpeggiaziun maschadada fitg dera sada ha fatg plazza tendenzialmain ad ina chargiada d'alp separada tenor vegliadetgna e spezia d'animal. Singuls manaschi d'alp manavan il latg directmain en la val. Las vias d'alp eran dentant raras, uschia che 90% dal latg vegniva elavurà anc en ils onns 1950 en la tegia d'alp. En consequenza d'ina diminuziun da las vatgas alpegiantas occupan actualmain pli e pli muvel sitg u nursas las anteriuras alps da vatgas. En il decurs dal 20avel tschientaner è l'utilisaziun da las pastgiras d'alp regredida fermmain, cun quai ch'il dumber da nursas e chauras è sa diminui e ch'ils purs da l'Italia dal Nord n'han betg pli tramess lur muntaneras da nursas sin las alps grischunas. L'allevament da chauras da chasa serviva al manaschi puril en la val per la produziun da latg durant la stad ed è perquai stà fin viaden ils onns 1950 pli impurtant che l'alpeggiaziun da chauras.

A partir da la segunda mesadad dal 19avel tschientaner han gi lieu – a l'exempel da l'economia da latg – numerusas fusiuns impurtantas per l'agricultura da muntogna: il 1863 è vegnida fundada l'Associaziun svizra d'economia alpestra cun l'intent da promover l'economia d'alp tutgada d'ina greva crisa agrara, ed il 1864 è vegni creà l'emprim cataster da las alps. Dapi il conclus federal davart la promozion da l'agricultura tras la Confederaziun (1881) è quella s'engaschada pli e pli ferm per l'agricultura en las Alps cun promover la vendita da muvel, accordar contribuziuns d'alpeggiaziun, subvenziunar meglieraziuns u conceder pajaments directs. Il Grischun è – sunter Berna – il pli grond retschavider da contribuziuns federalas per l'economia alpestra: tranter il 1980 ed il 2001 ha el survegnì tranter auter 36 miu. francs per 300 edificis d'alp, ed actualmain è reservads ca. 15,5 miu. francs l'onn per la cultivaziun ed il mantegniment da las pastgiras alpestras e communalas dal Grischun. Il Chantun dat contribuziuns ora-

vant tut per la furmaziun dals purs e signuns (il 1898 ha la Scola d'agricultura Plantahof a Landquart offert l'emprim curs per signuns) e conceda proporziunalmain contribuziuns per meglieraziuns d'alps e per vias d'alp.

A l'entschatta dal 20avel tschientaner eran 70% da las 822 alps grischunas (da quel temp) en possess da las vischnancas, 18% appartegnevan a corporaziuns e mo 9% a privats. Il 2005 eran 5% da las 190 000 ha pastgiras d'alp en possess privat, 25% appartegnevan a corporaziuns, 70% a vischnancas e mo intginas paucas hectaras eran en ils mauns da la Confederaziun e dal Chantun. Questa repartiziun da las pastgiras d'alp è sa midada mo minimalmain fin il di dad oz. Bundant 80% dals purs mettan lur muvel u ina part da quel ad alp, en tut 130 000 arments, chavals, portgs, chauras e nursas. L'alpeggiaziun da muaglia manidla è sa diminuida massivmain en ils davos decennis, quai che promova tranter auter era la desertificaziun da pastgiras alpinas. Il 1909 è vegnida alpeggiada en il Grischun 15 200 chauras e 79 465 nursas, il 2005 mo pli 6161 chauras e 56 877 nursas. La stad 2005 è vegni chaschà sin ca. 130 alps, e var 80 alps transportavan il latg en la val; la produziun da latg importa en total constantmain ca. 10 000 t latg, 590 t chaschiel e 115 t paintg.

Adolf Collenberg

Fameglia d'alp

La fameglia d'alp ha appartegnì fin viaden il 20avel tschientaner a la classa sociala la pli bassa. Las lavurs d'alp vegnivan exequidas – cun excepziun da la chascharia singula – da fameglia engaschada e salarisada per regla da las corporaziuns d'alp en in act public e formal. Il salari consistiva antruras, ultra da la spaisa (per vatgada), per part da nativalias. Quest salari è stà ditg fitg modest. Entradas supplementaras garantivan tranter auter il chavar giansaunas, il brischar charvun e bunamauns accordads a la fameglia dals proprietaris d'alp.

La squadra da basa consista dal signun (chau d'alp e responsabel principal), dal zezen (numnà era chandan u trosser), dal gidanter dal signun en tegia, dal paster grond, dal paster pitschen e qua e là d'in portger. Cuntrari al Vallais na fan il vadler ed il sterler betg part da la fameglia da las alps da vatgas dal Grischun, ma vegnan engaschads separadmain da l'ulteriura fameglia, essend las vatgas d'ina vischnanca repartidas (a basa dal sistem da dretgs d'alpeggiaziun) sin diversas alps, ils sitgs percenter sin ina suletta alp. Il chavrer d'alp (per ordinari in mattatsch) è collià cun in'alp da vatgas che chascha latg-chaura. Il chavrer da chasa percenter viva en il vitg, nua ch'el survegn dunsena en roda (per animal). Il nurser lavura persul e qua e là cun agid dad in u plirs chauns u d'in mattatsch. Fin vers la fin dal 20avel tschientaner engaschav'ins sin las alps corporativas

grischunas mo excepziunalmain fameglia feminina (p. ex. en il Samignun). Duntas devi percenter en la chascharia singula (oravant tut tar ils Gualsers). En Surselva ed en il Partenz lavuravan enturn il 1940 mo signuns ed auter persunal indigen, en l'Engiadina dapi tschientaners mo esters, e tranter quels eran ils Sursilvans, oravant tut ils Lumnezians, ils pli apprezzads; els èn vegnids substituìs pli tard tras Tirolais (surtut en l'Engiadina Bassa ed en Val Müstair), oravant tut dal Tirol dal Sid. Ils Engiadinais preferivan la lavur e la paja da pastiziers e cafetiers a quella da fameglia d'alp. En il Grischun talian vegnivan plaidids Bergamasc e Vuclinais, en il Grischun Central signuns da la Surselva e dal Partenz, ultra da pastiglia taliana. La revoluziun structurala dal puresser, iniziada en ils onns 1950, ha transformà il sistem tradiziunal da las alps e da l'alpeggiaziun. Il 1960 è vegnida fundada l'Unìun grischuna da signuns, ed il 1966 è vegnida patentada l'emprima signuna dal Grischun (Josefine Stricker-Moser).

La fameglia d'alp e la vita da pasturs èn omnipreschents en las ditgas ed en la litteratura rumantscha, per exempel en la cantata «A mesiras» (1896) da Giacun Hasper Muoth. Il mitus dal pievel da pasturs, naschì en il 18avel tschientaner e deraš fin viaden il 20avel tschientaner, sa basa oravant tut sin il maletg dal signun idealisà. El è sa furmà tras la coincidenza da l'ideologia svizra dal stadi puril dal temp modern tempriv e l'entusiassem creschent per il mund alpin. A partir dal 19avel tschientaner, ma surtut en l'emprima mesadad dal 20avel tschientaner, chattain nus en l'iconografia politica il paster sco represchentant dal pievel svizzer. La vita simpla e dira, ma sauna ed en armonia cun la natira (muntagnarda), la ventira en il ravugl da la famiglia e la libertad dals muntagnards vegnivan resguardadas sco cuntramaletg a la vita decadenta en las citads grondas. Durant il tranterguerras è il paster daventà – en il senn da la defensiun spiertala da la patria – l'archetip dal Svizzer valurus. Adolf Collenberg

Ir a mesiras

L'ir a mesiras è in vegl usit en connex cun l'economia alpestra, durant il qual ils purs gievan ad alp a mesirar il latg (mesira d'emprova). Fin enturn il 1800 durava la mesiraziun dus dis. La saira avant las mesiras gievan ins sin l'alp a dugar (term sursilvan per equalisar il latg): quel di da dugar mulschevan ils purs sezs las vatgas, ma mintgin quellas d'in auter e senza pasar il latg. Il di suenter aveva alura lieu il mesirar per propi: ils purs mulschevan en roda u tras la sort (attestà per la Lumnezia) las vatgas, mesiravan alura il latg e nudavan la quantitad sin il fist da mesiras. Tenor la quantitad da latg da tut la stad vegniva attribui il purment (chaschiel, paintg ed evtl. tschigrun). Il 1800 ha la plipart da las alps introduci l'ir a dugar ed a mesirar che vegniva pratigà pliras giadas durant ina stagiun d'alp. Durant ils dis da mesiras eran ils purs occupads surtut cun lavurs cuminas: far dutgs, mundar la pastgira, reparar utensils ed edificis. Enturn il 1860 è l'ir a mesiras vegni remplazzà tras la pratica da pasar il latg mintga tschavera. En la litteratura rumantscha cumpara l'ir a mesiras tranter auter en «Il di dellas imsüras» da Conradin Flugi d'Aspermont (1809) ed en la cantata «A mesiras» da Giacun Hasper Muoth (1896).

Adolf Collenberg



La stgargiada d'alp è colliada cun numerusas tradiziuns e rituals.

FOTO PF/PIXELIO

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.